


**INSTITUTIONES
PHILOSOPHICÆ
AD STUDIA
THEOLOGICA
POTISSIMUM...**

François Jacquier



P. 60.



INSTITUTIONES
PHILOSOPHICÆ
AD STUDIA THEOLOGICA
POTISSIMUM ACCOMMODATÆ,

AUCTORE

FRANCISCO JACQUIER

EX MINIMORUM FAMILIA
PRIMARIARUM PER EUROPAM
ACADEMIARUM SOCIO,

IN LYCEO ROMANO, ET IN COLLEGIO
URBANO DE PROPAGANDA FIDE
PROFESSORE.


TOMUS QUINTUS

*Quo Physica Pars Secunda, sive Physica
Particularis continetur.*



VENETIIS MDCCLXII.

SIMONIS OCCHI CURIS,
Superiorum permissu, ac Privilegio.



M O N I T U M.

CUM in prima Physices parte, universam Physicæ hujus nostræ rationem atque methodum explicaverim, nihil est quod amplius adjungam. Monere duntaxat necesse est in Arithmeticæ & Geometriæ Elementa, me absente, typis edita, irrepsisse typographicos errores plurimos qui studiosis adolescentibus difficultatem afferre possent, si nullo utantur magistro. Itaque libellum hunc in præceptis & demonstrationibus cæteroqui accuratissimum, ab omnibus mendis expurgari diligenter curavi, ita ut nihil sit quod juvenes mediocri etiam ingenio præditos atque attentos retardare possit. Cæterum affirmare audeo, pro mea in his rebus peritia, demonstrationes omnes ad Euclideam severitatem, diversa licet methodo, esse compositas; & non sine magna animi voluptate expertus sum adolescentes plurimos elementa illa celeriter arripuisse tantaque evidentæ vi ut in suis demonstrationibus labefactari non possint. Tandem probe meminisse oportet quis sit harum institutionum finis, quem silius in prima Physices parte declaravi, ac proinde hic rursus minime explicandum.

In adjecto errorum typographicorum indice, erratum quoque in Physicæ generalis figura aliqua emendatur.

A P P R O B A T I O.

Reverendissimi P. M. F. Thomæ Augusti-
 ni Ricchini jussis obtemperaturus perle-
 gi incredibili animi voluptate egregium opus
 doctissimi eruditissimique viri Reverendiss. Pa-
 tris Jacquier *Institutiones Philosophicas*, quo-
 quidem in opere non modo de legibus mo-
 tus, aliisque hujus facultatis partibus mira
 perspicuitate, copiaque doctrinæ singulari agi-
 tur, sed de computo etiam ecclesiastico, de-
 que principiis Chronologiæ, aliisque, quæ ad
 eruditionem Ecclesiasticam conferre plurimum
 poterunt. Itaque dignum censeo quod in lu-
 cem edatur ut studiosæ juventuti præsertim
 Ecclesiasticæ utilitati esse possit.

*Dabam Romæ ex Monasterio S. Mariæ No-
 væ die 31. Mense Augusto an. 1761. D. ALOY-
 SIUS STAMPA Abbas Olivetanus, Promoven-
 dorum ad Episcopatum Examinator, & in Col-
 legio Urbano de Propaganda Fide Studiorum
 Præfatus.*

I N D E X.

SECTIO I. D E Fluidis.	Pag. I
CAP. I. De fluidis generatim consideratis.	ib.
ART. I. De fluidorum natura.	ib.
CONCL. Ex spherica particularum fluidarum figura illarumque minima vi attractiva satis probabiliter repetenda videtur fluidi- tatis causa.	3
ART. II. De fluidorum equilibrio.	12
CONCL. Ex mutua aque & vitri attractione repetenda videntur tuborum capillarium phenomena.	22
ART. III. De fluidorum motu.	33
ART. IV. De resistentia fluidorum.	38
APP. De quibusdam capitulis præcedentis utilita- tibus.	43
CAP. II. De fluidis elasticis.	49
ART. I. De Elasticitate.	50
ART. II. De aere illiusque proprietatibus.	55
CONCL. Aer gravis est & elasticus.	56
ART. III. De sono & auditu.	69
APP. De quibusdam capitulis præcedentis utili- tatibus.	91
SECT. II. De lumine & igne.	101
CAP. I. De lumine.	ib.
ART. I. De lucis natura & progatione.	ib.
CONCL. Lux consistit in effluviis e corpore lu- cido jugiter emanantibus, illiusque propa- gatio instantanea non est, sed succes- siva.	103
ART. II. De lucis reflexione.	115
ART.	

(V I)

ART. III. De lucis refractione.	127
CONCL. Reflexionem lucis in minimis a conta- ctu distantis fieri, refractionem vero vi attractive medii tribuendam esse, vix in dubium vocari potest.	137
ART. IV. De visione.	146
ART. V. De coloribus atque iride.	159
CONCL. Certissimis experimentis diversam ra- diorum refrangibilitatem demonstravit New- tonus; atque ex eadem doctrina pendent iridis phenomena.	160
APP. De quibusdam capitulis præcedentis utili- tatibus.	187
CAP. II. De igne.	195
ART. I. De ignis proprietatibus præcipuis.	ib.
ART. II. De calore & frigore.	205
APP. De quibusdam capitulis præcedentis utilita- tibus.	215
SECT. III. De Astronomia.	219
CAP. I. De variis corporum celestium phæno- menis & motibus.	220
ART. I. De mundi systemate quale oculis ap- paret & de sphaera celesti.	ib.
ART. II. De variis mundani systematis hypo- thesibus.	231
ART. III. De Sole & stellis fixis.	247
ART. IV. De Stellis Erraticis, sive de plane- tis & cometis.	257
CONCL. Comete non sunt corpora sublunaria aut meteora, sed circa solem certa periodo revolvuntur.	268
ART. V. De planetis secundariis & de eclipsi- bus.	281
APP. De quibusdam capitulis præcedentis utili- tatibus.	294
CAP. II. De Astronomia Physica, seu de phæ- nomenon celestium causis.	296
ART.	

(VII)

ART. I. De gravitatis celestis systemate & de planetarum orbita.	297
ART. II. De planetarum densitate & figura, præsertim de figura telluris.	305
CONCL. Quamvis certo cognita non sit accu- rata telluris figura, eam tamen versus po- los compressam esse demonstrant observa- tiones atque experimenta.	310
ART. III. De phenomenis pendentibus ex mu- tua planetarum actione, præsertim de æstu maris.	318
CONCL. Ex actione lune & solis repetenda sunt æstus marini phenomena.	324
APP. De quibusdam præcedentis capituli utilita- tibus.	338
CAP. III. De Chronologia & Kalendario.	341
ART. I. De temporis partibus ejusque mensu- ra.	342
ART. II. De illustrioribus Epochis præcipuisque periodis.	348
ART. III. De Kalendario.	354
APP. De quibusdam capituli præcedentis utili- tatibus.	368
SECT. IV. De Geographia.	374
CAP. I. De superficie terrestri præcipuisque in ea considerandis corporum speciebus.	375
ART. I. De superficie terrestri divisione, illiusque variis respectu solis affectioni- bus.	ib.
ART. II. De præcipuis corporum speciebus in telluris superficie considerandis.	387
APP. De quibusdam capituli præcedentis utili- tatibus.	403
CAP. II. De corporibus aliis in terræ gremio potissimum considerandis.	406
ART. I. De ferro & magnete illorumque vi attractiva, ubi etiam de electricitate.	407
ART.	

(V I I I)

ART. II. De subterraneis quibusdam meteoris-
que phenomenis. 422

APP. De quibusdam capitulis præcedentis utili-
tatibus. 433



PARS

P A R S S E C U N D A
P H Y S I C E S
SEU PHYSICA PARTICULARIS.

S E C T I O I.

De Fluidis.



Uplex generatim distingui debet fluidorum species; alia fluida nulum præbent elasticitatis indicium, qualis aqua vulgo creditur. Alia autem sunt eximie elastica, qualis est aer. Ad fluidorum doctrinam revocari etiam possunt quæ de lumine & igne a Physicis tractari solent. Totam hujus utilissimi argumenti amplitudinem in varia capita dividemus, distinctisque articulis explicabimus.

C A P U T I.

De fluidis generatim consideratis.

IN fluido quolibet quatuor affectiones potissimum considerari debent. 1. Fluidorum natura. 2. illorum æquilibrium. 3. Eorundem motus. 4. Tandem resistentia.

A R T I C U L U S I.

De fluidorum natura.

I. Fluidum definiri solet corpus omne: cujus partes vi cuicumque illata cedunt, & cedunt.
Tom. V. A dem

dendo facile moventur inter se. Singulas huius definitionis partes explicabimus... 1. Hac est primaria fluidorum proprietas ut partes cedant vi etiam minimæ & quæ sub sensu non cadat. Hinc patet illam fluidorum proprietatem a sensibus nostris pendere; Si enim organo tactus longe subtiliori donati essent homines, ita ut eam liceret deprehendere resistentiam quæ sensuum nostrorum potestatem fugit, jam corpora plurima non reputaremus fluida quæ tamen ut talia a nobis sentiuntur.... 2. Ad constituendum corpus fluidum, oportet minimas omnino esse illius particulas ita ut sensibus nostris sese subducant; Si enim corporis alicujus partes seorsim tangere aut videre liceat, tanquam fluidum haberi non debet corpus illud. Ita licet farina minutissimis constet particulis quæ levi digito statim moveantur; quia tamen digitis compressæ facile sentiuntur, fluida dici non debet farina. At si multo subtiliores evadant particulae, ut fit dum panis dentibus atteritur, ventriculi & intestinorum actione subigitur ac tandem in chilum sanguinemque transmutatur, jam fluidi proprietates & nomen acquirit..... 3. Ut clara habeatur fluidorum notio, corpora *humida* cum fluidis, neque etiam fluida cum *liquidis* confundi debent. Corpora humida appellantur fluida illa quæ corporibus adhærescunt & in iis quædam relinquunt madoris vestigia. Metalla liquefacta fluidorum proprietates habent; hæc tamen non sunt corpora humida. Corpora liquida dicuntur fluida illa quæ ad libellum sese componunt; hæc autem proprietas singulis fluidis non convenit; ita flamma, sumus, aer, sunt corpora fluida; hæc autem dilatationem, minime vero libellam affectant. Itaque corpora omnia
 humi-

PARS II. SECT. I. 3

humida & liquida sunt etiam fluida, sed non viceversa.

II. Licet in humanæ societatis usu primarias fluidorum proprietates nosse satis sit, nec de fluiditatis causa, quæ quidem parum omnino juvaret, valde sit curandum, quid tamen hac de re probabilius sentiendum sit in sequenti conclusione exponam.

C O N C L U S I O.

EX SPHÆRICA PARTICULARUM FLUIDARUM
FIGURA ILLARUMQUE MINIMA VI AT-
TRACTIVA SATIS PROBABILITER REPE-
TENDA VIDETUR FLUIDITATIS CAUSA.

Prob. Crassiorum fluidorum particulas exquisitis microscopiis sæpe contemplati sunt diligentissimi Physici. In mercurio, lacte, sanguine, sero, oleis figuram sphæricam constanter observarunt. Eandem figuram in fumo carbonis Muskembroekius, & in vaporibus Derhamus maxima experimentorum subtilitate deprehenderunt. Porro si fluida crassiora ex minimis consent globulis, eandem quoque figuram in subtilioribus fluidorum particulis probabiliter ostendit lex analogiæ.

Et re quidem ipsa, cum minimæ fluidorum particulæ vi cuicumque illatæ cedant & cedendo facile moveantur inter se, hæc primaria fluidorum proprietas ex sphærica particularum figura satis apte intelligitur. In memoriâ revocanda sunt quæ de minimarum particularum vi attractiva demonstravimus in Physicâ generali. Illa attractionis species componitur ex minimarum particularum densitate & contactus magnitudine, ac proinde cum minima sit in globulis eximie levigatis con-

A 2 tactus

4 INSTITUTIONES PHYSICÆ

tactus magnitudo, minima omnino est attractio ideoque & cohesio minima, atque hinc summa facilitas qua particulæ fluidæ vi cuiuscumque cedunt, & aliæ supra alias labuntur.

Ex his principiis non solum satis feliciter explicatur fluiditatis causa; sed diversi etiam intelliguntur fluiditatis gradus. Etenim cum superficies crescant vel decrescant ut quadrata diametrorum, soliditates autem ut earumdem diametrorum cubi, minores particulæ maiorem habent superficiem ratione soliditatis, ac proinde validiorem contactum admittunt. Quare major erit fluiditas, si particulæ ad figuram sphericam magis accedant; contra autem fluiditas minor, si minores fuerint globuli, & minus accurate rotundi; in hoc enim casu crescit contactus magnitudo, atque hinc oriuntur per gradus variæ fluiditatis conditiones. Cæterum hic probe meminisse oportet, quod in Physica generali sæpe monuimus, attractionis nomine a nobis intelligi effectum aliquem cuius causam, si quæ sit, sagacioribus Philosophis investigandam relinquimus. Cavendum enim maxime nobis est ne attractionis doctrina abutatur, & pertinaciores imitemur materiæ subtilis patronos, qui dum hujus materiæ usum maxime amplificant & in omnibus effectibus explicandis adhibent, eam omnino inutilem reddunt. Sed quidquid sit, jam concludere licet: probabiliter asseritur ea fluiditatis causa quam lex analogiæ ipsaque fluiditatis phænomena postulare videntur, atqui &c. Ergo.

Objic. Ex intestino minimarum partium motu potissimum repetendam esse fluiditatis rationem demonstrant experimenta. Exemplo sit corporum solidorum in fluiditatis statum transmutatio, glaciei in aquam & vicissim.

Tota

P A R S II. S E C T. I. y

Tota inter utrumque statum differentia in eo maxime posita videtur, quod in corpore duro partes minimæ fixæ consistent ideoque tactus organo resistent; contra autem minimæ fluidorum particulae perpetuo motu agitentur & ideo vi cuicumque facile cedant. Et quidem intestinum hunc motum ostendunt corporum fluidorum effectus; fluidæ particulae corporum poros penetrant, durissima corpora emolliunt & dissolvunt. Tandem nullum corpus solidum ad fluiditatis statum transire potest nisi interveniente corporis alicujus motu; ignis v. g. aeris, aquæ. His præmissis observationibus ita argumentari licet. Probabiliter asseritur illa fluiditatis ratio ex qua pendere videntur præcipua fluidorum phaenomena; atqui &c. Ergo.

Resp. N. Min. Singulas explicabimus objectionis partes. Quamvis intestinus partium motus primaria non sit fluiditatis ratio, certum tamen est fluiditatem minimarum particularum motu maxime augeri, imo aliquando creari; sed hæc eadem experimenta conjecturas nostras maxime confirmant. Si glacies igni & calori subjiatur, jam particulae igneæ aliaque plurima diversi generis corpuscula glaciei poros pervadunt, & glaciei partes a mutuo contactu dimovent; hinc minor cohesio ideoque & fluiditas. Ex iisdem principiis pendet quoque corporum solidorum fusio; & calcinatio. Etenim si metalla etiam durissima vehementiori igne fuerint vexata, igneæ particulae durissimas quoque particulas frangunt, metallique massam in modum fluidi vel pulveris dissolvunt. Et re quidem ipsa, cessante ignis actione, puriora metalla ad contactum redeunt rursusque in duram massam sese compingunt. At si minus pura

6 INSTITUTIONES PHYSICÆ

fuerint metalla & diuturniori igne torqueantur, jam particulae plurimae vi ignis sublevantur, aliae figuram mutant. Hinc particulae, licet actioni ignis subtrahantur, ad eodem non redeunt contactus, atque ita intelligitur qua de causa in pulvisculum calcemque redigantur metalla plurima. Talis autem corporum indoles qua fit ut in pulverem reduci possint, vocatur *friabilitas*. Itaque manifestum est corporum fluiditatem intestino partium motu aliquando promoveri; verum hic fluiditatem consideramus in ipso corpore fluido duntaxat & ab aliis abstrahimus quibuscumque corporibus, quae fluiditatem augere possunt. Porro fluiditas hoc modo considerata satis feliciter intelligitur ex minimarum particularum figura illarumque debiliore vi attractiva. Probe autem notari debet quod modo dictum est, aliquando nempe fluiditatem, intestino partium motu augeri; & quidem id non semper accidere manifestum est, atque ut alia plurima omittam experimenta, satis erit referre quod a diligentissimo viro Fahrenheitio primum fuit observatum & deinde ab aliis Physicis eodem successu iteratum. Si aquae fluidae massa aeri frigidissimo & tranquillo exponatur, talem aliquando acquirit frigoris gradum qui frigus glacie productum longe superat; cujus quidem gradus fidem facit accuratissimum thermometer; haec tamen aqua, si tranquilla maneat, exquisitae fluiditatis statum retinet. At si aqua in hoc statu vel minimam ab aere aut corpore circumstante agitationem experiat, statim in durissimam glaciem concrevit & ad vulgarem congelationis gradum reducitur, aliquam amittens frigoris partem, quod quidem paradoxum omnino videbitur. Haec autem pauca dicta sint fius

fius explicanda ubi de glaciei formatione sermo erit.

Quod spectat corporum fluidorum in alia corpora actionem, diximus jam corpora fluida in seipsis & seorsim ab aliis corporibus hic considerari. Re quidem vera fluidorum quorundam particulæ corporum solidorum partes alte penetrant. Ita mercurius durissimorum quoque corporum substantiam pervadit, aqua corporibus plurimis sese inserit nonnullaque dissolvit. Verum effectus illi intestinis partium motibus, saltem ex omni parte tribui non debent, sed summæ particularum mobilitati, vi attractivæ, atque etiam aliis externis viribus. Ita aqua vi aeris comprimentis in balneorum usu ad sanguinem usque introducit, adjurantibus alternis contractionibus cordis, sanguinis moleculas agit, & circulationis facilitatem conciliat. Sed hæc omnia comparari debent cum iis quæ de minimarum particularum vi attractiva in Physica generali fufe disputavimus.

Inst. I. Rotunda particularum figura in singulis fluidis constanter non observatur. Demonstrant observationes microscopice fluidorum multorum particulas implexas esse atque ramosas. Ipsæ etiam sanguinis particulæ varias atque irregulares ostendunt figuras, si exquisito microscopio subjiciantur. Et requidem ipsa hanc particularum diversitatem atque irregularitatem postulare videntur ipsa phænomena; Si fluidorum particulæ ita sint dispositæ ut sese variis implexibus conjungere atque irretire possint, jam in massam solidam coalescere poterunt, ut accidit oleis; vel in glaciem indurescere, ut contingit aquæ fluidisque plurimis. At si tales sint particulæ ut se invicem implicare atque impedire non

8 INSTITUTIONES PHYSICÆ

possint, nunquam in corpus durum reduci poterunt; tales sunt æris mercuriique particulæ. Fluiditatis causa afferri non potest hæc figura quam in omnibus fluidis non observamus, quamque diversam omnino esse postulat diversa fluidorum natura; atqui &c. Ergo

Resp. Dist. Min. Hanc figuram in omnibus fluidis non observamus, ob nimiam particularum subtilitatem, & sensibus omnino imperviam. C. Min. Secus N. Min. Quare N. Conf. Quamvis minimæ omnino sint fluidorum particulæ quæ exquisito microscopio patent, non tamen pro fluidorum elementis haberi debent. Etenim tanta est primigeniarum particularum subtilitas ut imaginandi vi non possit comprehendi, & quo usque perveniat, ignotum omnino sit. Itaque dum microscopice observationibus utuntur Physici ad demonstrandam particularum fluidarum rotunditatem, id faciunt ex lege analogiæ dumtaxat. Ita ostendunt microscopia animalium terrestrium sanguinem compositum esse ex globulis rubris fluido aqueo vel seroso pellucido innatantibus. Quilibet globulus constat ex aliis sex minoribus globulis magisque pellucidis, quorum unusquisque rursus continet sex alios minores globulos, ita ut singuli globuli saltem ex triginta sex minoribus globulis componantur. Hinc per legem analogiæ ratiocinantur Physici globulos illos ex aliis minoribus fortasse compositos esse ad prima usque fluidi elementa. Cæterum minime repugnat globulos illos ita inter se disponi ut exquisito etiam microscopio varias figuras demonstrent; illi etenim crassiores globuli & oculis conspicui flecti possunt atque comprimi, vario ordine inter se collocari & in quamlibet figuram componi. Præterea sanguinem maxime here-

PARS II. SECT. I. 9

heterogoneum esse demonstrat analysis chemica; mirum ergo non est quod pro diverso sanguinis statu, diversaque secretionē varias oculis ostendat figuras, quamvis figuram sphericam habeant minima sanguinis fluidi elementa. Præclarissima atque utilissima de sanguinearum particularum mutatione experimenta sumpsit solertissimus naturæ indagator Leevenhoekius, unum referre satis erit; observavit levissima etiam venenati animalis morfiuncula totam sanguinis massam ita corrumpi ut uno quasi oculi ictu colorem, motum, figuram mutant globuli.

Hinc etiam patet responsio ad alteram objectionis partem. Quod fluida quædam in glaciem facilius concrecant, quædam difficilius, alia vero nunquam, id repetendum videtur ex maxima particularum fluiditate & mobilitate ac proinde & ex ipsa figura. Itaque in hac quæstione diligenter distingui debet *mobilitas a motu actuali*; fluiditas esse non potest sine maxima motus facilitate, quæ quidem summa mobilitas ex ipsa particularum figura probabilissime repetenda videtur; at fluiditas non semper conjuncta est cum motu actuali; & certe si minima quæque corpuscula in aqua suspendantur, immota omnino consistunt; quæ quidem perfecta quies cum intestino partium motu conciliari non posse videtur. Tandem apud omnes Physicos certissimum est, idque in sequenti articulo demonstrabimus, æqualem esse fluidorum ex omni parte pressionem. Illa autem pressionis æqualitas cum perpetuo particularum motu componi omnino non potest.

Inst. 2. Si corporum fluiditas ex spherica particularum figura minimaque vi attractiva repeti possit, jam contraria ratione corporum

durities ex contactus magnitudine majorique vi attractiva pendere dicenda est; hæc autem hypothesis est omnino absurda. Et quidem cum durissimæ sint minimæ fluidorum particulae, ponamus durissimum aquæ globulum cujus attractio ad lineæ unius distantiam vi-geat. Deinde circa hanc particulam descriptus intelligatur circulus, cujus semidiameter sit lineæ unius, particula aquæ ab iis tantum attrahetur globulis qui intra circuli peripheriam continentur. Quia vero particulae illæ in partes contrarias agunt, sese mutuo elident attractiones oppositæ ac proinde attractionis effectus erit nullus; quare explicari nequaquam poterit minimarum particularum durities. Evidens autem est hanc eandem ratiocinationem in majoribus quoque corporibus valere; etenim interiores corporis cujuslibet particulae, ex saltem quæ non sunt superficiei valde proximæ, ab omni parte attrahuntur æqualiter, ac proinde manent in quiete relativa. Ergo nec corporum durities nec fluiditas per prædictam hypothesim explicari possunt...

Resp. N. Min. Hæc obiectio cujus vim maximam non diffitemur, conjuncta est cum implicatissima quæstione de primigeniarum particularum natura quam quidem nobis ignotam esse in Physica generali, atque hic iterum profiteamur. Quod spectat primigeniarum particularum duritiem, probabilius videtur eam esse *primitivam* a Deo primis corporum elementis inditam. Hæc autem durities sine vi ulla attrahente intelligi poterit, si dicamus prima corporum elementa a Deo creata fuisse omnino solida ita ut nullas habeant partes, quæ sint poris intervallisque distinctæ. Durissimas esse minimas aquæ particulas merito concludere videtur Muskembroekius ex doloris

PARS II. SECT. I. II

ris sensu quem aliquis experitur, si aquæ superficiem manu verberet, atque etiam ex ipsa figuræ mutatione quæ in globis plumbeis observatur, si e sclopeto in aquam explodantur. Cæterum in præsentî quæstione non agimus de primigeniarum particularum duritiæ, sed tantum de magnorum corporum fluiditate ac proinde etiam, ob contrariam rationem, de duritiæ; validissima quidem foret in magnis etiam corporibus proposita objectio, si homogeneas fingamus primigenias omnes materiæ particulas; at si particularum immensam ponamus varietatem, quod non sine maxima probabilitate affirmant plurimi Physici, jam æquales esse non possunt attractiones oppositæ, ac proinde particulæ cohærere poterunt & inde conflata corpora diversos fluiditatis & duritiæ gradus acquirere.

Inst. 3. Fluiditatis & duritiæ causa multo probabilius referenda videtur in fluidum quoddam subtilissimum rarissimumque ab aere prorsus distinctum, quod *ætheris* nomine appellari solet. Motu intestino confuse & perturbate cientur ætheris particulæ; Illud fluidum est eximie elasticum, & minimæ illius molculæ compressæ molculas alias propiores comprimunt, hæ rursus alias. Fingamus tantam esse ætheris elasticitatem, ut vim aeris elasticam fere in immensum superet, jam partes materiæ a se invicem distrahi non poterunt, nisi superetur vis ætheris quæ contactum tuetur, & quæ major est pro majori contactus amplitudine. Ergo in hac hypothesi fluiditatis & duritiæ redditur ratio sine ulla vi attrahente. . . . Resp. N. Ant. & Conf. Hanc materiæ æthereæ hypothesein jam explicavimus in Physica generali. Negari quidem non potest existere materiam quandam aere nostro

crassiori longe subtiliorem, sive materia illa sola majori subtilitate ab aere differat, sive sit naturæ longe diversissimæ. Quidquid sit, hæc hypothesis non valde repugnat nostræ conclusioni in qua vis attractivæ causam nulla ratione definimus. Affirmare tamen audeamus precarias omnino huic materiæ proprietates tribui, nullo argumento, nulla ratiocinatione confirmatas. Præterea cum materia illa sit eximie elastica, seu quod idem est, polleat vi maxima repulsiva, explicanda superest vis illa quam quidem si materiæ æthereæ inditam affirmant hujus hypotheseos patroni, non video cur minimis materiæ particulis vim attractivam tribui tam ægre ferant. Tandem qua ratione, qua alia causa explicabunt perturbatum atque celerrimum hujus materiæ motum? novis certe sese implicant aliarum causarum ambagibus. Ex hujus questionis obscuritate patet, quod jam sæpe observavimus, difficillimam & fere desperatam esse primam effectuum naturalium mechanicam causam. Et re quidem ipsa præsentem controversiam aliasque id genus facile omitterem, nisi rerum obscuritas involveret experimenta plurima scitu dignissima, quæ, data occasione, prætermittere nolumus.

ARTICULUS II.

De fluidorum equilibrio.

I. FLUIDORUM omnium qualis est aqua, hæc est lex primaria, quod nempe partes superiores graves sint in inferiores seu in eas pressionem exerçant. Apud veteres scholasticos error invaluerat: fluida in propriis elementis, ut agebant, non gravitare. Sed pressio-

tionem hanc & scholasticorum errorem demonstrant experimenta plurima quorum unum referre satis erit. Ampulla vacua & accurate clausa aquæ immergatur stateræ brachio suspensa; alteri stateræ brachio appendatur pondus donec habeatur æquilibrium; si deinde re-ferata ampulla aquæ impleatur, hæc in partem contrariam inclinabit.

Ex hac proprietate colligitur fluidorum quiescentium superficiem in sphæræ segmenta telluri concentrica disponi. Etenim cum fluidorum particulae vi cuiuscumque cedant, vi gravitatis moveri debent donec descendere amplius non possint & singulae maneant in æquilibrium. Illud autem æquilibrium obtineri non potest, nisi singulae superficiei fluidæ puncta in segmentum sphæræ telluri concentricum fuerint disposita. Et quidem in hac particularum dispositione, quælibet particula premitur perpendiculariter ad telluris superficiem, ac proinde cum non magis tendat ad unam partem quam ad aliam, totam fluidi massam quiescere necessum est. Cæterum hic ponimus tellurem sphericam, & gravitatem ad centrum tendere. Porro cum exigua ingentis superficiei sphæricæ portio tanquam superficies plana considerari possit, si magni non fuerint fluidorum quiescentium tractus, illorum superficies tanquam plana haberi poterit; atque hinc pendet tota ars *libellandi*.

II. Si fluidum homogeneous infundatur tubo ex duobus cruribus cylindricis æqualibus & verticalibus composito, cujus crura duo communi tubo horizontali inter se jungantur; fluidum illud ad quietem pervenire non observatur, nisi eandem in utroque crure obtineat altitudinem. Hinc evidens est fluidum in tubo horizontali contentum a columnis fluidi

di

14 INSTITUTIONES PHYSICÆ

di verticalibus in partes contrarias premi. Si crurum unum verticale atque etiam tubi horizontalis pars aliqua refecentur, demonstrat experientia ad sustinendum fluidum eandem omnino vim requiri quæ necessaria foret ad sustinendum tubum cylindricum alteri cruri verticali æqualem & ad eandem altitudinem aquæ repletum. Generatim succedit experimentum, quæcumque sit tubi crura duo junctis inclinatio; atque hinc facile colligitur æqualem esse fluidorum undequaque pressionem. Hæc autem proprietas cui innititur tota fluidorum doctrina, rursus confirmatur, eamque obtinere ostenditur non solum in fluidis quorum partes vi constante & secundum directionem datam sollicitentur, sed etiam si viribus quibuscumque urgeantur. Etenim fluidum includatur in vase cujuscumque figuræ & embolo aliquo prematur; si vas illud in qualibet parte fuerit foramine pertusum, ad impediendum fluidi effluxum foramini adhibenda est pressio vi prementi omnino æqualis. Ex hoc experimento manifestum est fluidorum particulas suam pressionem quaquaversum exercere, tum sursum deorsum, tum deorsum sursum atque etiam ad latera secundum quamlibet directionem, & quæcumque sit vis fluidi particulas sollicitans. Et re quidem ipsa, hæc pressionis æqualitas ex ipsa etiam fluidorum definitione statim derivatur. Ponamus fluidum aliquod in vase quiescere, & particulam aliquam ex una parte magis premi, ex altera autem minus, jam quia fluidorum partes vi cuicumque illatæ cedunt, fluidi particulae moverentur secundum directionem vis majoris impressæ, quod est contra hypothesim: æqualis ergo est in hanc particulam pressio undequaque.

III.

III. Si corpus fluido totum immergatur , vel aliqua tantum ex parte , superficies illius inferior fluidi inferioris actione deorsum sursum premitur , superficies autem superior fluidi superioris actione urgetur , atque hinc varia intelliguntur præclarissima atque utilissima experimenta . Corpus in hoc casu duplicis columnæ fluidæ viribus urgeri ex dictis evidens est ; etenim columna superior agit in superiorem corporis immersti partem , columna autem inferior in partem corporis inferiorem . Variæ autem esse possunt corporis immersti conditiones : etenim vel minorem habet gravitatem specificam , vel majorem , vel æqualem ; singulas partes explicabimus . Et I. Si corpus sit fluido specificè levius , ad fluidi superficiem enatabit . Etenim columnarum fluidarum longitudo ab ipsa superiori fluidi parte computari debet , ac proinde longitudinum differentia æqualis est ipsi corporis crassitie , columna nempe inferior superiorem hac differentia superat . Quare corpus sursum urgeri necessum est vi columnæ fluidæ cujus pondus æquale est ponderi portionis fluidæ ejusdem cum corpore immerso voluminis ; ac proinde corpus ascendet , non tamen ascendet totum ; cum enim sit pondus fluido additum , jam vis minor foret in æquilibrio cum vi majori , quod est absurdum . Igitur tandiu corpus debet ascendere , donec pars intra fluidum demersa eam expellat fluidi quantitatem , quæ sit ejusdem ponderis cum toto corpore ; evidens enim est in hoc casu æqualem esse columnarum fluidarum pressionem . II. Si corpus immersum fluido specificè gravius fuerit , rursus hic attendi debet columnarum fluidarum differentia ; evidens est corpus sursum urgeri vi columnæ fluidæ , prorsus

16 INSTITUTIONES PHYSICÆ

sus ut in primo casu, ac proinde corpus eam amittit ponderis sui partem, quæ æqualis est ponderi fluidi ejusdem cum corpore immerso voluminis. At quia corpus immersum majorem habet gravitatem specificam, vi reliqua seu virium differentia corpus præcipitari necessum est. Contingit tamen aliquando corpuscula leviora atque etiam graviora per fatis longum tempus in eodem fluidi loco manere. Verum id facile intelligitur ex minima columnarum fluidarum differentia, quæ tantilla est ut resistantiam fluidi ex partium tenacitate oriundam superare non possit. III. Si corpus immersum ipsumque fluidum eandem habeant gravitatem specificam, corpus totum demergitur, sed in eo subsistit fluidi loco in quo constituitur. Et quidem in hoc casu corpus fluido impositum est pondus columnæ fluidæ additum; rursus ergo columnæ duæ hic fingi possunt diversæ quidem altitudinis, sed tamen homogeneæ; cum enim corpus solidum eandem habeat cum fluido gravitatem specificam, corpus illud considerari poterit tanquam æquale pondus fluidi, & ejusdem voluminis. Igitur columnæ omnes ad eandem altitudinem reduci necessum est; quod fieri nequit, nisi corpus totum demergatur. Illud vero sustineri a fluido evidens est, cum amittat ponderis sui partem æqualem ponderi fluidi ejusdem cum corpore immerso voluminis; amittit ergo totum pondus, ac proinde intra fluidum in quocumque loco quiescit.

IV. Ex hætenus demonstratis intelligitur duplicem esse corporum intra fluida gravitatem, *absolutam* scilicet & *relativam*. Gravitatis absoluta est vis tota qua corpus deorsum tendit; gravitas relativa est qua corpus magis

gis tendit deorsum quam fluidum ambiens ; apud vulgus pondera corporum nihil aliud sunt , quam veri ponderis excessus supra pondus aeris ; at pondera illa accurate distinguunt Physici .

Ex his principiis originem habuit vulgarissima apud Physicos statera , quæ *hydrostatica* appellatur . Corporis pondus ad accuratam libram in aere expendatur , iterumque in fluido aliquo ad stateram revocetur , differentia ponderum erit ipsum fluidi pondus ejusdem cum corpore immerso voluminis ; sunt autem gravitates specificæ ut pondera sub eodem volumine ; quare fluidorum & solidorum gravitates specificæ comparari inter se poterunt . Ejusdem stateræ beneficio conferre etiam licebit diversas fluidorum gravitates specificas ; si enim idem corpus diversis fluidis immersum ad examen revocetur , erunt pondera in diversis fluidis amissa ut eorundem fluidorum gravitates specificæ *respective* . Alia est faciliior machina ad explorandas fluidorum gravitates specificas . Constat globulo vitreo cujus extremitas inferior in sacculum definit , extremitas autem superior in collum longius & cavum terminatur . Sacculo infundi solet pauxillum mercurii ut machinula in situ recto fluido innatet . Notetur primum totius machinulæ , simul cum addito mercurio pondus quod dicatur , *P* , *granisque* expressum ponatur . Deinde machinula liquori immergitur ad datam aliquam altitudinem & in ea notatur prima divisio ; adjunguntur postea machinulæ ponderi grana alia per vices , & pro granis singulis iterum notatur altitudo ad quam machinula in liquore descendit . Machina ita comparata liquorum omnium gravitati investigandæ aptissima

18 INSTITUTIONES PHYSICÆ

fina est. Nam remotis omnibus granis ita ut machinula solum mercurium contineat, ipsa deinde immergatur alicui liquori & perveniat v. gr. ad quartam usque divisionem, in alio autem liquore ad sextam usque divisionem demergatur, erit gravitas specifica primi liquoris ad gravitatem specificam liquoris alterius ut numerus granorum sextæ divisioni conveniens ad numerum granorum quartæ divisioni respondentem, ut patet. Nam machinula intra liquorem demergitur, donec portio fluidi ejusdem cum machinula immersa voluminis idem habeat pondus cum tota machinula. Quare cum gravitates specificæ, eodem manente pondere, sint ut volumina inverse (ex dem. in Phys. gener.) erunt gravitates specificæ ut partium immerfarum volumina inverse, hoc est, ut immersionis altitudines inverse; sed altitudines demersionis sunt ut granorum numeri additi; ergo gravitates specificæ sunt ut iidem numeri reciproce. Quare si numeri illi in ipso instrumenti collo fuerint descripti, statim exhibebuntur diversæ gravitates specificæ.

Hic data occasione non abs re erit explicare celebratissimum problema de corona Hieronis Syracusarum Regis. Coronam aurificis fraude argento mixtam Rex suspicatus, Archimedi inveniendam proposuit latentis argenti cum auro subdole mixti portionem. Res huic ratiocinationi tota innittitur. Si nihil argenti in corona Regis lateat, sumatur purissimi auri massa ipsi coronæ pondere æqualis ac proinde etiam ejusdem voluminis. Duæ illa massæ fluendo immersæ eandem amittent ponderis sui partem; verum si aliquid argenti misceatur, jam massa auri puri & pondere æqualis minus continebit volumen; cum aurum sit corpus quod
sub

PARS II. SECT. II. 19

sub eodem volumine majorem habeat materiae quantitatem; quare massa auri minorem amittet ponderis sui partem, corona vero majorem. Ponatur coronam esse argento permixtam, sumaturque massa argenti puri cujus pondus sit coronae ponderi æquale, hæc majorem quam corona ipsa ponderis sui partem in fluido amittet. His præmissis ita solvitur problema. Sit P, pondus coronae, x pondus auri in corona contenti, y pondus argenti, p ponderis pars quam massa auri in aqua amittit, q ponderis pars quam amittit argentum, r

pondus quam corona amittit, erit $\frac{px}{p}$ ponderis pars quam massa auri x, in qua amitteret, & $\frac{qy}{p}$ erit pars ponderis, quam amit-

teret massa argenti, y, ut patet ex demonstratis; sunt enim ponderum partes amissæ, ut volumina, sive in hoc casu, ob eandem gravitatem specificam, ut pondera; sed in præsentî problemate ponderum jacturæ simul æquantur ponderi, r, quod corona amittit,

ergo $\frac{px}{p} + \frac{qy}{p} = r$. Præterea $x + y =$

P. Quare ex datis duabus æquationibus innotescunt quantitates incognitæ x, y. Cæterum in hoc problemate solvendo duæ requiruntur conditiones. I. ut mixtura ex unica tantum materia fiat; si enim duæ laterent diversorum metallorum portiones, tres forent incognitæ, & duæ tantum æquationes; quare problema foret *indeterminatum*. II. Notam esse oportet metalli speciem. Paucis indicasse satis sit notissimum problema, quo invento prope amens gaudio e balneo exiluit Archimedes clamans *reperi, reperi*. Tanta est doctrinæ vis ac sua.

suavitas aliis omnibus humanæ vitæ deliciis longe anteponenda.

V. Ad fluidorum æquilibrium pertinet quoque illorum pressio. Hic autem demonstranda est fluidorum comprimentium lex primaria; pressio scilicet quam fluida in vasorum bases exercent, quæcumque sit illorum figura, semper æqualis est ponderi columnæ fluidæ cujus basis est ipse vasis fundus, altitudo autem est distantia perpendicularis supremæ superficiei a fundo vasis. Si vas sit perpendiculare & ejusdem ubique diametri, res est evidens; basis enim toto fluidi pondere premitur, pondus autem est ut massa, hoc est, in præsentī casu ut productum ex basi in altitudinem. At si vas sit utcumque inclinatum & figuræ etiam cujuscumque, ita ut latera vel convergant vel divergant, demonstratio paulo difficilior est. Divisum intelligatur fluidum in strata fluida innumera & infinite parva ejusdem crassitie. Jam concipiatur vim gravitatis agere solummodo in strati superioris particulas, eadem vi premetur quoque stratum proxime inferius, & singulæ hujus secundi strati non secus ac primi particulæ prementur æqualiter, ob æqualem fluidorum undequaque pressionem. Jam secundi strati particula quælibet urgeatur vi propria gravitatis, singularum particularum pressio duplo major fiet. Hæc pressio duplo major urgebit quoque æqualiter singulas tertii strati particulas, & particula quælibet urgetur etiam vi propria gravitatis ac proinde tripla fit pressio. Similiter pressione quadrupla urgentur quarti strati particulæ & ita deinceps. Igitur pressio qua particula quælibet urgetur est ut stratorum fluidorum numerus, ac proinde pressio tota in fundum vasis est ut numerus particularum fundo incumbentium & numerus

PARS II. SECT. I. 21

merus stratorum *conjunctim*, hoc est, ut basis ducta in vasis altitudinem. Hinc pater fundum vasis non urgeri toto fluidi incumbentis pondere, sed aliqua solummodo ponderis parte, pondere reliquo a fluidi figura sustentato. Hæc est notissima atque utilissima fluidorum proprietas quam *paradoxum hydrostaticum* vocant; cum parva liquoris copia tantam in subiectum planum pressionem exercent, quantam exerceret ejusdem liquoris massa centies imo millies major in eadem altitudine.

VI. Ex his principiis pendet universa tuborum *communicantium* doctrina. Si tubi duo communi basi jungantur, fluidum homogeneum ad eandem altitudinem in utroque tubo subsistit. Etenim cum pressionem sint in ratione composita basium & altitudinum, habebitur æquilibrium si producta illa sint æqualia, hoc est, si altitudines fuerint æquales, ob communem basim. Verum si tubi contineant fluida diversæ densitatis, quo major erit fluidi densitas eo major erit, cæteris paribus, particularum prementium numerus, ac proinde pressio in basim exercita erit in ratione composita basis, altitudinis & densitatis, ideoque obtinebitur æquilibrium si producta ex densitate in altitudinem fuerint respective æqualia, hoc est, si altitudines sint in ratione reciproca densitatum. Itaque hac methodo comparari poterunt inter se gravitates specificæ fluidorum quæ sunt ut densitates; datis enim fluidorum altitudinibus, nota etiam erit gravitatum specificarum ratio.

Demonstratis hæcenus fluidorum legibus contraria sunt *tuborum capillarium* phænomena; tubi capillares appellantur minimi canaliculi qui capillorum tenuitatem fere imitantur. In his tubis illud est omnino singulare;

si

si nempe tubi capillaris utrinque aperti extremitas una aquæ immergatur, ad altitudinem satis magnam aqua ascendet, ibique manebit suspensa. Si autem plures tubi capillares eidem fluido immittantur, ad diversas altitudines ascendet fluidum, eritque altitudo in ratione reciproca diametri. Experimentum illud quod præcipuum est, referre nunc satis sit, cætera vero tuborum capillarium phænomena in sequenti conclusione describemus atque explicabimus.

C O N C L U S I O.

EX MUTUA AQUÆ ET VITRI ATTRACTIONE REPETENDA VIDENTUR TUBORUM CAPILLARIUM PHÆNOMENA.

Prob. Aquam a vitro suspendi & retineri quotidianis experimentis patet. Si tubo vitreo ad horizontem inclinato gutta aquea adhærescat, hæc deinde, aucto pondere, non secundum directionem perpendicularem decidit, sed juxta latus tubi ad oram infimam devolvitur. Vitrum quoque ab aqua retineri & suspendi certissimum est; si enim lamellæ vitreæ aqua perfusæ imponatur horizontaliter tubus vitreus, hic ab aqua ægre sursum distrahitur; imo tubus ille non decidit etiamsi deorsum spectet, lamina scilicet inversa. De hac mutua attractione jam multa explicavimus in Physica generali. Verum hæc attractio satis non est ut statim concludamus huic mutuæ attractioni referendum esse ascensum aquæ per tubos capillares; ostendi enim debet quomodo & quare aqua ad hanc vel illam altitudinem in datis quibusdam circumstantiis ascendat. Ut autem ex legibus attractionis di-

distincte explicentur tuborum capillarum phaenomena, mutua quoque particularum aquearum attractio illarumque pondus considerari debent. Itaque ex trium virium compositione tota quaestio pendere videtur, nempe ex mutua vitri & aquae attractione, ex particularum aquearum attractione inter se, & tandem ex ipsa particularum aquearum gravitate.

Moleculas aqueas se invicem attrahere jam demonstravimus in *Physica generali*, neque necesse est ut demonstremus eas graves esse. Jam vero attractioni resistit molecularum aquearum gravitas, quod quidem evidens est. Quare si pondus guttae majus evadat quam attractio sustinere possit, jam guttam relabi necessum est; atque hinc fit ut vapores aquei, si in guttam satis magnam coalescant, quod in fenestris observari solet, tandem defluant. Aquam ad vitrum fortius attrahi quam ad aquam ostendunt experimenta. Si tubo vitreo ad angulos rectos jungatur crus capillare, tuboque immittatur aqua, donec guttula ex cruris capillaris orificio defluat, hæc non statim decedit, sed pro majore vel minore cruris capillaris ad horizontem inclinatione vel elevatione, motu retrogrado infra tubum capillarem hærebit & guttulam ovalem formabit. Aucto pondere per novæ aquæ affluxum, guttula turgidior magisque protracta evadet; crescente pondere gutta separari incipit lapsumque minitari. Observandum autem est separationem non fieri in ipsa vitri superficie, sed in notabili distantia incipit aqua in duas partes dividi quarum superior vitro adhæret, altera autem, rupto tandem tollo intermedio, decedit. Porro si mutua aquæ cohesio vel attractio validior foret vi attractiva vitri, omnis aqua a vitro avelli deberet. Hinc fit ut vitrum aquam

om-

omnem quam attraxit nunquam dimittat, sed partem aliquam retineat, quantum potest. Eadem de causa gutta aquea in fenestrarum vitris pondere suo delapsa, semitam madidam relinquit, & ampullæ omnes aqua imbutæ, effusa etiam aqua, aliquantulum madidæ remanent. Contrarium in mercurio observatur; Si enim mercurii globulus minimus vitro adhærens augeatur ut pondus vim attractivam vitri superet, tum tota quanta est mercurii massa in unum globum coalescens decidit, nec quicquam, dummodo mercurius purus fuerit, vitro adhærescit ita ut nullum mercurii maneat vestigium. Ex his omnibus patet in explicando ascensu aquæ per tubos capillares sedulo distinguendum esse inter effectus qui a mutua actione vitri & aquæ oriuntur & inter eos qui mutua particularum aquearum attractione illarumque gravitate producuntur.

His jam observatis, ita explicari posse videtur aquæ per tubos capillares ascensus. Dum tubus capillaris superficiem aquæ admoveretur, particula fluida in ipso contactu tribus diversis viribus sollicitatur. Primo enim versus anulum infimum superficiem internam vitri impellitur vi mutue attractionis inter vitrum & aquam. Deinde huic ascensui resistit exigua fluidi attollendi massa pondere suo. Denique attractio quæ inter particulas aqueas in vase contentas, intercedit, ipsam separationem impedit atque hinc cylindrus aqueus producit. Est autem vis attractiva fortior inter aquam & vitrum quam inter ipsas aquæ particulas; aqua igitur tubi capillaris cavitatem tantillum subire debet. Eadem valet ratiocinatio, ubi jam aliqua portio aquæ tubulum ingressa in cylindrum aqueum surrexit; id nempe tamdiu valere debet quamdiu vis at-

tra-

PARS II. SECTIO I. 25

tractiva vitri oppositas vires superat. Itaque tota interna tubi capillaris superficies aquam attrahit, non quidem simul & eodem tempore, sed per gradus diversisque tempusculis. Hanc vero attractionem exercet tantum annulus ille vitreus qui singulis tempusculis superficiei aquæ contiguus est, ut patet. Neque enim pars superior tubi, cum levissima sit attractionis sphaera, quidquam agere potest. Neque etiam superficiei vitreæ pars illa cui aqua jam attracta accumbit. Superest ergo ut ascensus tribuatur annulo vitreo proxime superiori.

Ut autem singula tuborum capillarium phenomena intelligantur, probe notandum est cylindrum aqueum qui intra tubum capillarem ascendit, gravem esse, & sua gravitate ascensui resistere. Verum in cylindro aqueo duo accurate distingui debent. Cum attractio aquæ in vitrum ad minimam tantum distantiam vigeat, totus cylindrus a vitri parietibus non attrahitur, sed ea pars duntaxat quæ in ipsa attractionis sphaera continetur. Quare si annihilari fingamus totam illam aquæ partem quæ extra attractionis limites posita est, jam in tubo capillari suspensus maneret canaliculus aqueus cavus in minima & ubique æquali a vitro distantia. Itaque reliquus cylindrus in hoc canaliculo cavo contentus non retinetur vi attractiva vitri, sed mutua particularum aquearum cohesionem. Hujus autem cylindri massa ipsam canaliculi massam longe superat & vi ponderis sui cohesionem resistit. At canaliculus vi attractiva vitri cohibetur omnino & firmiter agglutinetur ita ut pondere proprio divelli & descendere nequeat; est enim canaliculi hujus crassities minima ejusque pondusculum respectu vis attractricis minimum, ita ut iste canaliculus quasi pondere omni destitutus fingi possit.

Tom. V.

B

Ex

26 INSTITUTIONES PHYSICÆ

Ex dictis autem colligi potest cylindrum aqueum in tubo capillari suspensum solo supremo canaliculi annulo sustineri; vitrum enim solum canaliculum suæ attractioni convenientem sustentat, ac proinde cylindrus a vitro immediate non suspenditur. Inter canaliculi & cylindri superficies sibi mutuo contiguas intercedit quidem attractio; sed hæc ad suspensionem cylindri nihil confert. Etenim si divisus intelligatur totus canaliculus in annulos innumeros altitudinis infinite parvæ, dividaturque totus cylindrus in totidem sectiones sive lamellas; quantum lamella una sursum vel deorsum trahitur, tantum per lamellas utrinque proximas itemque per annulos utrinque proximos impeditur; actio enim utrinque æqualis est & contraria; quare cohesiones quæ inter singulos annulos lamellasque respondentes intercedunt, sese mutuo destruunt. Itaque solus nexus lamellæ superioris destrui non potest per aliam incumbentem in quam annuli supremi attractio agere possit. Sola igitur cohesio inter annulum supremum & lamellam supremam efficax permanet atque vi mutue attractionis particularum aquearum ab ea pendent reliquæ omnes subsequentes lamellæ; ideoque totus cylindrus ope lamellæ suæ supremæ a solo supremo canaliculi annulo suspenditur. Jam vero quia vis sustinens semper est eadem, nempe vis attractiva quæ inter particulas aqueas supremi annuli & supremæ lamellæ intercedit, pondus autem sublevandum continuo crescit, hinc sequitur suspensionem nonnisi ad determinatam aliquam altitudinem locum habere, quam ubi aqua ascendens attigit jam æquilibrium fieri necessum est; quiescit igitur aqua & ascensus cessat.

Ex dictis autem facile determinari posset altitudo ad quam fluidum ascendit, si nota es-

let

fet attractionum lex; vis qua fluidi particulæ sese mutuo attrahunt dicatur q , diameter tubi sit d , & altitudo c . Jam quia fluidum per vices attollitur vi annulorum trahentium qui sunt ut columnarum fluidarum peripheriæ sive ut diametri, erit vis qua fluidum sursum trahitur ut diameter annuli & attractionum fluidi ad vitrum atque fluidarum particularum inter se differentia conjunctim; illa enim mutua particularum fluidarum attractio contraria est attractioni fluidi ad vitrum; erit ergo vis tota ut $d(p - q)$, cui, facto æquilibrio, æquale esse debet pondus columnæ fluidæ cd .

$$\text{Quare } cd = d(p - q) \text{ \& } c = \frac{p - q}{d}.$$

Quia vero differentia virium $p - q$, constans est, eodem manente fluido, patet altitudines esse in ratione reciproca diametrorum, ut demonstrant experimenta. Probe autem notandum est cylindri fluidi diametrum pro ipsa tubi diametro a nobis usurpari; quod facere licet, ob exiguam & fere infinitesimam attractionis sphaeram. Plurima alia tuborum capillarium phænomena in hujus conclusionis progressu explicabimus atque explicationis veritatem magis ac magis confirmabimus. Interim concludere licet: Non plures admittendæ sunt causæ quam quæ & veræ sunt & phænomenis explicandis sufficiunt; atqui in præsentī explicatione res ita se habet; vim attractivam vitri & aquæ, mutuam particularum aquearum attractionem experimenta demonstrant; has autem vires explicandis tuborum capillarium phænomenis sufficere demonstravimus, atque in objectionibus resellendis confirmabimus. Ergo &c.

Objic. Quamvis sese mutuo attrahant fluï-

Ex dictis autem colligi potest cylindrum aqueum in tubo capillari suspensum solo supremo canaliculi annulo sustineri; vitrum enim solum canaliculum suæ attractioni convenientem sustentat, ac proinde cylindrus a vitro immediate non suspenditur. Inter canaliculi & cylindri superficies sibi mutuo contiguas intercedit quidem attractio; sed hæc ad suspensionem cylindri nihil confert. Etenim si divisus intelligatur totus canaliculus in annulos innumeros altitudinis infinite parvæ, dividaturque totus cylindrus in totidem sectiones five lamellas; quantum lamella una sursum vel deorsum trahitur, tantum per lamellas utrinque proximas itemque per annulos utrinque proximos impeditur; actio enim utrinque æqualis est & contraria; quare cohæsiones quæ inter singulos annulos lamellasque respondentes intercedunt, sese mutuo destruunt. Itaque solus nexus lamellæ superioris destrui non potest per aliam incumbentem in quam annuli supremi attractio agere possit. Sola igitur cohæsiō inter anulum supremum & lamellam supremam efficacis permanet atque vi mutue attractionis particularum aquearum ab ea pendent reliquæ omnes subsequentes lamellæ; ideoque totus cylindrus ope lamellæ suæ supremæ a solo supremo canaliculi annulo suspenditur. Jam vero quia vis sustinens semper est eadem, nempe vis attractiva quæ inter particulas aqueas supremi annuli & supremæ lamellæ intercedit, pondus autem sublevandum continuo crescit, hinc sequitur suspensionem nonnisi ad determinatam aliquam altitudinem locum habere, quam ubi aqua ascendens attigit jam æquilibrium fieri necessum est; quiescit igitur aqua & ascensus cessat.

Ex dictis autem facile determinari posset altitudo ad quam fluidum ascendit, si nota es-

set

fer attractionum lex; vis qua fluidi particulae sese mutuo attrahunt dicatur q , diameter tubi sit d , & altitudo c . Jam quia fluidum per vices attollitur vi annulorum trahentium qui sunt ut columnarum fluidarum peripheriae sive ut diametri, erit vis qua fluidum sursum trahitur ut diameter annuli & attractionum fluidi ad vitrum atque fluidarum particularum inter se differentia conjunctim; illa enim mutua particularum fluidarum attractio contraria est attractioni fluidi ad vitrum; erit ergo vis tota ut $d(p - q)$, cui, facto æquilibrio, æquale esse debet pondus columnæ fluidæ cd .

$$\text{Quare } cd = d(p - q) \text{ \& } c = \frac{p - q}{d}$$

Quia vero differentia virium $p - q$, constans est, eodem manente fluido, patet altitudines esse in ratione reciproca diametrorum, ut demonstrant experimenta. Probe autem notandum est cylindri fluidi diametrum pro ipsa tubi diametro a nobis usurpari; quod facere licet, ob exiguam & fere infinitesimam attractionis sphaeram. Plurima alia tuborum capillarum phænomena in hujus conclusionis progressu explicabimus atque explicationis veritatem magis ac magis confirmabimus. Interim concludere licet: Non plures admittendæ sunt causæ quam quæ & veræ sunt & phænomenis explicandis sufficiunt; atqui in præsentī explicatione res ita se habet; vim attractivam vitri & aquæ, mutuam particularum aquearum attractionem experimenta demonstrant; has autem vires explicandis tuborum capillarum phænomenis sufficere demonstravimus, atque in objectionibus refellendis confirmabimus. Ergo &c.

Objic. Quamvis sese mutuo attrahant flui-

dorum moleculæ eæque ad vitrum attrahantur, ignota tamen est hujus attractionis lex, atque ea de causa factum est ut variz sint Physicorum opiniones; alii nempe, ut Hæksbejus, totius concavæ superficiei annulis successive trahentibus ascensum aquæ tribuunt, quæ quidem opinio in præsentî conclusione explicata est: alii autem, ut Jurinus, suspensionem aquæ referunt in solam circumferentiam superficiei concavæ, cui superficiei contigua est proximeque adhærescit superior aquæ superficies. His positis sic argumentari licet. Attractioni referenda esse tuborum capillarium experimenta sine ullo fundamento affirmatur, si incerta omnino sit talis attractionis lex, atqui &c. Ergo . . . Resp. N. Maj: Requidem vera hujus attractionis lex cognita non est; hoc unum affirmare possumus hanc attractionem neque esse in ratione duplicata inversa distantiarum; in contactu enim longe validior est hæc attractio quam pro talis attractionis lege; neque etiam esse potest in ratione plusquam duplicata distantiarum; in contactu enim foret infinita; Superest ergo attractionem illam servare legem aliam quæ sit ut certa functio quam in Physica generali jam explicavimus. Porro certissimum est innumeras fingi posse attractionis leges quæ tuborum capillarium phænomenis satisfaciant. Quamvis autem explorata nondum sit lex illa, inde tamen minime concludi potest nullam esse; cum attractionis phænomenum generatim comperitum sit, nec repugnet lex aliqua tuborum capillarium experimentis probe satisfaciens. Jam quod spectat diversas Physicorum opiniones, duæ sunt tantummodo quæ aliquid difficultatis habere possunt, aliarum enim falsitas demonstrata est omnino. Nos quidem proba-

vimus Hauksbeii opinionem, si de ascensu fluidi sermo sit; aqua nempe ascendit attractione totius concavæ superficiei ipsius tubuli cui cylindrus aqueus successive adhæret. At falsa est opinio hauksbejana, si sermo sit de causa suspensionis aquæ in tubo capillari jam quiescentis; ostendimus enim cylindrulum aqueum in tubo capillari sustineri vi attractiva superficiei annularis internæ tubuli, mediante annulo canaliculi aquei, cui suprema cylindruli suspensæ superficies cohæret & contigua est.

Næque satis feliciter Hauksbeii opinionem refellit Jurinus hac ratiocinatione; cum nempe, inquit Jurinus, altitudo aquæ in tubis capillaribus semper sit in ratione reciproca diametri, hinc sequitur quantitatem constantem semper esse superficiem illam quæ suspensam aquam sustinet; sed columna aqueæ suspensa in quolibet tubo semper est ut diameter; quare si attractio totius superficiei internæ aquam suspenderet, inde colligeretur causis inæqualibus effectus inæquales produci, quod est absurdum. Sed tota hæc Jurini ratiocinatio facile refellitur. Nullius usus est notissimum principium; *effectus nempe causis suis proportionales esse*, nisi agatur de causa prima & unica, non vero si agatur de effectu aliquo qui oritur ex causis plurimis & seorsim æstimandis. Ita dum ascensus aquæ in diversis tubis capillaribus inter se comparantur, superficiei cujusque attractio oritur ex attractionibus singularum particularum vitri in singulas aquæ particulas. Quia autem vires singulæ quæ vim totam superficiei unius componunt, non sunt æquales inter se, ex duarum superficierum æqualitate concludi non potest attractionis æqualitas, nisi cætera sint paria. Simili ratione, etiamsi concederetur solvæ

30 INSTITUTIONES PHYSICÆ

annulum superiorem aquæ contiguum attractionis causam esse, inde concludi minime posset pondus suspensum huic diametro proportionale esse; hujus enim annuli vis tota haberi non potest, nisi virium singularum summa habeatur. Quæstionem hanc ad sublimiorem Geometriam revocavit vir doctissimus D. Clairaut in eximio opusculo de figura telluris, sed rem faciliori doctrina tractasse nobis satis sit; cæterum clarissimi viri tuborum capillarium phænomena ex vi attractiva repetunt & in solo explicandi modo differunt.

Inst. I. Vis attractiva in omni fluidorum specie sese manifestaret, quod tamen experientiæ repugnat; nam mercurius per tubum capillarem non solum non ascendit, sed infra libellam descendit; & quidem eo magis quo minor est tubi diameter. Ergo &c. . . .
Resp. N. Conf. Ex doctrina hætenus explicata intelligitur qua de causa mercurius per tubos capillares descendat. In hujus conclusionis probatione demonstravimus fluidi per tubos capillares altitudinem esse in ratione directâ differentiæ virium attractivarum fluidi ad vitrum & fluidarum particularum inter se, atque in ratione reciproca diametri, quam rationem hac formula exhibuimus, $c = \frac{p - q}{d}$. Si quantitas $p - q$, sit affir-

mativa, jam altitudo est positiva, & aqua supra libellam ascendit. Verum si fluidarum particularum attractio mutua major sit quam attractio ad vitrum, ut contingit in mercurio, hoc est, si, q , major sit quam, p , jam quantitas, c , fit negativa, ac proinde ascensus mutatur in descensum, atque descensus ille.

PARS II. SECTIO I. 31

ille erit reciproce ut diameter, quod cum experimentis probe consentit. Simili ratione, quia virium differentia $p - q$, in infinitum variari potest, hinc diversissimæ altitudines oriuntur pro fluidorum varietate atque etiam pro diversa tuborum capillarium vi attractiva. Inde etiam intelligitur quare tubo capillari ab aqua avulso, suspensa tamen aqua remaneat intra tubum, si tantisper attollatur.

Et quidem in formula $c = \frac{p - q}{d}$, eva-

nescit vis, q , manetque vis tota, p , non imminuta. Hæc autem omnia phenomena per nullum fluidum, nequidem per ætherem cartesianum explicari posse videntur. Et certe si fluidum aliquod sit ascensus causa, nulla ratione intelligitur quid ad maiorem altitudinem conferat, si tubus capillaris ab aqua extrahatur. Multo minus reddi poterit ratio cur fluida quædam graviora altius ascendant, contra autem humiliter subsistant fluida alia minus gravia. Et quidem fluidum premens, quodcumque sit, in fluidum specificè levius vim majorem exerceret. Neque est quod hic refellamus commentitiam de inæquali aeris pressione quorundam Philosophorum opinionem; hypotheseos commentum satis demonstrant experimenta quæ felicius succedunt in vacuo Boyliano quam in aere aperto.

Inst. II. Observavit diligentissimus vir Mus-Kembroekius, pro majori tuborum capillarium altitudine ad maiorem quoque altitudinem fluida sublevari. Illud vero experimentum totam attractionis doctrinam evertere videtur. Etenim attractio illa quæ ascensum per tubos capillares produceret, in minimis duntaxat distantibus agere debet. At causam

ascensus diffusam esse per totam tubi longitudinem demonstrat Muskembroekii experimentum. Quare posito experimento sic argumentantur aliqui. Ea admitti non debet præmissorum phænomenan causa quam experimenta ipsa destruunt, atqui &c. Ergo . . . Resp. C. Maj. N. Min. Muskembroekii experimentum sæpius fuit iteratum & successu caruit; summa diligentia captatae fuerunt fluidi altitudines in diversis tubis, atque ad eas nihil omnino conferre diversam tuborum altitudinem constanter observatum est. Nec tamen clarissimum Muskembroekium alicujus oscitantiae in faciendis experimentis accusare quis audeat; tales enim errores vix ulla diligentia aliquando vitari possunt; subtilissima enim experimenta illa pendent ex interna tuborum capillarium superficie, quæ eximie perpolita & ejusdem accurate diametri esse debet; quæ quidem experimentorum subtilitates periculosa omnino sunt & difficiles. Cæterum clarissimo viro fidem nos damus petimusque vicissim.

Prolixius esset singula explicare experimenta, causam generatim indicasse satis sit, ad alia enim properare nos jubent & præscripta brevitatis & major fortasse utilitas; prætermittere tamen non licet hypothesim quam Vossii aut Borelli, aut Carrei appellant; adjumentum scilicet ascensus in abolita gravitatione quæsierunt; ajunt nempe cylindrum suspensum nullam pressionem in subjectam aquam exercere, & destructa gravitate id fieri præcipitanter affirmant quod scilicet pondus cylindri in tubo levius factum sit respectu aquæ in vase, ideoque, rupto æquilibrio, aqua debet ascendere, non secus ac fieri demonstravimus, ubi fluida duo sunt diversæ gravitatis spe-

PARS II. SECTIO I. 33

specificæ . Hypothesis illa quam magno apparatu refellunt aliqui , primis Physicæ principiis repugnat . Et quidem lapis e fune pendens , numquid levior evasit ? An minor potentia requiritur ut sursum tollatur ? An igitur cylindrus aqueus omni sua gravitate vi illum sublevanti non resistit ? Quia cum vitro cohæret . Sed hæc satis dicta sint ; de hac autem celeberrima quæstione , ut alios prætermittam Scriptores plurimos , legantur opuscula quæ in Commentariis Petropolitanis tom. 8. & 9. tradidit vir doctus æque ac diligens Weibrechtius .

ARTICULUS III.

De fluidorum motu .

I. **S**I particularum fluidarum figura mutuaque dispositio Physicis compertæ essent , ad vulgares & in Physica generali demonstratas motuum leges revocari possent fluida ; problema enim semper determinatum est , si invenienda proponatur mutua corporum actio , dummodo nota sit eorundem corporum figura positioque respectiva . At in præsentī argumento dolendum est quod problema non sit geometricè determinatum , sed experientias difficiles atque etiam hypotheses requirat . Quare hic pauca tantum exponemus quæ experimentis & facili ratiocinatione innotescunt .

Si fluidum aliquod vi comprimētis fluidi moveatur , velocitas fluidi exeuntis ad datam quamlibet altitudinem ea est quam fluidum acquireret cadendo ex eadem altitudine data . Hanc velocitatum legem demonstrat experientia & facilis ratiocinatio confirmat . Et

B § enim

34 INSTITUTIONES PHYSICÆ

enim fluidum aliquod vi alterius fluidi prementis e tubo cylindrico exeat, vis comprimens est ut pondus fluidi prementis, nempe ut productum ex basi in altitudinem. Quia vero idem tubus consideratur cujus proinde eadem est basis, mutata tantum fluidi altitudine, erit pondus comprimens ut fluidi altitudo. Est autem vis comprimens ut quantitas motus dato tempore genita, hoc est, ut quantitas fluidi dato tempore exeuntis per velocitatem multiplicata; sed quo major est velocitas, eo major est fluidi quantitas dato tempore erumpens; ergo quantitas motus est ut quadratum velocitatis, ac proinde altitudo est in ratione duplicata velocitatis, & velocitates sunt in ratione subduplicata altitudinum; atque hæc est ipsa lex quam descendendo servant corpora solida.

II. Si tubi duo ejusdem diametri & ejusdem altitudinis, recti fuerint vel quomodocumque inclinati, eandem fluidi quantitatem iisdem temporibus effundent. Etenim si in tubis duobus omnia fuerint paria, res est evidens; at demonstratum est, eadem manente altitudine, tubi perpendicularis vel inclinati fundum æqualiter comprimi; eadem ergo fluidi quantitates eodem tempore exeunt; atque hinc etiam facile colligitur, manente tuborum altitudine, sed mutata diametro, fluidi quantitates esse ut bases ac proinde in ratione duplicata diametrorum. Hinc data quantitate aquæ ex tubis duobus effluentis dataque tubi alterutrius altitudine, inveniri facile potest tubi alterius altitudo. Etenim cum sit quantitas aquæ dato tempore effluens ut ipsa velocitas, ac proinde in ratione subduplicata altitudinis, statim per regulam trium invenitur tubi altitudo quæsitæ.

Si

PARS II. SECTIO I. 35

Similiter data altitudinum ratione & data quantitate aquæ ex tubo alterutro effluentis, inveniri poterit quantitas aquæ e tubo altero exeuntis. Tandem si tuborum altitudines sint inæquales & inæqualia etiam foramina, erunt quantitates aquæ eodem dato tempore in ratione composita ex duplicata diametrorum & subduplicata altitudinum. Hæc autem omnia maximæ sunt utilitatis, si certa aquæ portio, pro data ratione, per varios canales distribui debeat. Verum in his omnibus attendere oportet & variis experimentis probare canalium asperitatem; hæc enim aquarum fluentium velocitatem maxime retardat.

III. In præcedentibus demonstrationibus probe observandum est aquarum velocitatem a nobis investigari, in hypothesi tantum quod fluidum exeat vi alterius fluidi comprimentis. Evidens autem est has demonstrationes transferri non posse ad effluxum aquæ per tubum cylindricum utrinque apertum & sine fundo ullo, quod tamen in omnibus fere physicarum institutionum libris factum legitur. Et enim manifestum est in hoc casu fluidum instar massæ omnino solidæ per tubum descendere; neque enim partes quæ eadem moventur velocitate, ullam in se mutuo pressionem exercent. Si autem fluidum per foramen fundo aptatum exeat, tunc particule singulæ pressionem aliquam obliquam & e latere sustinent ab aliis contiguis fluidi columnis, at pressionem illam æqualem esse ponderi columnæ fluidæ cujus basis est ipsa foraminis amplitudo non sine difficiliore Geometriæ apparatu demonstrari potest; neque rem certo conficiunt vulgares Physici qui facilioribus utuntur principiis. Verum quia nec difficiliorem demonstrandi rationem adhibere nobis li-

36 INSTITUTIONES PHYSICÆ

cet, nec demonstratione minus accurata uti nobis placet, satis sit observare hanc fluidorum descendendum legem experientia comprobatam esse atque etiam geometricè demonstratam, si minima sit foraminis amplitudo.

IV. Si fluidum aliquod in vase, GHln, (Fig. 1.) cujuscumque figuræ defluat, & in eodem statu ubique maneat, hoc est, in nullo loco intumescat vel detumescat, diviso fluido in sectiones, cd, hk, ad Em, perpendiculares, erit cujuscumque sectionis velocitas in ratione inversa latitudinis, hoc est, velocitas in, cd, erit ad velocitatem in, hk, ut hk ad cd. Etenim ponantur spatia cd eg, egrs, hklm, lnqp, indefinite parva & æqualia; dum portio fluidi cd eg perveniet in, egrs, portio hklm, fluet in, lnqp. Quare velocitas in sectione, hk, erit ad velocitatem in sectione cd, ut af, ad im, nempe ut spatia iisdem temporibus percurfa; sed (ex hyp.) $af \times cd = hk \times im$, ac proinde $af:im = hk:cd$, quare velocitates quæ sunt ut af, im, erunt etiam ut hk, cd. Principium illud ad fluminum cursum transferri potest. Flumen in eodem statu manere vel in statu manente esse dicitur, si inter fluendum nusquam attollitur ejus superficies vel deprimitur. Quare si flumen in statu manente perseveret, velocitates erunt in ratione sectionum reciproca, sive æqualibus temporibus æquales aquæ quantitates fluent per singulas fluminis sectiones, si tamen cætera omnia fuerint paria. Etenim transire ponatur plus aquæ per sectionem cd, quam per sectionem, hk, intumescet aqua inter has sectiones nempe in cdhk; sin vero plus aquæ flueret per sectionem, hk, quam per, cd, aqua inter has sectiones decresceret

con-

contraria ratione , ac proinde flumen non in eodem statu maneret ; sed de fluminum cursu multa & quidem utilissima in appendice observabimus .

V. Si aqua fluat per tubum vel per canallem ex quo deinde ad verticalem altitudinem resilire possit , seclusis omnibus impedimentis , ad eam ex qua decidit , altitudinem perveniet , quæcumque sit tubi vel canalis inclinatio . Id autem facile colligitur ex corporum descendentium lege quam a fluidis etiam servari ostendimus . Consulere hic debent Tyrones quæ de corporum descensu in Physica generali demonstravimus . Inde etiam evidens fit fluidum data aliqua velocitate per altitudinem perpendicularem acquisita e tubo inclinato effluens per curvam parabolicam relabi , prorsus ut faciunt corpora solida .

Ex hac doctrina instrumenti cujusdam occasionem nactus est D. Pitot Academiæ Parisiensis socius . Adhibet tubum inflexum cujus pars superior verticalis est , pars autem inferior horizontalis quam aquæ fluenti immergit . Jam aqua tubum horizontalem ingressa ad certam altitudinem in tubo verticali ascendit , ad eam scilicet altitudinem ex qua fluidum cadendo acquireret quæsitam velocitatem ; atque hinc vir clarissimus annis profluentis velocitatem in diversis locis diversisque altitudinibus æstimare tentavit , sed irritò prorsus conatu . Et quidem aqua in tubum horizontalem influens in ipso crurum angulo resistantiam maximam experitur , cui resistantiæ jungenda est retardatio ex mutuo partium attritu oriunda . Ex iisdem principis velocitatem sanguinis per animalium venas & arterias fluentis æstimare jam antea conatus erat , sed infelicioři successu clariss. Halesius qui

38 INSTITUTIONES PHYSICÆ

qui in eximio opere cui titulus est: *Statica animalium*: minimum tubulum eo fere quem diximus modo comparatum, se inferuisse refert sectis animalium venis & arteriis; ut ex sanguinis exilientis altitudine velocitatem expiscaretur; sed non video quænam ex tali instrumento haberi possit utilitas; nam præter incommoda cum instrumento præcedenti communia, alia sunt plurima; nempe venæ & arteriæ sectio magis vel minus nitide terminata, magis minusve angusta, sanguinis retardatio ex animalium canalibus in aerem exilientis, aliæ sunt difficultates omnino insuperabiles. Quare pater talia experimenta nihil omnino conferre ad determinandam sanguinis velocitatem in statu suo naturali; illud autem problema a *Physicomedicis* sæpius tentatum & Geometriæ atque Algebræ magno apparatu ornatum, doctissimorum quoque Geometrarum vires longe superat nisi fictitiis hypothesebus utantur. Satiùs ergo esset talia problemata pro desperatis relinquere & alia valetudini nostræ utiliora investigare.

ARTICULUS IV.

De resistantia fluidorum.

I. **D**E hac intricatissima doctrina Algebræ etiam reconditori fere impervia, pauca tantum delibare licebit; præmissis quibusdam de fluidorum percussione principiis. Si plana duo æqualia & immota, ut DC (Fig. 2.) incurrente fluido directè percutiantur, erunt percussiones sive ictus impressi ut quadrata velocitatum. Si autem velocitates sint inæquales, superficies autem inæquales, percussiones erunt ut superficies; tandem si inæqua-

quales fuerint velocitates & superficies, erunt percussiones ut superficies, & quadrata velocitatum simul. Etenim considerentur fluidi filamenta AF, tanquam ex minimis globulis composita quorum alii post alios suo ordine moventur. Jam quilibet globulus tanquam corpus solidum potest considerari; ponatur autem in fluido AF, velocitas triplo major, globulorum numerus triplo major eodem tempore moveri debet, ac proinde quantitas motus seu ictus magnitudo erit ut productum ex massa triplo majori in velocitatem triplo majorem; sed quo major est velocitas, eo major est globulorum eodem tempore incurrentium numerus; ergo ictus impressus, cæteris paribus, est ut quadratum velocitatis. Præterea si eadem manente velocitate, inæquales fuerint superficies, quo major est superficies, eo major erit particularum eodem tempore incurrentium numerus, ac proinde ob eandem velocitatem quantitas motus erit ut particularum numerus, hoc est, ut superficies. Quare si diversa fuerit velocitas & diversa etiam superficies, erit percussio seu ictus magnitudo in ratione composita ex simplici superficialium & duplicata velocitatum.

II. Nec difficilior inveniatur percussio obliqua. Superficies duæ æquales DC, DE eidem fluido incurrenti objiciantur; una quidem, DC, directe, altera autem DE, oblique. Cum singula fluidi filamenta secundum directiones parallelas BD, AC, incurrant (ex hyp.) angulus FDE, æqualis erit angulo alterno DEG. Jam sumatur DE, vel DC, pro radio vel sinu toto, erit DG, sinus anguli DEG vel FDE: sed numerus filamentorum directe incurrentium est ad numerum filamentorum quæ incurrunt oblique, ut DC ad DG; & præ-

terea, cæteris paribus, percussio obliqua est ad percussione[m] directam ut DG ad DC, hoc est, ut sinus anguli incidentiæ ad sinum totum, ex demonstratis in Physica generali; ergo percussio directa est ad percussione[m] obliquam ut quadratum sinus totius ad quadratum sinus anguli incidentiæ. Si autem superficies fuerint etiam inæquales, erit percussio directa ad obliquam in ratione ex his tribus composita, nempe percussio directa est ad obliquam ut quadratum sinus totius & superficies simul ad quadratum sinus incidentiæ & superficiem simul. Quare etiam evidens est superficiem inæqualium percussione[m] obliquam esse in ratione duplicata sinuum incidentiæ & superficiem conjunctim.

III. His præmissis de fluidorum percussione, jam pauca explicabimus de resistentia quam corpora in fluido delata experiuntur. Si corpus aliquod in fluido moveatur, occurrentes fluidi particulas percutit & in eas transfert aliquam motus sui partem: hinc corporis velocitas retardatur atque tandem omnino extinguitur. Itaque resistentia proportionalis est quantitati motus amissæ, vel etiam, quod idem est, producto ex quantitate fluidi quæ loco movetur in velocitatem acquisitam. Quare si corpus velocitate uniformi moveatur in medio resistente, necessum est huic corpori perpetuo applicari vim aliquam quæ fluidi resistentiam indefinenter superet, alioqui motus suum tandem amitteret: Hæc autem vis eadem perpetuo manere debet; cum enim mobile temporibus æqualibus spatia æqualia percurrat, eandem temporibus æqualibus resistentiam debet experiri. Jam ponamus corpus aliquod in fluido moveri velocitate triplo majore, eodem tempore spatium triplum percurrat,

rit, quod fieri non potest nisi fluidi volumen triplo majus e loco moveat; præterea volumen illud accipit velocitatem triplo majorem; nam dum e loco movetur, percurrere debet spatium æquale huic eidem spatio quod corpus describit. Igitur dum corpus movetur velocitate tripla, massam fluidi triplo majorem velocitate tripla impellit. Quare cum resistentiæ sint ut quantitates motus in fluidum translatae, erunt eadem resistentiæ ut tripla massa per triplam velocitatem multiplicata, hoc est, generatim ut quadratum velocitatis.

IV. Si Globi duo inæquali velocitate moveantur in fluido, resistentias patientur quæ sunt ut quadrata velocitatum & quadrata diametrorum conjunctim. Nam resistentiæ sunt ut quadrata velocitatum & superficierum simul, sed superficies sunt ut quadrata diametrorum; ergo resistentiæ sunt in ratione composita ex duplicata velocitatum itidemque duplicata diametrorum. Quare si velocitates sint æquales, resistentiæ sunt ut quadrata diametrorum. Porro evidens est proportionem non valere, nisi eadem sit fluidi aut corporis directio. Cæterum ex demonstratis colligitur corpora vi gravitatis per fluidum descenduntia reduci tandem ad motum uniformem. Ponamus corpus per aerem descendere, illius velocitas primum est accelerata; sed crescente velocitate crescit quoque aeris resistentia. Porro si ex duabus quantitatibus inæqualibus, minor perpetuo crescat, altera eadem manente, perveniri tandem debet ad terminum in quo minor majori æquatur; quare cum gravitas eadem maneat, continuo crescente resistentia; evidens est motum uniformiter acceleratum reduci tandem ad uniformem, ob gravitatis & resistentiæ æquilibrium, quod demonstrat

ex

experientia. Hinc facile satisfit objectioni quam in Physica generali breviter tantum attigimus; cum nempe uniformiter acceleratus esse debeat motus ex gravitate oriundus, qui tamen elapso tempore aliquo uniformis deprehenditur, gravitatis doctrinæ primæ fronte contraria videri possent experimenta.

V. In præcedentibus demonstrationibus nonnullas adhibuimus hypotheses quæ cum ipsa fluidorum natura non satis accurate consentire videntur. Ita dum fluidi percussione in planum aliquod investigamus, fluidum a nobis ponebatur tanquam compositum ex diversis filamentis in planum incurrentibus, quorum partes singulæ erant in directum positæ; fingebamus quoque filamenta illa in planum ita impingere ut post reflexionem ab ipso plano motus mutuos minime perturbarent, quæ quidem hypotheses cum natura fluidorum minime conveniunt; sunt enim particulæ fluidorum vario ordine inter se dispositæ, secundum varias directiones in se mutuo incurrunt, sese diversissimis indirectisque ictibus mutuo percutiunt, quas quidem conditiones aliasque plurimas nobis omnino ignotas definire non licet. His difficultatibus adjungi etiam debet resistantia ex particularum fluidarum tenacitate, gravitate, mutuoque attritu. Attamen non obstantibus præsentis doctrinæ incommodis atque ambagibus, nemo sibi persuadeat eam nullius esse utilitatis; probe enim distinguere debent demonstrationes quæ certis experimentis innituntur, ab aliis propositionibus quæ ex incerta fluidorum natura colliguntur. Ita de fluidorum doctrina multa demonstravimus quæ ex præssionis æqualitate unice pendunt; ita etiam dum fluidorum percussione investigamus illorumque resistantiam, accuratissi-

tissimis experimentis notam esse ponimus fluidorum velocitatem quæ quidem in plurimis saltem casibus omnem Geometriæ & Algebræ industriam effugere videtur; sed quo magis accurata sunt experimenta, eo magis ad veritatem accedet doctrina geometrica, si, ea qua par est, diligentia tractetur.

A P P E N D I X .

*De quibusdam capitulis precedentis
utilitatibus.*

I. **D**E fluidorum natura nihil est quod in hac appendice observemus, nisi ut recordemur angustos ingenii nostri limites quorum quidem conscius esse debet quisquis veram Physicam probe excolit; plurima enim imò omnia mirari cogimur naturæ phænomena; hanc veritatem sentiunt quidem omnes rerum physicarum bene docti, quamvis eam, ut facere deberent, philosophica ingenuitate non semper profiteantur.

Fluidorum doctrina maximas in arte Nautica habet utilitates, unam ex multis seligere satis erit. Ex præcedentibus demonstrationibus patet tantam navis partem aquæ immergi, donec æqualis aquæ moles totius navis pondus adæquet. Hinc statim definiri potest justum pondus navi imponendum. Pondus totum navis ex duabus partibus componitur, nempe ex proprio navis pondere & ex justo pondere navi imponendo. Duo illa pondera efficiunt ut navis ad datam profunditatem demergatur. Itaque mensuretur capacitas hujus partis navis quæ aquæ submersa est, priusquam pondere gravetur, & calculo definiatur quantum pondus habiturum sit æquale aquæ

aquæ volumen, pondus inventum navis ponderi erit æquale. Jam navi pondus imponatur, ad majorem profunditatem navis demergitur; atque iterum pondus navis æquatur ponderi aquæ ejusdem cum parte immersa voluminis; primum pondus ab altero subtrahatur, differentia æqualis erit ponderi imponendo. Itaque data profunditate ad quam navis iusto pondere onusta intra aquas latere debet, & data etiam profunditate ad quam navis proprio pondere aquis immergitur, tota res huc revocatur ut nempe determinetur per Geometriam utriusque capacitatis differentia, & deinde inveniaturs pondus aquæ ejusdem cum hac differentia voluminis; sed quæ ad artem Nauticam spectant fusius persequi non licet; sunt enim sublimioris doctrinæ; at de fluminum cursu fusius dicemus.

II. Doctrinæ præcedentis utilitatem in fluminum cursu pluribus demonstrare superfluum est; satis est cogitare in Italia præsertim vestra fertilissimos agros fluminum exundantium impetu devastatos, innumerabilium hominum fortunas aquis everfas. Quæ cum ita sint, brevioribus, quantum potero, verbis hic colligam utilissima sane principia quæ de fluminum natura tradidit vir peritissimus Guillelmus.

Fluminum aquæ suam ut plurimum habent scaturiginem in montibus vel in loco aliquo sublimi; descendendo velocitatem acquirunt; hæc tamen velocitas deinde ob perpetuam fundi littorumque resistantiam atque etiam ob minorem descensus declivitatem retardatur. Si velocitas acquisita diversis impedimentis extinguatur omnino, ita ut horizontalis fiat fluminis cursus; jam nihil est quod fluminis eursum tueri possit præter aquarum altitudinem.

nem vel pressionem perpendicularem; verum, quod quidem primo aspectu paradoxum videri posset, hæc ultima celeritatis causa eo magis crescit, quo magis velocitas prædictis impedimentis retardatur; nam quo maiorem acquisitæ velocitatis partem aqua amittit, eo magis attollitur illius superficies.

Aqua superior & a littoribus remotior, sola declivitatis ratione etiamsi valde exigua sit, semper fluere potest; cum enim nullo obstaculo impediatur, minima declivitas ad motum satis est. At aqua inferior fundo incumbens nullum fere motum ob exiguam declivitatem maximamque resistantiam admittit; & sola aquæ superioris pressione fluit. Partium viscositas atque tenacitas id debent efficere ut nempe partes inferiores superiorum pressione moveantur, atque superiores secum trahant, quæ quidem in alveo horizontali vel parum declivi, nihil aut fere nihil moverentur. Itaque partes inferiores motum ex pressione acceptum in partes superiores aliqua ex parte transferunt. Ea de causa fit ut maxima fluminis velocitas in media a fundo distantia observari soleat; in hoc enim loco dimidia aquæ pressione fluminis cursus acceleratur, nec fundi impedimentis retardatur. An fluminis aqua vi pressionis perpendicularis decurrat, an vero acquisita per descensum velocitate, hoc experimento potest explorari; profluenti amni obijciatur aliquod obstaculum ipsi aquæ perpendiculare; si aqua versus obstaculum accumuletur & intumescat, velocitas ex alvei declivitate oritur. At si aqua sistatur tantum, velocitas pressionis tribuenda est.

Flumina suum alveum sibi cavant. Si fundus sit admodum declivis, aqua maximam acqui-

34 INSTITUTIONES PHYSICÆ

enim fluidum aliquod vi alterius fluidi prementis e tubo cylindrico exeat, vis comprimens est ut pondus fluidi prementis, nempe ut productum ex basi in altitudinem. Quia vero idem tubus consideratur cujus proinde eadem est basis, mutata tantum fluidi altitudine, erit pondus comprimens ut fluidi altitudo. Est autem vis comprimens ut quantitas motus dato tempore genita, hoc est, ut quantitas fluidi dato tempore exeuntis, per velocitatem multiplicata; sed quo major est velocitas, eo major est fluidi quantitas dato tempore erumpens; ergo quantitas motus est ut quadratum velocitatis, ac proinde altitudo est in ratione duplicata velocitatis, & velocitates sunt in ratione subduplicata altitudinum; atque hæc est ipsa lex quam descendendo servant corpora solida.

II. Si tubi duo ejusdem diametri & ejusdem altitudinis, recti fuerint vel quomodo-cumque inclinati, eandem fluidi quantitatem iisdem temporibus effundent. Etenim si in tubis duobus omnia fuerint paria, res est evidens; at demonstratum est, eadem manente altitudine, tubi perpendicularis vel inclinati fundum æqualiter comprimi; eadem ergo fluidi quantitates eodem tempore exeunt; atque hinc etiam facile colligitur, manente tuborum altitudine, sed mutata diametro, fluidi quantitates esse ut bases ac proinde in ratione duplicata diametrorum. Hinc data quantitate aquæ ex tubis duobus effluentis dataque tubi alterutrius altitudine, inveniri facile potest tubi alterius altitudo. Etenim cum sit quantitas aquæ dato tempore effluens ut ipsa velocitas, ac proinde in ratione subduplicata altitudinis, statim per regulam trium invenitur tubi altitudo quæsitæ.

Si

PARS II. SECTIO I. 35

Similiter data altitudinum ratione & data quantitate aquæ ex tubo alterutro effluentis, inveniri poterit quantitas aquæ e tubo altero exeuntis. Tandem si tuborum altitudines sint inæquales & inæqualia etiam foramina, erunt quantitates aquæ eodem dato tempore in ratione composita ex duplicata diametrorum & subduplicata altitudinum. Hæc autem omnia maximæ sunt utilitatis, si certa aquæ portio, pro data ratione, per varios canales distribui debeat. Verum in his omnibus attendere oportet & variis experimentis probare canalium asperitatem; hæc enim aquarum fluentium velocitatem maxime retardat.

III. In præcedentibus demonstrationibus probe observandum est aquarum velocitatem a nobis investigari, in hypothesi tantum quod fluidum exeat vi alterius fluidi comprimentis. Evidens autem est has demonstrationes transferri non posse ad effluxum aquæ per tubum cylindricum utrinque apertum & sine fundo ullo, quod tamen in omnibus fere physicarum institutionum libris factum legitur. Et enim manifestum est in hoc casu fluidum instar massæ omnino solidæ per tubum descendere; neque enim partes quæ eadem moventur velocitate, ullam in se mutuo pressionem exercent. Si autem fluidum per foramen fundo aptatum exeat, tunc particule singulæ pressionem aliquam obliquam & e latere sustinent ab aliis contiguis fluidi columnis, at pressionem illam æqualem esse ponderi columnæ fluidæ cujus basis est ipsa foraminis amplitudo non sine difficiliore Geometriæ apparatu demonstrari potest; neque rem certo conficiunt vulgares Physici qui faciliorebus utuntur principiis. Verum quia nec difficiliorum demonstrandi rationem adhibere nobis licet,

B 6 cet,

36 INSTITUTIONES PHYSICÆ

cet, nec demonstratione minus accurata uti nobis placet, satis sit observare hanc fluidorum descendantium legem experientia comprobata esse atque etiam geometricè demonstratam, si minima sit foraminis amplitudo.

IV. Si fluidum aliquod in vase, GHIn, (Fig. 1.) cujuscumque figuræ defluat, & in eodem statu ubique maneat, hoc est, in nullo loco intumescat vel detumescat, diviso fluido in sectiones, cd, hk, ad Em, perpendiculares, erit cujuscumque sectionis velocitas in ratione inversa latitudinis, hoc est, velocitas in, cd, erit ad velocitatem in, hk, ut hk ad cd. Etenim ponantur spatia cd eg, egrs, hkln, Inqp, indefinite parva & æqualia; dum portio fluidi cd eg perveniet in, egrs, portio hkln, fluet in, Inqp. Quare velocitas in sectione, hk, erit ad velocitatem in sectione cd, ut af, ad im, nempe ut spatia iisdem temporibus percurfa; sed (ex hyp.) $af \times cd = hk \times im$, ac proinde $af:im = hk:cd$, quare velocitates quæ sunt ut af, im, erunt etiam ut hk, cd. Principium illud ad fluminum cursum transferri potest. Flumen in eodem statu manere vel in statu manente esse dicitur, si inter fluendum nusquam attollitur ejus superficies vel deprimitur. Quare si flumen in statu manente perseveret, velocitates erunt in ratione sectionum reciproca, sive æqualibus temporibus æquales aquæ quantitates fluent per singulas fluminis sectiones, si tamen cætera omnia fuerint paria. Etenim transire ponatur plus aquæ per sectionem cd, quam per sectionem, hk, intumescet aqua inter has sectiones nempe in cdhk; sin vero plus aquæ flueret per sectionem, hk, quam per, cd, aqua inter has sectiones decresceret

con-

contraria ratione , ac proinde flumen non in eodem statu maneret ; sed de fluminum cursu multa & quidem utilissima in appendice observabimus .

V. Si aqua fluat per tubum vel per canallem ex quo deinde ad verticalem altitudinem resilire possit , seclusis omnibus impedimentis , ad eam ex qua decidit , altitudinem perveniet , quæcumque sit tubi vel canalis inclinatio . Id autem facile colligitur ex corporum descendentium lege quam a fluidis etiam servari ostendimus . Consulere hic debent Tyrones quæ de corporum descensu in Physica generali demonstravimus . Inde etiam evidens fit fluidum data aliqua velocitate per altitudinem perpendicularem acquisita e tubo inclinato effluens per curvam parabolicam relabi , prorsus ut faciunt corpora solida .

Ex hac doctrina instrumenti cujusdam occasionem nactus est D. Pitot Academiæ Parisiensis socius . Adhibet tubum inflexum cujus pars superior verticalis est , pars autem inferior horizontalis quam aquæ fluenti immergit . Jam aqua tubum horizontalem ingressa ad certam altitudinem in tubo verticali ascendit , ad eam scilicet altitudinem ex qua fluidum cadendo acquireret quæsitam velocitatem ; atque hinc vir clarissimus amnis profluentis velocitatem in diversis locis diversisque altitudinibus æstimare tentavit , sed irritò prorsus conatu . Et quidem aqua in tubum horizontalem influens in ipso crurum angulo resistantiam maximam experitur , cui resistantiæ jungenda est retardatio ex mutuo partium attritu oriunda . Ex iisdem principis velocitatem sanguinis per animalium venas & arterias fluentis æstimare jam antea conatus erat , sed infeliciori successu , clariss. Halesius qui

38 INSTITUTIONES PHYSICÆ

qui in eximio opere cui titulus est: *Statica animalium*: minimum tubulanti eo fere quem diximus modo comparatum, se inferuisse refert sectis animalium venis & arteriis; ut ex sanguinis exilientis altitudine velocitatem expiscaretur; sed non video quænam ex tali instrumento haberi possit utilitas; nam præter incommoda cum instrumento præcedenti communia, alia sunt plurima; nempe venæ & arteriæ sectio magis vel minus nitide terminata, magis minusve angusta, sanguinis retardatio ex animalium canalibus in aerem exilientis, aliæ sunt difficultates omnino insuperabiles. Quare patet talia experimenta nihil omnino conferre ad determinandam sanguinis velocitatem in statu suo naturali; illud autem problema a *Physicomedicis* sæpius tentatum & Geometriæ atque Algebræ magno apparatus ornatum, doctissimorum quoque Geometrarum vires longe superat nisi fictitiis hypothesebus utantur. Satiùs ergo esset talia problemata pro desperatis relinquere & alia valetudini nostræ utiliora investigare.

ARTICULUS IV.

De resistentia fluidorum.

I. **D**E hac intricatissima doctrina Algebræ etiam reconditori fere impervia, pauca tantum delibare licebit; præmissis quibusdam de fluidorum percussione principiis. Si plana duo æqualia & immota, ut DC (Fig. 2.) incurrente fluido directè percutiantur, erunt percussiones sive ictus impressi ut quadrata velocitatum. Si autem velocitates sint inæquales, superficies autem inæquales, percussiones erunt ut superficies; tandem si inæqua-

qua-

quales fuerint velocitates & superficies, erunt percussiones ut superficies & quadrata velocitatum simul. Etenim considerentur fluidi filamenta AF , tanquam ex minimis globulis composita quorum alii post alios suo ordine moventur. Jam quilibet globulus tanquam corpus solidum potest considerari; ponatur autem in fluido AF , velocitas triplo major, globulorum numerus triplo major eodem tempore moveri debet, ac proinde quantitas motus seu ictus magnitudo erit ut productum ex massa triplo majori in velocitatem triplo majorem; sed quo major est velocitas, eo major est globulorum eodem tempore incurrentium numerus; ergo ictus impressus, cæteris paribus, est ut quadratum velocitatis. Præterea si eadem manente velocitate, inæquales fuerint superficies, quo major est superficies, eo major erit particularum eodem tempore incurrentium numerus, ac proinde ob eandem velocitatem quantitas motus erit ut particularum numerus, hoc est, ut superficies. Quare si diversa fuerit velocitas & diversa etiam superficies, erit percussio seu ictus magnitudo in ratione composita ex simplici superficierum & duplicata velocitatum.

II. Nec difficilior invenietur percussio obliqua. Superficies duæ æquales DC , DE eidem fluido incurrenti obijciantur; una quidem, DC , directe, altera autem DE , oblique. Cum singula fluidi filamenta secundum directiones parallelas BD , AC , incurrant (ex hyp.) angulus FDE , æqualis erit angulo alterno DEG . Jam sumatur DE , vel DC , pro radio vel sinu toto, erit DG , sinus anguli DEG vel FDE : sed numerus filamentorum directe incurrentium est ad numerum filamentorum quæ incurrunt oblique, ut DC ad DG ; & præ-

terea, cæteris paribus, percussio obliqua est ad percussionem directam ut DG ad DC, hoc est, ut sinus anguli incidentiæ ad sinum totum, ex demonstratis in Physica generali; ergo percussio directa est ad percussionem obliquam ut quadratum sinus totius ad quadratum sinus anguli incidentiæ. Si autem superficies fuerint etiam inæquales, erit percussio directa ad obliquam in ratione ex his tribus composita, nempe percussio directa est ad obliquam ut quadratum sinus totius & superficies simul ad quadratum sinus incidentiæ & superficiem simul. Quare etiam evidens est superficiem inæqualium percussionem obliquam esse in ratione duplicata sinuum incidentiæ & superficiem conjunctim.

III. His præmissis de fluidorum percussione, jam pauca explicabimus de resistentia quam corpora in fluido delata experiuntur. Si corpus aliquod in fluido moveatur, occurrentes fluidi particulas percutit & in eas transfert aliquam motus sui partem: hinc corporis velocitas retardatur atque tandem omnino extinguitur. Itaque resistentia proportionalis est quantitati motus amissæ, vel etiam, quod idem est, producto ex quantitate fluidi quæ loco movetur in velocitatem acquisitam. Quare si corpus velocitate uniformi moveatur in medio resistente, necessum est huic corpori perpetuo applicari vim aliquam quæ fluidi resistentiam indefinenter superet, alioqui motum suum tandem amitteret: Hæc autem vis eadem perpetuo manere debet; cum enim mobile temporibus æqualibus spatia æqualia percurrat, eandem temporibus æqualibus resistentiam debet experiri. Jam ponamus corpus aliquod in fluido moveri velocitate triplo majori, eodem tempore spatium triplum percurrat,

rit, quod fieri non potest nisi fluidi volumen triplo majus e loco moveat; præterea volumen illud accipit velocitatem triplo majorem; nam dum e loco movetur, percurrere debet spatium æquale huic eidem spatio quod corpus deferibit. Igitur dum corpus movetur velocitate tripla, massam fluidi triplo majorem velocitate tripla impellit. Quare cum resistentiæ sint ut quantitates motus in fluidum translatae, erunt eadem resistentiæ ut tripla massa per triplam velocitatem multiplicata, hoc est, generatim ut quadratum velocitatis.

IV. Si Globi duo inæquali velocitate moveantur in fluido, resistentias patientur quæ sunt ut quadrata velocitatum & quadrata diametrorum conjunctim. Nam resistentiæ sunt ut quadrata velocitatum & superficierum simul, sed superficies sunt ut quadrata diametrorum; ergo resistentiæ sunt in ratione composita ex duplicata velocitatum itidemque duplicata diametrorum. Quare si velocitates sint æquales, resistentiæ sunt ut quadrata diametrorum. Porro evidens est proportionem non valere, nisi eadem sit fluidi aut corporis directio. Cæterum ex demonstratis colligitur corpora vi gravitatis per fluidum descendente reduci tandem ad motum uniformem. Ponamus corpus per aerem descendere, illius velocitas primum est accelerata, sed crescente velocitate crescit quoque aeris resistentia. Porro si ex duabus quantitatibus inæqualibus, minor perpetuo crescat, altera eadem manente, perveniri tandem debet ad terminum in quo minor majori æquatur; quare cum gravitas eadem maneat, continuo crescente resistentia, evidens est motum uniformiter acceleratum reduci tandem ad uniformem, ob gravitatis & resistentiæ æquilibrium, quod demonstrat

ex

experientia. . Hinc facile satisfit objectioni quam in Physica generali breviter tantum attingimus; cum nempe uniformiter acceleratus esse debeat motus ex gravitate oriundus, qui tamen elapso tempore aliquo uniformis deprehenditur, gravitatis doctrinæ prima fronte contraria videri possent experimenta.

V. In præcedentibus demonstrationibus nonnullas adhibuimus hypotheses quæ cum ipsa fluidorum natura non satis accurate consentire videntur. Ita dum fluidi percussione in planum aliquod investigamus, fluidum a nobis ponebatur tanquam compositum ex diversis filamentis in planum incurrentibus, quorum partes singulæ erant in directum positæ; fingeamus quoque filamenta illa in planum ita impingere ut post reflexionem ab ipso plano motus mutuos minime perturbarent, quæ quidem hypotheses cum natura fluidorum minime conveniunt; sunt enim particulæ fluidorum vario ordine inter se dispositæ, secundum varias directiones in se mutuo incurrunt, sese diversissimis indirectisque ictibus mutuo percutiunt; quas quidem condiciones aliasque plurimas nobis omnino ignotas definire non licet. His difficultatibus adjungi etiam debet resistantia ex particularum fluidarum tenacitate, gravitate, mutuoque attritu. Attamen non obstantibus præsentis doctrinæ incommodis atque ambagibus, nemo sibi persuadeat eam nullius esse utilitatis; probe enim distinguere debent demonstrationes quæ certis experimentis innituntur, ab aliis propositionibus quæ ex incerta fluidorum natura colliguntur. Ita de fluidorum doctrina multa demonstravimus quæ ex præssionis æqualitate unice pendunt; ita etiam dum fluidorum percussione investigamus illorumque resistantiam, accuratissi-

tissimis experimentis notam esse ponimus fluidorum velocitatem quæ quidem in plurimis saltem casibus omnem Geometriæ & Algebræ industriam effugere videtur; sed quo magis accurata sunt experimenta, eo magis ad veritatem accedet doctrina geometrica, si, ea qua par est, diligentia tractetur.

A P P E N D I X .

*De quibusdam capitulis præcedentis
utilitatibus.*

I. **D**E fluidorum natura nihil est quod in hac appendice observemus, nisi ut recordemur angustos ingenii nostri limites quorum quidem conscius esse debet quisquis veram Physicam probe excolit; plurima enim imò omnia mirari cogimur naturæ phænomena; hanc veritatem sentiunt quidem omnes rerum physicarum bene docti, quamvis eam, ut facere deberent, philosophica ingenuitate non semper profiteantur.

Fluidorum doctrina maximas in arte Nautica habet utilitates, unam ex multis seligere satis erit. Ex præcedentibus demonstrationibus patet tantam navis partem aquæ immergi, donec æqualis aquæ moles totius navis pondus adæquet. Hinc statim definiri potest justum pondus navis imponendum. Pondus totum navis ex duabus partibus componitur, nempe ex proprio navis pondere & ex justo pondere navi imponendo. Duo illa pondera efficiunt ut navis ad datam profunditatem demergatur. Itaque mensuretur capacitas hujus partis navis quæ aquæ submersa est, priusquam pondere gravetur, & calculo definiatur quantum pondus habiturum sit æquale aquæ

aquæ volumen, pondus inventum navis ponderi erit æquale. Jam navi pondus imponatur, ad majorem profunditatem navis demergitur, atque iterum pondus navis æquatur ponderi aquæ ejusdem cum parte immersa voluminis; primum pondus ab altero subtrahatur, differentia æqualis erit ponderi imponendo. Itaque data profunditate ad quam navis justo pondere onusta intra aquas latere debet, & data etiam profunditate ad quam navis proprio pondere aquis immergitur, tota res huc revocatur ut nempe determinetur per Geometriam utriusque capacitatis differentia, & deinde inveniatur pondus aquæ ejusdem cum hac differentia voluminis; sed quæ ad artem Nauticam spectant fufius persequi non licet; sunt enim sublimioris doctrinæ; at de fluminum cursu fufius dicemus.

II. Doctrinæ præcedentis utilitatem in fluminum cursu pluribus demonstrare superfluum est; satis est cogitare in Italia præsertim vestra fertilissimos agros fluminum exundantium impetu devastatos, innumerabilium hominum fortunas aquis everfas. Quæ cum ita sint, brevioribus, quantum potero, verbis hic colligam utilissima sane principia quæ de fluminum natura tradidit vir peritissimus Guillelmus.

Fluminum aquæ suam ut plurimum habent scaturiginem in montibus vel in loco aliquo sublimi; descendendo velocitatem acquirunt; hæc tamen velocitas deinde ob perpetuam fundi littorumque resistantiam atque etiam ob minorem descensus declivitatem retardatur. Si velocitas acquisita diversis impedimentis extinguatur omnino, ita ut horizontalis fiat fluminis cursus; jam nihil est quod fluminis cursum tueri possit præter aquarum altitudi-

nem

nem vel pressionem perpendicularem; verum, quod quidem primo aspectu paradoxum videri posset, hæc ultima celeritatis causa eo magis crescit quo magis velocitas prædictis impedimentis retardatur; nam quo maiorem acquisitæ velocitatis partem aqua amittit, eo magis attollitur illius superficies.

Aqua superior & a littoribus remotior, sola declivitatis ratione etiamsi valde exigua sit, semper fluere potest; cum enim nullo obstaculo impediatur, minima declivitas ad motum satis est. At aqua inferior fundo incumbens nullum fere motum ob exiguam declivitatem maximamque resistantiam admittit, & sola aquæ superioris pressione fluit. Partium viscositas atque tenacitas id debent efficere ut nempe partes inferiores superiorum pressione moveantur, atque superiores secum trahant, quæ quidem in alveo horizontali vel parum declivi, nihil aut fere nihil moverentur. Itaque partes inferiores motum ex pressione acceptum in partes superiores aliqua ex parte transferunt. Ea de causa fit ut maxima fluminis velocitas in media a fundo distantia observari soleat; in hoc enim loco dimidia aquæ pressione fluminis cursus acceleratur, nec fundi impedimentis retardatur. An fluminis aqua vi pressionis perpendicularis decurrat, an vero acquisita per descensum velocitate, hoc experimento potest explorari; profluenti amni obijciatur aliquod obstaculum ipsi aquæ perpendiculare; si aqua, versus obstaculum accumuletur & intumescat, velocitas ex alvei declivitate oritur. At si aqua sistatur tantum, velocitas pressionis tribuenda est.

Flumina suum alveum sibi cavant. Si fundus sit admodum declivis, aqua maximam acqui-

acquirat velocitatem; quare partes fundi elatiores abripere & complanare debet easque in loca humiliora transferre, atque ita fundum ad situm horizontalem redigere. Quo major erit aquæ velocitas, eo profundior alveum sibi excavabit. Ubi aqua alveum horizontalem sibi effecit, ipsa quoque motu horizontali fluere incipit, ac proinde in ipsum alvei fundum vim minorem exercet, donec tandem illius vis resistentiæ fundi æqualis fiat. Tunc autem fundus saltem per longum tempus in statu manente perseverat; illud vero tempus longius est vel brevius pro qualitate soli: nam E. G. argilla & creta diutius resistunt quam arena & limus.

Præterea aqua alvei sui littora perpetuo corrodit, idque facit eo majori vel minori vi quo magis vel minus ad directionem perpendicularem percussio accedit. Hoc perpetuo conatu alvei crepidines, quantum fieri potest, fluentis aquæ directioni redduntur parallelæ. Itaque minus tortuosus fit aquæ cursus, alveus latior evadit, ac proinde aliquid profunditatis ideoque etiam aliquid pressionis flumen amittit; id autem tandiu fieri pergit, donec inter vim aquæ littorumque resistentiam detur æquilibrium; quod quidem æquilibrium tandem fieri demonstrat experientia; cum fluminum profunditatem & latitudinem ultra certos limites crescere non observetur. Aliquando tamen contrarium succedere potest; flumina quorum aquæ sunt crassiores & limosæ, in ipso alvei fundo materias heterogeneas deponunt; ideoque minor fit alvei profunditas. Littora etiam continua talis materiæ depositione ad se invicem possunt accedere; imò fieri potest ut materiæ illæ extra profluentis amnis directionem longius excurrentes, & idcir-

circo tardiori motu agitata, tandem quiescant omnino novamque ripam constituent. Porro illi diversi effectus fere semper concurrere & pro varietate locorum diversimode inter se conjungi videntur; hinc difficillimum est de his effectibus judicium, qui tamen effectus probe cogniti esse debent, antequam aliquod tentetur opus quod in fluminis statu mutationem aliquam asserere possit; præsertim si alio deducendus sit fluminis cursus.

Flumen minus in eodem communi alveo cum flumine majore aquas miscere potest sine ullo latitudinis vel profunditatis incremento. Hujus paradoxo ratio est quod fluminis minoris accessio majoris fluminis aquas prope littora quiescentes agitet, profluentis amnis velocitatem augeat in ratione quantitatis aquæ auctæ. Ita ramus fluminis quod *Padus* dicitur prope Venetias licet auctus ramo *Ferrariensi* & alio etiam flumine quod vocatur *Patavus*, nullam tamen in suis dimensionibus mutationem ostendit. Si flumen aliquod in aliud influat vel perpendiculariter vel secundum quamlibet directionem, pristinam directionem sensim amittit & in novo alveo permixtis aquis flumen utrumque confluit. Hac autem conjuncta flumina velocius decurrunt, tum ob diminutam littorum resistentiam, tum ob majorem currentis aquæ a littoribus distantiam; aqua enim velocius atque facilius fluit ob majorem aquæ quantitatem, quæ, aucta velocitate, alveum cavare debet atque ad tantam profunditatem ut alvei crepidines ad se accedant. Hinc persape fit ut conjuncta flumina minus spatium in telluris superficie occupent quam ante. Mediam sive communem fluminum confluentium directionem invenire problema est difficillimum. Hoc unum ob-

ob-

observare satis erit communem directionem magis accedere ad directionem fluminis quod majori pollet aquarum impetu, ac proinde posita in utroque flumine virium æqualitate directio communis in medio jacebit loco. Cætera vero quæ hac de re tradidit D. Pitot in monumentis Parisiensibus anno 1738. ad severitatem geometricam non videntur omnino composita.

Ex his omnibus colligitur in fluminum exundatione duo vel maxime adhibenda esse remedia; flumen nempe, contracto alveo, facilius continetur; crescente enim in hoc casu velocitate, flumen alveum profundiorē sibi effodit. Eadem ratione præcaventur aliquando fluminum exundationes, conjunctis fluminibus, non autem divisīs, quæ quidem aquarum divisio non sine gravissimo damno aliquando facta videtur. Si autem in aliquo casu minui oporteat aquæ velocitatem, id parum feliciter præstant extructi pontes, opposita repagula aliaque id genus impedimenta; aqua enim in hæc obstacula incurrens attollitur & sua mole velocitatem aquæ intra pilas fluentis non parum auget.

Si flumen intumescit augetur illius velocitas donec tandem exundet; sed exundante flumine decrescit velocitas, eam procul dubio ob causam quod alveus augeatur magis quam pro quantitate aquæ; atque hæc videtur ratio cur exundatio versus fluminis fauces minor observetur, ob majorem in hoc loco aquarum velocitatem. Quod autem spectat aquarum velocitatem versus fluminis ostium; prætermittendum non est mediam alvei aquam aliquando depressoīrem esse quam versus fluminis littora; cum enim aqua littori proxima minori velocitate moveatur, hæc refluxu

te mari magis reprimatur. Ex hac velocitatum differentia inter mediam alvei aquam & eam quæ littori proxima est, intelligere licet cur aqua in medio fluminis sæpe intumescat maris impedimento non retardata, ob majorem aquarum in loco medio quam versus ripas velocitatem. Hæc generatim dicta sint de fluminum cursu; cæterum doctrinam geometricam turbant plurimum locorum circumstantiæ, nec multum fidendum est audacioribus viris qui locorum imperiti in periculosissimo aquarum negotio remedia proponere audent felicemque exitum polliceri.

CAPITULUM II.

De fluidis Elasticis.

IN capite præcedenti fluidorum doctrinam generatim consideravimus, seposita omnino illorum elasticitate. Recta docendi methodus postulat ut de elasticitate aliquid primum dicamus, deinde aeris proprietates expendamus, atque tandem præcipua phænomena quæ ex aeris elasticitate pendent, distincte explicemus. Itaque tres erunt hujus capituli articuli. 1. Elasticitatem generatim considerabimus. 2. Aeris nostri qui eximia elasticitate præditus est, proprietates demonstrabimus. 3. Tandem pulcherrimam atque jucundissimam soni doctrinam quæ cum aeris elasticitate conjuncta est, explicabimus.

ARTICULUS I.

De Elasticitate.

I. **V**Im elasticam variosque elasticitatis gradus jam definivimus in Physica generali; at de elasticitatis causa plures sunt Physicorum opiniones quarum aliquæ falsæ demonstrantur, nulla autem vera ostenditur. Cartesiani rem ita explicant; dum comprimitur vel tenditur corpus aliquodj elasticum & in modum arcus flectitur, a se invicem recedunt particulæ in superficie convexa & ad se invicem accedunt in superficie concava. Hinc in parte concava angustiores fiunt pori, & ex rotundis V. G. ovales fiunt. His autem positis fieri ajunt ut materia subtilis ex angustioribus poris in quibus compressa later, elabi conetur, atque hoc conatu corpus ad pristinum statum compellat.

Recentiores Cartesiani quorum agmen ducit celeberrimus Malebranchius, elasticitatis causam tribuunt minimis subtilissimæ materiæ vorticulis quibus corpora omnia plena esse fingunt. Itaque compressi vortices figuram sphæricam in ovalem mutant, crescit vis illorum centrifuga qua tandem in pristinum statum compressas corporum partes restitunt. Alii autem Physici materiæ subtili vel æthereæ primitivam elasticitatem affingunt.

Nemo non videt hypotheses illas vagas omnino esse nullamque genuinam elasticitatis notionem nobis ingerere. Et quidem si pori ex parte convexa fiant ampliores, jam materia subtilis quæ formam quamlibet induere potest, eosdem poros statim facilius occupabit, ac proinde corpus in statu compressio-

PARS II. SECT. I. 51

nis manebit. Præterea liberalius Cartesianis concedamus vi materiæ subtilis corpora compressa ad pristinum statum redire, qua ratione explicabunt reciprocos illos tremulosque motus quibus corpora elastica eunt & redeunt per aliquod tempus? Nullus alius intelligi potest fluidi Cartesiani effectus nisi ut corpus pristinae figuræ restituat. Quod spectat Malebranchii vorticulos, tale figmentum hand firmiori nititur fundamento quam magnorum vorticum hypothesis jam antea profligata. Præterea si vorticuli illi per intimas corporum omnium cellulas sint disseminati, corpora omnia debent esse elastica. Tandem si materia subtilis vel ætherea ingenitam habeat seu primitivam elasticitatem, rursus interrogari poterunt talis hypotheseos auctores quænam sit hujus elasticitatis causa, & nil quidquam se profecisse sateri cogentur.

II. Elasticitatis causam ex attractione probabilius repetunt Newtoniani. Si corpus aliquod percutiatur vel comprimatur ita ut moleculæ e locis suis dimoveantur, non tamen ultra attractionis limites excurrant, cessante vi extrinseca, mutua attractione ad pristinum statum redire debent moleculæ. Si autem Newtonianos quis interrogaverit cur attractio mutua in certis dumtaxat corporibus elasticitatem producat, id fieri reponent ob diversam molecularum naturam variumque illarum ordinem, ac proinde & variam attractionem. Hinc si corpus fuerit compositum ex moleculis heterogeneis quæ diversam habeant figuram, diversaque polleant vi attractiva, exclusis e tota corporis massa certis particulis aliisve substitutis, jam alia diversæ naturæ orietur massa. Ita si lamella calybea liquefiat, hoc est, si in datam calybis massam & inter varias il-

lius moleculas aliud molecularum systema intrudatur ex ignis aerisque particulis compositum, debiliior fiet atque etiam omnino evanescere poterit vis elastica. Quamquam hæc explicatio universalis attractionis lege innixa videatur, eam tamen nimis vagam esse & ad clare explicandos elasticitatis effectus superfluam ingenue fatemur. Id ergo studiosis adolescentibus assidue inculcandum, ut de ignotis effectuum causis dubitare discant; præcipientes enim opiniones & effectuum explanationes non satis determinatæ Physices progressum maxime retardant.

III. His de elasticitate generatim explicatis, jam de fluidis elasticis pauca adjungemus. Fluidorum elasticitatem ut explicaret Newtonus, posuit singulas fluidi elastici particulas pollere vi centrifuga qua se mutuo fugiunt aut repellunt. Sed quidquid sit, certissimum est elasticitatem, si effectus tantum consideremus, reduci posse ad actionem vis centrifugæ qua fluidi particulae sese mutuo repellunt; etiamsi talem vim centrifugam existere certum non esset. Fluidorum elasticorum pressionem dumtaxat considerabimus, illorum enim motum accurate explicare res est difficilior & ad explicandas aeris proprietates nullius fere utilitatis.

Fingatur virga elastica AB (Fig. 3.) plano immoto DN, affixa, & vi qualibet aut pondere A, comprimatur, ita ut redigatur in spatium AB, evidens est vires punctorum B, A, æquales esse, nempe puncti B, secundum BC, & puncti A, secundum directionem contrariam AA. Quare vis in B, secundum BC, æqualis est pressioni ponderis A, nempe planum in B, comprimitur non secus ac si pondus A, puncto B, incumberet. Jam removeatur

tur planum DN, substituaturque virga altera elastica BC, priori æqualis & similis atque plano immoto, dn, affixa, evidens etiam est vim puncti C, versus planum, dn, æqualem esse vi puncti, b, secundum directionem, ba, vel quod idem est vi puncti, b, secundum directionem bC, quæ quidem vis æqualis est vi puncti A secundum directionem AA; hæc autem posterior vis æqualis est pressioni ponderis A, quæ in primo casu æqualis erat vi puncti A, unica existente virga elastica; quare ex his omnibus æqualitatibus patet punctum C, comprimi vi æquali ponderi A, atque esse $Cb = ba = BA$. Igitur generatim quicumque sit numerus elastorum, si eadem vi comprimantur, pressio quam elasta exercent in planum immotum, æqualis est pressioni quam potentia comprimens in idem planum immediate exerceret, eritque spatium in quod elasta illa reducuntur, ad spatium in quod eadem potentia redigitur elastum unicum, ut est elastorum numerus ad unitatem.

Jam intelligantur elasta duo AB, BC; plano immoto DN, affixa; primum elastum comprimatur ut ante pondere A, alterum vero elastum comprimatur in B, vi altera quæ ponderi A, æquivalet, vel alteri cuilibet potentie, punctum C, premetur vi æquali ponderibus A, B, simul sumptis, elastum AB, premetur vi Bb, & elastum BC, redigitur in spatium bC. minus quam Ab. Nam vis puncti C, in planum, vel quod idem est, vis puncti b, secundum directionem ba, æqualis est actioni potentie B, prementi in b, & actioni puncti A, secundum AA; nempe potentie A. Ergo punctum b, vel C, comprimitur vi $A + B$, & punctum a, vi A. Quare generatim quicumque sit elastorum numerus,

C 3

rus,

rus, quæ elastra ponderibus vel potentiis quibuscumque premantur; elastra illa omnia in obstaculum immotum pressionem exercent quæ semper æqualis est potentiæ vel ponderum summæ. Jam ponderum & elastrorum pars quælibet destrui vel removeri fingatur, atque residui superioris ponderis loco substitutum intelligatur obstaculum immobile, evidens est eandem manere pressionem puncti C, cum elastrorum status & compressio nequaquam mutantur.

Hæc principia sane evidentissima ad fluidorum pressionem facile transferuntur. Si vas aliquod contineat fluidum elasticum cujus partes singulæ urgeantur vi quacumque acceleratrice, & vires singulæ vasis fundum comprimant, fundus vasis, cæteris paribus, eodem modo premetur ac si fluidum in eodem manens statu, vi elastica statim destituatur; atque ad vas illud sustinendum eadem necessaria erit potentia quæ ad sustinendum fluidum non elasticum requiritur, nempe requiritur potentia æqualis ponderi fluidi. Jam ponatur vas aliquod figuræ cujuscumque fluido gravi & homogeneo plenum, atque fluidum sola gravitatione partium superiorum in inferiores statim comprimatur & ad minus spatium redigatur, ex demonstratis evidens est particulas eo magis compressas esse magisque densas quo magis sunt fundo proximæ. Præterea etiam manifestum est densitatem in suprema fluidi superficie, ante & post compressionem, manere eandem; cum superficiei partes pondere dumtaxat infinite parvo comprimantur. At si compressio fluidi non solum ipsius fluidi pondere, sed vi alia qualibet etiam producat, in hoc casu ad determinandam fundi pressionem, habenda quoque est ratio hujus alterius vis; po-

sito-

sitoque vase cylindrico, pressio in fundum æqualis foret ponderi fluidi & vi alteri additæ, ut patet; quod quidem probe notandum est; hujus enim doctrinæ usus recurret in proximo articulo.

ARTICULUS II.

De aere illiusque proprietatibus.

I. **A**ER est fluidum illud telluri nostræ circumfusum, in quo vivimus & movemur. Tota hujus aeris moles *atmosphæra* dicitur. Aerem inter elementa recensebant aliqui veteres Philosophi; sed aeris nomine intelligebant fluidum homogœneum, elasticum, quod vulgaris aeris veluti basis est. Et quidem aer nostræ atmosphæræ terrestrium omnium corporum maxime heterogeneus impurusque videtur; nam quidquid e terræ gremio jugiter exspirat, quidquid e corporibus putrescentibus evolat, quidquid vaporis subtilissimi ab aquis erumpit, id totum aer in se complectitur. In aere igitur continentur vapores, exhalationes omnium generum, sales *volatiles* dicti, particulæ sulphuræ, bituminosæ, oleosæ, & aliæ innumeræ, ac proinde aer omnium corporum particulis sædatus est; sed notandum est tales particulas haud quidem æqualiter per atmosphæram esse dispersas. Si terra sit vel paludosa, vel corporibus putridis noxiisque grava, jam aer incumbens ejusdem conditionis effluvia admittet. Hinc ex ipsa terræ natura pendet aliqua ex parte aeris temperies. Præterea etiam venti regulares nonnulli varias possunt abigere vel etiam avehere aeris particulas, atque ita variis modis aerem vel repurgare vel inficere. Hæc autem breviter

observata sint, ex quibus intelligitur exiguam omnino esse aeris *elementaris* & proprie dicti portionem, si conferatur cum cæteris corpusculis magna copia per aerem dispersis. Nec minus patet per solam aeris perniciosam qualitatem explicari posse morborum quorundam contagium, sive morbi illi ex aere *immediate*, sive ex ægrotorum vicinia contrahantur. Quare fictitia omnino sunt mortifera, ut dicunt, animalcula, quæ, grassante contagio, per atmosphæram volitare comminiscuntur aliqui.

C O N C L U S I O.

AER GRAVIS EST ET ELASTICUS.

Prob. I. Pars. Ipsum aeris pondus ad examen revocarunt veteres Philosophi. Globum intus cavum ad stateram expendebant; deinde aerem in eodem globo valide comprimebant, iterumque globi pondus accurate explorabant; aliquam deprehenderunt ponderis differentiam inter aerem nostrum vulgarem & aerem densissimum. Sed experimentum illud accuratius fuit iteratum post inventam machinam cujus ope aer e vasis educitur. Machina illa quæ *pneumatica* appellatur ab Otthone de Guerik Magdeburgensi consule primum excogitata, a Boyle postea fuit perfecta, atque tandem a recentioribus Physicis ad majorem perfectionis & facilitatis gradum perducta. Quamvis tota hujus machinæ structura totumque artificium oculis facilius quam explicatione ulla usurpentur, quia tamen explicandæ aeris proprietates gravitas, & elasticitas institutis in hac machina experimentis maxime demonstrantur, præcipuas illius partes, quantum verbis fieri potest, vobis exhibere utilissimum erit.

erit. In hac machina considerari primum debet antlia metallica eximie perpolita cujus cavitatem ingreditur cylindrus quem *embolum* appellant; ille autem cylindrus internæ superficie antliæ arcte apprimitur ita ut nihil aeris in antliam irrepere possit; fundo antliæ aptata est valvula eo artificio comparata ut aeri egressum permittat, regressum vero prohibeat. E latere antliæ inferitur canaliculus metallicus cujus extremitas superior cum tabula lignea horizontali firmiter cohæret. Ille autem canaliculus hiat in campanam vitream tabulæ horizontali arcte agglutinatam. Eidem canaliculo aptata est machinula quam *epistomium* vocant, cujus opè aeri in campanam vitream transitus conceditur vel negatur.

Rebus ita comparatis, in antliam metallicam truditur embolus, quod fieri solet vi rotæ dentibus instructæ, aer compressus exitum quærit & revera, permisso transitu per valvulam, exit. Contrario rotæ motu embolus attollitur, aer e campana vitrea per canaliculum descendit & transit in antliam, demisso iterum embolo aer comprimitur atque excluditur, ac tandem repetitis emboli alternis agitationibus campana vitrea omni fere aere vacua manet.

Aeris gravitatem non sine acutissimo doloris sensu experietur qui machinæ pneumaticæ canaliculum digito occludere tentaverit; educto enim ex cavitare canaliculi aere, digitus roto atmosphæræ pondere foramini arcte apprimetur. Si campana vitrea superficiem planam aliqua ex parte habuerit, factò vacuo, in minutissima frustula dissilire fracta externi aeris pondere. Nemo vestrum non vidit rubos vitreos qui a primo auctore Torricellio dicuntur *Torricelliani*. Admubeatur rubus vitreus

ex una parte accurate clausus atque mercurio impleatur, & deinde ex altero foramine aperto in vase mercurium continente perpendiculariter invertatur, mercurius in tubo ad altitudinem 27 aut 28 pollicum circiter suspensus manebit. Hujus experimenti ratio ex præcedentibus intelligitur; etenim mercurius stagnans in vase subiecto atmosphæræ incumbentis pondere premitur, ac proinde eadem vi mercurius in tubo suspenditur. Et requidem ipsa si tubus Torricellianus cui deinde factum est *Barometri* nomen, in campana pneumatica includatur, extracto aere, descendet mercurius, restituto autem aere ascendet rursus.

Ex aeris gravitate intelligitur etiam ascensus aquæ per antlias quas *tractorias* appellant. At cum gravitas specifica mercurii sit ad gravitatem specificam aquæ ut 14 ad 1 circiter, patet cur aqua ad 32 pedes per antlias ascendere soleat, nempe ad altitudinem mercurii altitudine quatuor decies majorem. Alia sunt innumera & quidem præclarissima experimenta, sed omnia referre non vacat; in objectionibus refellendis nonnulla alia explicabimus.

Prob. II. Pars. Elasticitati & gravitati aeris communia fere sunt argumenta omnia. Ex aeris elasticitate pendet machinæ pneumaticæ structura; etenim vi elastica aer in campana vitrea contentus transit in antliam. Observandum autem est vim elasticam aeris a corporum solidorum elasticitate longe differre; & quidem si vesica flacida in campana pneumatica includatur & aer deinde hauriatur, vi aeris interni vesica intumescet & turgida expandetur. Itaque aer non compressus vi sua elastica dilatatur majusque spatium occupat, quod non faciunt corpora solida elastica quæ, cessante compressione, pristinam tantum recuper-

perant figuram . Jam vero cum elasticitas & gravitas communi probatione demonstrentur, non est cur hac in re diutius immoremur, satius erit elasticitatis & gravitatis effectus expendere eosque a se invicem accurate discernere .

Evidens est aeris pondus illiusque pressionem ex aeris elasticitate nequaquam pendere; idem enim maneret aeris pondus, quod materiæ quantitati proportionale est; etiamsi omni careret elasticitate . At cum aer sit elasticus, hinc colligitur eum posse comprimi, in minus spatium redigi ita ut elasticitas quæ ponderi comprimenti resistit, eidem ponderi, cæteris paribus, sit proportionalis . Et quidem reactio actioni æqualis est & contraria, ac proinde gravitas aeris quæ pressionem producit, & elasticitas aeris quæ pressioni resistit seu ad dilatationem tendit, æquales esse debent . Quæ cum ita sint, si aer in vase claudatur ita ut nullum cum aere externo habeat commercium, eadem manebit hujus aeris pressio & atmosphæræ ponderi æquivalerebit; atque hæc est ratio cur mercurius in Barometro ad eandem altitudinem subsistat sive in aere aperto sive in cubiculo clauso, vi nempe elastica aeris . Itaque diligenter observandum est pressionem quam fluida elastica exercent, non ad fluidorum pondus velut ad causam *immediatam*, sed ad vim elasticam proprie esse referendam . Quod ergo mercurius in Barometro suspensus maneat,tribuendum non est aeris ponderi, nisi quatenus pondus illud ipsa est pressionis causa . Et quidem, eodem licet manente aeris pondere, si aliqua de causa minuatur vel augeatur pressio ac proinde & vis elastica, mercurius in Barometro descendere vel ascendere observatur : Et requidem ipsa

aeris pondus non esse solam pressionis causam certum omnino videtur; aeris elasticitatem maxime turbant varii generis corpuscula atmosphaeræ innatantia, aliæque causæ plurimæ quas deinde, data vel etiam quæsitâ occasione, explicabimus. Cæterum ex his omnibus sic tandem concluditur. Aeri tribuendæ sunt proprietates illæ quas experimenta communi probatione demonstrant, atqui &c. Ergo.

Obijc. adversus I. partem. Si descripta experimenta aeris gravitatem demonstrent, jam totius atmosphaeræ pondus facile æstimare licebit. Etenim cum tantum sit aeris pondus ut aquam in antliis tractoriis ad 32 pedum altitudinem suspendere valeat, considerari poterit atmosphaeræ pressio in universum globum terraqueum, non secus ac si tellus vasto aquarum oceano ad 32 pedum profunditatem immersa esset. Porro pes cubicus aquæ libris 64 æquivaleat, ac proinde pedes cubici 32 æquantur libris 2048; at telluris superficies continet pedes quadratos circiter 554780000000000; hic autem ingens numerus per 2048 multiplicatus efficiet pondus librarum quo aer tellurem nostram comprimet. Ecquis autem sibi facile persuadebit tantæ pressionis sustinendæ parem esse globum terraqueum? Quis crediderit homines pro sua parte enorme pondus humeris sustinere posse; si enim ponamus corporis humani superficiem esse pedum quadratorum 15, quæ quidem superficies homini mediocris staturæ circiter convenit, simili inito calculo corporibus nostris incumberet pondus librarum 33600. His positis sic concluditur: aeri tribuenda non est proprietas illa cujus effectus fidem omnem superat, atqui &c. Ergo ... Resp. N. Min. Hæc obiectio facile

facile evanescit, si aliam fluidorum proprietatem in memoriam revocemus, æqualem scilicet undequaque pressionem. Itaque aer secundum quamlibet directionem corpora omnia ex omni parte premit æqualiter; atque ob æqualem illam pressionem fit ut corpora nullam figuræ mutationem, nullum detrimentum inde patiantur. Et requidem ipsa, si aliquo in loco minuatur pressio, statim sentietur pressionis inæqualitas, atque hinc pender *cucurbitarum* usus. Etenim humanæ cutis pars illa quæ sub cucurbita continetur, nullo fere aere premitur; eductus enim fuit aer. Quare aeris externi pondere comprimuntur humani corporis humores atque versus partem illam quæ sub cucurbita later, impelluntur; hic fit ut pellis vasaque omnia hoc in loco turgida intumescant.

Hic autem prætermittendum non est præsens divinæ providentiæ argumentum; tanta aeris pressione continentur arteriales plantarum atque animalium canales qui circulationis impetu frangi vel distendi facile possent. Hac eadem vi fluida in corporibus animalium cohibentur nimiaque transpiratio coercetur. Hoc incommodum experiuntur viatores qui altissimos montes conscendunt, quo proximiores sunt monti verticis eo debiliores sese sentiunt, atque sæpe *hemoptysim* & *hemorragiam* patiuntur; aer nempe pulmonum vasa non satis comprimit. Notissimum est experimentum quo animalibus in campana pneumatica inclusis aer adimitur; illa enim animalia intumescunt totoque corpore sudant, ore aliisque corporis partibus fæces egerunt.

Observationibus barometricis compertum est maximam altitudinis mercurii in tubo differentiam non excedere pollices tres. Itaque

maxima pressiois aeris in corpus nostrum differentia non excedit pondus cylindri mercurii cuius altitudo est pollicum trium, basis autem superficiei corporis nostri æqualis est; facta autem quæ facilis omnino est computatione, pressiois differentia invenitur librarum circiter 4000. Cum autem tanta sit diversis temporibus atque etiam brevissimo tempore pressiois differentia, mirum non est quod tam repentina aeris mutatione sæpe afficiatur atque turbetur corporis nostri machina. Et requidem ipsa, tanta ponderis accessione contrahi deberent corporis nostri canales ita ut sanguis veluti stagnans in iis quiesceret & circulationis motus sisteretur, nisi frequentissimo huic incommodo divina machinæ nostræ structura paratum fuisset remedium. Et quidem si augeatur aeris pondus, pulmonum *lobi* majori vi dilatantur, ac proinde magis attenuantur sanguinis particule, ita ut faciliores succedant secretiones, ideoque & succi nervei major copia accedat cuius actio contractionem cordis vi majori producit. Sed hæc breviter observata sint, de motibus animalium nonnulla in Physices progressu suo loco exponemus.

Inst. Cum aer vaporibus, exhalationibus magnaque particularum heterogenearum copia sit infectus, suspicio oriri posset atmosphæræ pondus non puriori aeri sed aliis corporibus essetribuendum: quibus positis sic argumentari licet. Aeris gravitatem non demonstrant experimenta illa quæ in aere purissimo & ab heterogeneis corpusculis defæcato sumi non possunt, atqui &c. Ergo Resp. N. Maj. Aerem crassioribus particulis non fædatum gravem esse facile demonstrant nubes in sublimiori aere suspensæ; intelligi enim nequaquam.

quam potest graviores vapores in atmosphæra fluctuare, nisi cum aere fuerint in æquilibrio constitutæ, quo quidem sublato æquilibrio eas præcipites ruere necessum est. Præterea hic agimus de aere nostro, non autem de purissimo quodam aere vel æthere de quo nulla licet habere experimenta. Nemo quidem inficiari potest vapores & exhalationes aeri pondus addere; neque est quod rem ab omnibus concessam fufius demonstremus, satius erit observationes quasdam barometricas quæ ad præsens argumentum pertinent hic exponere.

Quamvis vapores & exhalationes aeris pondus augeant, constans tamen fere est observatio altitudinem mercurii in barometro majorem esse cælo sereno, dum nempe aer purior videtur; contra autem cælo pluvio minor observatur mercurii altitudo. Hujus autem phænomeni plurimæ causæ esse possunt. Et primo quidem certissimum est ventorum vim atmosphæra ponderi in aliqua particulari regione mutationem satis magnam asserre posse. Ita si venti duo ad partes oppositas spirent, majorem aeris copiam in loco aliquo cogere atque accumulare possunt atque ita aerem gravorem reddere. Contra autem venti unius directio versus locum aliquem atmosphæram aliqua ex parte sublevare potest & ita illius pondus minuere. Et requidem ipsa subtilissimo experimento ostendunt Physici ventum etiam arte excitatum aliquam in proximo barometro altitudinis differentiam asserre. Præterea nitrosæ particulae, exhalationes terrestres præsertim si magna siccitate donentur, magis augent atmosphæra pondus. Hinc si atmosphæra prædictis causis pondus acquirat, vapores cum aere intime permixtos facilius sustinebit, cælumque serenum observabitur. At
 si

si causis oppositis levior fiat atmosphæra, jam vapores haud amplius suspensi proprio pondere in pluviam relabuntur. Hinc reddi potest ratio difficillimi sane phœnomeni quod in mercurii altitudine ut plurimum observatur. Cæterum fatendum est ex barometri observatione de futura cæli temperie certum fieri non posse judicium, sed meras haberi conjecturas quæ nimium credulos sæpe decipiunt.

Objic. adversus II. partem. Plurimis experimentis compertum est aeris elasticitatem minui posse atque etiam tolli omnino ita ut aer nullum elasticitatis indicium præbeat. Clariss. Halesius in *statica vegetabilium* ralem esse demonstravit perniciosissimam sulphurearum particularum naturam ut aeris elasticitatem maxime debilitent. Aeris molecule in aliis corporibus arctius conclusæ & ab aliis particulis vi majori attractæ nullam exercent vim repulsivam ac proinde & nullam vim elasticam. In aere admittenda non est proprietas illa saltem tamquam universalis quam aer amittere potest, atqui &c. Ergo. . . Resp. N. Maj. Etiam si aer summam habeat elasticitatem, hanc tamen non semper exercet; si enim aer sit in suo statu naturali vel aliis corporibus intime permixtus, jam nullum præbet elasticitatis signum. Si aeris particule vi maxima comprimantur, qualis est aer in corporum omnium cellulis valide conclusus, nullum in eo statim deprehenditur elasticitatis vestigium. At si aer ex illis corporum carceribus liberatur, eximiam elasticitatem offendit. Ita si in campana vitrea claudatur ampulla fluido aliquo plena, educto aere statim magna copia erumpere & per totam fluidi massam dispersæ observantur mi-

minimæ aeris particulæ . Porro ut elasticitas dicatur aeris proprietas, minime necessum est aerem in statu quolibet vim elasticam exercere, non secus ac corpora solida quæ elasticitate pollent, recte dicuntur *elastica* quamvis in statu compressionis tantum elasticitatem manifestent . Halitus sulphurei alique etiam plurimi, aeris elasticitatem debilitant & fere totam extinguunt ; sed experimenta illa conclusioni nostræ minime repugnant ; satius erit aliquas elasticitatis mutationes exponere .

Aeris elasticitas condensatione & rarefactione maxime augeri potest ; si aer in sclopeto pneumatico vi maxima comprimatur, & deinde liber dimittatur, globulos plumbeos pulveris pyrii instar propellit . Aer calore rarefactus vim elasticam mirum in modum auget . Si vesica paululum inflata, & accurate clausa igni admoveatur, rarefacto aere intumescit atque tandem dirumpitur . Aerem maxime condensari & rarefieri posse certissimum est, quamvis incertus sit maximus condensationis & rarefactionis gradus . Ex hac aeris proprietate manarunt fontes *artificiales*, aliæque machinæ plurimæ inter quas sua utilitate commendari maxime debent antiæ quæ ad extinguenda incendia adhiberi solent .

Inst. Atmosphæræ elasticitatem ita explicant cultiores Physici . Divisam intelligunt totam atmosphæræ altitudinem in orbes æquales crassitie indefinite parvæ . Deinde experimentis certissimum ponunt aeris densitatem ponderibus comprimentibus esse proportionalem, ac proinde in quolibet atmosphæræ loco densitas aeris est ut pondus aeris superioris . Jam pondus aeris superioris inferioris

rem

rem aerem comprimentis dicatur A , pondus aeris qui alium orbem proximum comprimit, dicatur B , & ita deinceps aliarum superiores columnarum dicantur C, D , erit densitas primi orbis inferioris ut $A - B$, proximi orbis densitas ut $B - C$; sunt enim densitates ut pondera comprimentia. Quare erit $A : A - B = B : B - C$, ideoque $A : B = B : C$, ac proinde pondera sunt in progressionem continua geometrica. Jam quia orbis singuli ponuntur ejusdem crassitie, sive ejusdem altitudinis, patet altitudines atmospherarum, in hac hypothese, crescere in progressionem arithmetica. Itaque pro data qualibet atmospherarum altitudine facile invenitur aeris rarefactio, & viceversa dato rarefactionis gradu invenitur aeris altitudo huic rarefactioni conveniens. Rem accuratissima observatione illustrabimus. In vertice montis qui gallice dicitur *Puy de Domme* observata fuit barometri altitudo lin. 285, & in horto cœnobii nostri quod monti proximum est, altitudo fuit lin. 324. Itaque numeri duo 285 & 324 exhibere possunt pondera aerem in utroque loco comprimentia; quare aeris densitates sunt ut iidem numeri, rarefactiones autem sunt in eorundem numerorum ratione reciproca. Jam si rarefactio aeris in cœnobii nostri horto dicatur 1, fiatque proportio 285 : 324 = 1 : $\frac{324}{285}$; quartus hic terminus pro-

portionalis exhibebit aeris rarefactionem in montis vertice. Ponamus cum diligentissimis Physicis aerem nostrum decies millies rariorem fieri posse, huncque esse maximum rarefactionis gradum, tres cognitos habebimus in atmosphaera rarefactionis gradus, nempe

1, $\frac{324}{285}$ & 10000. Præterea nota est at-

mosphæræ altitudo ab horto nostro usque ad montis verticem, nempe exapedarum 560; investiganda ergo superest atmosphæræ altitudo ad quam aer raritatem habeat decies millies majorem; hæc autem altitudo ex progressionum doctrina facile invenitur; duas enim habemus progressionem unam geometricam quæ aeris rarefactiones exhibet, alteram arithmeticam quæ atmosphæræ altitudines præsentat. Jam vero ex logarithmorum doctrina, si quantitates aliquæ fuerint in progressionem geometricam, erunt illorum logarithmi in progressionem arithmeticam; sed in progressionem arithmeticam terminus quilibet æqualis est primo termino & terminorum differentiarum toties sumptæ quot sunt termini datum terminum præcedentes. Quare si calculus ad logarithmos reducat, erunt aeris altitudines datæ duabus rarefactionibus convenientes ut differentiarum inter rarefactionum illarum logarithmos & logarithmum rarefactionis primæ; cum logarithmi sint in progressionem arithmeticam; quare altitudo 560 est ad altitudinem quæsitam, x, ut log. $\frac{344}{285}$ —

log. 1 ad log. 10000 — log. 1, sive ut log. $\frac{344}{285}$ ad log. 10000, ob log. 1 = 0; inito

autem calculo per vulgares logarithmorum tabulas talis invenitur altitudo atmosphæræ conveniens rarefactionis termino 10000 ut exapedis circiter 40000 æqualis sit. En totam Physicorum ratiocinationem; sed quam incerta sit facile intelligitur. Etenim fingitur pre-

pressionem ponderibus comprimentibus proportionalem esse; quod falsum omnino est; cum enim atmosphæra in ultimo compressionis gradu extensione aliqua ac proinde & pondere non careat, iterum comprimi posset atmosphæra, quod est contra hyp. vel quod non minus absurdum est, in infinitum comprimi ac rarefieri posset, ac proinde illius altitudo foret infinita.

Præterea elasticitas aeris ponderi comprimenti proportionalis ponitur, cujus quidem hypotheseos falsitatem jam demonstravimus; nam eodem manente pondere, aeris elasticitatem maxime turbant calor, frigus, humiditas, siccitas. His fuscè explicatis sic tandem concluditur. Aeris elasticitas variis particulis per atmosphæram sine ulla lege dispersis longe probabilius tribuitur, si experimentis repugnent physicæ aeris elastici leges, atqui &c. Ergo Resp. D. Maj. Et illa experimentorum varietas demonstrat ad aeris elasticitatem varias causas concurrere. C. Maj. aerem elasticitate destitutum esse ostendit, N. Maj. Quare N. C.

Ad definiendam atmosphære altitudinem varias quidem hypotheses fingunt Physici, quæ ad omnes aeris partes transferri non possunt; sua experimenta habuerunt in data aliqua aeris portione quam ad certos limites comprimi & condensari posse observarunt, atque densitates ponderibus comprimentibus proportionales esse invenerunt. At certissimum videtur aeris compressionem & dilationem non soli partium ponderi tribuendas esse, sed calori, frigori aliisque causis plurimis. Itaque compertum omnino est aeris rarefactiones in diversis altitudinibus ponderi comprimenti proportionales non esse, ac proinde

inde observationes barometricæ quæ in inferiori atmosphæræ parte sumuntur, ad superiorem aeris regionem traduci non debent. Tandem repugnat omnino hypothesis quæ densitatem ponderibus comprimentibus proportionalem facit; foret enim altitudo atmosphæræ infinita. Hinc factum est ut aliam hypothesis quæsierint doctissimi viri & aeris densitates ponderi comprimenti atque alteri ponderi *constant*i proportionales fecerint. In hac autem hypothesis vitatur atmosphæræ infinitæ incommodum. Sed quidquid sit de atmosphæræ altitudine quæ quidem ex barometri observationibus nulla ratione definiti posse videtur, certa tamen est & indubitata aeris elasticitas, quæcumque sit illius lex; atque aeris nostri elasticitatem, cæteris paribus, ponderi comprimenti proportionalem esse demonstrant experimenta. In referenda autem objectione prolixiores fuimus ut inveniendæ altitudinis atmosphæræ vulgaris methodus vobis innotesceret.

ARTICULUS III.

De sono & auditu.

I. **C**irca doctrinam soni tria præcipua nobis consideranda sese offerunt. Vel enim sonus consideratur in corpore sonoro, vel in medio quod soni vehiculum est, nempe in aere; vel tandem in ipso auditus organo, quare tres illas partes soni definitio complecti debet. Recte igitur sonum definiunt Physici particularum corporis resonantis motum tremulum in aeris particulas translatum & ad aures tandem delatum. Singulæ hujus definitionis partes notissimis experimentis demon-

stran-

observata sint, ex quibus intelligitur exiguam omnino esse aeris *elementaris* & proprie dicti portionem, si conferatur cum cæteris corpusculis magna copia per aerem dispersis. Nec minus patet per solam aeris perniciosam qualitatē explicari posse morborum quorundam contagium, sive morbi illi ex aere *immediate*, sive ex ægrotorum vicinia contrahantur. Quare fictitia omnino sunt mortifera, ut dicunt, animalcula, quæ, grassante contagio, per atmosphæram volitare comminiscuntur aliqui.

C O N C L U S I O.

AER GRAVIS EST ET ELASTICUS.

Prob. I. Pars. Ipsum aeris pondus ad examen revocarunt veteres Philosophi. Globum intus cavum ad stateram expendebant; deinde aerem in eodem globo valide comprimebant, iterumque globi pondus accurate explorabant; aliquam deprehenderunt ponderis differentiam inter aerem nostrum vulgarem & aerem densissimum. Sed experimentum illud accuratius fuit iteratum post inventam machinam cujus ope aer e vasis educitur. Machina illa quæ *pneumatica* appellatur ab Otthone de Guerik Magdeburgensi consule primum excogitata, a Boylio postea fuit perfecta, atque tandem a recentioribus Physicis ad majorem perfectionis & facilitatis gradum perducta. Quamvis tota hujus machinæ structura totumque artificium oculis facilius quam explicatione ulla usurpentur, quia tamen explicandæ aeris proprietates gravitas, & elasticitas institutis in hac machina experimentis maxime demonstrantur, præcipuas illius partes, quantum verbis fieri potest, vobis exhibere utilissimum erit.

erit. In hac machina considerari primum debet antlia metallica eximie perpolita cuius cavitatem ingreditur cylindrus quem *embolum* appellant; ille autem cylindrus internæ superficie antliæ arcte apprimitur ita ut nihil aeris in antliam irrepere possit; fundo antliæ aptata est valvula eo artificio comparata ut aeri egressum permittat, regressum vero prohibeat. E latere antliæ inferitur canaliculus metallicus cuius extremitas superior cum tabula lignea horizontali firmiter cohæret. Ille autem canaliculus hiat in campanam vitream tabulæ horizontali arcte agglutinatam. Eidem canaliculo aptata est machinula quam *epistomium* vocant; cuius ope aeris in campanam vitream transitus conceditur vel negatur.

Rebus ita comparatis; in antliam metallicam truditur embolus, quod fieri solet vi rotæ dentibus instructæ, aer compressus exitum quærit & revera, permissio transitu per valvulam, exit. Contrario rotæ motu embolus attollitur, aer e campana vitrea per canaliculum descendit & transit in antliam, demisso iterum embolo aer comprimitur atque excluditur, ac tandem repetitis emboli alternis agitationibus campana vitrea omni fere aere vacua manet.

Aeris gravitatem non sine acutissimo doloris sensu experietur qui machinæ pneumaticæ canaliculum digito occludere tentaverit; eductio enim ex cavitate canaliculi aere, digitus roto atmosphæræ pondere foramini arcte apprimetur. Si campana vitrea superficiem planam aliqua ex parte habuerit, facto vacuo, in minutissima frustula dissilit fracta externi aeris pondere. Nemo vestrum non vidit tubos vitreos qui a primo auctore Torricellio dicuntur *Torricelliani*. Adhibeatur tubus vitreus

ex una parte accurate clausus atque mercurio impleatur, & deinde ex altero foramine aperto in vase mercurium continente perpendiculariter invertatur, mercurius in tubo ad altitudinem 27 aut 28 pollicum circiter suspensus manebit. Hujus experimenti ratio ex præcedentibus intelligitur; etenim mercurius stagnans in vase subjecto atmosphæræ incumbens pondere premitur, ac proinde eadem vi mercurius in tubo suspenditur. Et requidem ipsa si tubus Torricellianus cui deinde factum est *Barometri* nomen, in campana pneumatica includatur, extracto aere, descendet mercurius, restituto autem aere ascendet rursus.

Ex aeris gravitate intelligitur etiam ascensus aquæ per antlias quas *tractorias* appellant. At cum gravitas specifica mercurii sit ad gravitatem specificam aquæ ut 14 ad 1 circiter, patet cur aqua ad 32 pedes per antlias ascendere soleat, nempe ad altitudinem mercurii altitudine quatuor decies majorem. Alia sunt innumera & quidem præclarissima experimenta, sed omnia referre non vacat; in objectionibus refellendis nonnulla alia explicabimus.

Prob. II. Pars. Elasticitati & gravitati aeris communia fere sunt argumenta omnia. Ex aeris elasticitate pendet machinæ pneumaticæ structura; etenim vi elastica aer in campana vitrea contentus transit in antliam. Observandum autem est vim elasticam aeris a corporum solidorum elasticitate longe differre; & quidem si vesica flacida in campana pneumatica includatur & aer deinde hauriatur, vi aeris interni vesica intumescet & turgida expandetur. Itaque aer non compressus vi sua elastica dilatatur majusque spatium occupat, quod non faciunt corpora solida elastica quæ, cessante compressione, pristinam tantum recuper-

perant figuram . Jam vero cum elasticitas & gravitas communi probatione demonstrentur, non est cur hac in re diutius immoremur, satius erit elasticitatis & gravitatis effectus expendere eosque a se invicem accurate discernere.

Evidens est aeris pondus illiusque pressionem ex aeris elasticitate nequaquam pendere; idem enim maneret aeris pondus, quod materiæ quantitati proportionale est; etiamsi omni careret elasticitate. At cum aer sit elasticus, hinc colligitur eum posse comprimi, in minus spatium redigi ita ut elasticitas quæ ponderi comprimenti resistit, eidem ponderi, cæteris paribus, sit proportionalis. Et quidem reactio actioni æqualis est & contraria, ac proinde gravitas aeris quæ pressionem producit, & elasticitas aeris quæ pressioni resistit seu ad dilatationem tendit, æquales esse debent. Quæ cum ita sint, si aer in vase claudatur ita ut nullum cum aere externo habeat commercium, eadem manebit hujus aeris pressio & atmosphæræ ponderi æquivalerebit; atque hæc est ratio cur mercurius in Barometro ad eandem altitudinem subsistat sive in aere aperto sive in cubiculo clauso, vi nempe elastica aeris. Itaque diligenter observandum est pressionem quam fluida elastica exercent, non ad fluidorum pondus velut ad causam *immediatam*, sed ad vim elasticam proprie esse referendam. Quod ergo mercurius in Barometro suspensus maneat,tribuendum non est aeris ponderi, nisi quatenus pondus illud ipsa est pressionis causa. Et quidem, eodem licet manente aeris pondere, si aliqua de causa minuatur vel augeatur pressio ac proinde & vis elastica, mercurius in Barometro descendere vel ascendere observatur. Et requidem ipsa

60 INSTITUTIONES PHYSICÆ

aeris pondus non esse solam pressionis causam certum omnino videtur; aeris elasticitatem maxime turbant varii generis corpuscula atmosphæræ innatantia, aliæque causæ plurimæ quas deinde, data vel etiam quæsitâ occasione, explicabimus. Cæterum ex his omnibus sic tandem concluditur. Aeri tribuendæ sunt proprietates illæ quas experimenta communi probatione demonstrant, atqui &c. Ergo.

Objic. adversus I. partem. Si descripta experimenta aeris gravitatem demonstrent, jam totius atmosphæræ pondus facile æstimare licebit. Etenim cum tantum sit aeris pondus ut aquam in antliis tractoriis ad 32 pedum altitudinem suspendere valeat, considerari poterit atmosphæræ pressio in universum globum terraqueum, non secus ac si tellus vasto aquarum oceano ad 32 pedum profunditatem immersa esset. Porro pes cubicus aquæ libris 64 æquivalet, ac proinde pedes cubici 32 æquantur libris 2048; at telluris superficies continet pedes quadratos circiter 554780000000000; hic autem ingens numerus per 2048 multiplicatus efficiet pondus librarum quo aer tellurem nostram comprimeret. Ecquis autem sibi facile persuadebit tantæ pressionis sustinendæ parem esse globum terraqueum? Quis crediderit homines pro sua parte enorme pondus humeris sustinere posse, si enim ponamus corporis humani superficiem esse pedum quadratorum 15, quæ quidem superficies homini mediocris staturæ circiter convenit, simili inito calculo corporibus nostris incumberet pondus librarum 33600. His positis sic concluditur: aeri tribuenda non est proprietas illa cujus effectus fidem omnem superat, atqui &c. Ergo ... Resp. N. Min. Hæc obiectio facile

facile evanescit, si aliam fluidorum proprietatem in memoriam revocemus, æqualem scilicet undequaque pressionem. Itaque aer secundum quamlibet directionem corpora omnia ex omni parte premit æqualiter; atque ob æqualem illam pressionem fit ut corpora nullam figuræ mutationem, nullum detrimentum inde patiantur. Et requidem ipsa, si aliquo in loco minuatur pressio, statim sentietur pressionis inæqualitas, atque hinc pendet *cucurbitarum* usus. Etenim humanæ cutis pars illa quæ sub cucurbita continetur, nullo fere aere premitur; eductus enim fuit aer. Quare aeris externi pondere comprimuntur humani corporis humores atque versus partem illam quæ sub cucurbita latet, impelluntur; hic fit ut pellis vasaque omnia hoc in loco turgida intumescant.

Hic autem prætermittendum non est præsens divinæ providentiæ argumentum; tanta aeris pressione continentur arteriales plantarum atque animalium canales, qui circulationis impetu frangi vel distendi facile possent. Hac eadem vi fluida in corporibus animalium cohibentur nimiaque transpiratio coercetur. Hoc incommodum experiuntur viatores, qui altissimos montes conscendunt, quo proximiores sunt monti verticis, eo debiliores sese sentiunt, atque sæpe *hemophysim* & *hemorrhagiam* patiuntur; aer nempe pulmonum vasa non satis comprimit. Notissimum est experimentum quo animalibus in campana pneumatica inclusis aer adimitur; illa enim animalia intumescunt totoque corpore sudant, ore aliisque corporis partibus, fæces, egerunt.

Observationibus barometricis compertum est maximam altitudinis mercurii in tubo differentiam non excedere pollices tres. Itaque

maxima pressiois aeris in corpus nostrum differentia non excedit pondus cylindri mercurii cuius altitudo est pollicum trium, basis autem superficiei corporis nostri æqualis est; facta autem quæ facilis omnino est computatione, pressiois differentia invenitur librarum circiter 4000. Cum autem tanta sit diversis temporibus atque etiam brevissimo tempore pressiois differentia, mirum non est quod tam repentina aeris mutatione sæpe afficiatur atque turbetur corporis nostri machina. Et requidem ipsa, tanta ponderis accessione contrahi deberent corporis nostri canales ita ut sanguis veluti stagnans in iis quiesceret & circulationis motus sisteretur, nisi frequentissimo huic incommodo divina machinæ nostræ structura paratum fuisset remedium. Et quidem si augeatur aeris pondus, pulmonum *lobi* majori vi dilatantur, ac proinde magis attenuantur sanguinis particule, ita ut faciliores succedant secretiones, ideoque & succi nervi major copia accedat cuius actio contractionem cordis vi majori producit. Sed hæc breviter observata sint, de motibus animalium nonnulla in Physices progressu suo loco exponemus.

.. Inst. Cum aer vaporibus, exhalationibus magnaue particularum heterogenearum copia sit infectus, suspicio oriri posset atmosphæræ pondus non puriori aeri sed aliis corporibus essetribuendum: quibus positis sic argumentari licet. Aeris gravitatem non demonstrant experimenta illa quæ in aere purissimo & ab heterogeneis corpusculis defæcato sumi non possunt, atqui &c. Ergo Resp. N. Maj. Aerem crassioribus particulis non sædatum gravem esse facile demonstrant nubes in sublimiori aere suspensæ; intelligi enim nequaquam.

quam potest graviores vapores in atmosphæra fluctuare, nisi cum aere fuerint in æquilibrio constitutæ, quo quidem sublato æquilibrio eas præcipites ruere necessum est. Præterea hic agimus de aere nostro, non autem de purissimo quodam aere vel æthere de quo nulla licet habere experimenta. Nemo quidem inficiari potest vapores & exhalationes aeris pondus addere; neque est quod rem ab omnibus concessam fufius demonstremus, satius erit observationes quasdam barometricas quæ ad præsens argumentum pertinent hic exponere.

Quamvis vapores & exhalationes aeris pondus augeant, constans tamen fere est observatio altitudinem mercurii in barometro majorem esse cælo sereno, dum nempe aer purior videtur; contra autem cælo pluvio minor observatur mercurii altitudo. Hujus autem phænomeni plurimæ causæ esse possunt. Et primo quidem certissimum est ventorum vim atmosphærae ponderi in aliqua particulari regione mutationem satis magnam asferre posse. Ita si venti duo ad partes oppositas spirent, majorem aeris copiam in loco aliquo cogere atque accumulare possunt atque ita aerem graviores reddere. Contra autem venti unius directio versus locum aliquem atmosphæram aliqua ex parte sublevare potest & ita illius pondus minuere. Et re quidem ipsa subtilissimo experimento ostendunt Physici ventum etiam arte excitatum aliquam in proximo barometro altitudinis differentiam asferre. Præterea nitrosæ particulæ, exhalationes terrestres præfertim si magna siccitate donentur, magis augent atmosphærae pondus. Hinc si atmosphæra prædictis causis pondus acquirat, vapores cum aere intime permixtos facilius sustinebit, cælumque serenum observabitur. At

si

si causis oppositis levior fiat atmosphæra, jam vapores haud amplius suspensi proprio pondere in pluviam relabuntur. Hinc reddi potest ratio difficillimi sane phœnomeni quod in mercurii altitudine ut plurimum observatur. Cæterum fatendum est ex barometri observatione de futura cæli temperie certum fieri non posse judicium, sed meras haberi conjecturas quæ nimium credulos sæpe decipiunt.

Objic. adversus II. partem. Plurimis experimentis compertum est aeris elasticitatem minui posse atque etiam tolli omnino ita ut aer nullum elasticitatis indicium præbeat. Clariss. Halesius in *statica vegetabilium* talem esse demonstravit perniciosissimam sulphurearum particularum naturam ut aeris elasticitatem maxime debilitent. Aeris moleculæ in aliis corporibus arctius conclusæ & ab aliis particulis vi majori attractæ nullam exercent vim repulsivam ac proinde & nullam vim elasticam. In aere admittenda non est proprietas illa saltem tamquam universalis quam aer amittere potest, atqui &c. Ergo. . . Resp. N. Maj. Etiam si aer summam habeat elasticitatem, hanc tamen non semper exercet; si enim aer sit in suo statu naturali vel aliis corporibus intime permixtus, jam nullum præbet elasticitatis signum. Si aeris particulæ vi maxima comprimantur, qualis est aer in corporum omnium cellulis valide conclusus, nullum in eo statu deprehenditur elasticitatis vestigium. At si aer ex illis corporum carceribus liberatur, eximiam elasticitatem ostendit. Ita si in campana vitrea claudatur ampulla fluido aliquo plena, educto aere statim magna copia erumpere & per totam fluidi massam dispersæ observantur
mi.

minimæ aeris particulæ . Porro ut elasticitas
 dicatur aeris proprietas, minime necessum est
 aerem in statu quolibet vim elasticam exer-
 cere, non secus ac corpora solida quæ ela-
 sticitate pollent, recte dicuntur *elastica* quam-
 vis in statu compressionis tantum elasticita-
 tem manifestent . Halitus sulphurei alique
 etiam plurimi, aeris elasticitatem debilitant
 & fere totam extinguunt ; sed experimenta
 illa conclusioni nostræ minime repugnant ;
 satius erit aliquas elasticitatis mutationes ex-
 ponere .

Aeris elasticitas condensatione & rarefa-
 ctione maxime augeri potest ; si aer in sclo-
 peto pneumatico vi maxima comprimatur,
 & deinde liber dimittatur, globulos plum-
 beos pulveris pyrii instar propellit . Aer ca-
 lore rarefactus vim elasticam mirum in mo-
 dum auget . Si vesica paululum inflata &
 accurate clausa igni admoveatur, rarefacto
 aere intumescit atque tandem disrumpitur .
 Aerem maxime condensari & rareferi posse
 certissimum est, quamvis incertus sit maxi-
 mus condensationis & rarefactionis gradus .
 Ex hac aeris proprietate manarunt fontes *ar-
 tificiales*, aliæque machinæ plurimæ inter
 quas sua utilitate commendari maxime de-
 bent antliæ quæ ad extinguenda incendia ad-
 hiberi solent .

Inst. Atmosphæræ elasticitatem ita expli-
 cant cultiores Physici . Divisam intelligunt
 totam atmosphæræ altitudinem in orbes æ-
 quales crassitie indefinite parvæ . Deinde ex-
 perimentis certissimum ponunt aeris densita-
 tem ponderibus comprimentibus esse propor-
 tionalem, ac proinde in quolibet atmosphæ-
 ræ loco densitas aeris est ut pondus aeris su-
 perioris . Jam pondus aeris superioris inferioris
 rem

rem aerem comprimentis dicatur A, pondus aeris qui alium orbem proximum comprimit, dicatur B, & ita deinceps aliarum superiores columnarum dicantur C, D, erit densitas primi orbis inferioris ut $A - B$, proximi orbis densitas ut $B - C$; sunt enim densitates ut pondera comprimentia. Quare erit $A : A - B = B : B - C$, ideoque $A : B = B : C$, ac proinde pondera sunt in progressionem continua geometrica. Jam quia orbis singuli ponuntur ejusdem crassitie, sive ejusdem altitudinis, patet altitudines atmospherarum, in hac hypothese, crescere in progressionem arithmetica. Itaque pro data qualibet atmospherarum altitudine facile invenitur aeris rarefactio, & viceversa dato rarefactionis gradu invenitur aeris altitudo huic rarefactioni conveniens. Rem accuratissima observatione illustrabimus. In vertice montis qui gallice dicitur *Puy de Domme* observata fuit barometri altitudo lin. 285, & in horto cœnobii nostri quod monti proximum est, altitudo fuit lin. 324. Itaque numeri duo 285 & 324 exhibere possunt pondera aerem in utroque loco comprimentia; quare aeris densitates sunt ut iidem numeri, rarefactiones autem sunt in eorundem numerorum ratione reciproca. Jam si rarefactio aeris in cœnobii nostri horto dicatur 1, fiatque proportio $285 : 324 = 1 : \frac{324}{285}$; quartus hic terminus pro-

portionalis exhibebit aeris rarefactionem in montis vertice. Ponamus cum diligentissimis Physicis aerem nostrum decies millies rariorem fieri posse, huncque esse maximum rarefactionis gradum, tres cognitos habebimus in atmosphaera rarefactionis gradus, nempe

1, $\frac{324}{285}$ & 10000. Præterea nota est at-

mosphæaræ altitudo ab horto nostro usque ad montis verticem, nempe exapedarum 560; investiganda ergo superest atmosphæaræ altitudo ad quam aer raritatem habeat decies millies majorem; hæc autem altitudo ex progressionum doctrina facile invenitur; duas enim habemus progressionem unam geometricam quæ aeris rarefactiones exhibet, alteram arithmeticam quæ atmosphæaræ altitudines repræsentat. Jam vero ex logarithmorum doctrina, si quantitates aliquæ fuerint in progressionem geometricam, erunt illorum logarithmi in progressionem arithmeticam; sed in progressionem arithmeticam terminus quilibet æqualis est primo termino & terminorum differentiarum toties sumptæ quot sunt termini datum terminum præcedentes. Quare si calculus ad logarithmos reducat, erunt aeris altitudines datis duabus rarefactionibus convenientes ut differentiarum inter rarefactionum illarum logarithmos & logarithmum rarefactionis primæ; cum logarithmi sint in progressionem arithmeticam; quare altitudo 560 est ad altitudinem quæsitam, x, ut log. $\frac{344}{285}$ —

log. 1 ad log. 10000 — log. 1, sive ut log. $\frac{344}{285}$ ad log. 10000, ob log. 1 = 0; inito

autem calculo per vulgares logarithmorum tabulas talis invenitur altitudo atmosphæaræ conveniens rarefactionis termino 10000 ut exapedis circiter 40000 æqualis sit. En totam Physicorum ratiocinationem; sed quam incerta sit facile intelligitur. Etenim fingitur pre-

pressionem ponderibus comprimentibus proportionalem esse; quod falsum omnino est; cum enim atmosphæra in ultimo compressionis gradu extensione aliqua ac proinde & pondere non careat, iterum comprimi posset atmosphæra, quod est contra hyp. vel quod non minus absurdum est, in infinitum comprimi ac rarefieri posset, ac proinde illius altitudo foret infinita.

Præterea elasticitas aeris ponderi comprimenti proportionalis ponitur, cujus quidem hypotheseos falsitatem jam demonstravimus; nam eodem manente pondere, aeris elasticitatem maxime turbant calor, frigus, humiditas, siccitas. His fuscè explicatis sic tandem concluditur. Aeris elasticitas variis particulis per atmosphæram sine ulla lege dispersis longe probabilius tribuitur, si experimentis repugnent physicæ aeris elastici leges, atqui &c. Ergo . . . Resp. D. Maj. Et illa experimentorum varietas demonstrat ad aeris elasticitatem varias causas concurrere, C. Maj. aerem elasticitate destitutum esse ostendit, N. Maj. Quare N. C.

Ad definiendam atmosphære altitudinem varias quidem hypotheses fingunt Physici, quæ ad omnes aeris partes transferri non possunt; sua experimenta habuerunt in data aliqua aeris portione quam ad certos limites comprimi & condensari posse observarunt, atque densitates ponderibus comprimentibus proportionales esse invenerunt. At certissimum videtur aeris compressionem & dilationem non soli partium ponderi tribuendas esse, sed calori, frigori aliisque causis plurimis. Itaque compertum omnino est aeris rarefactiones in diversis altitudinibus ponderi comprimenti proportionales non esse, ac proinde

inde observationes barometricæ quæ in inferiori atmosphæræ parte sumuntur, ad superiorem aeris regionem traduci non debent. Tandem repugnat omnino hypothesis quæ densitatem ponderibus comprimentibus proportionalem facit; foret enim altitudo atmosphæræ infinita. Hinc factum est ut aliam hypothesim quæsiverint doctissimi viri & aeris densitates ponderi comprimenti atque alteri ponderi *constant*i proportionales fecerint. In hac autem hypothesi vitatur atmosphæræ infinitæ incommodum. Sed quidquid sit de atmosphæræ altitudine quæ quidem ex barometri observationibus nulla ratione definiri posse videtur, certâ tamen est & indubitata aeris elasticitas, quæcumque sit illius lex; atque aeris nostri elasticitatem, cæteris paribus, ponderi comprimenti proportionalem esse demonstrant experimenta. In referenda autem objectione prolixiores fuimus ut inveniendæ altitudinis atmosphæræ vulgaris methodus vobis innotesceret.

ARTICULUS III.

De sono & auditu.

I. **C**IRCA doctrinam soni tria præcipua nobis consideranda sese offerunt. Vel enim sonus consideratur in corpore sonoro, vel in medio quod soni vehiculum est, nempe in aere; vel tandem in ipso auditus organo, quare tres illas partes soni definitio complecti debet. Recte igitur sonum definiunt Physici particularum corporis resonantis motum tremulum in aeris particulas translatum & ad aures tandem delatum. Singulæ hujus definitionis partes notissimis experimentis demon-

stran-

strantur . Etenim corpora non resonant nisi percutiantur , & maxime omnium resonant corpora dura atque elastica quorum partes ictu flectuntur & deinde vi sua elastica resiliunt, atque ita tremulo ac vibratorio motu agitantur . Particularum corporis resonantis subsultus visu & tactu percipitur ; chartæ frustula corpori resonanti insidentia subsultare oculis cernuntur & admota manu partium fremitus sentitur . Verum si chorda instrumenti musici tensa non fuerit, licet oscillationes tota peragat, sonum non edit, & forcipis focariæ crura digitis constructa & deinde dimissa, oscillationes agunt sine sono ; at si oscillando corpus aliquod durum percutiunt , statim resonant ; ex quibus experimentis colligitur sonum non solo totius corporis motu oscillatorio, sed particularum tremore produci . Hic motus aeri contiguo communicatur ; contremiscunt ergo minimæ aeris particulæ ad modum chordæ musicæ . Et quidem aerem soni vehiculum esse ostendunt corpora sonora in vacuo Boyliano ; dum enim educitur aer, sonum languidiorem reddunt & exhausto aere nullum qui possit audiri . Nec ad motum producendum satis est quilibet aeris motus ; si enim magna aeris moles agitur, ventus quidem excitatur sed nullus sonus . Quare necessarius est vibratorius minimarum particularum motus ; hunc vero motum oculis percipere licet , dum instrumentorum, musicorum chordæ pulsantur ; nam aeri innatantes tenuissimi pulvisculi & radio solis conspicui ad chordarum fremitum subsultare observantur . His necessariis ad sonum producendum conditionibus breviter jam observatis, nunc præcipua soni phænomena explicabimus .

II. Ex præcedentibus intelligitur etiam soni

PARS II. SECT. I. 71

propagatio . Etenim consideremus corpus quod tremulum quod alternis vicibus eundo redeundo sonum producat . Hujus corporis partes ita suo propellent aeris partes proximæ , easdem compriment & condensabunt , deinde reditu suo partes compressas rece-
de & sese expandere permittent . Igitur partes aeris corpori tremulo proximæ ibunt & ibunt per vices , & quemadmodum propior aeris partes eundo condensantur & redeundo relaxantur , sic etiam partes reliquæ , quod eunt , condensabuntur , & quoties redeunt , expandentur , ac proinde non omnes ibunt simul & redibunt , sed aliquæ earum ibunt & alie redeunt , atque ita deinceps vicibus alternis ; quod quidem evidens est ex minimarum particularum elasticitate . Porro licet corporis tremuli partes eant & redeant secundum plagam certam & determinatam , tamen motus per aerem propagatus quaquaversum dilatabitur , ut patet ex natura fluidorum quæ compressionem suam undequaque exercent . Igitur corpore sonoro tanquam centro communi secundum superficies propemodum sphericas & concentricas propagabitur motus . Hujus rei exemplum aliquod , minus tamen perfectum , habemus in undis quæ si digito tremulo excitentur , non solum pergent hinc inde secundum directionem digiti , sed per circulos concentricos digitum statim cingent & undique divergent . Imperfectum autem nec satis accuratum esse exemplum illud observabimus ; si enim medium non sit elasticum , jam illius partes a corporis tremuli partibus compressæ nequeunt condensari , & motus in instanti propagabitur ad partes ubi medium facillime cedit , hoc est , ad partes quas corpus tremulum vacuas a tergo relinquit . Ex his patet propa-

pa-

pagationem soni per aerem non fieri in *instanti*, sed determinato tempore opus habet ut per datum spatium propellatur. Motus autem soni æquabilis observatur & neque ab intensitate soni neque ab ejus qualitate pender. Velocitatem soni ad calculum revocarunt doctissimi Geometræ, sed res pendet ex sublimiori doctrinâ nec fortasse satis accurate demonstrata; quare velocitatem soni experimento definire satis sit. Tanta est velocitas lucis ut per atmosphæram in instanti *quoad sensum* propagetur. Si sonus, & lux eodem temporis puncto excitentur, uti in machinis bellicis flamma & fragor simul producuntur, spectator accurate dimetiatur spatium quo a corpore resonante distat, tempusque quod inter luminis & soni perceptiones intercedit, soni velocitas innotescet; atque hoc modo in variis regionibus varia observata est velocitas soni, & in Anglia ea celeritate sonum propagari Flamstedio & Halleyo visum est, qua pedes Londinenses 1142, Parisienses vero 1070 tempore minuti unius secundi percurreret. Quia vero densitas & vis elastica aeris in variis terrarum locis diversisque anni tempestatibus in eodem loco mutantur, inde quoque mutari oportet soni velocitatem. Diu creditum est, observantibus Gassendo, Merfeno nostro & Academicis Florentinis, sonum neque conspirante vento accelerari, neque adverso retardari; sed D. Dérham experimentis accuratius institutis falsum id esse asserit.

III. Quidquid minimas aeris particulas ita commovere valet ut motum tremulum admittant, id sonum producat. Duo autem potissimum considerabimus sonorum genera. Primum est eorum qui a corpore tremulo oriuntur, cuiusmodi sunt chordarum campanarumque

que soni . Alterum vero sonorum genus eorum est qui inflatis instrumentis producuntur; sic tibiæ, fistulæ aliaque id genus instrumenta ore inflata tinniunt . Si chorda tensa pulsatur aut vellicatur, ex quiete situque naturali detorquetur, & deinde in situm naturalem sese conatur restituere, atque in eum revera motu accelerato, ob continuam vis elasticæ actionem, properat . At cum eo pervenit, celeritatem acquisitam subito non potest amittere neque in eo statu quiescere . Quare eam ultra excurrere necessum est similique modo redire, atque tandiu perseverabunt oscillationes illæ, donec ob aeris resistantiam plane evanescant . Harum vibrationum leges accurate demonstrarunt Geometræ; at cum demonstratio difficilioribus principiis innixa sit, formulam exhibere satis erit . Si longitudo chordæ musicæ dicatur L , M , chordæ pondus, vis elastica chordæ seu quod idem est, pondus quo chorda tenditur, dicatur P , erunt numeri vibrationum

dato tempore peractarum ut $\frac{\sqrt{P}}{\sqrt{L \times M}}$. Hinc

si chordarum longitudo L , & massæ M , ponantur æquales, erunt numeri vibrationum ut \sqrt{P} , hoc est, in ratione subduplicata ponderum tendentium . Si pondera tendentia P , & longitudo L , æquantur, erunt numeri

vibrationum ut $\frac{1}{\sqrt{M}}$, hoc est, in ratione

subduplicata inversa massarum, ac proinde in ratione inversa diametrorum, si chordæ sint homogeneæ . Si pondera tendentia sint æqualia, & præterea chordæ sint homogeneæ & ejusdem diametri, erunt numeri vibrationum in ratio-

ne inverſa longitudinum : nam in hoc caſu

vibrationum numeri ſunt ut $\frac{1}{\sqrt{L \times M}}$; ſed

eadem manente chordarum homogenearum diametro, maſſæ, M , ſunt ut longitudines, L ,

quare $\frac{1}{\sqrt{L \times M}}$ erit ut $\frac{1}{\sqrt{LL}}$, nempe ut

$\frac{1}{L}$. Simili ratione ex hac formula colligi poſſent innumera alia Theoremata quæ ad chordarum muſicarum vibrationes pertinent.

Sub eodem ſonorum genere comprehendimus campanarum ſonos, quod quidem facile patet ; pulſatæ enim campanæ contremiſcunt & campanarum partes ſuas vibrationes peragunt ; idque etiam facile percipiet qui campanæ motum attentis oculis perſequetur ; hanc enim ex rotunda ovalem fieri, & modo ad hanc modo ad illam partem oblongari obſervabit. Difficillimum quidem eſt ex campanæ forma & pondere numerum oſcillationum definire ; ſi tamen campanæ fuerint ſimiles & homogeneæ, facile demonſtratur numerum vibrationum eſſe in ratione ſubtriplicata, ſive ut radices cubicæ ponderum. Etenim pondus

tendens ponatur $\frac{M}{L}$, formula præcedens abit

in $\frac{\sqrt{M}}{\sqrt{L \times M}} = \frac{1}{L}$. At corpora homogenea

ſimilia ſunt in ratione triplicata laterum homologorum ; ergo cum maſſa vel pondus ſit

M , erit L ut $\sqrt[3]{M}$, ac proinde vibrationum

numeri erunt ut $\frac{1}{\sqrt[3]{M}}$, hoc eſt, in ratione
sub-

subtriplicata reciproca ponderum . Quod autem

pondus tendens ponatur $\frac{M}{L}$, ratio facile pa-

rēt . Etenim si chordæ musicæ pondere aliquo appenso tendantur , ita ut tamen non rumpantur , chordarum homogenearum vires , seu resistantiæ sunt ut crassities , ac proinde etiam & pondera tendentia ; sed chordarum crassities sunt ut pondera directe & longitudines inverse (ex elem. Geom.) . Ergo pondera tendentia sunt in ratione ponderum chordarum directa & longitudinum inversa ; quod quidem accuratissimis experimentis in chordis metallicis confirmarunt Physici ; manifestum autem est hanc ratiocinationem ad metallicas campanarum chordas transferri posse .

IV. Sonorum differentia secundum *grave & acutum* pendet ex vibrationum tarditate & celeritate ; sonum graviores esse dicimus quo pauciores vibrationes eodem tempore peraguntur contra vero acutiorem quo plures vibrationes eodem tempore absolvuntur . Si chordæ duæ eundem vibrationum numerum eodem tempore perficiunt , dicuntur *unisonæ* . Si vibrationum numeri sint ut 2 ad 1 , tunc consonantia illa vocatur *octava* ; si fuerint ut 3 ad 2 , dicitur *quinta* . Si numeri vibrationum sint ut 4 ad 3 , consonantia dicitur *quarta* ; si fuerint ut 5 ad 4 , dicitur *tertia major* , & tandem *tertia minor* , si numeri vibrationum fuerint ut 6 ad 5 , atque ita deinceps . Illæ autem omnes consonantiæ ad experimentum facile revocantur , mutatis chordarum longitudinibus , ponderibus , & tensionibus . Probè distinguenda est sonorum vehementia & debilitas ab illorum gravitate & acumine . Vehementia ejusdem soni diversa est pro diversa

auditoris distantia; etenim sonus undequaque in circumferentiam propagatus pro majoribus distantibus in majus spatium diffunditur, ac proinde vehementia soni, cæteris paribus, in duplicata distantiarum ratione decrescere debet, ut statim intelligitur ex iis quæ demonstravimus in Physica generali. Præterea cum pulsata chorda, idem pulsus per aerem transmittatur, necesse est motum perpetuo remissorem fieri, ideoque & sonum debiliorem audiri. At quamvis in chordis vibrantibus major audiatur sub initio soni intensitas quæ sensim languescit atque tandem evanescit, interim tamen oscillationes manent isochronæ, ac proinde sonus eundem retinet *gravitatis & acuminis* gradum. Tandem pendet etiam soni intensitas ex vi pulsante; intensior enim exprimitur idem sonus, si majori vi pulsetur chorda; imo si nimis vehemens fuerit pulsatio, ita ut chorda extra situm naturalem longius excurrans ampliores vibrationes peragat, sonus sub initio acutior auditur, deinde autem minus acutus; atque hinc fit ut soni minus jucundi minusque distincti producantur. Itaque ut jucundiores sonos reddat instrumentum musicum, id negligendum non est, ut nempe eadem sit vis pulsans aut saltem non multum diversa, atque etiam ut chordæ in medio vel saltem in locis similibus impellantur; patet enim, mutato pulsationis loco, ipsam quoque vim pulsanter mutari.

V. Ad secundam sonorum speciem referuntur soni instrumentis aere inflatis excitati, Qua ratione autem soni illi producuntur, ex ipsa fistularum structura intelligere est. Nemo non novit fistulas esse tubos seu canales qui altera extremitate junctum habent *peristomium*, aerem ex ore excipiens atque per rimam in

tubum emittens. Id autem omnino fieri debet, ut aer per rimam immissus internam tubi superficiem, radat leviterque perstringat, non vero in illius cavitatem & latera irruat. Quamobrem id maxime curant fistularum artifices ut tubi latus rimæ oppositum excindant ne sit contiguum peristomio; fistulæ extremitatem acuunt ut aer in ipsam aciem irruens ab ipsa quasi findatur & ita tenuior aeris lamella per tubum prorepit. Ea de causa fit ut in tibiis peristomio destitutis, quales sunt fistulæ quæ *transverse* vocantur, peristomii figuram os quasi imitari videatur. His præmissis de fistularum constructione & artificio, ita sonus excitatur, aer nempe in tubum ore immissus, aerem in ipso tubo jam existentem secundum longitudinem comprimit; hinc fit ut sese iterum expandat, rursus coarctetur, atque hoc modo, durante inflatu, oscillationes perficiat sonumque producat. Ipsum quoque tubum motu tremulo agitari opinantur aliqui; at cognitis fistularum proprietatibus minime satisfacit hæc opinio; constat enim fistulas cylindricas longitudine æquales, pares omnino sonos edere, quamvis amplitudine, crassitie & materia ipsa differant. Quæ ratione fieri posset ut diversissimi tubi simili modo contremiscerent? Merito igitur duplicem enumeravimus sonorum speciem. Hæc tamen secunda species aliquo modo cum prima potest comparari.

Corpus quod vibrationes peragit easque in aerem circumfusum transfert, est aer in tubo contentus cujus quantitas ex tubi longitudine & amplitudine innotescit. Vis ad oscillandum impellens est aer in tubi internam superficiem ore immissus; at vis qua aer in tubo existens & ex statu naturali deturbatus sese restituere

78 INSTITUTIONES PHYSICÆ

conatur, qua proinde fit ut certum oscillationum numerum dato tempore absolvat, est pondus atmosphæræ, seu vis elastica aeris quæ incumbentis atmosphæræ pressioni æquivalet; quare vis illa ex altitudine mercurii in Barometro æstimari debet. Jam fistulæ ad chordas musicas aliqua ex parte revocari possunt; etenim chorda cum aere in fistula contento potest comparari; ponderis chordam tendentis vires gerit pondus atmosphæræ; hæc enim duo licet prorsus dissimilia videantur eo quod chorda a pondere tendente extendatur, aer vero ab atmosphæra comprimatur, res tamen perinde se habet, si effectum attendamus; idem enim est effectus, sive aeris compressione, sive chordæ extensione oscillationes producantur. Itaque cum aer in fistulæ tubo chordæ musicæ instar suas oscillationes perficiat, ex præcedenti formula comparari poterunt numeri vibrationum dato tempore peractarum. Sit fistulæ longitudo, a , amplitudo bb , gravitas specifica aeris ad gravitatem specificam mercurii in ratione m ad n , altitudo mercurii in Barometro, k ; habemus ergo chordam *aeream* longitudinis, a , cujus pondus, $mabb$; hæc autem tenditur pondere atmosphæræ, hoc est, cylindro mercurii cujus basis est amplitudo tubi, bb , altitudo autem k , quare pondus tendens $= nkbb$, quibus valoribus in præcedenti formula substitutis, habebitur vibrationum numerus $\sqrt{\frac{nkbb}{a \cdot mabb}} = \sqrt{\frac{nK}{m}}$. Quia vero altitudo, k , diversis tempestatibus parum mutatur, atque eadem fere semper manet ratio m ad n , hinc patet cylindricarum fistularum sonos esse reciproce ut tuborum longitudines, ita ut quo tubi breviores sunt, eo acutiores reddant sonos, & contra, quod qui-

quidem egregie cum experientia consentit; cum fistularum soni neque a tubi amplitudine neque a materia; sed a sola longitudine pendeant; quotidianis enim experimentis norunt Musici quoties instrumenta chordis instructa simul cum pneumaticis in concentu musico adhibent, hæc perquam mutabilia esse illorumque chordas modo intendi, modo remitti debere; observatum tamen etiam est acutiorem reddi fistularum sonum si cælum fuerit maxime serenum cum summo calore conjunctum. Pendet quoque sonorum vehementia ab ipsa vi qua inflantur fistulæ & a ratione quam fistulæ amplitudo ad longitudinem tenet; & quidem fistularum & chordarum similis est ratio, atque chordarum crassities cum fistularum amplitudine comparanda est. Quemadmodum ergo non quævis chorda ad omnes sonos edendos est accommodata; sed ad datum sonum certa quædam crassities requiritur, ita etiam datæ longitudinis fistula, non pro lubitu ampla vel angusta fieri potest, sed certi sunt limites quos si prætergrediaris, nullum prorsus tonum datura est fistula. Neque pro lubitu augeri vel minui potest inflatus vehementia; nam si nimis languide fistula infletur, sonum edet prorsus nullum; at fortius quam par est inflata, non eum quem debet edit sonum sed justo acutiorem. Et quidem si major sit inflatus vehementia, jam ampliores esse intelligitur aeris in tubo contenti oscillationes; at oscillationum amplitudo tubi amplitudine ita determinatur ut certum terminum transgredi non possit; quare si fistula vehementius infletur quam ad istum gradum requiritur, eundem sonum edere non poterit; quod quidem etiam in chordis musicis jam antea observavimus. Quæ autem de

80 INSTITUTIONES PHYSICÆ

fistulis hæcenus dicta sunt, ad eas tantum pertinent quarum tubi formam habent vel prismaticam vel cylindricam; quales autem sonus daturi sint tubi, si fuerint divergentes vel convergentes aut alterius figuræ, problema est longe difficilius. Si tamen figuræ fuerint similes, & datus sit fistulæ unius sonus, inveniri poterit fistulæ similis sonus, non secus ac factum est in fistulis cylindricis.

VI. Ad tubos divergentes referri debent tubi *Stentorophonici* quorum vis est maxima ad vocem articulatam longius propagandam. Optima tubarum vocalium figura illa est quæ fit ex conversione parabolæ circa axem, constituto tubæ orificio in ipso parabolæ foco. Hac enim structura fit ut radii sonori qui angulum reflexionis æqualem efficiunt angulo incidentiæ, saltem magna ex parte reflectantur ad axem tubæ paralleli (ex natura parabolæ). Tubus ellipticus parabolico jungi solet ita ut elliptici focus unus coincidat cum foco parabolici, & os loquentis in altero ellipseos foco constitutatur; qua ratione fit ut radii sonori ab ore in tubo elliptico ad focum parabolici, partim directi, partim reflexi dirigantur (ex natura ellipseos) & deinde in tubo parabolico paralleli progrediantur. Tubis stentoreis annumerandæ sunt omnes tubæ militares aut venatoriæ; exiguus enim sibilus quem edit Tubicen, constricto aere inter labium & tubæ oram in validissimum erumpit sonum. Accurate autem observandum est instrumenta illa a figura parabolica longe discrepare; sunt enim versus axem convexa. Itaque incrementum soni non pendet ex parallela directione soni, sed, ut ait Nevvtonus, ex motus *reciprocatione*; talis nempe est tubæ figura ut sonus ab uno pariete ad alterum repellatur, & non

PARS II. SECTIO I. 81

nonnisi post innumeras reflexiones sive reciprocationes foras emittatur; ac proinde motu novo a recurrentibus aeris particulis impresso maxime augetur.

Ex iisdem principiis pendent sonorum repetitiones sive *Echo*. Si sonus e centro quovis A (Fig. 4.) directe propagatus in obstaculum planum satis magnum BC, incurrat, & ex A, ducatur ad BC perpendicularis AE, producatque ad H ut sit $EH = AE$, sonus reflexus eodem fere modo percipietur ac si ex loco H, tanquam centro directe propagaretur, ob angulum reflexionis æqualem angulo incidentiæ. Similiter si sonus a centro quovis propagatus in obstaculum quodlibet impingat a quo ita reflectatur ut post reflexionem radii sonori in centrum aliud convergant, sonus reflexus tanquam ex hoc secundo centro propagatus audietur. Quare si radii sonori satis densi ad aurem appellentes & soni unius sensationem producentes, ab aure in diversa centra convergant, locus ex quo sonus propagatur, non bene distinguetur. At si sonus producat in loco A, & deinde ab obstaculo quovis BC, reflectatur tanquam ex centro H propagatus, auditor in loco R, sonum directum per AR, propagatum percipiet primum; deinde sonum reflexum quasi ex centro H, procedentem, postquam motu directo spatium AF, & motu reflexo spatium FR, descripsit, audiet; idem igitur sonus audietur bis, modo tamen distantiarum AR, & AFR, differentia tanta sit ut sonus directus & sonus reflexus eodem sensibili momento organum auditus non afficiant; nam si sonus reflexus ad aurem perveniret eo tempore quo soni directi impressio adhuc in ea perseverat, non geminus sed intensior tantum sonus audiretur. Por-

ro experientia constat sonos vix posse distinguere, si plures quam novem circiter syllabæ tempore minuti unius secundi successive producantur; quare ne sonus reflexus cum directo confundatur, inter eorum ad aurem appulsus intercedere oportet partem nonam minuti unius secundi, quo tempore sonus describit spatium 127 pedum Londinensium circiter. Hoc igitur spatio minor esse non debet distantiarum AR, & AFR differentia, ut sonus reflexus distincte percipi possit in R. Si plura sint obstacula justis intervallis dissita in quæ sonus directe offendat, is quasi ex variis locis sæpius repetitus audietur; ita machinarum bellicarum fragorem & tonitrus boatum circumjecta ædificia vel crassiores nubes pluries referunt. Ex sonorum reflexione & ex parabolæ vel ellipsos proprietate pendet, quod maxime mirari solet imperitum vulgus, in amplissimis quibusdam cubiculis atque etiam in templis tantum soni incrementum ut si quis demissiori etiam voce mulsitaverit, ab alio qui in convenienti licet maxime distanti loco fuerit constitutus, distincte audiat.

VII. Duplicem jam consideravimus instrumentorum speciem; at prætermittendum non est vocis instrumentum quod ad utrumque instrumentorum genus pertinere videtur. Præclarissima referemus experimenta quæ paucis ab hinc annis de animalium voce habuit vir clariss. D. Ferrein. Ex Anatome notum est *tracheam* sive *asperam arteriam* esse canalem qui prope fauces per anteriora colli ad pectus descendit & in multos ramos *bronchia* appellatos per universam pulmonum substantiam disseminatur, ut omnibus eorum cellulis aut vesiculis possit aerem suppeditare; hujus canalus caput quod *laryngem* vocant, media formula

mula pertusum est, quæ rimula *glottis* dicitur, & fistulæ peristomium imitatur. Circum glottidis labia conspiciuntur fibræ tendinosæ quas *chordas vocales*; ob illarum officium, appellare laudato viro placuit. Dum pectus musculorum vi attollitur, aer exterior vesiculis pulmonaribus sese inserit, non secus ac sublato embolo antliæ cavitatem ingreditur. Hic motus quo fit ut pulmones aerem admittant, *inspiratio* dicitur; *expiratio* autem vocatur motus contrarius quo depressi pulmones aerem expellunt, atque motus uterque communi nomine *respiratio* appellatur. His positis, totum vocis artificium ita explicatur. Dum aer e pulmonibus per tracheam ejicitur, glottidis fibrillas vellicat, motuque tremulo agitat. Illæ autem fibrillæ, pro tonorum varietate, majoris vel minoris tensionis capaces sunt, atque ad illam tensionis varietatem producendam laryngis cartilaginibus aptatos musculos deprehendit D. Ferrein. Ex his omnibus jam suspicio oriri potest vocis organum ad chordas sonoras atque etiam ad instrumenta pneumatica pertinere; tendinosæ fibrillæ hinc & inde ad glottidis labia protensæ cum duplici chordarum serie in clavicymbalo posunt comparari; glottis ipsa pro earundem chordarum intervallo haberi potest, penarum quibus chordæ vellicantur, locum tenet aer fibrillas agitans, vis autem hujus aeris pulmonum actione producta digitorum officio fungitur. Hanc conjecturam ita confirmant experimenta ut extra omnem dubitationem posita videatur. Ex animalium cadaveribus trachea simul cum larynge abstrahitur, tensis deinde magis vel minus glottidis fibrillis, aer in tracheam ore immittitur, pro majori vel minori tensionis gradu diversi audiuntur toni. Ita

84 INSTITUTIONES PHYSICÆ

pulchre succedit experimentum ut diversi animalium toni clare distinguantur; tauri mugitus, latratus canis, ovis belatus facile discernuntur. Fibrillarum seu chordarum vocalium vibrationes attentis oculis sese conspicuas præbent. Si eadem fibrillæ digitis vel instrumento aliquo stringantur atque ad varias longitudoines contrahantur, inflata larynge, diversos edent tonos. Quod autem in prædictis experimentis aer præstat, id in vivis animalibus exequitur natura. Etenim demonstrat Anatomæ chordas vocales horizontaliter extensas extremitate anteriori, *cartilagini scutiformi* annexas esse, extremitate autem posteriori alligatas esse *cartilagini arytenoideæ*; cartilago autem scutiformis hinc & inde cartilagini annulari innititur, atque his duobus fulcris tanquam centro in arcum curvilineum flectitur modo antrorsum retrorsum, modo sursum deorsum & contra. Talis autem motus fieri non potest nisi cartilagine illæ chordas vocales trahant in partes oppositas, nempe cartilago scutiformis trahit retrorsum antrorsum, cartilagine autem arytenoideæ trahunt antrorsum retrorsum. Itaque chordæ vocales magis vel minus tenduntur. Experimenta illa in animalium cadaveribus instituta unusquisque in se ipso facile sumere poterit; si enim digitum gutturi quis immergat ita ut ad spatium prædictis cartilaginibus interceptum pertingat, facile experietur nullum produci posse tonum acutiorem nisi pressionem aliquam digito sentiat; contra autem si tonum graviolem edere tentaverit, in partem contrariam cartilago movetur & digito libertatem restitui experietur. Ex his principiis, ex diversa nempe fibrillarum conformatione & tensione, explicari potest in diversis hominibus, atque etiam in

PARS II. SECTIO I. 85

in eodem homine diversa ætate vocis varietas; sed hæc omnia facile colliget quisquis explicatam sonorum doctrinam probe intellexerit.

Cæterum quæ hætenus explicavimus longe differunt ab iis quæ antea tradiderat D. Dardart; in glottidis labiis admittebat quidem fremitum aliquem, sed fremitum hunc ad tonorum varietatem secundario tantum conferre existimabat, atque ex diversa glottidis apertura totam vocis melodiam repetebat. At opinionis falsitatem demonstravit D. Ferrein; glottidis amplitudinem, sive aperturam per gradus mutavit, eadem manente fibrillarum tensione; contra autem servata glottidis apertura, tensionis gradus mutavit; in primo casu eundem, in altero autem diversum audiuit tonum. In his autem omnibus experimentis solam tonorum varietatem simul cum larynge a cæteris partibus abstractam adhibuit vir clarissimus, at si sonus organis extra laryngem positis, gutturi, nempe, dentibus, linguæ, labiis, genis, naribus, palato, admiranda motuum varietate illidat, jam sonus in vocem articulatam erumpit. Hanc autem motuum varietatem ad litteras exprimendas necessariam surdos natos sæculo proxime elapso docebat Joan. Conradus Amman Medicus Amstelodamensis atque etiamnum Parisiis extat vir stupendæ industriæ D. Pereyrerius qui intra breve tempus mira successus felicitate surdos loquelam docet.

VIII. Soni doctrinam in aere & in instrumentis sonoris hætenus consideravimus, ultima jam superest hujus articuli pars quæ est de ipso auditus organo. Præcipuas ejusdem organi partes, quantum officii nostri est, ordine describemus illarumque usum exponemus. Externa auris pars oculis subjecta dicitur

tur *auricula* quæ est cartilago sive membrana capitis cuti firmiter annexa, hinc inde prominens & in modum conchæ expansa ad aerem majori copia excipiendum. Hinc ii quibus resecta est auricula, minus distincte audiunt, & manu instar cornu inflexa uti solent. Conchæ adjacet *meatus auditorius* partim cartilagineus partim osseus, qui variis flexibus velut spiris contorquetur, ut reflexionum numerus ideoque & sonus augeatur. In fine meatus auditorii occurrit membrana quædam subtilis annulo osseo imposita, nullo foramine pertusa, versus meatum auditorium tantisper cava, versus interiora auris convexa; hæc *membrana Tympani* appellatur. Quando quidem vero variis aeris motibus excipiendis hæc eadem tympani membrana modo laxari, modo tendi debuerat, huic operi officula quatuor a sapientissimo divinoque artifice destinata conspiciuntur, *malleolus*, nempe, *incus*, *stapes* & *os orbiculare*. Malleolus sua cauda tympano nectitur, capite incudi cui subjectus est stapes, hic autem cum officulo orbiculari conjungitur; illa autem quatuor officula sic inter se junguntur & adjunctis musculis trahuntur, ut tympani membranam modo laxiorem, modo tensiorem, reddi oporteat. Itaque dum extrema stapedis pars contrahitur, annexa illi incus impelli debet eademque contractio diffundi in malleolum qui cum altera sui parte tympano adhæreat, tympanum ipsum debet contrahere ejusque membranam duriorē reddere. Prædicta officula continentur in cavitate quæ *tympani cavitas* appellatur. In cavitatem tympani hiat *tuba Eustachiana* quæ est canalus longior partim osseus, partim cartilagineus, per palatum protensus, communicans cum aere externo qui ore & naribus hauritur.

ritur . In eandem cavitatem hiant quoque *orificia cellularum mastoidearum* & fenestraz duæ ; *ovalis* quam tegit *stapes* & *rotunda* quæ tenui membrana tegitur .

Jam consideravimus meatum auditorium & cavitatem tympani , contemplanda superest *spelunca* alia , ut dicunt , quæ *offis petrosi* cavitates continet , & *labyrinthus* vocatur . Media labyrinthi cavitas appellatur *vestibulum* ad quod ducit fenestra ovalis . Ad cavitates labyrinthi pertinet etiam *choclea* cui opponuntur tres canales *femicirculares* dicti ; illi autem canales per quinque foraminula hiant in vestibulum . Maxime autem considerari debet admirabilis *chocleæ* structura ; hoc nomine appellata eoquod *cochleæ* figuram imitetur in varios gyros sinusque inflexa ; hujus quidem spiræ initio latiores sunt & ampliores , deinde vero sensim contrahuntur . Huic autem ossi lege admirabili contorto subtiliores atque molliores nervorum fibræ a septimo pari diffusæ superextensæ conspiciuntur . Ad labyrinthum quoque referri potest *processus mastoideus* qui cellulas plurimas intus continet ; quarum quidem cellularum beneficio sonus admodum multiplicatur . Tandem ultima cavitas est *aquæ ductus Fallopii* qui est canalis longior & labyrintho protensus in osse petroso insculptus , nervum *acusticum* seu *auditorium* continens . Nervus autem ille in duos ramos dividitur , *mollem* scilicet & *durum* ; mollis per labyrinthum distribuitur , durior autem per varios ramulos tendit ad tympanum , aurem externam aliasque vicinas partes .

Ex his licet brevius explicatis jam intelligere est qua ratione in nobis excitetur sensatio soni . Sonus qui in aere externo producit in auriculam incidit & concham ingre-

ditur ; unde in meatum auditorium deferitur ; hinc transmittitur in tympani membranam quæ sic concussa ad modum aeris incidentis contremiscere incipit . Hujus membranæ fremitus communicatur aeri in tympani cavitate contento qui per tubam Eustachianam illuc advenit , atque in eodem aere pulsus excitantur . Hic motus per fenestras propagatur ad fibrillas nerveas quæ internas superficies vestibuli & trium canalium semicircularium vestiant , agitantur etiam ad modum aeris diversa atque consona quæ per cochleam secundum harmoniæ leges extenduntur nervi acustici filamenta & inde motus per nervum acusticum ad cerebrum usque transfertur & anima sonum percipit . Aliquem aerem quem *innatum* dicunt in labyrinthi cavitatibus latere vulgo creditur ; verum fictitius omnino videtur aer ille , cum nullus intra cavitates labyrinthi aditus , exitus nullus unquam observari potuerit ; & præterea ad explicandum auditus artificium nullius omnino est utilitatis ; præsertim si verum sit quod paucis abhinc annis traditum est , mulierem Bononiensem rerum anatomicarum peritissimam detexisse communicationem inter utramque fenestram & cochleam , ope duorum muscutorum qui a fenestris cum nervo auditorio connectuntur . Quare nulla est aeris innati necessitas . At necessarium omnino esse patet aerem in tympani cavitate contentum ; hinc nascitur surditas si tubæ Eustachianæ hiatus obstruatur . Ea de causa fit ut pictores dum in tabella auditorem aliquem intensius attentum pingere volunt , cum ore patulo pendulaque maxilla inferiori representare soleant .

IX. Unum jam superesset investigandum qua scilicet ratione fieri possit ut diversi per aerem

PARS II. SECT. I. 89

aerem tremores sine ulla tonorum confusione eodem tempore ad aures propagentur variasque excitent soni sensationes. Et quidem in concentu musico soni tam graves quam acuti eodem tempore distincte audiuntur. Tanta est propositi phænomeni difficultas ut meræ hæcenus habeantur conjecturæ & vix aliquid amplius unquam sperandum sit. Ingeniosissima sane est hypothesis viri doctissimi D. De Mairan qui in aeris particulis diversos admittit elasticitatis atque tensionis gradus & diversos veluti tonos, ita ut aliæ particulæ tardius, aliæ velocius suas vibrationes perficiant, atque ita diversas sensationes producant. Si chorda musica motu oscillatorio agitetur, hæc motuum suum transfert potissimum in aeris particulas unisonas, eodem scilicet elasticitatis & tensionis gradu præditas; illæ igitur aeris particulæ instar chordæ eunt & redeunt. Inde rationem reddunt aliqui Physici cur chorda unisona etiam non pulsata, si tamen fuerit proxima, resonet & tonum edat; cum enim chorda illa ad chordæ pulsatæ modum contremiscere apta sit, recurrentibus aeris pulsibus motum accipit tonumque producit. Simili modo aliæ sunt aeris particulæ quæ eodem tempore duplum absolvunt vibrationum numerum, ille igitur velociores aeris vibrationes in chordam ipsam transferri debent, debilius tamen ut pote integra chordæ vibratione turbatæ, atque hinc fieri ajunt ut præter tonum totius chordæ quem *fundamentalem* dicunt, audiatur etiam tonus qui *octava* vocatur, aliique etiam toni excitentur, non solum in chorda pulsata, sed in proximis quoque chordis licet intactis. Generatim rem ita explicant. Si chordæ duæ proximæ in partes aliquotas dividi possint quæ sint inter se ad uni-

unisonum, aut quod idem est, quæ vibrationes isochronas peragant, & harum chordarum una pulsetur sonumque edat, chordæ duæ sese in partes aliquotas veluti dividunt, recurrentibus aeris particulis; ut ad unisonum reducantur. Ita si capiantur ejusdem chordæ partes duæ quarum ratio sit 2 ad 3 & æqualiter tendantur, alteraque pars pulsetur, dividetur minor chorda in partes duas, & major in partes tres quæ singulæ seorsim vibrationes suas perficient. Nam brevior chorda, duarum nempe partium, tres vibrationes perficit; dum chorda longior partium trium duas tantum absolvit; quare chorda brevior frequentiores in aere pulsus excitat quorum recursum chorda longior citius quam par est agitur, & cum utriusque chordæ aerisque oscillationes congruere non possint, nisi singulæ chordarum partes aliquotæ & æquales suas vibrationes seorsim peragant, motus ille conspirans tam in chordis quam in aere tandem producit. Hæc quidem tonorum multiplicitas experimentis demonstratur, sed demonstrata non est allata experimentorum ratio. Et enim, ut alias prætermittam difficultates plurimas, si diversæ aeris elasticitati tribuenda sint hæc Musices phænomena, cur audiuntur duntaxat soni tono principali acutiores? Non minus distincte graviore toni in hac hypothesis audiri debent; cum in utroque casu iisdem motibus recurrant atque conspirent aliæ aeris particule quæ unam vibrationem peragunt, intereadum chorda tota vibrationem unam perficit. Sed hæc satis dicta sint in re admodum difficili & nunquam fortasse explicanda.

A P P E N D I X

*De quibusdam capitulis præcedentis
utilitatibus.*

I. **E**Xplicatam in præcedenti articulo doctrinam intelligendis Musices principiis utilissimam esse ex dictis jam manifestum est; hanc autem utilitatem paucis, quantum licet, declarabimus. Musica dicitur scientia varios sonos ita conjungendi ut auribus gratam exhibeant harmoniam. De tonorum varietate nonnulla exponemus, & de suavitatis musicæ causa pauca adjungemus. *Intervallum* apud Musicos appellatur differentia inter duos sonos ratione *gravitatis* & *acuminis*, ita ut quo major est differentia inter graviorem & acutiorem sonum, eo majus quoque intervallum esse dicatur. Quare si differentia sit nulla, nullum quoque est intervallum, illudque intervallum *evanesce*ns appellatur *unifonus*. Si intervallum fuerit 2:1, si nempe soni rationem duplam teneant, intervallum dicitur *octava*; sed primaria sonorum intervalla jam definivimus, nunc vulgarem tonorum *scalam* explicabimus; hæc notissimis vocibus exprimitur *ut, re, mi, fa, sol, la, si, ut*. In hac autem scala præcedentes toni ex ordine tenent sequentium numerorum rationem nempe 1. $\frac{2}{1}$. $\frac{3}{2}$. $\frac{4}{3}$. $\frac{5}{4}$. $\frac{6}{5}$. $\frac{7}{4}$. $\frac{8}{5}$. Ex hac numerorum serie patet æqualia esse vel fere æqualia intervalla inter *ut re, re mi, fa sol, sol la, la si*; verum intervalla inter *mi fa, & si ut* licet æqualia inter se, præcedentium intervallorum sunt tantum dimidia; quare intervalla *mi fa, si ut* appellari solent *hemitonia*,

nia, reliqua autem intervalla *ut re*, *re mi* &c. soni proprie dicuntur. Ut autem perspicua intervallorum notio habeatur, docendum est qua ratione soni duo fractis numeris expressi possint inter se comparari. Ita si comparandi sint soni *mi*, *sol* qui exprimuntur numeris $\frac{5}{4}$, $\frac{3}{2}$, multiplicetur numerator 5 per denominatorem 2; deinde numerator 2 ducatur in denominatorem 4; habebuntur numeri duo integri 10 & 12, ac proinde sonorum illorum ratio, sive, quod idem est, intervallum exprimitur ratione eorundem numerorum 10, 12; vel 5, 6; atque sonorum intervallum eo majus erit quo magis ratio illa differt ab unitate. Nec difficilius numeris exprimitur sonus aliquis cujus data est ratio ad alium quemlibet sonum datum. Ita invenienda sit tertia major quintæ $\frac{3}{2}$, hæc tertia major debet esse $\frac{5}{4}$ ipsius quintæ, ut patet ex tertiæ majoris & quintæ definitione; nam tertia major soni cujuslibet est $\frac{5}{4}$ ejusdem soni; quare fractiones duæ $\frac{5}{4}$, $\frac{3}{2}$ in se invicem multiplicari debent, orieturque nova fractio $\frac{15}{8}$ quæ erit tertia major quæsitæ. Hæc omnia statim manifesta sunt ex demonstratis in Arithmetica, ubi de numeris fractis. Simili ratione in aliis quibuslibet tonis operatio institui debet; ita ratio *si ut* est $\frac{15}{16}$ ad 1 seu 15 ad 16, atque eadem est ratio *mi fa*, nempe $\frac{5}{4}$ ad $\frac{4}{3}$ seu 15 ad 16. Hinc patet hemitoniorum intervalla esse tonorum integrorum intervallis dimidio circiter minora. Etenim ratio *ut*, *re*, est $\frac{9}{8}$, ratio autem *si ut* vel *mi fa* $\frac{15}{16}$, quæ duæ rationes si conferantur cum unitate, differentię inveniuntur $\frac{1}{9}$, $\frac{1}{16}$ quarum una est
alte-

PARS II. SECT. I. 93

altera circiter duplo major. Jam ad vulgarem
scalam variosque tonos redeamus.

Si intervallum componatur ex tono & hemitonio; ut *mi sol*, *la ut*, *re fa*, dicitur *tertia minor*, Intervallum ex duobus tonis compositum quales sunt *ut mi*, *fa la*, *sol si*; vocatur *tertia major*. Intervallum ex duobus tonis & hemitonio compositum quales sunt *ut fa*, vel *sol ut*, appellatur *quarta*. Si intervallum constat ex tribus tonis quales sunt, *fa si*, vocatur *Trito* vel etiam *quarta superflua*. Intervallum ex tribus tonis & hemitonio compositum quale est, *ut sol*, *fa ut*, *re la*, *mi si*, vocatur *quinta*. Si intervallum componitur ex tribus tonis & duobus hemitoniis quale est *mi ut*, appellatur *sexta minor*; dicitur autem *sexta major*; si intervallum ex quatuor tonis & hemitonio componatur, quale est intervallum, *ut la*. Si intervallum ex quatuor tonis constet & ex duobus hemitoniis quale est, *re ut*, dicitur *septima minor*; at vocatur *septima major*, si intervallum ex quinque tonis & hemitonio componatur, tale est intervallum *ut si*. Tandem si intervallum ex quinque tonis & duobus hemitoniis compositum fuerit, quale est *ut ut*, appellatur *octava*. Evidens autem est illas tonorum definitiones convenire cum iis quas in articulo præcedenti tradidimus, unicum exemplum afferre satis sit. Intervallum *mi sol* est *tertia minor*; nam *mi* in scala vulgari exprimitur per $\frac{5}{4}$, *sol* autem per $\frac{1}{2}$, quare intervallum inter *mi* & *sol* exprimit ratio fractionum $\frac{5}{4}$, $\frac{1}{2}$ quæ quidem ratio est 10 ad 12 vel 5 ad 6, ac proinde intervallum illud est *tertia minor*, ut antea explicavimus. Si præcedentibus tonis in instrumento musico certus assignetur vibrationum numerus, vel, quod idem est,
datus

datus *gravitatis* & *acutiei* gradus, atque deinde toni illi duplo acutiores reddantur, nova obtrinetur scala in qua toni singuli ad tonorum præcedentium *octavam* ascendunt. Quia vero a primo *ut* usque ad secundum *re*, alterius scilicet superioris vel *ascendentis* scalæ, novem soni computantur, ideo intervallum inter illos duos sonos dicitur *nona*, quam componi manifestum est ex sex tonis & duobus hemitonis. Simili ratione intervallum inter *ut* primæ scalæ & *fa* secundæ vocatur *duodecima*, atque ita deinceps. Dupla octava appellatur *decima quinta*; at, *decima septima* vocatur dupla octava tertiæ, & *decima nona* dicitur dupla octava quintæ. Totam rem numeris explicabimus.

Si tonus aliquis dicatur 1, illius octava acutior erit 2, gravior autem octava $\frac{1}{2}$: numeri illi exprimunt vibrationum numerum dato aliquo tempore peractarum. Quare ut toni alicujus octava acutior habeatur, numerus hunc sonum exhibens per 2 multiplicari debet; si vero multiplicetur per $\frac{1}{2}$ habebitur octava gravior. Itaque si sonus aliquis V. G. *ut* dicatur 1, illius octava acutior erit 2, dupla octava erit 4, tripla 8. Contra autem octava gravior erit $\frac{1}{2}$, dupla octava $\frac{1}{4}$, tripla octava $\frac{1}{8}$. Simili modo numerus 3 exprimet duodecimam acutam, duodecima autem gravis erit $\frac{1}{3}$. Ita decima septima major acuta erit 5, gravis autem $\frac{1}{5}$; facile patet duodecimam acutam toni alicujus esse octavam quintæ ejusdem toni. Etenim si tonus *principalis* dicatur 1, erit quinta $\frac{2}{3}$, cujus octava est 3. Simili ratione decima septima major acuta, est dupla octava tertiæ majoris ejusdem toni; etenim quinta exprimitur fractione $\frac{1}{5}$, quæ multiplicata per 4, ut habeatur dupla octa-

va,

va, ab it in 5, nempe in decimam septimam majorem acutam. Porro evidens est quinque tonos qui vulgarem scalam constituunt in duos semitonos veluti divisos concipi posse; ita inter *ut* & *re* medius est tonus qui *ut* semitono superat, & a sono *re* deficit eodem semitoni intervallo. Si aliquis scalæ tonus semitoni intervallo gravior reddatur, dicitur *be-mollis*; vocatur autem *diesis* si eodem intervallo fiat acutior.

His præmissis quæ quidem musices amatoribus probe cognita esse debent, jam referendum est præclarissimum sane experimentum quo Musicæ doctrinæ pars maxima innixa videtur. Si chorda aliqua musica præsertim crassior, plectro pulsetur, præter tonum principalem sive fundamentalem auditur octava ejusdem toni, & præterea duodecima & decima septima major acuta satis facile distinguuntur, hoc est, octava acuta quintæ, & dupla octava tertiæ majoris. Id quidem jam diu notum est; at subtilius aliud experimentum habuere recentiores Musici; si nempe comparantur chordæ duæ quarum una sit ad duodecimam gravem chordæ pulsatæ, altera autem ad decimam septimam majorem gravem, fremitus quidam in duabus illis chordis observatur, nullus tamen auditur sonus. Præterea chordæ illæ in partes veluti dividuntur, una scilicet in tres partes æquales, altera autem in quinque, atque partes illæ in quas dividuntur chordæ, toni principalis octavam redderent, si non fremitum duntaxat sed sonum quoque ederent. Jam tonus fundamentalis dicatur *ut*; quia vero eadem chorda producit duodecimam & decimam septimam majorem, audietur quoque octava ipsius *sol*, & dupla octava toni *mi*. Quare cum octavam

vam *sol* & duplam octavam *mi*, quasi sponte instrumenta ipsa suppeditent; hinc colligitur duos prædictos tonos simul cum tono *ut*, consonantiam magis naturæ consentaneam ac proinde & magis perfectam reddere.

Simili ratione illa tonorum consonantia voce expressa, foret omnium perfectissima; at quia vocis limites tam magna intervalla non facile permittunt, prædictis tonis illorum octavæ substituuntur; hinc nascitur cantus *ut*, *mi*, *sol*, *ut* omnium simplicissimus & maxime facilis, in ipso corpore sonoro habens originem. Quia verò in hoc cantu *ut*, *mi*, *sol*, *ut*, tertia *ut mi* major est, hinc cantus ille *modus major* appellatur.

In secunda experimenti parte percipitur fremitus duodecimæ gravis & decimæ septimæ majoris itidem gravis; hinc derivatur alter *modus* qui *minor* appellatur, cujus denominationis rationem explicabimus. Cum tertia minor gravis sit *la*, tertia major gravis erit *la bemollis*; nam tertia major a minori differt hemitonio, sed intervallum *ut la* est tertia minor, ergo intervallum *ut la bemollis* erit tertia major. Quare decima septima major gravis erit dupla octava ipsius *la bemollis* gravis. Simili modo cum quinta gravis sit *fa*, duodecima gravis erit octava ipsius *fa* gravis. Itaque cum toni substitui possint octavis, hinc oritur cantus naturæ consentaneus, *fa la bemollis ut*, in qua tertia *fa la bemollis* minor est & ideo *modus* ille appellatur *minor*.

Verum quia resonante tono principali *ut*, in tonis *fa*, *la bemollis* fremitus duntaxat percipitur, nullus autem sonus qui in primo modo auditur, hinc *modus minor* minus perfectus est quam *modus major*. Ex his principiis

piis musicæ compositionis leges derivarunt vi-
ri celeberrimi eruditique *orpei*, sed nobis
satis sit ea breviter exposuisse quæ in chor-
darum musicarum vibratione observantur. De
suavitatis musicæ causa re quidem valde ob-
scura aliquid subjungemus quod sua utilitate
non caret, & sic *miscbimus utile dulci*.

II. Propria experientia unusquisque novit
ea sibi placere quorum ordinem justamque
dispositionem percipit. Ita si contemplemur
horologium, id maxime nobis placebit si ex
ejus structura intelligimus singulas illius par-
tes ita esse connexas ut ad tempus accurate
indicandum concurrant. Exemplo etiam sit Ar-
chitectura quæ *Gothica* appellatur, hæc orna-
mentorum multitudine laborat atque intuen-
tium oculos animumque defatigat. Quia ve-
ro sine partium varietate nullus rerum ordo
esse potest, hanc primariam suavitatis causam
unusquisque in seipso experitur, nempe con-
sensum sive ordinem in varietate. Et quidem
nobis displicet nimis longa rerum vel obje-
ctorum similitudo; maxime delectamur lectio-
ne librorum qui maximam nos docent rerum
varietatem; contra autem tædio afficimur si
res easdem frequentius repetitas legamus. Hanc
generalem suavitatis rationem ad musicam
transferre tentarunt doctissimi viri, hac nem-
pe ratione.

Duo in sonis potissimum consideranda sunt
quæ ordinem possunt continere, sonorum sci-
licet *gravitas* vel *acumen* & eorum *duratio*.
Itaque placebit musicus concentus, si ordi-
nem quem inter se tenent soni illorumque
durationem percipimus. Duorum sonorum ordi-
nem intelligimus, si percipiamus rationem quam
vibrationum eodem tempore editarum nume-
ri inter se habent; ita si aliquis sonus eodem

tempore tres pulsus perficiat dum alter duos tantum absolvit, jam eorum relationem atque ordinem cognoscimus. Simili modo plurimum sonorum mutuam relationem comprehendimus, si rationes omnes quas singulorum tonorum numeri inter se habent, perspectas habemus. Quia vero in sonorum duratione ordo etiam esse potest, ex hac causa voluptatem etiam capiemus si rationes quas singula durationum tempora inter se tenent, percipiamus. Cum autem soni graviore eodem tempore pauciores edant pulsus, perspicuum est sonorum acutorum rationem facilius quam gravium percipi posse, eodem tamen manente tempore & mutato duntaxat vibrationum numero. Hæc itaque regula merito observatur ut nempe gravioribus sonis major tribuatur duratio, acutioribus minor; atque eandem ob causam sonos eo magis producendos esse intelligitur quo magis sunt compositæ & perceptu difficiles tonorum rationes; fieri tamen potest ut acutiores soni tardius aliquando incedere debeant, graviore autem celeriter progredi possint, si nempe hi simplices, illi vero compositas teneant rationes. Hinc intelligitur modi utriusque *majoris* scilicet & *minoris* perfectio, cum sonorum ordinem atque relationem natura ipsa nobis suppeditet. Verum quidquid hætenus dictum est de sonorum ordine illorumque mutua relatione non ita intelligendum volumus, quæ nonnullorum est opinio, quasi ex ipsa numerorum natura facilique vibrationum proportionem suavitatis musica derivari possit. Et quidem si ex ipsa vibrationum natura illarumque facillatione pendeat harmoniæ jucunditas, quid causæ esse poterit cur tertia minor in qua vibrationes sunt ut 5 & 6, gratissimam auribus exhi-

exhibeant consonantiam; contra autem soni quorum vibrationes sunt ut 6 & 7; aures durissime offendant? Ecquis sibi facile persuadebit jucundissimam esse primam consonantiam, quia singulæ sex vibrationes simul recurrunt; in alio autem sono acerbe aures afficiuntur, quia singulæ tantum septem vibrationes simul recurrere audiuntur? Ecquis intelliget tantam sensationum differentiam ex minima tonorum differentia quæ est duntaxat $\frac{1}{36}$, nempe pars

36^a. Igitur per vibrationum relationes perceptu faciles intelligimus tantum illas tonorum rationes quas instrumentorum nostræque vocis natura exhibet, atque nomine consonantiarum illas duntaxat significamus sonorum combinationes quæ ad præcedentes modos referuntur; contra autem si ad modos illos soni non possunt referri, *dissonantiæ* appellantur. Jucunditatem semper afferunt consonantiæ; quamvis autem displiceant dissonantiæ, eas tamen aliquando adhibere licet, non tamen sine aliqua præparatione, & dummodo ad perfectissimam consonantiam statim transitus fiat. In dissonantiarum usu ars est maxima; & quidem si dissonantiarum labori & tristitiæ succedat consonantiarum facilitas & jucunditas, brevi tadio quasi sublevati majorem deinde capimus voluptatem. Frequentiores autem usurpari solent dissonantiæ in iis musicarum compositionum generibus quæ ad dignitatem & majestatem formata esse debent, quales sunt concentus sacri pro templorum majestate & religione compositi.

Ex iis quæ hætenus diximus probabilissime colligitur suas esse & quidem certissimas artis musicæ leges, nullo hominum arbitrio mutabiles. Fatendum tamen est suavitatem musi-

cam ex gentium moribus atque ingenio non parum pendere ; etenim cum sensationibus repræsentandis accommodata sit Musica , pro diversa hominum indole magis minusve jucundum esse debet idem musicæ genus . Evidens quoque est ex diversa organi conformatione repetenda etiam esse diversa de musicæ suavitate hominum judicia . Itaque si homines iisdem sensationibus diversimode afficiantur , si organum auditus sit varie conformatum ita ut validius vel debilius hæctatur atque moveatur , jam diversas de musicæ suavitate opiniones ex his causis oriri necessum est . Hac igitur ratione absolvi posse videtur pervulgata quæstio de musicæ varietate ; dum enim disputari solet usurpatum a natione aliqua musicæ genus non esse naturæ consentaneum , res perinde se habet ac si vernaculum in eadem natione sermonem naturæ consonum esse negaretur , & quidem linguæ in qualibet natione ad exprimenda hominum sensa sunt institutæ , atque talis esse debet musicæ perfectio ut vocēs ideoque & hominum indolem , quantum ars patitur , exhibeat . Sed hæc pauca breviter attingisse satis sit , oblata occasione ; quidquid sit de musicæ suavitatis causa & varietate , certissimum est tantam esse harmoniæ vim ut non solum homines quibus rite conformatum est organum plurimum delectet , sed aliquos delicatiori auditu instructos mira dulcedine rapiat , variosque affectus movere valeat . Quæ cum ita sint , purior doctrina jubet caute declinandos esse musicos concentus qui ad excitandos affectuum tumultus morumque san-ctitatem corrumpendam videntur compositi .

SECTIO SECUNDA

De lumine & igne.

CUM lux & ignis communes quasdam & affines proprietates habeant, utrumque argumentum eadem sectione complectemur; id enim in nostris institutionibus maxime cavemus ne ea separemus quæ sunt conjuncta. Itaque duo erunt hujus sectionis capita. Primum de lumine; alterum de igne.

CAPITULUM I.

De lumine.

TRiplici potissimum ratione lux considerari potest, nempe vel in corpore lucido quod lucem emittit, vel in corpore quod emissam lucem excipit, & tandem in ipso visionis organo. In hac autem divisione continentur etiam quæ de coloribus & iride in cultiori Physica solent explicari. Itaque pro rerum tractandarum varietate & ordine varios instituemus articulos.

ARTICULUS I.

De lucis natura & propagatione.

I. **O**Mnes tum veterum, tum recentiorum Philosophorum de natura lucis sententiæ licet plurimum inter se dissidentes, ad duo veluti capita referri possunt. Alii nimirum existimant lucem esse qualitatem aliquam, vel accidens quod lucido corpori modo conjungatur aliorumque accidentium instar in-

hæreat, modo ab illis separetur. Alii vero arbitrantur lucis naturam positam esse in tenuissima quadam substantia corporea quæ celerissime agitata, corpora illustret, aerem penetret, oculum subeat, nervasque fibrillas percellens sensum quemdam in illis imprimat. Quod primam opinionem spectat, eam breviter & fortasse longius quam par est, in sequenti conclusione refellemus. Quod vero attinet aliorum Philosophorum sententiam, ii rursus naturam lucis diversimode explicant. Cartesius vorticum hypothesim hic, pro more suo, implorat, & rem totam ita exponit. Sol, stellæ fixæ ex tenuissimis corporibus nempe ex materia primi elementi seu subtili componuntur & in globos conformantur qui circa proprium axem vehementissimo motu convertuntur. Jam dum globuli illi aguntur in gyrum, conantur a centro motus recedere atque hac vi centrifuga circumstantes secundi elementi globulos quaquaversum per rectam impellunt. Quia vero globulosa materia a sole stellisque fixis veluti centris, radiorum instar ad circumferentiam, hoc est, ad extremum vorticis protenditur, dum globulus Soli conterminus subtilis materiæ vi centrifuga impulsus movetur, idem motus per seriem globulorum propagatur, donec globulus oculo contiguus & ad tremorem concitatus lucis sensationem excitet; & quidem *in instanti*, non secus ac agitata baculi extremitate, alteram extremitatem statim moveri necesse est.

II. Cartesianam hypothesim validissimis argumentis impugnavit Nevvtonus, & fere demonstravit lucem consistere in subtilissimis effluviis a corpore lucido tanquam centro per radios perpetuo emanantibus & in omnem partem rapidissime vibratis. Itaque patet Cartesianam

PARS II. SECTIO I. 103

fianam hypothefim a Nevvtoniana fententia duplici ex parte maxime difcrepare. 1. Cartefius nulla admittit e corpore lucido effluvia.

2. Lucem in instanti propagari afferit; quæ duo negat Nevvtonus, cujus fententiam in fequenti cõclufione explicabimus & confirmabimus.

CONCLUSIO

LUX CONSISTIT IN EFFLUVIIS E CORPORE LUCIDO JUGITER EMANANTIBUS, ILLIUSQUE PROPAGATIO INSTANTANEA NON EST, SED SUCCESSIVA.

PROB. I. Pars. Experimentis notiffimum est radios lucis in speculi *uftorii* foco collectos tantam vim concipere ut ex duriffimis quoque adamantibus fumum exprimere, corpora plurima in calcem vitrumque redigere valeant. Hi autem alique id genus effectus intelligi nequaquam poffunt, nifi tenuiffima lucis corpuscula undequaque difperfa in minus fpatium redigantur vimque majorem acquirant; ac proinde lux in perpetua tenuiffimarum particularum emissionem confiftit. Et re quidem ipfa, corpora omnia lucida ut flamma & ignis dum lucent & urunt, tandem confumuntur atque omnino diffipantur.

Neque est quod Cartefianam vorticum hypothefim jam antea profligatam hic iterum refellamus, fatis erit oftendere lucis propagationem confiftere non poffe in preffione quadam per fluidum aliquod elasticum diffufam. Etenim fluidum illud preffionem fuam undequaque exercet, non fecus ac in fono videmus contingere. Itaque fol etiam latens fub horizonte nobis foret confpicuus, eodem plane

modo quo sonus in quavis cubiculi parte per fenestram auditur. Ex his jam sic concluditur. E corporibus lucidis perpetuo emanant effluvia illa, quæ experimentis sese manifestant & quæ lucis phænomena omnino postulant; atqui sine perpetua corpusculorum emanatione explicari non possunt experimenta, lucisque phænomena quibus minime satisfacit fluidi elastici pressio. Ergo. &c.

PROB. II. Pars. Luminis propagationem *instantaneam* non esse, sed tempore aliquo indigere, ex prima conclusionis parte manifestum est. Etenim cum effluvia a corpore luminoso ad oculos nostros emitti progredique debeant, motum illum in instanti fieri repugnat; cum quolibet materiæ translatio aliquod postulet temporis intervallum. Successivam luminis propagationem non solum demonstrant observationes astronomicæ, sed ipsam quoque propagationis velocitatem ostendunt. Circa Jovem Satellites quatuor revolvuntur, ut circa terram luna; & quemadmodum luna eclipsim patitur ubi telluris umbram subit, ita quoque eclipsim patiuntur Satellites ubi Jovis umbram subeunt, Jove scilicet Solem inter & Satellitem constituto. Satelles intimus horis circiter 42 revolutionem absolvit, & in singulis revolutionibus ob exiguam a Jove distantiam in Jovis umbra immergitur. Observatum autem est, tellure inter Solem & Jovem existente, Satellitis ab umbra Jovis emersionem citius contingere quam per calculos astronomicos fieri debet; contra autem Sole inter Jovem terramque constituto, prædicti Satellitis emersionem tardius accidere observatur quam juxta tabulas astronomicas fieri deberet. Hæc autem acceleratio vel retardatio nulla alia ratione intelligi potest quam ex
luc.

successiva luminis propagatione; hæc enim efficere debet ut breviori temporis intervallo lux e minori distantia deferatur. Accuratissimis autem diuturnisque observationibus innotuit totam temporis differentiam pertingere ad 14 minuta prima, Jove accedente ad terram vel ab ea recedente per intervallum quod duplæ distantiz Solis a terra æquale est: quare attributa sunt minuta septem circiter propagationi successivæ lucis a sole ad terram. Hinc tandem argumentari licet. Successiva est propagatio illa quam instantaneam esse, & ipsi lucis naturæ & observationibus astronomicis repugnat, atqui &c. Ergo.

Objic. adversus I. partem. In hypothesi Nevvtoniana Sol qui lucis nostræ fons est & origo per vastissima undequaque spatia a multis retro sæculis corpuscula perpetuo emitteret; & quidem sine ullo substantiæ solaris detrimento; quod omni caret verisimilitudine. Quare sic argumentantur aliqui. Repugnat hypothesis illa quæ lucis solaris jacturam maximam & extinctionem fere omnem induceret, atqui &c. Ergo Resp. N. Minus nullius momenti est objectio illa quæ imperito quorundam Physicorum vulgo videtur gravissima. Licet Sol distet a terra semidiametris terrestribus ad minimum 22000, & singulis horæ semiquadrantibus novo lumine impleat sphæram toto globo terraqueo plusquam decies millies majorem, inde tamen timenda non est solaris luminis jactura. Et quidem difficultatem penitus tollit immensa luminis tenuitas quæ omnem imaginandi vim longe superat; satis sit observare levissimam plumulam filo suspensam, siquid statim solis radio, ne leviter quidem agitari. Præterea delicatissimum visionis organum, licet incurren-

tes perpetuo solis radios excipiat, nullam tamen ex hujus materiæ affluxu offensionem patitur. Verum cum tanta sit radorum solarium velocitas, necessum omnino est ut minimam & fere nullam contineant materiæ quantitatem; alioqui enim radii lucis immensa fere vi corpora impeterent totamque telluris compagem dissolverent. Hæc autem responsio facilius intelligetur, si revocetur in memoriam præclarissimum theorema in quo demonstravimus non repugnare portioem materiæ valde exiguam in vastissimam sphaeram ad Saturnum usque extendi, iisdem manentibus quæ in præsentis rerum statu observamus phænomenis. Quæ cum ita sint, substantiæ solari reparationem aliquam frustra quæsierunt nonnulli.

Inst. I. Lux corpora quædam penetrat, in aere, crystallo aliisque pellucidis corporibus liberrime diffunditur & quidem secundum lineam rectam. Hinc lucem *accidens* esse ac proinde illius propagationem in subtilissimis effluviis positam non esse, tali ratiocinatione concludunt Peripatetici. Verisimile non est subtilissima etiam effluvia intimam corporum substantiam pervadere, & per vastissima spatia motu rectilineo propagari; Ergo &c. . . . Resp. N. Maj. Prima hujus objectionis pars vix responsione indiget. Etenim si lux sit accidens, intelligi certe non potest cur ipsa aliquorum duntaxat corporum substantiam pervadat, cur corpora aliqua sint pellucida, alia autem opaca, quod quidem nos facile explicabimus ubi de pelluciditate & opacitate sermo erit.

Quod spectat rectitudinem luminis propagationem, ex lucis directione nequaquam pendet nostra conclusio. Hæc objectio in ipsos ad-

ver-

PARS II. SECT. II. 107

versarios facile retorqueri posset. Demonstrat quidem experimenta rectilineam *ad sensum* esse luminis propagationem in exiguis distantiiis. Ita in cubiculum tenebrosum introducto solari radio, lineam lucidam recta protensam observamus. Verum accurate rectilineam luminis propagationem neque in distantiiis majoribus, neque etiam in minoribus nos admittimus; quod deinde explicabimus ubi de lucis transitu per diversa media tractabimus. Interim recordari satis erit experimentum jam alias memoratum; si nempe solaris radius intra obscurum cubiculum exceptus prope corporum extrema transeat, ille per rectam progredi non observatur, sed ad corporis extremitatem inflecti atque incurvari manifesteprehenditur; quod quidem experimentum nulla ratione explicare poterunt Peripatetici, neque etiam fortasse Cartesiani.

Inst. II. Effluviorum hypothesis eam potissimum ob causam adhiberi videtur, ad explicandam nempe successivam luminis propagationem; nulla autem est hujus hypotheseos hac in re utilitas. Et quidem consideremus globulos duos æquales & elasticos quorum diameter dicatur, d ; unus autem alium quiescentem percutiat velocitate v , dicaturque, a , spatium inter globi percussi extremitatem posteriorem comprehensum; evidens est ex demonstratis in Physica generali conflictuum legibus, globuli percutientis extremitatem ante-

riorem describere spatium, a , tempore $\frac{a}{v}$

quo nempe attinget globulum alterum; deinde extremitas anterior globi percutientis & extremitas posterior globi percussi movebuntur

E 6 com.

communi velocitate $\frac{V}{2}$, hoc est, globulus qui antea movebatur velocitate V , amittet velocitatem $\frac{V}{2}$ quam globus alter acquireret. Jam

dicatur x , spatium quod punctum contactus percurrit, intereadum globulus elasticus comprimitur & relaxatur, punctum contactus per-

curret spatium x , velocitate $\frac{V}{2}$, tempo-

re $\frac{2x}{V}$, ut patet. Tunc primus globulus quie-

scit, & extremitas anterior globuli percussæ describit spatium quodlibet, c , velocitate V ,

tempore $\frac{c}{V}$. Jam vero spatium inter locum

quem ante ictum occupabat globi percutientis extremitas anterior, & inter locum quem occupabat extremitas anterior globuli percussæ, patet esse $a + x + c + d$.

Quare si

duo tantum fingantur globuli, erit differentia temporis in hypothesi *emissionis* & *pressionis*

$= \frac{d-x}{V}$. Si ponantur tres globuli, differen-

tia fiet $\frac{2d-2x}{V}$, & ita deinceps; positoque

globulorum numero n , valde magno, differentia erit quamproxime $= \frac{nd-nx}{V}$; ac

pro-

PARS II. SECTIO II. 109

proinde si fiat $d = x$, nulla erit temporis differentia, hoc est, lucis propagatio eodem omnino tempore fiet, in utraque hypothese pressionis vel emissionis. Itaque inutilis omnino est hypothesis illa, si propagationis successivæ phænomenis æque satisfaciatur pressio Cartesiana, atqui &c. Ergo . . . Resp. N. Min. Hæc subtilissima & accuratissime demonstrata obiectio iis tantum adversatur Physicis & quidem plurimis, qui ex successiva lucis propagatione corpusculorum emissionem ostendere conantur, quod quidem immerito faciunt nisi hac ratiocinatione utantur: in præcedenti formula $\frac{nd - nx}{V}$,

differentia temporis in uno duntaxat casu fit nulla, dum nempe $d = x$, hoc est, si globuli unius diameter spatio percurso, x , æqualis sit; in alio autem quolibet casu aliqua habetur temporis differentia. Quare pressionis hypothese unicus tantum casus patrocinator, cæteri omnes infiniti adversantur. Hæc quidem ratiocinatio valde probabilis est, non tamen vim demonstrationis obtinet; atque ea de causa corpusculorum emissionem non ex successiva lucis propagatione ostendimus, sed contra ex radiorum emissionem successivam luminis propagationem demonstravimus.

Objic. adversus II. partem. Validissimum successivæ propagationis argumentum ab omnibus reputatur illa temporis differentia quam in Satellitis intimi Jovialis eclipsibus observant Astronomi, pro varia Satellitis a tellure distantia. At Joannes Dominicus Cassinus hunc propagationis successivæ effectum non observavit in aliorum Satellitum eclipsibus; imo ne in ipso quidem Satellite intimo constans depre-

hea.

henditur effectus ille. Etenim si Jupiter, dum est in minima vel maxima a tellure distantia, sit simul in minima a Sole distantia, minus remotus est a terra quam si fuerit in maxima a Sole distantia, & differentia distantiarum æqualis erit differentiæ distantiarum Jovis a Sole quæ proxime æqualis est dimidiæ distantie Solis a terra, ut notum est ex Astronomia. Quare, cæteris paribus, in primo casu per tria saltem minuta citius lumen propagari deberet quam in secundo, ac proinde citius in primo quam in secundo casu conspiciunt forent eclipses, quæ tamen temporis differentia non observatur. Igitur ex observationibus astronomicis id tandem colligi potest: successivam lucis propagationem non demonstrat illa temporis differentia quæ nec constanter observatur nec talis apparet qualem postularent successivæ propagationis phænomena, atqui &c.... Resp. Dist. Maj. Non observatur ob prætermittas correctiones omnino necessarias C. Maj. adhibitis correctionibus necessariis N. Maj. D. Min. N. Conf. In tabulis astronomicis quas adhibuit Cassinus & quibus deinde usi sunt alii plurimi, omissæ fuerunt correctiones nonnullæ quas tamen necessario postulabant Satellitum Jovialium motus. Correctiones illas hic explicare non licet, cum sine doctrina astronomica intelligi non possint. Satis erit observare pro varia Satellitum positione varios omnino esse & nequaquam negligendos errores ex mutua illorum attractione oriundos. Accuratiores Satellitum Jovialium tabulas ediderunt celeberrimi Astronomi Hallejus & Bradlejus, qui omnem, quantum in re subtilissima fieri potest, adhibuerunt diligentiam, per tringita & amplius annos. Satellitum motus exquisitis telescopiis persecutus

PARS II. SECT. II. III

tus est vir peritissimus D. Pound cujus observationes cum doctrina astronomica accurate consentiunt. Itaque nullum jam superest diligentioribus Astronomis dubium quin eadem valeat in omnium Satellitum eclipsibus temporis differentia, proportionem servata. De Satellitum erroribus & correctionibus adhibendis legantur clariss. D. De Lisse litteræ ad Astronomos datæ an. 1750.

Inst. I. Si ea sit lucis celeritas ut a Sole ad nos perveniat tempore octo minutorum circiter; lux e stellis ad nos devenire non poterit nisi post longissimum tempus. Etenim licet ignota sit stellarum a tellure distantia, certum tamen est eam immanem esse & vix cum distantia solis comparandam. Hinc facile colligitur stellas à nobis videri per lumen post plures annos emissum, imo post plura annorum millia. Itaque admittenda non est hæc hypothesis quæ tot absurda & minime credibilia continet, atqui &c. Ergo.... Resp. N. Min. Minime absurda sunt hæc quæ obijciuntur, licet minus credibilia videri possint iis qui sensuum præjudiciis assueti magnitudines omnes intervallaque omnia & tempora ex crassioribus sensuum observationibus & præjudicatis opinionibus definiunt. Et quidem certum omnino est lucis radios successive propagatos a remotioribus stellis ad nos pervenire non potuisse nisi post plura sæcula; si autem supremus rerum omnium conditor stellas statim post mundi creationem videri voluerit, simul quoque creavit luminis vestigia a stellis ad nos usque protensa; alioquin inter stellas fixas esse possent aliquæ e quibus nondum ab initio mundi lux ad nos pervenisset. Cæterum si immensa hæc lucis vestigia statim Deus non creaverit, fieri posset ut aliquæ remotis.

112 INSTITUTIONES PHYSICÆ

motissimæ stellæ post multa annorum millia videri inciperent & pro stellis novis haberentur. Porro in his omnibus nihil est quod vel tantisper repugnet.

Inst. II. Admissa successivæ propagationis hypothesi, jam in corporum cælestium motibus duæ correctiones adhibendæ sunt, una scilicet ex luminis propagatione, altera autem ex ipso objecti motu. Et quidem dum objectum lucem emittere incipit, non statim hoc ipso instanti conspicitur, sed eo tardius observatur quo major fuerit inter objectum & spectatorem distantia. Si objectum & spectator quiescant, nullum in directione objecti discrimen esse potest; at si interim moveatur objectum, locus apparens qui ad primam radii directionem refertur, maxime differet a loco vero, si objecti distantia sit valde magna. Ita ob maximam stellarum distantiam, loca illarum apparentia a veris immaniter discrepant, neque vera illarum distantia ullo modo posset definiri. Hæc autem gravissima difficultas evanescit, si instantanea sit lucis propagatio; non solum enim objecta eo ipso instanti quo lucem emittunt, statim apparent, sed etiam secundum ipsam radii directionem viderentur, neque spectatoris vel objecti translatio discrimen ullum afferre posset. His premissis sic tandem concluditur. Hypothesis illa omnino repugnat quæ universam turbaret Astronomiam, atqui &c. Ergo Resp. C. Maj. N. Min. Hæc objectio occasionem præbet explicandæ correctionis astronomicæ quam lucis *aberrationem* appellant. Hujus aberrationis duplicem casum considerabimus; vel movetur objectum lucidum, quiescente spectatore; vel contra movetur spectator, interim quiescente objecto lucido.

Pona-

PARS II. SECT. II. 113

Ponamus ex objecto lucido, O (Fig. 5.) emanare radium qui, objecto quiescente ad oculum spectatoris pertingeret secundum directionem, OE, celeritate, c. Deinde fingamus ipsum objectum progredi secundum directionem, OV, velocitate, s, evidens est, completo parallelogrammo, OVEA, directionem radii incidere in diagonalem, OA, atque objectum spectatori apparere in O, quamvis revera sit in V. Itaque locus verus a loco apparente discrepabit angulo, OAV. Jam capiatur, $OV : OE = s : c$, erit velocitas radii OA, ad velocitatem secundum OE ut OA ad OE. His præmissis jam facile invenitur angulus OAV. Sinus anguli, AOV, dicatur, m; ducta ex puncto V, perpendiculari VP, ad diagonalem OA, erit, VP, ad OV, ut sinus anguli AOV ad sinum totum, ac proinde sumpta unitate pro sinu toto erit $VP = ms$; sed in triangulo VPA, sinus anguli OAV est ad sinum totum, ut PV ad AV vel OE; quare habebitur sinus anguli quæsitæ

$$\text{sinus anguli quæsitæ} = \frac{VP}{AV} = \frac{ms}{c}$$

Jam quiescat objectum in puncto O, (Fig. 6.) spectator vero promoveatur in recta AE, velocitate r; dum in A versatur, excipiet radium ex objecto propagatum per directionem OA. Quia vero radius secundum directionem OA, celeritate, c, impingit in oculum qui moveri ponitur celeritate, r, secundum directionem AE, patet radii motum dividi posse in duos quorum unus PA sit normalis ad AE, alter OP congruat cum directione AE. Quare si OA, exprimat lucis celeritatem, c, erit PA ut celeritas normalis ad AE, & OP erit celeritas secundum directionem.

rectionem EA, quæ cum sit contraria celeritati oculi, r, eundem præstabit effectum ac si augetur velocitate, r, & in oculum quiescentem incurreret. His præmissis capiatur $OA : AE = c : r$, augeaturque celeritas radii OP, parte OQ = AE, atque oculus in A, quiescens radium excipiet, cujus motus erit compositus ex motu PA, & motu QP; unde resultabit radius QA, in cujus directione objectum a spectatore in A constituto cernetur. Igitur spectatori qui, etiam si moveatur in A, tamen quiescere sibi videbitur, objectum apparebit sub Angulo QAE, quod tamen appareret sub angulo OAE, si lux propagaretur in instanti. Quare angulus QAO est differentia inter locum verum & apparentem. Jam anguli apparentis QAE sinus dicatur, m, sitque $OA = c$, $OQ = AE = r$, evidens est anguli QAO sinum

esse $= \frac{mr}{c}$, prorsus ut ante.

Hi sunt duo casus propositi in quibus patet eadem plane ratione inveniri angulum aberrationis; in primo casu data est ratio celeritatis lucis ad celeritatem objecti, in altero autem datur ratio celeritatis lucis ad celeritatem spectatoris. Evidens autem est eo majorem esse aberrationis angulum quo major est ratio velocitatis objecti vel spectatoris ad velocitatem lucis. Duo præcedentes casus ad Astronomiam transferri possent; sed res ad præsentem locum non pertinet; breviter observare satis sit per *objectum* designari posse stellam aliquam, & per *spectatorem* posse intelligi terram ipsam, si motum terræ fingere liceat. Jam ob minimam rationem velocitatis terræ ad velocitatem lucis, patet minimam omnino

mnino fore loci veri & apparentis variationem, quam tamen in hac etiam hypothesi non negligunt Astronomi. At si loco diurni terræ motus, similis motus tribuatur syderibus, aberratio fit maxima. Itaque præcedens objectio nostræ conclusioni minime repugnat, cum hanc fateamur lucis aberrationem quæ omnino negari non potest. Cæterum difficultates quæ adversus telluris quietem inde nasci possent, explicare non est hujus loci; hanc eandem doctrinam commode revocabimus ubi sermo erit de mundi systemate.

ARTICULUS II.

De lucis reflexione.

I. **Q**Uamvis præsens Articulus de reflexione inscribatur, nonnulla tamen quæ reflexioni & refractioni communia sunt, perspicuitatis ergo præmittemus. Si lucis radius medium aliquod trajiciens in medium aliud diversæ densitatis vel naturæ deinde transeat, directionem mutat; idque duplici modo fieri potest; si nempe radius medium penetrare non possit, in illius superficie reflectitur; sin contra medium possit pervadere, refringitur. Porro dum dicimus reflexionem fieri in corporis superficie, id debet intelligi dumtaxat de reflexione *quoad sensum*; hanc enim quæstionem utrum reflexio in contactu fiat vel prope contactum, speciali conclusione deinde examinabimus. Sit AC (Fig. 7.) radius ex aere in vitri superficiem PQ, incidens; ex puncto C, in quo radius superfici ei occurrit, erigatur perpendicularis MD, ad ipsam superficiem; punctum C, dicitur *punctum incidentiæ*, recta MD, *cathetus incidentis*.

incidentiæ & angulus ACM, vel ipsi æqualis DCB, angulus incidentiæ vocatur. Si radius incidens AC, vitrum penetrare non possit, mutata directione per CI, reflectitur, efficiendo angulum MCI, qui angulus reflexionis appellatur. At si radius incidens AC, vitrum penetrare possit, mutat quidem primam directionem CB, sed refractionem patitur versus CT, atque angulus DCT dicitur angulus refractus, TCB angulus refractionis, CT vocatur radius refractus, CE sinus anguli incidentiæ, & TH sinus anguli refracti.

II. Ex præcedentibus definitionibus evidens est angulum reflexionis vel refractionis, jacere in eodem plano cum angulo incidentiæ, illudque planum ad superficiem medii perpendiculariter insistere; etenim hujus anguli positio pendet ex catheto incidentiæ qui ad eandem superficiem perpendicularis est. Accuratissimis experimentis compertum est sinum anguli reflexionis vel refractionis esse semper ad sinum anguli incidentiæ in data ratione, nempe in reflexione, ratio illa semper est *equalitatis*, quantum experimentis in re subtilissima innotescere potest; in refractione autem, *constans* quidem est in eodem medio sinuum ratio, at pro mediorum diversitate varia est. Ita si punctum lucidum transeat ex aere in aquam pluvialem, sinus anguli refracti est ad sinum anguli incidentiæ ut 3 ad 4 circiter; si transeat ex aere in vitrum, ratio sinuum est ut 2 ad 3; & viceversa in transitu ex aqua in aerem ratio est ut 4 ad 3; ex vitro in aerem ut 3 ad 2. Inde autem facile colligitur radium perpendiculariter incidentem in ipsam medii superficiem, vel reflecti in seipsum, vel medium ipsum recta permeare sine ulla refractione. Et quidem in hoc casu, sinus

18 nus anguli incidentiæ $= 0$, ac proinde & si-
8 nus anguli reflexionis vel anguli refracti $=$
0, ideoque radius coincidit cum catheto in-
cidentiæ.

Si radius lucis sub quocumque angulo in medium incidat illudque non permeet, reflecti semper poterit. Verum si anguli incidentiæ sinus, ex natura medii, minor sit anguli refracti sinu, radius non semper poterit medium penetrare, hoc est, in angulis incidentiæ certi sunt limites ultra quos radius refringi non potest, nec proinde e medio in quod est emergere & in alterum transire; quod exemplo illustrabimus. Ponamus punctum lucidum ex aere in aquam incidere sub angulo fere 90° , angulus refractus foret $48^\circ \frac{1}{2}$, cum sinus totus vel sinus incidentiæ sit ad sinum anguli refracti ut 4 ad 3, ex qua ratione invenitur angulus refractus $48^\circ \frac{1}{2}$ circiter. Quare si angulus ex aqua transeat in aerem sub angulo incidentiæ $48^\circ \frac{1}{2}$, emergere debet ex aqua radendo illius superficiem efficiens angulum refractum circiter 90° . At si radius angulum incidentiæ efficeret majorem $48^\circ \frac{1}{2}$, tunc sinus anguli refracti foret major sinu toto, quod est absurdum; fieri ergo non potest in hoc casu ut radius emergat; & re quidem ipsa experimento compertum est hunc radium reflecti e superficie communi aeris & aquæ atque in aqua remanere.

III. Ex æqualitate angulorum incidentiæ & reflexionis tota pendet speculorum doctrina. Intelligatur punctum aliquod O, (Fig. 8. p. 10.) positum in axe speculi sphaerici concavi vel convexi MAB, sitque radius incidens, OM, axi AO, infinite proximus, inveniri poterit punctum F in quo radius reflexus ex puncto M, axi occurrit. Ducatur ex centro, C,

118 INSTITUTIONES PHYSICÆ

C, superficiei sphaericæ recta MC, quæ cum sit perpendicularis ad superficiem speculi in puncto incidentiæ M, hæc erit cathetus incidentiæ. Igitur angulus OMG vel CME est angulus incidentiæ, factoque angulo CMF, æquali angulo OMD, erit MD radius reflexus; axi OA, occurrens in F.

Commoditatis & facilitatis causa analytice exhibebimus rectam AF, vel ipsi æqualem MF, ut patet; cum infinite proximæ sint rectæ OM, OA. Sit OA vel MO, distantia objecti a speculo $= \pm d$, (summatum signum $+$, si speculum sit concavum, & signum $-$, si sit convexum); hæc autem signorum determinatio intelligitur ex demonstratis in Arithmetica de quantitativis positivis & negativis; etenim positio radii incidentis OM consideratur respectu semidiametri AC. Sit $AC = r$, FA vel FM $= f$, erit FC $= r - f$ (Fig. 8. & 10.) vel $= f - r$ (Fig. 9.) & CO $= -r \pm d$ (Fig. 8.) vel $= r - d$ (Fig. 9.) $= r \pm d$ (Fig. 10.). Sed (ex elem. Geom.) CO : CF $=$ MO : MF, hoc est (Fig. 8. & 9.) $\pm r \pm d : \pm r \pm f = d : f$; quare in omnibus speculis concavis

$$f = \frac{dr}{2d-r}$$

Præterea (Fig. 10.) in triangulo, CMO, habetur CO : MO $=$ Sin. CMO vel FMC : Sin. MCO vel MCF; sed in triangulo FMC, habetur quoque Sin. FMC : Sin. MCF $=$ CF : FM. Quare CO : CF $=$ MO : MF, vel $r \pm d : r \pm f = d : f$. Itaque

$$\text{in speculis convexis erit } f = \frac{dr}{2d+r}$$

tandem in qualibet speculorum sphaericorum spe-

specie prodit $f = \frac{dr}{2d+r}$. Porro observan-

dum est hanc formulam non valere, nisi radius incidens OM sit axi OA valde proximus, aut nisi superficies AM speculi inter radium incidentem & axem AO comprehensa sit valde exigua superficiei sphaericae portio. Ita (Fig. 8. & 10.) cum sit semper MF major quam AF, quo magis radius incidens OM, distat a puncto A, eo magis radius reflexus MF, accedit ad punctum A; facile autem Trigonometriae ope innotescit accurate recta AF, dato arcu AM. Etenim in triangulo OCM, præter latera OC, CM, datur angulus MCO, cujus mensura est arcus AM, ac proinde inveniri possunt anguli COM, CMO & latus MO. Deinde in triangulo FMO dantur latus MO, angulus FOM, & angulus FMO, quare habebitur latus OF, ac proinde & AF.

IV. Ex his principiis pendent omnia speculorum sphaericorum phaenomena. Si radius incidens OM, sit axi OA, parallelus, hoc est, si objectum ad distantiam infinitam sit constitutum, jam angulus EMC æqualis foret angulo FCM & triangulum CMF esset isosceles; cum duo illius anguli communem habeant mensuram nempe arcum AM. Id vero ad solares radios transferri potest, sunt enim quamproxime paralleli. Generatim autem cum radii lucis emanantes ex puncto A, & in speculi superficiem prope punctum A incidentes, in speculis concavis prope punctum F, colligantur, patet cur specula illa sint caustica seu vim comburendi habeant, si tanta sit radiorum copia ut aliquam caloris sensationem

in

in nobis excitare valeant radii illi etiam directe emissi. Hinc factum est ut punctum illud vel spatium in quo radii colliguntur, *focus* appellari soleat. Cæterum evidens est radiorum illorum vim pendere ex illorum densitate atque etiam qualitate.

Radii solares in speculum incidentes tamquam physice paralleli haberi solent; id tamen verum non est accurate; oporteret enim solem omni diametro sensibili carere, tuncque propter immensam ejus distantiam, radii sub angulo fere nullo in speculi superficiem inciderent ac proinde haberi possent tanquam paralleli; at diameter apparens solis est circiter dimidii gradus; quare radii ex disci solaris extremitatibus emanantes cadunt in superficiem speculi sub angulo gradus dimidii, ac proinde post reflexionem in eodem puncto non concurrunt, sed tota ejusdem anguli magnitudine ab eodem puncto aberrant; atque huic causæ etiam aliqua ex parte tribuendum est quod radiorum focus puncto non terminetur, sed aliquod spatium occupet.

V. Præcedentes formulæ mira facilitate exhibent quidquid pertinet ad specula convexa vel concava. Ponamus distantiam objecti a speculo esse infinite parvam; jam ob $\frac{1}{d} =$

$\frac{1}{\infty}$, fiet $f = \frac{dr}{2d+r} = \frac{1}{+\infty}$. Quare in spe-

culo concavo signum — demonstrat objecti imaginem jacere ad partem semidiametro concavitate oppositam; cum semidiameter ponatur $= r$; igitur imago in hoc casu est pene speculum. At in speculo convexo contraria ratione patet imaginem semper positam esse versus speculi convexitatem. Quia vero in
for-

d

formula $\frac{d}{2d+1}$, valor, f, non potest fieri

negativus, quicumque ponatur valor ipsius, d, hinc colligitur in speculo convexo, quicumque sit objecti distantia, imaginem convexitatis centro semper obverti.

Ponatur d, minor quam $\frac{1}{2}r$ vel 2d minor quam, r, erit $2d - r$ quantitas negativa, ac proinde in speculo concavo erit valor, f, negativus; quare imago objecti erit pone speculum.

Si ponatur $d = \frac{1}{2}r$, fiet $f = \frac{\frac{1}{2}r}{0} = \infty$,

ac proinde si objecti distantia quartæ parti axis æqualis sit, imago ad distantiam infinitam projicitur in speculo concavo, sive quod idem est, radii lucis ex objecto in speculum incurrentes reflectuntur paralleli. At in speculo convexo si ponatur $-d = \frac{1}{2}r$, erit $f = \frac{1}{4}r$.

Si ponatur, d, major quam $\frac{1}{2}r$ vel 2d major quam, r, in speculo concavo formula fieri non poterit negativa, ac proinde imago concavitati semper obvertetur. Jam formula in proportionem reducatur, erit $d : 2d - r = f : r$; quia vero, d, major est quam $\frac{1}{2}r$ & minor quam r, antecedens, d, major erit quam consequens $2d - r$, ac proinde, f, major est quam r, quare imago est ultra centrum. Si ponatur, $d = r$, erit $2d - r = d$, & $f = r$; quare in speculo concavo si objectum in centro constituitur, imago quoque in centro jacebit. At in speculo convexo si fiat $-d = r$, erit $f = \frac{1}{3}r$. Inde autem intelligere est cur oculo inter quartam axis partem & centrum speculi concavi constituto, objecti imago evanescat; est enim pone oculum; ad distantiam

Tom. V.

F

infi-

infinitam projicitur, si oculus in quarta parte axis constitutus sit; ex infinito autem ad centrum regreditur ibique cum oculo confunditur, si oculus inter quartam axis partem & centrum fuerit locatus; tunc vero in speculo confusa turbataque fiunt omnia, cum oculus seipsum undequaque videat.

Si ponatur, r , minor quam, d , in proportionem $d : 2d - r = f : r$, antecedens, d , minor erit quam consequens $2d - r$, quare f erit minor quam r . Si fiat $d = \infty$, tunc formula generalis evadit $f = \frac{1}{2} r$. Hactenus persecuti sumus phænomena quæ pertinent ad imaginis locum in speculis concavis vel convexis, nunc imaginis situm & magnitudinem breviter considerabimus.

VI. Si arcus circuli OPQ (Fig. 11. 12.) speculo sphærico BAD concentricus objecti instar consideretur, imago, opq , erit quoque arcus concentricus major vel minor pro majori vel minori a centro speculi C , distantia; præterea imago hæc erit recta, hoc est, imaginis & objecti idem erit situs, si imago & objectum ad easdem jaceant partes respectu centri speculi; contra vero imago erit inversa, si centrum C , inter imaginem & objectum fuerit constitutum. Etenim cum arcus OPQ sit ipsi BAD concentricus, rectæ OB , PA , DQ , per centrum C , transeuntes & in quibus locatæ sunt imagines, o , p , q , punctorum O , P , Q , sunt æquales inter se; quare, d , qui illarum rectarum valorem exprimit in formula generali erit quantitas constans, ac proinde ob quantitatem constantem, r , erit etiam, f , quantitas constans, hoc est, rectæ oB , pA , qD æquales sunt; ac proinde, opq , OPQ , BAD , sunt arcus concentrici. His positis evidens est, imagine & ob-

& objecto ad eandem partem respectu centri constitutis (Fig. 12.) imaginem & objectum eundem situm habere, cum singula imaginis puncta posita sint in eadem semidiametro per analogia objecti puncta transeunte. At si imago sit ultra centrum respectu objecti (Fig. 11.) cum rectæ in quibus sunt singularum objecti partium imagines, per centrum speculi necessario transeant, rectæ illæ quæ ex puncto supra axem per medium objectum transeuntem emanant, infra axem occurrunt, ubi per centrum transierunt & viceversa. Ergo si aliqua ex his rectis quæ sunt supra axem, proficiatur ex parte superiori objecti quæ proinde etiam supra axem posita est, imago hujus partis jacebit infra, cum in ea recta non pingatur, nisi postquam recta illa per centrum transiit. Evidens etiam est totam objecti imaginem ut pote lineis ad centrum concurrentibus comprehensam eo minorem esse quo propior est speculi centro, & contra. Ex dictis etiam manifestum est in speculo convexo semper rectam esse imaginem objecti in arcum speculo concentricum conformati; hæc enim imago objectumque ipsum sunt ultra centrum; decrescit autem imaginis magnitudo quo magis removetur objectum; imago enim accedit ad centrum. In speculo concavo imago etiam recta est crescitque illius magnitudo, si objectum inter superficiem & quartam axis partem sit collocatum, decrescit deinde & fit inversa dum objectum inter quartam axis partem & centrum constituitur; crescit deinde & inversa manet, si objectum ultra centrum progrediatur. Tandem ex demonstratis colligitur, eo minorem esse objecti imaginem quo minor est speculi radius, cæteris paribus. Cæterum hæc omnia in objectis cujuscunque fi-

124 INSTITUTIONES PHYSICÆ

guræ valere non possunt accurate; attamen si objecta ita sint exigua ut illorum latitudo tanquam arcus speculo concentricus possit considerari, facile intelliguntur prædicta speculorum phænomena; at si objecta figuram sphericam non habeant speculo concentricam, jam illorum imagines eo magis difformes apparent quo major est illorum superficies & quo minor est speculi radius. E. G. Si linea recta speculo spherico objiciatur, curvilinea esse debet illius imago; etenim cum singula hujus rectæ puncta inæquales habeant a speculo distantias; punctorum illorum imagines in diversis quoque repræsentabuntur distantis. Hinc patet eo magis deformatas esse imagines, quo magis quartæ axis parti proximum est objectum in speculo concavo; atque tantilla in objecti distantis mutatio, partium imagines maxime turbat.

VII. Speculorum planorum proprietates ex præcedenti formula facile etiam colligere est; etenim in speculis sphericis ponatur radius sphericitatis infinitus, nempe $r = \infty$, for-

dr

mula $f = \frac{rd}{2d-r}$ abit in hanc $f = -d$.

Hinc colligitur in speculis planis eandem esse pone speculum imaginis distantiam quæ est objecti distantia ante speculum, atque evidens quoque est in situ recto semper positam esse objecti imaginem. Quia vero in speculis sphericis, singulorum objecti punctorum imagines sunt in recta per centrum & per puncta illa transeunte ac proinde ad speculi superficiem perpendiculari, patet singulorum punctorum imagines in speculo plano esse in perpendiculari ducta ex puncto quolibet ad superficiem speculi. Tandem cum perpendiculares ex ob-

jecti

jecti extremitatibus ad speculum ductæ, sint inter se parallelæ quæ proinde ad distantiam infinitam duntaxat possunt concurrere, manifestum est imagines his rectis comprehensas objecto æquales esse, quoad singulas dimensiones. In speculo plano horizontaliter collocato, objecta in situ recto posita apparent inversa, & contra si speculum sit inclinatum, singula objecta in partem contrariam inclinata videntur. Si speculum sub angulo 45° inclinatum sit, objecta horizontaliter posita in situ verticali apparent, & contra objecta verticaliter posita in situ horizontali conspiciuntur, quod quidem evidens est, cum objecti partes singulæ pone speculum sint positæ, & quæ sunt anteriori superficiiei proximiores propius quoque pone speculum repræsententur & contra.

VIII. Alias speculorum proprietates ex præcedentibus demonstrationibus facile colligendas prætermittimus, sed silentio præterire non licet præclarissima experimenta quæ de radiis solaribus per specula plana collectis habuit vir clariss. D. De Bufon. Speculum adhibuit ex 168. speculis planis compositum; illa autem specula tali artificio erant inter se connexa ut facili manu in omnes partes converti possent. Rebus ita comparatis, solares radios speculis planis excipiebat atque ita deinde dirigebat ut singulorum radiorum imagines in eodem spatio coinciderent. Tantam vim atque efficaciam acquisiverunt collecti hoc modo radii, ut ad distantiam ducentorum pedum ex ligno flammam excitare potuerint. Hæc autem experimenta aliquam fidem & auctoritatem conciliare possent speculo, quo Archimedes Romanorum classem Syracusas obsidentium in flammam redegitur. De hoc speculo jam ab

antiquissimis Scriptoribus tradito satis accurate mentionem fecerunt Zonaras & Tzetzes Scriptores græci qui sæculo duodecimo floruerunt; Illud vero speculum ita memorat Tzetzes ut descripto speculo simillimum omnino sit. Sed quidquid sit de speculo Archimedis, certum omnino videtur specula sphærica tantam vim concipere non posse ut ad magnam distantiam comburere valeant. Re quidem vera si mediocris sit foci a speculo distantia, in spatium ita angustum rediguntur radii ut comburendi vim retineant. At si maxime augeatur foci distantia, magis ac magis disperguntur radii & debiliores fiunt. Imo si focus ad talem distantiam ponatur constitutus ut speculi diameter sub angulo 32 conspiciatur, nihil plus efficaciarum haberent radii in foco collecti quam si ope speculi plani in eundem focum immissi fuissent, quod quidem facile patet ex præcedentibus & præsertim ex num. 4. Præterea cum Sphæricitatis radius proposita distantia duplo major esse debeat (ex demonstratis,) speculum quod ad tantam distantiam vim comburendi retineret, ingentis sphæræ segmentum esse oportet; porro humanam industriam superare videtur accurata, quæ necessaria omnino est, ingentium sphærarum conformatio. Vim comburendi habere specula elliptica & parabolica, patet ex iis quæ de sonorum propagatione demonstravimus; Verum si specula illa sint valde magna, illorum structura eadem laborat difficultate aliisque incommodis plurimis. Et re quidem vera Clariss. Dufay hæc specula in distantis etiam non valde magnis adhibuit & successu caruere. Quæ cum ita sint, si Archimedeo speculo credendum sit, Scriptorum fide & physice ratiocinationis autoritate constat speculum

lum illud fuisse vitrum polygonum, eo quem diximus modo, comparatum. Neque tamen sperandum est ad distantiam quamlibet, aucto speculorum numero, vim comburendi propagari posse; huic enim efficaciz sui sunt & quidem satis angusti limites; est enim radiorum intensitas, cæteris paribus, in ratione reciproca duplicata distanriarum, ut demonstravimus in Physica generali de virtute qualibet per radios ex puncto aliquo uniformiter diffusa. Præterea huic intensitatis decremento jungi etiam debent variaz reflexiones atque impedimenta plurima quibus per longiorem atmosphæræ tractum obnoxii sunt radii. Sed quidquid sit de horum speculorum limitibus, certissimum est ea esse posse utilitatis maximæ præferrim in arte Chemica.

ARTICULUS III.

De lucis refractione.

I. **A**Ntequam refractionis causam physicam investigemus, formulam generalem exhibebimus cujus ope refracta alicujus objecti imago inveniri potest. Sit O , objectum positione datum (fig. 13. 14.) & BAI superficies sphærica refringens, cujus radius AK , sitque sinus anguli incidentiæ ad sinum anguli refracti ut p ad q . Per punctum O , & centrum K , ducatur recta indefinita, OK . Sit OI radius incidens axi OA infinite proximus, agaturque ex centro K ad punctum incidentiæ I semidiameter KI , qui erit cathetus incidentiæ. Ad radium incidentem OI , si necesse sit, productum, demittatur ex centro perpendicularis KG quæ erit sinus anguli incidentiæ OIN , vel KIG ; quare fiat

F 4. p ad

p ad q ut KG ad quartum terminum proportionalem cuius intervallo tanquam radio & centro K describatur arcus, ad quem ex puncto I ducatur tangens IH quæ occurret axi AO in puncto quæsito P. Nam ducta recta KH, ad punctum contactus, hæc erit sinus anguli KIP, qui proinde erit angulus refractus respectu radii incidentis OI. Quia vero eadem constructio valet pro singulis radiis ex puncto O, in superficiem refringentem incidentibus & puncto A, infinite proximis, evidens est radios illos ita refringi ut singuli dirigantur ad punctum P, in quo proinde jacet focus vel imago. Facile autem analytice exprimi potest recta AP. Sit OA vel OI = d, radius sphericitatis KI vel AK = + r, nempe + r, si objectum convexitati obvertatur (fig. 13.) & - r si obvertatur concavitati (fig. 14.) sit AP vel IP = f, jam (per constructionem præced.) $p : q = KG : KH$, ac proinde $KG = \frac{q \times KH}{p}$. Sed ob OI, OA

rectas infinite proximas, arcus AI considerari potest tanquam rectula ad axem OA perpendicularis, quare similia sunt triangula rectangula OAI, OKG, atque etiam triangula PAI, PKH. Ergo $OK : OI = KG : OI \times KG$

$$AI = \frac{OK}{OI \times KG}, \text{ \& } KH : AI \text{ vel,}$$

$$\frac{OI \times KG}{OK} = PK : PI \text{ vel PA. Igitur PA} = \frac{OK}{OI \times KG \times PK}$$

$$\frac{OK \times KH}{OK \times KH} \text{ Substitutisque valoribus f = dpr}$$

$$\frac{dpr}{dp - q(d+r)} = \frac{dpr}{d(p-q) - rq}, \text{ pro fu-}$$

$$\text{perficiēbus convexi; \& f} = \frac{dpr}{d(q-p) - rq}$$

$$= \frac{dpr}{q(d-r) - dp} \text{ pro superficiebus con-}$$

$$\text{cavis.}$$

II. Hæ generales formulæ non secus ac in articulo præcedenti tractari possunt, quod paucis exemplis demonstrabimus. Si radius transeat ex aere in vitrum, erit $p = 3r$, $q = 20$, ac proinde $f = \frac{3r dr}{11d - 20r}$

in primo casu; in secundo autem $f = \frac{3r dr}{11d - 20r}$

Jam ponantur duo media homogenea in infinitum extensa, puta aer & vitrum, quæ duo media superficie sphaerica dirimantur, fingamus hanc superficiem aeri convexitatem obvertere & objectum aliquod lucidum atque exiguum ab illa superficie per aerem recedere in infinitum secundum directionem huic superficie perpendicularē, in formula $f = \frac{3r dr}{11d - 20r}$

, pro variis conditionibus, nempe pro diversis valoribus distantiae, d , determinabitur positio imaginis, non secus ac factum est in speculis sphaericis. In sequentibus exemplis valor distantiae, d , exprimet partes ipsius, r , sumpta, r , pro unitate.

Si valor, d , maneat inter $d = \frac{11}{\infty}$, & $d = 5$.

$d = \frac{11}{20}$, erit, f , quantitas negativa: cujus

valor crescit in infinitum, ideoque imago extra vitrum & ad partes objecti semper posita erit; nam valor, f , positivus exprimit distantiam superficiei refringentis ab imagine ultra hanc superficiem posita respectu objecti. Hæc autem imago semper erit recta, recedet deinde ab illa superficie magis ac magis in infinitum, atque radii qui vitrum permeant suoque concursu imaginis locum determinant, fient minus ac minus divergentes, donec tandem evadant paralleli. Si valor, d , maneat

inter $d = \frac{11}{20} r$ & $d = \infty r$, est semper,

f , quantitas positiva, imago intra vitrum situ inverso pingitur, versus superficiem refringentem deinde progreditur usque ad di-

stantiam $\frac{31}{11} r$ & radii qui vitrum permeantes

hanc formant imaginem atque antea paralleli, magis ac magis convergent.

Si autem superficies media dirimens aeris

concavitate obvertat, tunc $f = \frac{31 dr}{-11d - 20r}$,

ac proinde quæcumque sit distantia objecti a superficie, seu quicumque sit valor ipsius, d , erit semper f quantitas negativa, ideoque imago extra vitrum & in situ recto semper

est constituta. Si crescat d inter $\frac{1}{\infty} r$ & ∞r ,

valor f infinite parvus crescit usque ad $\frac{31}{11} r$;

quare

quare: imago recedit a superficie refringente

usque ad distantiam $\frac{3r}{2}$, & radii vitrum penetran-

trantes divergunt, sed minus ac minus. Simili ratione ad calculum revocari possent alii casus plurimi, sed rem paucis exemplis illustrasse satis sit.

III. In vitrorum usu duæ refractiones fieri solent, una nempe in ingressu, altera vero in egressu. Hunc casum qui maximæ utilitatis est, considerabimus. Sit O, positio objecti (fig. 15.) in axe OF, vitri utrinque convexi quod *lens* appellari solet, sintque C & K, portionum sphaëricarum centra, inveniri poterit punctum F, in quo radius OI axi OA infinite proximus eidem axi OA, post duas refractiones occurrit. Sit OA = d, CB = R, KA = r, FB = x, PB = z, posito P, puncto in quo radius incidens post unicam refractionem axi occurreret. Sit AB, crassities lentis = e, sitque ratio sinus anguli incidentiæ ad sinum anguli refracti in ingressu ut p ad q, in egressu autem ut q ad p. Tandem ponatur CD = m, KG =

nq,
m, erit $p : q = KG (n) : KH = \frac{p}{nq}$,

& $q : p = CD (m) : CE = \frac{mp}{q}$. Præ-

terea ob triangula rectangula OAI, OKG, similia, erit OG vel OK : OA = GK : AI,

hoc est, $d + r : d = n : AI = \frac{dn}{d+r}$.

Item ob triangula PAI, PKH, similia, erit $PA (z + e) : PH (z + e - r) = AI$
F 6 (dn

$$\left(\frac{dn}{d+r} \right) : KH = \frac{nq}{p} . \text{ Quare facta me-}$$

$$\text{diorum \& extremorum multiplicatione, erit}$$

$$\frac{dnz + den - dnr}{d+r} = \frac{nqz + enq}{p} ; \text{ unde}$$

$$\text{eruitur } z = \frac{deq + eqr + dpr - dep}{dp - dq - qr} . \text{ Præ-}$$

$$\text{terea ob triangula PCB, PBT, similia, erit}$$

$$PD (z+R) : PB (z) = CD (m) : BT =$$

$$\frac{mz}{z+R} .$$

$$\text{Tandem ob triangula FCE, FBE,}$$

$$z+R$$

$$\text{similia, erit } EC (x+R) : FB (x) = CE$$

$$\left(\frac{pm}{q} \right) : BT = \frac{mz}{z+R} , \text{ factaque, ut}$$

$$\text{ante, mediorum \& extremorum multiplica-}$$

$$p R x$$

$$\text{tione, fiet } z = \frac{qx + qr - px}{qx + qr - px} , \text{ institutaque æ-}$$

$$\text{quatione habetur } x = \frac{dpqRr + deqqR - depqR + eqqrR}{(dppR - dpqR - pqrR - deqq - dpqr + 2depq + depp + dppr - eqqr + epqr)} .$$

$$\text{Hæc autem æquatio gene-}$$

$$\text{ralis, pro diversis casibus, ad formam}$$

$$\text{multo simpliciore reducitur. Ita si fiat}$$

$$p = 31, q = 20, \text{ habetur } x =$$

$$620 drR - 220 deR + 400 erR$$

$$341 dR + 341 dr - 620 rR - 121 de + 220 er$$

$$103 \text{ lectaque vitri crassitie ac proinde facta}$$

$$620 drR :$$

$$e = 0, \text{ fit } x = \frac{341 dR + 341 dr - 620 rR}{620 drR}$$

20 drR

= ————. Tandem si duæ

$$11dR + 11dr - 20rR$$

sphæricitates ponantur æquales, ac proinde

10dr

$$x = R, \text{ erit } x = \frac{11d - 10r}{11d - 10r}$$

11d - 10r

IV. Idem inveniri potest trigonometricè. Etenim in triangulo OKI, datis OK, KI & angulo AKI invenitur IO, & angulus KIO cujus supplementum est KIG. In triangulo rectangulo IKG, datis IK & angulo KIG, invenietur KG. Fiat deinde $p : q = KG : KH$; datis autem in triangulo rectangulo KIN, lateribus KI, KH, innotescet angulus KIH. Præterea in triangulo KIP, datis latere IK & angulis IKP, KIP, habebitur KP & angulus KPI. Item in triangulo PCD, rectangulo in D, erit $PC = PK + KA + CB - AB$, daturque angulus CPD ac proinde & angulus PCD, quare habebitur CD; & fiat $q : p = CD : CE$. Præterea in triangulo rectangulo CTD, datis lateribus CT, CD, dabitur angulus TCD. Deinde in triangulo CTE, datis lateribus CT, CE, datur angulus ETC, cujus supplementum est CTF. Tandem in triangulo CTF, datis latere TC, angulo CTF, & angulo FCT = PCD = TCD, invenietur CF, ac proinde & BF = CF - CB. Si objectum O, ad distantiam infinitam removeatur, multo facilius succedit calculus; nam cum sit OI in hoc casu axi parallelus, erit angulus KIG = AKI cujus mensura est arcus datus AI. Ex hac constructione & ex calculo evidens est radium OI in aliqua ab axe communi OA, distantia incidentem, eidem axi citius occurrere; nempe punctum, F, ad punctum, B, magis accedit

134 INSTITUTIONES PHYSICÆ

dit quo major est arcus AI. Sed formulam
generalem ad exempla quædam transferamus.
Si lens vitrea sit æqualiter utrinque convexa,
& objectum lucidum satis exiguum in alteru-
tra superficie A, vel B. constitutum fingatur,
deinde objectum illud secundum directionem
axis communis removeri intelligatur in infini-

10d.

tum, evidens est ex formula $x = \frac{1}{\frac{1}{d} - \frac{1}{r}}$

11d. 10r,

objecti imaginem semper in axe occurrere.
Præterea ob valorem, x, negativum & per-

petuo crescentem inter valores $d = \frac{1}{\frac{1}{\infty} - \frac{1}{r}}$ &

10

$d = \frac{1}{\frac{1}{\infty} - \frac{1}{r}}$, imago objecti primum cum obje-

11

cto ipso confunditur rectaque apparet; deinde
ab ipso vitro ad easdem objecti partes rece-
det in infinitum, & radii qui hanc formant
imaginem, e vitro emergent minus ac minus
divergentes donec tandem fiant paralleli. In
aliis autem distantis d, valoribus, nempe

10

inter $d = \frac{1}{\frac{1}{\infty} - \frac{1}{r}}$, & $d = \infty$, valor x, erit

11

positivus & decrescens, objecti imago inver-
teretur & ad partes objecto oppositas jacebit,
ex distantia infinita regredietur tandem ad di-

10

stantiam $d = \frac{1}{\frac{1}{\infty} - \frac{1}{r}}$, atque radii qui hanc pin-

11

gunt imaginem, ex vitro primum emergent
paralleli, deinde magis ac magis convergent.

Si lens sit plano convexa, jam sphæ-
ricitatis radius alteruter fit infinitus,
quare ponatur $R = \infty$, formula $x = \frac{1}{\frac{1}{d} - \frac{1}{R}}$

20 dr R

abir in hanc $x =$

11 dR + 11 dr — 20r R

20 dr

.. Si fiant in hoc casu eadem hy-

11 d — 20r

potheses quæ in casu præcedenti, pro diversis
objecti distantis, imaginis progressum eodem
modo determinare licebit..

Si lens sit æqualiter utrinque concava ,
tunc radius, KA, versus objectum, O, con-
vertitur ideoque poni debet $= - r$; at ra-
dius CB, qui antea versus objectum dirige-
batur in partem contrariam vertitur ac pro-
inde ponendus est $= - R$, & formula præce-

10 dr

dens mutatur in hanc $x = -$

11 d + 10r

At si lens sit plano concava, jam formula

20 dr

fit $x = -$ Tandem si lens

11 d + 20r

fit ex una parte convexa, ex altera autem
concava, sphericitatis radius alteruter mutari
debet, verbi gratia, $- R$, mutatur in R ,
neglectaque crassitie vitri habetur $x =$

20 dr R

.. Hos singulos ca-

11 dR — 11 dr — 20r R

sus persequi placuit tum ob eximiam illorum
utilitatem in sequentibus articulis deinde de-
clarandam, tum etiam ut nostris auditoribus
manifesta fiat admiranda plane Algebræ fecun-
ditas.

V. De luminis reflexione & refractione
multa jam demonstravimus, verum de physica
reflexionis & refractionis causa disputant
Cartesii Nevvtonique discipuli. Reflexionem
lumi-

Luminis ita explicant Cartesiani . Si lux incidat in corpus cujus texturam permeare non possit, jam radii lucis regredi coguntur, non secus ac videmus pilam parieti impactam retrorsum redire. Corpora quæ lucem reflectunt *opaca* dicuntur, eaque ita contexta esse oportet ut radiis lucis transitum per lineas rectas negent; at si corporum particulae ita sint commissæ ut per illarum interstitia radii lucis per lineas rectas magna copia transmitti possint, corpora illa dicuntur *pellucida*. Refractionem hoc modo exponunt. Corpus omne, seclusis impedimentis recta moveri pergeret in infinitum, ideoque radius omnis oblique cadens in superficiem corporis pellucidi recta pergeret, nisi quid obstaret. Itaque quo difficilius penetratur corpus in quod radius incidit eo magis a linea perpendiculari recedet radius & contra. Hæc quidem breviter pronuntiabant veteres Cartesiani, sed quid addiderint doctissimi Cartesianæ hypotheseos reformatores deinde explicabimus. Verum ab antiquis recentioribusque Cartesianis differunt Newtoniani; reflexionem lucis non fieri in ipsa corporum superficie existimant sed in minima a superficie distantia; refractionem vero non tribuunt medii resistentiæ sed vi attractivæ, quod quæ ratione explicant, in sequenti conclusione exponemus..

CON-

CONCLUSIO

REFLEXIONEM LUCIS IN MINIMIS A CONTACTU DISTANTIIS FIERI, REFRACTIONEM VERO VI ATTRACTIVÆ MEDII TRIBUENDAM ESSE VIX IN DUBIUM VOCARI POTEST.

PROB. I. Pars. Si lux e vitro in aerem transmittatur, eadem vi reflectitur ac si transeat ex aere in vitrum, imo validius reflectitur quam si transeat ex aere in aquam; credibile non est plures esse in aere partes reflectentes quam in aqua aut in vitro. Verum rem Cartesians concedamus, quamvis omni careat verisimilitudine; at qua ratione explicare poterunt validissimam reflexionem quam lux patitur, si ex vitro transeat in vacuum Boylianum? Si lux transiens ex vitro in aerem incidat sub inclinatione majori, quam 40° vel 41° , tota reflectitur; Si inclinatio minor sit, magna ex parte transmittitur. Quis autem facile crediderit radiis lucis sub certo inclinationis angulo plures in aere poros occurrere qui luci transitum præbeant? sub alia autem inclinatione nullos hiare poros qui transitum luci permittant? id quidem intelligi vix potest, præsertim si observemus lucem ex aere in vitrum sub quocumque inclinationis angulo transeuntem magna ex parte transmitti, ipsique proinde per poros transitum patere. Tandem si lucis radii a solidis corporum partibus reflectantur, certis legibus fieri nequaquam potest illorum e superficiebus etiam eximie lævigatis reflexio. Etenim quantumvis perpolita atque tersa sit corporum superficies, plurimis tamen eminet asperitatibus, quæ si

cum

cum subtilissimis solaribus radiis conferantur, ingentium montium instar haberi debent. Itaque si radii lucis a solis corporum partibus repellantur, incerta omnino lege reflecti atque dispergi debent ob variam superficierum asperitatem, quod contrarium est experimentis. At singula reflexionis phænomena intelliguntur, si reflexionem in minimis a contactu distantis fieri cum Nevvtonianis statuamus. Et re quidem ipsa, corporum particulas in lucis radios ad minimam distantiam agere experimento primus omnium demonstravit Grimaldus. & accuratius deinde confirmavit Nevvtonus. Lumen per angulissimum foramen in tenebrosam cubiculum intromittatur, & lucis radio obiciatur tenuissimum corpus quod ipsam radii latitudinem non excedat, umbra corporis radio immissi ad notabilem distantiam projicietur latior quam utique esse deberet, si radius lucis prope corporis objecti extremitates linea recta transiret. Umbra hæc ternis inter se parallelis colorati luminis ordinibus seu fasciis limbrata apparet, quæ fimbriæ in latitudinem sese laxare conspiciuntur, ampliori facto foramine, & ita inter se miscentur ut discerni amplius non possint. Nevvtonus lamellam plumbeam acicula pertusam adhibuit, & foraminis diameter erat $\frac{1}{12}$ pollicis. Umbræ dilatatio accuratius discerni potest in majori quam in minori a corpore distantia; notum quippe est umbram in majori magis quam in minori distantia dilatari; in magnis autem longe facilius quam in parvis differentiæ observantur; At ista umbræ dilatatio deprehendi minime posset, si radii prope corporum superficies nullam ferrent repulsionem, sed in rectis lineis propagati

gari pergerent. Itaque manifestum est repulsionem aliquam pati radios a solidi atque opaci corporis superficie juxta quam incedunt. Hanc luminis proprietatem qua fit ut radii lucis corpus opacum radentes recta non pergant, sed a corporis superficie repellantur, *diffractionem lucis* appellant Physici. Verum hanc proprietatem a reflexione & refractione non differre, in hujus conclusionis progressu probabilissime ostendemus. Interim concludere licet; Reflexio lucis non fit in solidis corporum particulis, si eam prope contactum aliquando fieri demonstrent accuratissima experimenta, eamque eodem modo semper contingere ostendant validissimæ rationes, atqui &c. Ergo.

PROB. II. Pars, quæ quidem nulla alia validiori ratione evinci potest quam si refractionis phænomena secundum Nevvtonianam doctrinam explicemus, eandemque explanationem cum hypothesi cartesianâ comparemus. Spatium $ABDC$ (fig. 16) duobus planis parallelis AB , CD , terminatum repræsentet medium densius quod sit medio rariori X tum supra tum infra comprehensum. Globulus lucis, g , in minima a medio AB distantia versus superficiem AB , attrahetur. Jam ponamus radium lucis, $f g$, perpendiculariter in superficiem AB , incidere, evidens est radii directionem in medio $ABCD$, perpendicularem manere; etenim attractiones laterales utpote æquales & contrariæ sese mutuo elidunt, quare sola superest attractio perpendicularis quæ cum perpendiculari motus directione conspirat. Illæ igitur vires duæ id solum præstare debent ut nempe radius perpendiculariter moveri pergat, & motu accelerato transeat in AB , ob. medii densioris attractionem; deinde
au.

autem in medio uniformi ABCD ob æqualem undequaque attractionem motu acquisito æqualiter progredietur. Verum ubi radius emerget ex CD, vi attractiva medii ABCD retrahetur; quare evidens est radium lucis in medio inferiori eodem modo retardari quo accelerabatur in medio superiori, ac proinde in medio inferiori X, eadem movebitur velocitate qua progrediebatur in medio superiori, antequam perveniret ad AB. Hic autem mediorum resistantiam non consideramus; Sermo enim est de globulis qui per medii interstitia libere transeunt; alii si quidem globuli intra medium reflectuntur vel absorbentur.

Simplicissimum directionis perpendicularis casum demonstravimus, jam directionem obliquam expendamus. Sit directio obliqua HG, agatque vis attractiva medii in distantia GP; considerari debent vires duæ, una secundum directionem, HG, perpetuo eadem, altera vero secundum perpendicularem, GP, perpetuo variabilis. Ex hac virium compositione fit ut globulus minimum describat curvæ arcum GI, versus IB concavum ob motum acceleratum, non secus ac gravia oblique deorsum projecta describunt parabolam quæ concavitatem telluri obvertit. At ubi globulus pervenit in, I, recta trajiciet medium Y, secundum tangentem curvæ antea descriptæ, motuque uniformi pertinget ad K; Sed emergens ex CD, retrahetur vi attractiva ad medium Y; quare rursus considerari debent vires duæ, una secundum directionem tangentis perpetuo eadem, altera autem perpendicularis, globuli motum retardans iisdem gradibus quibus antea versus AB, fuerat acceleratus, ac proinde globulus curvam, KL, priori similem & æqualem describet, sed
sua

PARS II. SECT. II. 141

fitu contrario positam ob motus retardationem, non secus ac gravia sursum oblique projecta describunt parabolam quæ convexitatem telluri convertit. Tandem ubi globulus extra limites attractionis pervenit, secundum directionem tangentis moveri pergit, ut ante.

Ex hac explicatione facile intelligitur notissima attractionis lex qua fit ut radii lucis ex medio rariori transeuntes in densius, accedant ad perpendicularem; contra autem recedant a perpendiculari, si transeant e medio densiori in rarius; id quidem evidens est ex curvarum GI, & KL, contraria positione. At in hypothesei cartesianæ intelligi non potest lex illa. Etenim si medii resistantiæ tribuenda sit luminis refraction, radius lucis transiens ex medio rariori in densius refringi debet recedendo a perpendiculari; quod enim curva Gi, versus iB, concavitatem obvertat, id fit ob velocitatis incrementum secundum directionem perpendicularem, Gp; at in hypothesei cartesianæ velocitas perpendicularis semper decrescit. Etenim etiam si fingamus minorem esse resistantiam in medio densiori quam in rariori, V. G. in aqua aut vitro quam in aere, quod absurdum videtur; Si tamen radius transeat ex medio quod magis resistit, in aliud quod resistit minus, aliquam licet minorem patietur motus retardationem; ac proinde non intelligitur qua ratione radius ad perpendicularem accedat.

Præterea si refractionis causa sit medii resistantia, radius magno refractionum numero vexatus, non solum velocitatis suæ partem aliquam amittet, sed & totam poterit amittere, non secus ac corpori solido medium fluidum trajicienti contingit. Id vero experimentis contrarium omnino est; re quidem ipsa debiliior

bilior exit radius diversa permeans media ; sed illam lucis jacturam inde oriri putandum est quod partes aliquæ intercipientur aut intra medium reflectantur ; cæterum aliæ omnes particulæ quæ e medio emergunt , totam primitivam retinent velocitatem . Et quidem accuratissimis experimentis compertum est lucis radium per diversa media utcumque refractum eandem subire refractionis legem , ita ut constans semper maneat ratio sinuum incidentiæ & refractionis . At si refractionis causa sit medii resistantia , jam mutata radii velocitate incertis omnino legibus , ipsam quoque curvarum, GI, KL, naturam & positionem mutari necessum est , ac proinde sine ulla constanti lege variabilis foret radii incidentis & refracti positio .

Ex iis quæ hætenus explicavimus admiranda facilitate intelligitur qua de causa refractionis in reflexionem mutari numquam possit , si radius ex medio rariori in densius transeat , contra autem si transitus fiat ex medio densiori in rarius sub certa inclinatione , refractionis abeat in reflexionem . Primus casus statim patet ; etenim quæcumque sit radii inclinatio , vis attractiva medii densioris efficere debet ut radius ad ipsam medii superficiem citius perveniat , & sub minori inclinatione medium penetret , ut patet ; cum radius refractus accedat ad perpendicularem . Jam ponamus radium , IK , (fig. 17.) ex medio densiori in rarius incidere sub inclinatione satis magna , evidens est radium vi attractiva medii densioris retrahi versus CD : At talis esse potest radii in K inclinatio ut composita cum vi attractiva versus CD , abeat in directionem Lm , plano CD parallelam , antequam radius extra medii densioris attractionem excurrat ;
quam

PARS II. SECT. II. 143

quam radius regredietur per curvam, Mno, priori, Lki, similem & æqualem, eritque inclinatio, onC, inclinationi priori iKD, æqualis; ideoque in hoc casu accurata sit reflexio. Nec minori felicitate explicantur difficillima alia lucis phænomena quæ aliam quamlibet hypothesim videntur respuere. Sed de his deinde, ubi occurret locus, sermonem habebimus. Interim concludemus: vix in dubium vocari potest illa refractionis causa quæ naturæ legibus consentanea est lucisque phænomenis accurate satisfacit, atqui &c. Ergo.

Objic. Adversus utramque partem. Lex analogiæ præscribit similium effectuum easdem asferendas esse causas. At corporum solidorum lucisque reflexio sunt effectus omnino similes. Ergo lucis reflexio ex immediato superficiæ reflectentis contactu pendere videtur. Resp. Dist. Maj. Si effectus ita similes sint ut omnia sint paria accurate C. Maj. Secus N. Maj. & conf. Itaque inter magna corpora & subtilissima lucis corpuscula institui non potest accurata comparatio; quod quidem ex demonstratis de vi attractiva manifestum omnino est; cum longe alia esse debeat magnorum corporum minimarumque particularum attractio mutua. Præterea similes non esse effectus illos demonstrant plurima lucis phænomena, sed satis sit demonstratum refractionis lucis exemplum quæ aliquando mutatur in reflexionem; id vero corporibus solidis non contingit. Diversam utriusque reflexionis causam postulant experimenta; & quidem si corpus ab aliquo plano reflectatur, angulus reflexionis angulo incidentiæ æqualis esse non potest, nisi corpus incidens sit accurate sphericum & perfecta elasticitate donatum, & præterea planum reflectens perfecte lævigatum esse oportet; quæ
qui.

quidem omnia ex demonstratis in Physica generali reflexionum legibus facile colliguntur. Attamen radii lucis ita reflecti observantur in speculis, ut angulorum reflexionis, & incidentiæ æqualitas tanquam accuratissimum experientiæ principium habeatur. At speculorum superficies quamvis lævigatissima videatur, debet tamen esse admodum scabra, & irregularis: & quidem ad perpolienda vitra adhiberi solent pulvisculi quorum profecto particulæ radiis luminis longe crassiores, inducere debent sulcos monticulosque plurimos, a quibus lumen omne quaquaversum admodum irregulariter, ut a scabro pariete, reflecteretur. Tandem si analogiæ legem hic quoque velint nonnulli Physici, aliquo modo in utraque reflexionum specie valere potest, ut patebit ex sequenti objectione.

Inst. Omni carent verisimilitudine oppositæ illæ leges quibus fit ut radii lucis in certis casibus refringantur, in aliis autem repellantur. Ecquis sibi facile persuadebit mediorum superficies ita variabili lege *in distans* agere ut radios lucis modo admittant, ut fit in refractione, modo autem repellant ut fit in reflexione; id saltem postularet analogia naturæ ut ad certos usque limites vigeret attractio quæ deinde mutaretur in repulsionem, hanc scilicet attractionis & repulsionis varietatem operante fluido aliquo, pro diversa corporum reflectentium & refringentium natura. His positis sic argumentantur aliqui. Commentitiis viribus quæ agunt in distans, & modo attrahunt, modo repellunt, anteponenda est hypothesis quæ universalibus naturæ legibus magis est consentanea, atqui &c. Ergo... Resp. C. Maj. & *permitto* Minorem. Nostram conclusionem directe non petit hæc obiectio;
tan-

tanquam probabilissimum quidem & fere demonstratum habemus reflexionem lucis fieri in minimis a corpore reflectente distantis, non tamen omnino negamus elasticas, licet sensibus minime conspicuas, atmosphæras circa ipsam corporum superficiem dispersas. Hanc hypothesim ingeniosissime quidem excogitarunt recentiores Cartesiani syllematis reformatores; rem ita explicant. Fingamus dispersam esse circa vitri superficiem subtilissimam atmosphæram quæ radio lucis occurrat; hæc autem atmosphæra licet subtilissima, crassior tamen erit si conferatur cum luminis tenuitate. Ponamus deinde atmosphæram illam non esse medium uniforme, sed diversam habere densitatem; radius oblique in atmosphæram incurrens curvam minimam describet non secus ac in attractionis hypothesi; nam vis huius fluidi radium ad ipsam corporum superficiem impellentis gerit vices attractionis, non secus ac vis centrifuga materiæ subtilis gravia deorsum trudit. Quare res perinde se habet, siue attractionem siue atmosphæram impellentem admittamus. Eadem plane ratione intelligitur reflexionem fieri posse in ipsis atmosphære particulis; ac proinde fictitium esse attractionis principium aut saltem minime necessarium ajunt Cartesiani. Fatendum quidem est ignotum illud fluidum cuius leges pro arbitrio fingi atque refingi possunt, nulla fortasse severa & geometrica demonstratione refelli posse; observabimus tamen radii oblique incidentis velocitatem in velocitates duas dividendam esse, unam scilicet perpendicularem & perpetuo variabilem, alteram vero constantem secundum directionem parallelam. At si radius vi atmosphære refringatur, huius atmosphære fluidum resisteret quoque secundum

Tom. V.

G

dum

146 INSTITUTIONES PHYSICÆ
dum directionem parallelam. Sed quidquid sit,
attractionem & repulsionem velut phænomena
consideramus, doctissimos quidem variarum
hypotheseon auctores impense veneramur; sed
propositus harum institutionum scopus diffici-
les causas investigare non patitur. Satis erit
observare reflexionis & refractionis phænome-
na tribuenda esse eidem potentiaæ quæ pro di-
versis circumstantiis diversimode agit, quæ-
cumque sit potentia illa. Etenim si radii lu-
cis ex vitro in aerem exeant sub tali incli-
natione ut refringantur, aucta autem inclina-
tione reflectantur, eadem omnino vi refra-
ctionem & reflexionem produci demonstravi-
mus. Cum præsentī conclusionē conjuncta sunt
alia phænomena plurima quæ in sequentibus
articulis opportunius explicabuntur.

ARTICULUS IV.

De visione.

I. **EX** præcedentibus articulis totum pen-
det visionis artificium; sed ipsum vi-
sionis organum, quantum nostri est instituti,
breviter describemus. Oculi figura fere est
sphærica, pars tamen anterior est paululum
magis convexa & tunica *cornea* vocatur, ubi
pellucida est; reliquum autem oculi integu-
mentum quod opacum est, dicitur *Sclerotica*.
Pars scleroticæ anterior quæ corneæ adjacet,
tegitur tenui membrana quæ vocatur *adnata*
& efficit *album oculi*. Adnata tegit quoque
corneam, sed ita tenuis ibi est ut difficile di-
stinguatur. Ab anteriori parte cum cornea
juxta circumferentiam cohæret tunica *uvea*
dicta, quæ plana est & in medio foramen ha-
bet quod appellatur *pupilla*. Uvea constat ex
fibris

fibris circularibus concentricis ad angulos re-
 ctos per fibras *longitudinales* ad centrum ten-
 dentes intersectis. Fibras illas musculosas esse
 a nemine hætenus demonstratum est ; imo
 peritissimus anatomicus Ruyschius qui circa
 oculi structuram diligentius versatus est , fi-
 bras istas , maximam partem , vasa esse osten-
 dit , atque celeberrimus vir D. Du Vernoi
 oculum Ceti diligentissime contemplatus , eas-
 dem fibras ex musculorum numero rejiciendas
 esse judicavit. In medio oculi magis tamen
 versus partem anteriorem , positum est corpus
 molle , pellucidum , lenti convexæ simile cu-
 jus superficies posterior anteriorem convexita-
 te superat ; vocatur *humor crystallinus* . Axis
 hujus cum oculi axe per centra pupillæ &
 bulbi oculi transeunte coincidit . Sustinetur
 crystallinus humor filis , quæ in singulis pun-
 ctis circumferentiæ hujus coherent & interio-
 ri parti oculi annectuntur juxta circumferen-
 tiam corneæ , in formam arcus inflectuntur &
 muscoli creduntur , atque *ligamenta ciliaria*
 nominantur : hæc inter se junguntur & cum
 crystallino separationem in oculo efficiunt ,
 huncque in duas cavitates seu *cameras* , ut
 dicunt , unam anteriorem , alteram postero-
 rem dividunt. Anterior cavitas repletur flui-
 do aquæ simillimo , dicitur *humor aqueus* , ca-
 vitas posterior repletur humore pellucido ejus-
 dem circiter densitatis cum humore aqueo ,
 sed minoris fluiditatis , *humor vitreus* vocatur .
 Superficies posterior & interior oculi tegitur
 tunica *Choroides* dicta , fusco colore tincta ;
 hanc iterum tegit membrana tenuissima cui
 nomen *Retina* datur . *Nervus opticus* ad po-
 steriorem bulbi oculi partem paululum ad la-
 tus huic inseritur , & ita cum oculo jungitur
 ut exterius nervi integumentum cum Sclero-

tica cohæreat & sequens cum Choroide ; fibræ autem ex quibus retina constat, concurrunt & medullam nervi constituunt . Oculus in capite movetur variis musculis cum Sclerotica cohærentibus, de his vero dicere juris nostri non est ; consideramus enim oculi structuram duntaxat quatenus ad luminis motum pertinet .

II. His præmissis , jam intelligitur admirandum visionis artificium . Radii luminis e superficie corporum, vel prope superficiem reflexi corneam primum permeant, tum in aqueum humorem incidentes, ii qui oblique cadunt, tali ratione refrangi debent ut viciniore quam antea fiant ; transeunt enim ex medio rariore in densius, nempe ex aere in aquam . Deinde pupillam subeunt, atque intra crystallinum humorem qui densior est aqueo, iterum refracti magis ad se invicem accedunt . Tandem in vitreum humorem incidunt atque denuo refracti magis convergunt . Radii quidem ex humore crystallino in vitreum minus densum transeunt a perpendiculari recedunt, sed ob *lenticularem* crystallini figuram contingit ut radii a perpendicularibus recedentes sibi ipsis viciniore fiant, quod quidem patet ex iis quæ demonstravimus de refractione duplici per vitra utrinque convexa . Itaque radii in humorum trajectu has refractiones passi, in retina coeunt, hanc concutiunt, nervi optici filamenta movent ac tandem motus ad cerebrum propagatur .

Ut autem tota res in meliori lumine collocetur, ponamus ex singulis superficie ali-cujus punctis emanare undequaque lucis radios, jam superficie punctum quodlibet considerari poterit tanquam vertex conijus basis est ipsa pupilla, tum radii refracti alium gene-

generant conum priori oppositum cujus basis quoque est pupilla; vertex autem est in oculi fundo in quo scilicet radiorum ex aliquo puncto emanantium concursus, ejusdem puncti imaginem repræsentat. Illi autem duo coni habent axem communem quem velut lineam rectam considerare licet; nam in hoc casu vix attendi debet refractione quam radii in crystallino subeunt, tum in ingressu, tum in egressu; itaque fingi potest singulos radios utrumque prædictum conum formantes cum ipso axe communi confundi; ac proinde quodlibet superficiei alicujus punctum distinguitur, eo quod ejusdem puncti imaginem ad fundum oculi transmittat radius per centrum pupillæ transiens. His positis, si punctum objecti sit in ipso magnitudinis visibilis centro puta R , (Fig. 18.), aliud ejusdem superficiei punctum Q , ad dexteram positum, sui ipsius imaginem in oculum emittet per radium Qq , qui priorem radium Rr in centro pupillæ interfecabit; quare imago, q , ad sinistram imaginis, r , jacebit, ac proinde imagines illæ pingentur in situ inverso, si cum punctorum R , Q , positione conferantur. Itaque cum radiorum ex quolibet puncto emanantium fasciculus sive conus ad simplicem radium per axem reduci possit, tota objecti superficies ad oculum relata se habet tamquam pyramidis lucidæ basis, cujus pyramidis vertex est ipsum pupillæ centrum; radii autem qui hanc formant pyramidem in oculi fundum producti, aliam generant pyramidem oppositam ipso organi fundo comprehensam, cujus proinde basis est tota objecti imago, quæ cum suis coloribus depicta præsentis objecti sensationem in nobis excitat. Quodnam vero sit primum visionis organum, an sit Retina, an

Chorois disputant aliqui Physiologi; quæ quidem quæstio videtur omnino superflua; singulæ enim organi partes, pro suo officio, ad distinctam visionem conferunt; verum cum Retina ex medullosa nervi optici portione componatur, huic parti tribuenda sunt præcipua visionis munera. Neque ad Physicos pertinet definire quo artificio pupilla dilatetur & contrahatur. Indubitatum quidem est pupillam non ejusdem semper diametri apparere, sed nimia illabente lucis copia contrahi, & contra dilatari. Hunc reciprocum pupillæ motum fibris muscularibus tribuunt aliqui; sed rem alio modo explicant alii; de pupillæ contractione & dilatatione tentamen proposuit vir Clariss. Weibrechtius in commentariis Petropolitans Tom. 3. at his relictis, oculorum vitia illorumque remedia, quod quidem Physicorum juris est, exponemus.

III. Cum lucis radii imaginem puncti ex quo emanarunt, secum deferant & per vitrum convexum refracti in foco sese decussent, evidens est radios illos plano aliquo ultra vel citra punctum intersectionis exceptos ejusdem puncti imaginem repræsentare; quæ quidem imago magis extensa minusque vivida esse debet quo major est illius a foco distantia. Ex majori illa imaginis amplitudine fieri debet ut puncti alicujus contigui imago cum priori imagine partim confundatur. Quare si duo illa puncta diversum habeant colorem, imago ex his duabus imaginibus composita tres exhibebit colores; pars enim duabus imaginibus communis compositum colorem admittet. Itaque imago illa permixta neque objecti dimensionem, figuram, colorem, splendorem repræsentare poterit, sed justo major erit atque confusa; Verum in concursu seu foco radiorum,

PARS II. SECT. II. 151

rum, punctorum duorum imagines sunt nitide separatae & propriis coloribus distinctae.

Quae cum ita sint, objecti alicujus distincta est visio, si radii retinam attingunt in vero concursus puncto, hoc est, in vertice conorum lucidorum qui ex unoquoque objecti puncto proficiscuntur. Contra autem visio confusa est, si radii ante vel post concursum ad retinam perveniant. Praeterea objecti imago vivida atque distincta trans superficiem refringentem convexam representata, in axe per objectum & centrum sphaericitatis transeunte constituta est, ut in praecedenti articulo demonstravimus; quare objecta distincte non videntur, nisi versus objectum dirigatur axis per oculi & pupillae centra transiens; & re quidem ipsa in objecto distinctissime non percipitur, nisi punctum illud ad quod hic axis pertingit. Jam vero ad explicandam vitiosam oculorum constitutionem, aliud superest observandum. Si objectum aliquod collocetur in aliqua distantia a superficie refringente convexa, immota, & constantis sphaericitatis, deinde autem objectum ad superficiem illam accedat, objecti imago recedet (ex demonstratis). Quare si imago objecti in eodem loco fixa retineri debeat, vel removenda est superficies refringens accedente objecto, vel semidiameter sphaericitatis minnenda, quae quidem omnia ex articulo praecedenti sunt manifesta. Igitur homines qui eximio pollent visus organo, oculos ita conformatos habent & ita facile mobiles, ut radii ex eodem objecti puncto emanantes & pupillam fere paralleli subeuntes, quod fit in distantia satis magna, in ipsa retina colligantur. At si objectum ad oculos accedat ita ut lucis radii ex aliquo objecti puncto ema-

nantes, pupillam ingrediantur divergentes, tunc spectator ita oculos accomodare potest in singulis objecti distantis, ut imago in retina semper exaretur, sive id faciat lentem crystallinam versus pupillam propius admovento, sive reducta ad maiorem convexitatem lente crystallina aut tunica cornea. Crystallinae lentis mutationem fieri ligamentorum Ciliarium ope persuasum habent plerique Anatomici. Cornea quoque mutationi obnoxia esse potest vi muscutorum *rectorum* qui oculum juxta directionem axis comprimunt, illumque versus orbitæ fundum retrahunt.

IV. Ex his intelliguntur diversa oculorum incommoda. Si organum ita vitiose fuerit conformatum ut pro objectorum distantia mutari non possit, ut oportet, oculi figura, tunc intra certos limites dumtaxat distincta habetur visio; ita si lens crystallina vel etiam corneæ pars anterior justo maiorem habeat convexitatem, objectorum nimis distantium imagines prope lentem crystallinam ac proinde ante retinam pinguntur, ideoque confuse dumtaxat videntur. Ea de causa fit ut homines tali vitio laborantes qui dicuntur *Myopes* objecta propius admovere debeant; ita enim imagines sunt remotiores & ad ipsam retinam accurate pertingunt. At si corneæ segmentum anterius vel lens crystallina eam dumtaxat habeant convexitatem quæ necessaria est ut objectorum remotiorum imagines in retinam cadant, objecta proximiora pingentur ultra retinam, ideoque confuse tantum videri possunt. Qui tali oculorum vitio laborant, vocantur *Presbytæ*, atque vitium illud frequens est senibus, arescentibus enim longa ætate humoribus, complanatur lens crystallina, & corneæ pars anterior

terior deprimitur. Itaque Myopes proximiora dumtaxat objecta distincte vident per radios divergentes; Presbytæ autem distincte tantum vident objecta remotiora per radios fere parallelos. Porro ex antea explicata vitrorum concavorum & convexorum doctrina notum est eam esse vitrorum concavorum proprietatem, ut radios parallelos & ex remotiori objecto emanantes reddant divergentes; quare myopum vitium lentis concavæ ope corrigi potest. Contraria ratione lentem convexam adhibere debent presbytæ. Evidens autem est justam esse debere vitrorum concavitatem vel convexitatem & oculorum imperfectioni convenientem. Alio etiam modo ex parte aliqua emendari possunt, tum myopum tum presbytarum vitia, si nempe objecta per foramen valde exiguum conspiciantur. Etenim si pupillæ diameter instar puncti se haberet, ita ut unicum dumtaxat admitteret radium ex unoquoque objecti puncto emanantem, radii illi in totidem distincta retinæ puncta caderent ac proinde distinctam repræsentarent objecti imaginem, minus tamen vividam, ob lucis inopiam. Ea de causa fit ut objectum etiam oculo valde proximum trans exiguum foramen distincte cernamus.

Sæpe contingit ut oculorum alteruter vi maxima polleat, alter autem myopum vel presbytarum vitio laboret. In hoc casu spectator perfectiorem oculum versus objecta debet convertere, alterum autem oculum minus perfectum avertere; alioquin objecti imago confusa distinctam imaginem turbaret. Hinc fit ut aliqui distortis aspiciant oculis. Vitium illud appellatur *Strabismus*, de quo multa & quidem utilissima tradidit D. De Bufon in monum. Paris. an. 1743.

Porro licet objectum aliquod geminis intueamur oculis, illud tamen unicum apparet; æquales enim omnino fiunt in *omologas* utriusque oculi fibras impressiones, atque easdem illas simultaneasque impressiones velut impressionem unicam mens nostra judicat. At si ejusdem objecti imagines in omologis non pingantur fibris, jam ex impressionum varietate duplicis objecti sensatio in nobis excitatur. Cæterum imagines duæ in fibris omologis imprimuntur, si objectum utroque oculo per radios physice parallelas contemplemur, vel si oculi eodem plane modo versus objectum dirigantur. Hinc objectum oculis proximius, duplex nobis apparet; cum objectum illud intueri non possimus, nisi visionis axes valde inclinentur; oculus sinister objectum videt ad dexteram, oculus autem dexter ad sinistram, cum duo axes ad partes illas sint inclinati. Simili ratione duplex apparet objectum, si oculi non eodem modo obvertantur, in diversis enim locis fiunt objectorum impressiones. Hinc homines vino madidi duplex objectum loco unius apprehendere solent; ita enim perturbatis motibus agitantur nervorum muscutorumque fibræ ut versus idem objectum ea, quæ necessaria est, directione ambo oculi converti non possint. Idem quoque accidit hominibus affectuum æstu & furore misere abreptis.

V. Ad visionis doctrinam pertinet apparens objectorum magnitudo. Angulus *opticus* appellatur ille quem comprehendunt radii duo ex duobus dimensionis alicujus extremis emanantes. Quia vero, cæteris paribus, de objectorum æqualitate vel inæqualitate nullum ferre possumus judicium, nisi ex ipsis imaginibus in fundo oculi depictis, patet objecta quæ.

quælibet æqualia vel inæqualia, sub eodem angulo visa, apparere æqualia, nisi causa aliqua de apparenti magnitudine nostrum perturbet iudicium. Ex angulorum inæqualitate evidens est decreſcere apparentem alicujus objecti magnitudinem, si major sit illius ab oculo distantia, cæteris paribus. Etenim objecti dimensiones sunt bases constantes trianguli cujus latera sunt duarum objecti extremitatum ab oculo distantia; quare crescentibus lateribus pro majori distantia, crescunt quoque anguli oppositi ac proinde decreſcit angulus lateri constanti oppositus ideoque & minor fit objecti imago. Hinc magnitudines apparentes vel anguli optici objectorum sunt in ratione distantiarum inversa ab oculo, si tamen anguli sunt minimi; secus autem si anguli paulo majores sint (ut patet ex Geom.). Quare objecti alicujus majoris & valde remoti partes æquales, non apparent æquales; nam partes ab oculo remotiores minorem subtendunt angulum, & contra. Ea de causa fit ut lineæ parallelæ ad magnam distantiam productæ videantur concurrere, atque eandem ob causam sublimior turris spectatori inclinata videtur; nam si turris sit perpendicularis, spectator situm hunc perpendicularem comparat cum recta perpendiculari per oculum transeunte; quare situs perpendicularis ipsius turris, rectæ perpendiculari per oculum transeunti parallelus, in parte superiori convergere apparet.

VI. Hæc eadem principia ad visionem quæ fit per vitra vel specula transferri possunt; Etenim cum objecta non videamus nisi secundum directionem radiorum qui in oculum transmittunt objectorum imaginem, si radii illi plures refractiones & reflexiones patian-

tur ita ut mutetur primitiva radiorum directio, jam objectum videre non possumus secundum rectam ex objecto ad oculos nostros directe pervenientem. Itaque cum magnitudo apparens objecti maxime pendeat ex angulo quem radii ad oculum ultimo pervenientes comprehendunt, evidens est apparentem objecti magnitudinem mutari, si refractionis vel reflexio angulum opticum mutaverit. Quod spectat oculi distantiam a loco objecti apparente; hanc non meretur vera ultimæ imaginis ab oculo distantia. Etenim experientia compertum est, objectorum distantiam apparentem ex nostris judiciis maxime pendere. Objecta quæ fusca & obscura apparent, remotiora judicamus; atque eandem ob causam, illorum quoque magnitudinem augeamus. Si inter objectum aliquod & oculos nostros longa contineatur objectorum series, augeamus quoque tacito iudicio objecti distantiam & magnitudinem. Igitur quæ dicta sunt de apparenti objectorum magnitudine, intelligi debent duntaxat, *si omnia fuerint paria*. Itaque cum apparentem objectorum distantiam ex nostris de illorum magnitudine iudiciis æstimare soleamus, si objectorum imagines reflexione aut refractione minuantur vel augeantur, objecta illa oculo proximiora vel ab eo magis remota judicamus, facta nempe comparatione inter magnitudinem apparentem & magnitudinem veram. Quia vero objectorum quæ directe videntur, superficies est basis pyramidis lucidæ cujus vertex est in oculo; si reflexione aut refractione magis obtusus fiat pyramidis angulus, objectum quod ad hujus pyramidis basim semper refertur, oculo seu novæ pyramidis vertici propius apparebit; contrarium eveniet, si pyramis fiat magis

gis acuta. Inde autem per constructionem determinari solet apparens objectorum locus, si objecta trans vitra & specula conspiciantur. Sit RQ , objecti cujuslibet dimensio, O locus oculi (Fig. 19.), OR , axis pyramidis opticae, OT , directio radii ex puncto Q , emanantis, atque radius ille plures utcumque patiat reflexiones vel refractiones, per superficies sphaericas quarum axes singuli sint in recta OR . Ducatur, qQ , ipsi OR parallela, donec radio OT occurrat in q , erit punctum, q , locus apparens sive ultima imago puncti Q , Or erit distantia apparens oculi ab objecto, & qr locus apparens ultimae imaginis. Hinc intelligitur quare objecta trans lentem utrinque convexam visa, majora & propiora appareant; contra autem appareant minora & remotiora, si trans lentem concavam aspiciantur. Illud quidem objectorum incrementum & decrementum ex anguli optici inaequalitate constat omnino; at quidquid de apparenti objectorum magnitudine illorumque apparenti loco haecenus tradiderunt Physici, pro meris conjecturis atque hypothesebus haberi debet. Verum quemvis apparentem objectorum magnitudinem circumstantiarum varietate maxime perturbatam definire non liceat, certum tamen est ex his erroribus, saltem maxima ex parte, repetenda esse multa visionis phaenomena mox explicanda.

VII. Obscuriora magisque confusa videntur objecta quae sunt ab oculis nostris remotiora; contra autem splendidiori fulgent luce, si fuerint propiora. Hinc fit ut objecta confusa a nobis remotiora judicemus & viceversa, atque ea de causa intelligitur difficillimum picturae artificium quo lux & umbra in tabellis tanta miscetur industria ut objecta
emi-

eminere & quasi foras erumpere videantur . Eadem est ratio cur spectra nocturnaue phantasmata longe majora apparere soleant ; cum enim obscura sint objecta , majorem illorum distantiam ex visionis confusione æstimamus , illorumque magnitudinem ita enormiter augemus ut timidioribus hominibus terrorem incutere soleant . Hinc etiam reddi potest ratio cur concava cœli superficies *delumbati* fornicis instar appareat . Etenim cum sydera prope horizontem minus splendeant , eo remotiora a nobis judicantur ; atque eidem causæ magna ex parte tribuendum est quod sol & luna majores appareant in horizonte , minores autem quo altiores supra horizontem ; Etenim ponamus sphaericam esse apparentem cœli concavitatem in cujus centro posita sit tellus , diameter apparens solis eadem esse debet in qualibet supra horizontem altitudine . At cum fornicis *delumbati* figuram referat cœli concavitas , major est apparens solis distantia in horizonte quam in aliqua supra horizontem altitudine , ac proinde solis aliorumque syderum magnitudinem optica illusione augemus . Huic tamen causæ jungi etiam debet alia quam ex longa objectorum serie desumere solent Physici . Et quidem dum Sol & Luna versantur in horizonte , inter corpora illa nostrosque oculos magna sese offert objectorum multitudo , qua fit ut majorem a nobis judicemus Solis & Lunæ distantiam . Id autem frequenti exemplo ostendi potest . Si longior vallis homini in planitie constituto conspicua non fuerit , objecta ultra vallem licet longius remota judicabit spectator valde proxima . At si ad vallis marginem accesserit , oblata nempe corporum intermediorum serie , statim magnam æstimabit distantiam . Porro

Porro sphaericam ponebamus concavam cæli superficiem; & quidem certum est suos esse visioni limites ita ut nullam in remotissimis distantis differentiam discernere valeamus. At objecta quæ eandem a nobis distantiam servare videntur, apparere debent tanquam locata in superficie sphaeræ cujus centrum oculus occupat. Hinc fit ut corpora omnia cælestia licet magnis intervallis alia aliis superiora, ad eandem tamen concavam superficiem atque sphaericam referamus.

ARTICULUS V.

De coloribus atque iride.

I. Triplici potissimum ratione considerari possunt colores, nempe quatenus sunt in ipsis lucis corpusculis, vel quatenus certam quandam designant corporum dispositionem qua fit ut dati alicujus coloris sensatione nos afficiant; tandem quatenus in organo visionis certum motum imprimunt; has singulas partes ipsaque iridis phænomena prolixiori conclusionem explicabimus, paucis tamen præmissis. De colorum natura variæ sunt Philosophorum opiniones. Peripaterici colores omnes accidentia quædam & qualitates esse arbitrantur quæ variis corporibus impressæ fuerint ipsisque inhæreant, & in oculis nostris imaginem vel speciem quandam imprimant. Verum entitates illas exulare omnino jubent recentiores Physici; neque enim ad producendam coloris sensationem necesse est ut in corpore ullus color inhæreat, quemadmodum ex cibo sapor & ex acu dolor percipitur, licet sapor ipse in cibo, & dolor in acu non reperiat. Communis est igitur Philosophorum
omnium

omnium opinio colores esse non entitates aliquas vere corporibus inhærentes, sed quasdam lucis modificationes quæ juxta varium modum quo a diversis corporibus lux refilit atque refrangitur, varias in oculis vibrationes variumque coloris sensum excitant. At quamvis in hac doctrina generatim conveniant Cartesiani & Novvtoniani, rem tamen diverso plane modo explicant. Cartesiani totam colorum differentiam repetunt ex diversa corporum textura, qua fit ut radii lucis diversas in diversis corporibus suscipiant modificationes atque ita varias in nobis excitent colorum sensationes. Contra censet Novvtonus & immensa experimentorum vi plane demonstrat, majorem vel minorem radiorum coloratorum refractionem non pendere a modificationibus quas radius luminis in refractione aut reflexione acquirat, sed ex ipsius radii natura oriri, ita ut diversa colorum fila intrinsecam habeant *refrangibilitatem* coloremque intrinsecum; sed Nevvtoni doctrinam non satis mirandam sequenti conclusione exponemus.

CONCLUSIO

CERTISSIMIS EXPERIMENTIS DIVERSAM RADIORUM REFRANGIBILITATEM DEMONSTRAVIT NEVVTONUS; ATQUE EX EADEM DOCTRINA PENDENT IRIDIS PHÆNOMENA.

PROB. I. Pars. Ex innumeris experimentis quæ Nevvtonus instituit & in Optica fuscè persequitur, unum hic primum seligemus vulgo notissimum, quod rem omnino demonstrat. Est autem hujusmodi.

Paratur prisma vitreum triangulare cujus
trans-

PARS II. SECTIO I. 161

transversam sectionem exhibet triangulum ABC (Fig. 20.). Solis radius SD, per exiguum foramen D, in cubiculum satis tenebrosum immissus excipitur facie prismatis, AC, oblique in E. Pars aliqua ex, E, reflectitur, pars alia ipsum ingreditur vitrum & refringitur, ex antea demonstratis, ac proinde etiam ubi pervenit ad faciem CB, pars aliqua intra vitrum reflectitur, pars autem alia e vitro egreditur. Sed de radiis reflexis hic nihil curandum est; solos radios refractos consideramus. Porro radius in E, non refringitur totus in eodem angulo, sed plurium veluti filorum diverse refrangibilium tela retextitur; quæ omnium maxime refringuntur per, Ep, violaceum colorem exhibent, rubeum vero colorem pingunt quæ omnium minime refringuntur per Er, reliquis coloribus intermediis jacentibus in angulo pEr, nempe hoc ordine sedent colores, *rubeus, aureus, flavus, viridis, cæruleus, indicus, violaceus*. Illa autem colorum fila in egressu e facie, CB, rursus iter inflectunt & a perpendicularis TpN, trn, recedunt; filum quidem violaceum omnium maxime, & rubeum omnium minime, ac in pariete vel in charta eodem ordine pinguntur. Porro hic repræsentavimus radium SDE per unicam lineam rectam, & separata colorum fila tanquam lineas, PR, consideravimus. Verum ob foraminis D, amplitudinem ex quovis Solis puncto defertur exiguus quidam radiorum conus, seu quasi cylindrus ad E; & ob diametrum solis apparentem, Ss, defertur per quodvis punctum foraminis, D, conus, EDe, habens angulum EDe, æqualem angulo SDs ad verticem opposito, nempe diametro apparenti Solis. Hinc fit ut radii DE, De, non habeant eundem

ap-

angulum incidentiæ ac proinde nec eundem angulum refractionis. Itaque fila omnia rubra, tum quæ profecta ex eodem Solis puncto transeunt per omnia puncta foraminis D, tum quæ discedunt e diversis Solis punctis, pingunt circa R, exiguum ellipsum seu circellum quemdam, cujus centrum proxime occupat rubeus radius e centro Solis digressus & per centrum foraminis transiens. Idem præstant violacei circa P, atque ita deinceps a centro circelli rubei ad centrum violacei continua serie disponuntur circellorum omnium centra. Hinc fit ut in charta vel pariete non linea quedam colorata pingatur, sed veluti columna binis semiellipfibus vel semicirculis in R & P, & e latere binis rectis infinitas ellipses vel circellos intermedios tangentibus terminata. Porro si interceptis reliquorum colorum filis unicum duntaxat filum, E. G. viride transmittatur, alteroque prismatico frangatur, vel pluribus utcumque refractionibus vel reflexionibus torqueatur, jam illud in plura fila non dividitur, sed refringitur totum iisdem legibus quibus in primo prismatico fuerat refractum; eundem semper colorem servat, etiamsi prismatis conversione ad quamlibet partem dirigatur, sive transeat per medium lucidum, sive aliorum colorum fila trahat, aut etiam densioris umbræ confinia radat. Diversam radiorum refrangibilitatem omnino intrinsecam & immutabilem demonstrat experimentum illud, nec minus clare ostendit necessariam cum radiorum refrangibilitate colorum connexionem.

Nevvtonianam doctrinam plurimis experimentis confirmabimus, ubi solventur objectiones; quare hic pauca addere satis erit. Si radii prismate separati iterum colligantur ope lentis

lentis convexæ, ut fieri solet, color albus iterum restituitur. Attamen radii illi ex quibus collectis albedo nascitur, ultra punctum intersectionis iterum in colores suos dividuntur, sed ordine inverso; illa enim colorum fila in foco collecta sese deinde decussant. Simili ratione si radii rubri, flavi, virides, cærulei & violacei certa proportionem misceantur, subalbicans color inde nascetur qui etiam observabitur in globo septem prædictis coloribus tincto, dummodo globus ille ita rapida manu convertatur ut singuli colores organum visionis seorsim afficere non possint. Si radii solares interna prismatis superficie sub angulo valde obliquo excipiantur, radii violacei reflectentur, transmittentur autem radii rubri; ex hoc experimento colligitur radios magis *refrangibiles*, esse quoque magis *reflexibiles*, seu majori reflexionis facilitate præditos. Itaque ex his paucis experimentis & ex aliis plurimis infra explicandis manifestum est solis imaginem quam *spectrum solare* appellat Newtonus, compositam esse ex septem radiis primitivis, diversa refrangibilitate & reflexibilitate præditis, nullique mutationi obnoxiiis. Sed antequam ad alteram conclusionis partem progrediamur, observandum est solaris imaginis colores ea proportionem in septem intervallo dividi, ut proportionalibus septem tonorum musicorum intervallis satis accurate respondeant. Id quidem plane singulare est, sed præcipiti iudicio concludendum non est, inter colorum tonorumque sensationes aliquam esse analogiam; nihil enim habent sensationes nostræ ipsis objectis simile; certum tamen est diversos colores variosque colorum gradus ita inter se componi posse ut jucundissimum oculis spectaculum exhibere possint.

Prob.

164 INSTITUTIONES PHYSICÆ

Prob. II. Parrs. Iridis origo & generatio
 haud melius explicabitur quam sequenti ex-
 perimento . Capiatur globus vitreus BCD ,
 aqua plenus (Fig. 21.) , & ita aperto aeri
 objiciatur ut a tergo spectatoris E , positus
 sit sol S . Jam si radius ED , ductus ab ocu-
 lo ad punctum D , globi BCD constituat an-
 gulum $42^{\circ} 11'$ cum recta EM , quæ ad par-
 tes solis producta intelligatur , & in solem
 ipsum incurrat , tunc pars globi vitrei D ,
 rubro colore tincta apparebit ; sed si angulus,
 DEM , paulatim minuatur , tunc evanescet
 quidem color rubeus , sed in ejus locum suc-
 cedet primum flavus , tum sequentur colores
 alii ex ordine , & ultimo loco violaceus ; hic
 autem postremus color sese conspicuum non
 præbet , nisi angulus DEM , fiat $40^{\circ} 16'$;
 ita ut colorum limites intra grad. 42. min.
 11. & grad. 40. min. 16. contineantur , ac
 proinde tota colorum latitudo occupat spa-
 tium $1^{\circ} 55'$. In hoc autem experimento co-
 lores generantur per binas radiorum solarium
 refractiones & unam reflexionem . Nam ra-
 dius SB , incidens in globi punctum B , pri-
 mum refrangitur in BC , tum reflectitur in
 CD , iterumque refrangitur in DE , atque ea-
 dem directione subit oculum E , angulos præ-
 dictos comprehendens cum recta EM quæ
 producta tendit ad solem . Porro adnotare
 oportet radium Solis SB , qui globo occurrit
 in B , & post binas refractiones unamque re-
 flexionem ad oculum in E pertingit , paralle-
 lum esse rectæ ME , tendenti ad solem S .
 Etenim cum rectæ BS , ME tendant ad So-
 lem infinito propemodum intervallo a terra
 distantem , si intervallum illud conferatur cum
 distantia radiorum B , M , facile intelligitur
 rectas ME , BS tanquam parallelas haberi pos-
 se .

PARS II. SECT. II. 165

se. Quare productis SB, ED, donec concurrant in X, erunt anguli alterni, EXD, DEM, æquales inter se. Jam vero quoniam experimento compertum est apparere colorem rubrum in D, ubi angulus DEM est $42^{\circ} 11'$; cumque sit angulus DEM, æqualis angulo BXD, videbitur quoque color rubeus in D, si angulus BXD, quem radius incidens BS, & emergens DE, producti continent in X, sit $42^{\circ} 11'$. Si autem hic angulus paulatim minuatur, evanescet quidem rubeus color, sed in ejus locum succedent ex ordine colores alii, ut jam diximus. Porro ut conspicuus maneat color violaceus, necesse est angulum BXD, esse $40^{\circ} 16'$. Si autem angulus paulo minor evadat, jam nulli amplius colores apparebunt.

Ad demonstratas refractionum leges revocari potest præcedens experimentum. Est O, centrum sphaeræ vitreæ a quo in radios SBX, & BC, cadant perpendiculares OR, OQ, jungaturque OB, erit OBX, angulus incidentiæ cujus sinus est OR, sumpto OB, pro sinu toto sive radio, & OBC, angulus refractionis cujus sinus est OQ. Similiter demissis in radium reflexum CD, & emergentem EDX, perpendicularibus Oq, Or, junctoque radio OD, erit ODC, angulus incidentiæ, & ODX angulus refractionis, quorum angulorum sinus sunt Oq, Or. Jam vero in refractionibus radiorum rubrorum quæ fiunt in transitu ex aere in aquam, sinus anguli incidentiæ est ad sinum anguli refractionis ut 108 ad 81 circiter; in refractionibus vero radiorum violaceorum quæ fiunt pariter in transitu ex aere in aquam, sinus anguli incidentiæ est ad sinum anguli refractionis ut 109 ad 81; quare in radiis rubeis OR est
ad

ad OQ ut 108 ad 81, in violaceis autem ut 109 ad 81. Similiter in rubeis Oq ad Or, erit vicissim ut 81 ad 108, in violaceis vero ut 81 ad 109. Quibus constitutis, si calculus ineatur, ex Trigonometria, prodit angulus BXD pro radiis rubeis $42^{\circ} 11'$, pro violaceis autem $40^{\circ} 16'$. Qui quidem anguli cum experimento ad amissim consentiunt. Jam fingamus partem aliquam atmospheræ quæ oculis spectatoris obversatur, rotundis aquæ guttis refertam esse, & rectam EM, per oculum spectatoris ductam ita positam esse ut producta ad partes a spectatore averfas in solem incurrat; Si guttula BCD talem habeat situm respectu solis & oculi, ut radius SB, bis refractus & semel reflexus perveniat ad oculum sub angulo DEM $40^{\circ} 16'$ guttam illam violaceam apparere necessum est. Si autem guttula sublimior talem habeat situm, ut radius bis refractus & semel reflexus accedat ad oculum sub angulo $42^{\circ} 11'$, gutta rubea apparebit; & ita dicendum est de aliis guttis intermedis. Itaque intelligamus innumeras hujusmodi lineas, ita ut semper fiant anguli propriæ radiorum refrangibilitati convenientes, diversi representabuntur colores. Jam vero oculus spectatoris considerari potest tanquam locatus in communi vertice conorum omnium quos generant radii ad oculum pertingentes; evidens autem est pro diversa radiorum refrangibilitate diversos haberi conos, eundem tamen verticem, nempe oculum, habentes. Hæc autem conorum formatio intelligi facile poterit, si revocemus in memoriâ objecta satis remota ad eandem ab oculo distantiam referri, ac proinde tanquam in circulo posita videri; quare patet multa objecta hoc modo disposita, sese conspicienda præbere in coni super-

perficie. Igitur manifestum etiam est guttas rubeas pertinere ad superficiem coni in quo angulus ad verticem major est, guttas autem violaceas referri ad conum in cuius vertice angulus minor est, & ita aliorum colorum guttæ ad conos intermedios referuntur. Hinc ergo intelligitur diversas guttarum species per diversas colorum fascias vel arcus esse disponendas. Hæc quidem est origo iridis quæ *primaria* seu *interna* vocatur; sed hanc iridem circumdat aliquando alia quæ *secundaria* seu *externa* dicitur.

Iridis secundariæ generatio consimili experimento explicatur. Si nempe globus vitreus soli obijciatur ita ut angulus DEM, sit 50° 58' circiter, apparebit color rubeus in D. At si angulus DEM, evadat paulo major, evanescet quidem rubeus color, sed in ejus locum succedet primum color flavus, tum alii colores atque ultimo loco color violaceus, qui color ut fiat conspicuus necesse est angulum DEM esse 54° 9', ac proinde iridis secundariæ limites inter 50° 58' & 54° 9' continentur ita ut colorum latitudo occupet spatium 3° 41'. Quare distantia inter duas irides erit 8° 47'. Verum in calculis præcedentibus radios per centrum solis transeuntes duntaxat consideravimus; at cum diameter solis apparet sit 30' circiter, duæ extremæ colorum fasciæ, rubri scilicet & violacei augeri debent 30' in iride interiori, nempe color violaceus infra augetur 15', color autem rubeus supra totidem 15'. Contra autem in iride exteriori, color violaceus supra augetur 15', infra autem color rubeus; colores enim in utraque iride sunt contrario ordine positi. Igitur arcus utriusque distantia minui debet 30', ac proinde latitudo arcus interioris erit 2° 25', arcus autem

tem exterioris $3^{\circ} 41'$, utriusque arcus distantia $8^{\circ} 17'$; quod quidem cum observatis iridis dimensionibus accurate consentit. Porro in hoc experimento quod quidem non secus ac præcedens ad calculum trigonometricum revocatur, colores generantur per binas refractiones totidemque reflexiones, atque ea de causa fit ut secundariæ iridis colores sint dilutiores minusque vividi; & idcirco irides secundariæ videri non solent, nisi cælum antea sit admodum nubilum, & obscure, atque hinc patet cur rarissime conspiciatur tertia iris, quæ, præter duas radiorum refractiones, triplicem reflexionem admittit. Porro quemadmodum sol iridem effingit in nube aquea, idem quoque interdum facit Luna plena, si nempe eadem concurrant conditiones quæ in solari iride postulantur. Id solum interest quod iridis lunaris colores multo languidiores sint, ob luminis lunaris vim multo debiliorem. Iridis phænomena hæcenus explicavimus, ea quæ nobis conceditur doctrinæ facilitate; At uberior explicatio difficiliora requireret principia; ex demonstratis id saltem evidens est iridis phænomena omnino pendere ex diversa radiorum refrangibilitate.

Porro ex his quæ diximus intelligere est iridem primariam omnino evanescere, si altitudo solis supra horizontem major fuerit 42° . Etenim in hoc casu recta EM, radiis solaribus parallela, cum horizonte infra efficit angulum 42° majorem, ideoque linea DE quæ cum recta, EM, efficere debet angulum 42° . est infra horizontem ita ut radius ED, superficiem terrestri occurrat & ad oculum non pertingat. At si altitudo solis major sit 42° , minor autem 54° , iridem secundariam videre possumus, evanescente primaria.

maria. Porro ex angulorum magnitudine facile colligitur utramque iridem situ contrario positam esse, ut antea monuimus; nempe in iride primaria color rubeus infra, violaceus autem supra conspicietur & contra in iride secundaria, & ita alii colores intermedii oppositum ordinem servabunt. Si tellus esset tanquam punctum, vel si esset adeo parva ut liceret nobis ea videre quæ latent sub horizonte, utramque iridem primariam scilicet & secundariam conspiceremus integram. Recta linea a sole ad centrum iridis circularis ducta perpendicularis esset ad planum iridis & per spectatoris oculum transiret. Itaque in hac hypothesi iris nihil esset aliud quam corona variis coloribus distincta, eaque foret basis duplicis coni recti quorum unius vertex esset Sol, alterius autem oculus spectatoris. At iris quam in cælo spectamus pars est aliqua hujus coronæ quæ eminet supra horizontem loci; horizon enim in causa est ne reliqua pars existat ac proinde ut corona mutila conspiciatur. Hinc intelligitur quare arcus cælestis modo majorem modo minorem circuli portionem referat; illius siquidem magnitudo pendet ex parte superficiei conicæ supra telluris superficiem eminente, dum iridem conspiciamus. Hæc autem portio major est vel minor pro majori vel minori lineæ EM, ad telluris superficiem obliquitate. Hæc obliquitas crescit, pro majori solis altitudine supra horizontem, ac proinde decrescit cælestis arcus amplitudo. At semicirculo major esse non potest iridis magnitudo; Etenim sol sub horizonte latens conspicuus non est, & cælestis arcus centrum semper est in linea EM; sed sole existente in ipso horizonte, prædicta linea terram radit; ergo nunquam supra tel-

Tom. V.

H

luris

luris superficiem eminet. Si tamen spectator in altissimo monte fuerit constitutus, tunc linea EM, in qua jacet iridis centrum, magis attolletur supra horizontem, ideoque iridis arcus semicirculo in hoc casu major observabitur.

Præterea si pluvia spectatori vicinior sit, jam minoris amplitudinis erit basis coni in cuius vertice positus est oculus, ac proinde arcus tanto minor apparebit & contra. Si pluvia desinat ex parte dextera, videbitur tantum pars arcus sinistra; cessante pluvia ex parte sinistra, sola pars arcus dextera spectabitur; denique cessante pluvia intermedia, conspicua tantum erunt arcus crura. Antequam objectiones proponamus & hanc doctrinam nostris responsionibus confirmemus, prætermittendum non est quid per radios *efficaces* intelligunt Physici. Considerant nempe parallelos solis radios in guttam aqueam incidentes; ex hoc radiorum fasciculo aliqui in gutta refracti ad idem guttæ punctum concurrunt, postea reflexi & iterum refracti e gutta exeunt paralleli. Quoniam radii illi sunt valde proximi, vi satis magna oculum percellunt, si ad illum possint pertingere, & ideo dicuntur *efficaces*. At radii alii nimis divergentes tanta vi non agunt in oculum ut vividos colores, quales in iride observantur, possint excitare, & ideo radii illi vocantur *inefficaces*. De radiis efficacibus præclara quidem Theoremata cum insignioribus Geometris possemus demonstrare; sed ex his quæ hactenus explicare licuit satis patet conclusionis propositæ & Nevvtonianæ doctrinæ veritas.

Objic. Adversus primam partem. Nevvtonianam doctrinam evertere omnino videntur accuratissima experimenta. Si filum diversis par-

par.

partibus tinctum, duplici colore rubro nempe & cæruleo, inermi oculo contemplerur, omnes fide partes diversis licet coloribus pictæ in directum apparent; quod non contingeret, si radii diversam haberent refrangibilitatem. Præterea solertissimus naturæ indagator Mariottus in distantia pedum circiter 30, colorem violaceum qui majus quam trium linearum spatium occupabat, per rimam duarum circiter linearum trajecit & prismate alio valde obliquo excepit; id autem se observasse profiteretur, quandam scilicet hujus coloris partem in colorem cæruleum & rubrum fuisse mutatam. His positis sic argumentantur. Quidquid de coloribus, suis experimentis demonstratum confidunt Nevvtoniani, ad duas potissimum revocatur radiorum proprietates, nempe diversam illorum refrangibilitatem atque immutabilitatem; atqui utramque proprietatem lumini detrahunt objecta experimenta. Ergo..... Resp. Neg. Min. Experimenta illa carent ea diligentia & dexteritate, quæ in re subtilissima sunt omnino necessariæ. Et quidem quod spectat primum experimentum, diligentiori manu hoc modo iterandum est. Sumatur nempe chartæ plagula, eaque linea transversa ad perpendicularum ab uno latere ad alterum ducta in duas æquales partes media dividatur; harum una colore rubro, altera cæruleo inficiatur. Expediit porro ut colores quibus illinitur charta, largi sint ac saturi. Tum vero plagula sic infecta ad fenestræ operculum firmatur, ita ut vivido lumine illustrari queat. Si per prisma sic inspicatur charta ut refractione altius attolli videatur, dimidia ejus pars quæ est colore cæruleo infecta, altius videbitur attolli quam quæ rubra. Si autem ita convertatur Prisma

ut charta refringendo descendere videatur, tum cærulea pars aliquanto inferius quam rubra demitti videbitur. Hoc quidem experimento coloris rubri & violacei diversa refrangibilitas omnino evincitur. Quod alterum spectat experimentum; perfectam colorum separationem in prima refractione desiderari certissimum est; nempe cum violaceo colore aliud aliud peregrinum lumen permixtum fuit quod secunda refractione sese prodidit. Et quidem maxima imaginis pars colorem suum constanter retinuit, & præterea lumen illud quod inexpectatum colorem retulit, unum ex septem primitivis coloribus exhibuit. Hanc esse hujus eventus causam ostendit Nevvtonus dum anno 1716. idem experimentum omni adhibita diligentia iteravit coram Societate Londinensi, vocatis quoque externis testibus plurimis qui experientiæ fidem facerent. Quid autem in capiendis hisce experimentis observari & caveri maxime debeat, breviter monemus.

Immisso solis radio per exiguum rotundumque foramen in cubiculum tenebrosum; intervallo circiter decem duodécimve pedum a fenestra collocare oportet lentem optimæ notæ qua foraminis imago in charta ultra lentem sita distincte depingatur. Statim ac ex imagine quæ accurate rotunda esse debet, agnoscitur lentem debita positione donatam esse, proxime post lentem prisma interponitur quo lumen trajectum refringatur, vel sursum vel in latus. Ut autem imago quæ ex rotunda in oblongam mutabitur, nitida sit & parallelis inter se lateribus definita, chartam qua imago excipitur, ultro citroque movere præstabit, donec charta & prisma iusto inter se spatio distent & rectilinea imaginis latera maxime

xime distincta appareant. In capiendō experimento id curandum est diligenter ne lumen peregrinum a parietibus reflexum sese imagini oblongæ immisceat eamque interturbet; quare plurimum proderit cubiculi parietes nigris pannis aut peristromatis integere. Porro illud omnino prætermittendum non est quod plurimis dedit errandi occasionem; si nempe foramen sit adeo amplum ut radii in prisma incidentes magnam illius faciei partem occupent, jam diversa colorum fila a se invicem non satis recedunt, nisi magna sit chartæ a prismate distantia; in extremis duntaxat columnæ solaris limitibus colores videntur saturi & puri, violaceus nempe ac rubens, in medio autem color albus ex colorum omnium permixtione conflatus. Si vero sensim removeatur charta, vel imminuto foramine contrahatur imago, in utroque casu incipiunt apparere prope rubeum flavus, prope violaceum cæruleus, primum quidem dilutiores, deinde magis saturi, donec demum viridis in medio exurgat, & omnia colorum fila nitide separentur. Præterea angulus prismatis satis magnus esse debet ut nempe sub magna obliquitate in superficiem refringentem lux incurrat & ita validius refringatur. Etenim ex demonstratis de angulo incidentiæ & refractionis manifestum est quid angulus prismatis ad colorum separationem conferat; atque hinc etiam patet cur in vitris per binas superficies planas parallelas terminatis, licet habeatur refractionis, ipsa tamen colorum divisio nequaquam fiat oculis conspicua. Tandem si vitra adhibeantur aeris bullulis fœda, vel non ejusdem homogeneæ densitatis, minus feliciter succedit experimentum. Si autem obtineri nequeant prismata quæ hujusmodi experimentis

capiendis idonea sint, quæ scilicet arenæ granulis bullisque aeris penitus careant, satius erit, loco prismatum, vasis uti & confractorum speculorum partibus in formam prismatum, conclusa intus aqua pluvia, compactis, atque, ad augendam refractionem, aquam Saccharo Saturni copiose imbuere. Si lumen ita separatum, vel mediante convexa lente contrahatur, vel alteri prismati subjiatur, in utroque casu invariati omnino manebunt colores.

Inst. I. Certissimum est præter septem colores ex unico solari radio enatos, infinitam prope modum existere colorum varietatem. Ex septem coloribus primitivis componi possunt alii colores innumerabiles; porro si existant duntaxat colores septem, jam colores alii quilibet apparentes duntaxat essent & meri oculorum errores, quod absurdum videtur. Ergo &c. ... Resp. N. Conf. Ex præcedenti objectione hoc unum colligi potest duplex distinguendum esse colorum genus. Alii nempe colores sunt *primitivi* & *simplices* qui componuntur ex radiis constanti refrangibilitatis gradu præditis. Tales sunt colores septem ex radii solaris divisione, &, ut ita dicam, *anatomie* oriundi. Alii autem colores sunt *secundarii* ex coloribus primitivis permixti. Componi quidem possunt colores primigeniis coloribus similes, quoad ipsum coloris *gradum* & *tonum*, non vero quoad ipsam immutabilitatem; quod quidem demonstrant recensita prismatis experimenta. Et reipsa si diversorum colorum pulveres inter se misceantur, colorem alium oculis exhibent. At si colorem compositum exquisito microscopio contemplermur, varias colorum partes facile distinguemus.

Inst.

Inst. II. Colorum varietatem ex diversa corporum textura omnino pendere, ostendunt sumpta in minimis corporum lamellis experimenta. Si ex sapone aqua permixto minimæ bullulæ excitentur, singulorum colorum radios transmittere observantur lamellæ illæ ad certos usque crassitie limites; deinde aucta crassitie radios cæruleos primum reflectunt, deinde virides, flavos & rubeos. Aucta magis crassitie, radios cæruleos, virides, flavos & rubeos sed tantisper permixtos exhibent; tandem radios omnes ita simul compositos reflectunt ut inde color albus nascatur. Si tenuissimarum lamellarum crassities crescant secundum progressionem numerorum naturalium 1, 2, 3, 4, 5 &c., cæteris paribus, primaque lamella colorem homogeneum reflectat, hunc transmittet lamella secunda, tertia lamella hunc eundem colorem rursus reflectet, & ita deinceps; lamellæ scilicet quarum crassities sunt ut numeri impares 1, 3, 5, 7 &c. eisdem radios reflectent quos transmittent lamellæ aliæ, quarum nempe crassities crescit in ratione numerorum parium 2, 4, 6, 8 &c. Hinc colorem *primi ordinis* appellant Physici colorem homogeneum cujus singulos radios lamella aliqua reflectit; at in lamella cujus crassities est triplo minor, color *ordinis secundi* dicitur, in lamella autem cujus crassities est quinquies minor, *tertii ordinis* color appellatur. Color primi ordinis est omnium vividissimus, atque ita ex ordine crescit colorum intensitas. Quo minor est lamellæ crassities, cæteris paribus, eo majorem reflectet lucis copiam ad certos usque limites ultra quos nullam reflectet lucem; at quo major est lamellæ crassities, eo plures reflectuntur colores, atque etiam pro varia oculi positione co-

lor aliquando variare observatur ; in aliis autem casibus permanere. His præmissis experimentis , sic concludere licet . Ex diversa radiorum refrangibilitate non pendet colorum varietas quæ ad diversam corporum texturam referenda omnino videtur, atqui &c. Ergo... Resp. N. Min. Doctrinæ hæcenus explicatæ nihil repugnat proposita objectio ; & certe non negamus ex diversa corporum textura pendere colorum varietatem ; semper tamen manet diversa atque intrinseca radiorum refrangibilitas & reflexibilitas ; cum , eadem manente corporis textura , varias refractiones & reflexiones patiantur radii . Hæc , quæ obijciuntur , colorum reflexio & transmissio per tennes lamellas, *accessus facilis reflexionis & facilis transmissionis* a Nevvtono appellatur . Hujus denominationis ratio patet ; cum lamellæ lucis radios per vices reflectant atque transmittant . Quamvis autem experimenta illa Nevvtonianam doctrinam non labefactent imo confirment , fatendum tamen est illorum explicationem ea munitam non esse perspicuitate quæ rerum physicarum æquis æstimatoribus satisfacere, nullamque dubitationem relinquere possit . Hæc enim experimenta cum intima lucis corporumque natura conjungi videntur , ac proinde certiores desiderant de luminis corporumque natura cognitionem & fortasse semper desiderabunt ; afferemus tamen quod a Nevvtonianis probabilius creditur . Si duo vitra sibi invicem apprimantur quæ sint majoris sphaeræ segmenta , aer his duobus vitris comprehensus tenuissimum veluti discum efformat cujus eadem non est ubique crassities . In puncto contactus ubi crassities hæc nulla est , macula nigra apparet circa quam observantur annuli plurimi diversis coloribus tincti
& an.

& annulo albo a se invicem separati. Ut autem experimentum illud quod ad rem præsentem pertinet, probe intelligatur, de lamellarum corporumque pelluciditate aliquid observandum est. Tenuissimæ quorumlibet corporum lamellæ pelluciditatem demonstrant, si radiis solaribus objiciantur, vel microscopio conspiciantur. Quotidiana notum est experientia pelluciditate sua privari fluida, ubi in spumam abeunt. Spuma autem constat aeris bullulis tenuissimo liquoris velamine obductis. Igitur dum fluida spumescunt, in iis propriæ materiæ partes minus voluminis occupant quam meatus iisdem partibus intercepti atque aere turgentes. Quapropter corpora ex pellucidis opaca fiunt, si eorum meatus rariori materia oppleantur.

Hoc ipsum deprehenditur in corporibus solidis; sumatur nempe vitri frustum cujus crassities sit duorum circiter pollicum, aliaque subtiliora frusta sibi invicem superimponentur ita ut massam efforment ejusdem ac illud crassities. Si trans frustum prius conspiciatur, itidemque trans massam ex duobus aut pluribus vitreis frustulis compositam, illud hac pellucidius apparebit. Porro hoc unum inter utrumque vitrum discrimen occurrit, nempe vitrum solitarium nullo aere interrumpitur; at massa ex frustis compacta aerem intercipit. Si frustula vitrea sibi invicem apposita glutine aliquo jungantur, ita ut inter ipsa aliquid aquæ irrepere valeat & aggregatum istud aquæ immergatur, longe pellucidiora videbuntur frustula illa quam dum aer interjacebat. Cum ergo corpora ideo fiant pellucidiora, quod illorum interstitia occupet materia cujus densitas ad propriam densitatem accedit; ea est probabilissima & fere demonstrata pelluciditas

tis causa ; Si nempe tenuissimæ corporum lamellæ ita sint inter se dispositæ ut in illarum interstitiis nullæ vel saltem paucissimæ fiant reflexiones & refractiones , jam corpora erunt pellucida . At si lamellarum interstitia materiam contineant heterogeneam ita ut lucis radii reflexionibus & refractionibus plurimis torqueantur atque debilitentur , corpora fiunt opaca .

Hæc autem experimenta Nevvtonianam de lamellarum coloribus doctrinam apprime confirmant . Etenim intelligamus minimas lamellarum particulas lamellasque ipsas , medio aliquo a se invicem esse separatas ; illius autem medii densitas ab ipsa lamellarum densitate magis minusve differat . Jam vero demonstratum est lucis refractionem & reflexionem pendere ex corporis refringentis & reflectentis vi attractiva , atque ex diversa radiorum refrangibilitate . Itaque ex his causis generatim intelligere licebit varia per tenuissimas lamellas colorum phænomena pro varia particularum crassitie mediique densitate , & vi refringente ; colores nempe pro diversis conditionibus diversi aut etiam omnes , & sæpe nulli reflectentur , vel transmittuntur . Hæc autem colorum phænomena quæ constantissima omnino observantur , tribui certe non possunt fortuitæ alicui causæ , quales forent irregularis atque mutabilis partium dispositio , variabiles atque inconstantes in aere & æthere motus , aut aliæ hujusmodi conditiones sine ulla lege . Etenim si radii omnes eandem haberent refrangibilitatem , qua ratione explicari posset coloris albi in varios colorum annulos dispersio summe regularis ? Nunquam certe intelligi poterit cur , cæteris paribus , eo magis vividus atque homogeneous appareat color quo

te-

tenuiores sunt particulæ; cur prædictæ particulæ crassitiem omnium maximam habeant, si corpus fuerit rubrum, & omnium minimam si violaceum; cur tandem in quibusdam corporibus constantes sint colores, in aliis autem pro diverso oculi situ variabiles. At hæc omnia generali saltem ratione intelligi possunt, si primigenias & immutabiles in radiis admittamus dispositiones, quibus fit ut eisdem semper datos colores producant. Itaque diversæ colorum mutationes tribui non debent physicæ alicui variationi in radiis lucis per refractionem aut reflexionem productæ, sed diversæ radiorum permixtioni vel separationi, quæ ob diversam illorum refrangibilitatem vel reflexibilitatem diversæ sunt. Nec difficilior explicatur quare colores aliqui pro vario oculi situ mutabiles appareant. Etenim quamvis in plerisque corporibus lamellarum densitas ipsam superet medii circumjecti densitatem, aliquando tamen fit maiorem esse densitatem medii, atque in hoc casu, ob maiorem medii vim refringentem, radii oblique incidentes magis recedunt a perpendiculari, ac proinde ob maiorem in motu luminis mutationem, pro mutata oculi positione, colorem quoque mutari necessum est. Ea de causa repetendum est cur Pavonum caudæ nonnullique bombycini panni, & alia corpora plurima, pro diverso oculi situ, diversum exhibeant colorem.

Ex iisdem principiis pendent corporum naturalium colores; etenim corporis cujuslibet colorati superficies potest considerari tanquam composita ex lamellis pellucidis quæ certam habent crassitiem, & medium etiam datæ densitatis intra poros admittunt. Igitur quæcumque dicta sunt de minimis lamellis, de ipsis quoque corporum quorumlibet superficiebus

intelligi possunt; nempe corpora eum demonstrant colorem cujus radios majori saltem copia reflectunt; vel potius hujus videntur coloris qui ex radiorum reflexorum mixtura componitur; Si vero neque reflectant radios, neque transmittant, sed omnes vel fere omnes absorbeant, colore nigro inficiuntur. Hæc quidem sunt quæ generatim ostendi possunt de lamellarum corporumque coloribus; verum pro meris conjecturis atque hypothesebus haberi debet quidquid de minimarum particularum densitate & constitutione definire audent nonnulli. Et re quidem ipsa Nevvtonus qui demonstrationis severitatem in rebus etiam Physicis summo studio quæsit, ex corporum naturalium coloribus particularum componentium crassitiem probabiliter tantum investigandam proponit. Et certe corporum particulas tenuesque lamellas, eadem manente densitate, eosdem exhibere colores mera est conjectura.

Sed quidquid sit, certum omnino est colores in corporibus non esse. Si excindantur aliquæ taleolæ ex ligno *Nephritico* quod cærulei coloris est, eisque in vase affundatur aqua putealis pura ac limpida, extrahetur color qui singularis omnino indolis esse videbitur. Oculo inter fenestram & poculum posito color apparet intense cæruleus minimeque perspicuus; tinctura autem inter poculum & fenestram collocata perspicuus & ruber color pulchre splendet, dummodo tinctura sit satis crassa ut colorem præferat valde saturum. Sed si tenuior fuerit atque dilutior, colorem cæruleum saturum conspiciemus. Si eadem tinctura solaribus radiis illustretur, cæruleus ejus color vividior evadit; & in viridem degenerat, si crassa est tinctura. Prope
pocu-

poculi oram apparet *viride maris*, & cum Sol in tincturam desuper radios emittit, tota ejus superior superficies *viride maris* refert. Ex parte *cærulea*, opaca est tinctura; ex alia vero quæ rubra est vel flavo *cærulea*, pellucida deprehenditur. Quomodocumque vertatur poculum & quavis positione donetur, semper *cæruleus* color ibi apparet, ubi tinctura solari lumine illustratur illudque reflectit; ruber vero vel flavo *cæruleus* huic poculi lateri adhæret quod transitum luci permittit. Jucundum propterea oculis spectaculum præbet globus vitreus tinctura ligni nephritici plenus, si noctu ante candelam accensam statuatur & in omnes partes manu versetur. Etenim si globus circumagatur, simul ac rubens color apparet, repente *cæruleus* aut viridis marinus in conspectum venient, evanescente penitus rubro. Si nephritica tinctura pallida luce illustretur, color *cæruleus* multo elatior apparet quam cum ipsa intenso lumine coruscabat. Itaque quoniam tinctura *cærulea* apparet per radios reflexos, rubra autem vel flavo *cærulea* per radios transmissos seu refractos, necesse est ut aliud lumen reflectatur, aliud refringatur. Quare cum color ex lumine reflexo aut refracto oriatur, tincturæ ingenitus esse nequit. Quia tamen non quodlibet materiæ genus eo modo lumen reflectit vel refringit quo solet tinctura nephritica; tenendum omnino est singulare aliquid tincturæ inesse, vi cujus peculiaris illa reflectendi ac refringendi proprietates, ei & non aliis corporibus competat. Id autem experimento rursus confirmatur. Nephritica tinctura ex illa etiam parte quæ a lumine aversa est, *cærulei* coloris apparet; At si aliquot olei vitrioli, vel etiam spiritus

vitrioli, vel denique aquæ fortis guttulæ, tincturæ affundantur; cæruleus color statim evanescit & aureum colorem tinctura acquirit quem sive per radios reflexos sive per transmissos visa constanter refert. Notum est tria fluida memorata *corrosiva* esse; unde partes ligni nephritici quæ aquæ colorem impertiunt, in alias multo minores particulas frangere valebunt, si tincturæ intillentur. Hac divisione fit ut figuram aliam aliamque magnitudinem assequantur, ideoque per aquæ interstitia sese vario ordine distribuunt. Quapropter manifestum evadit vim refringendi luminis una cum colore in fluido immutari, dum ejus particulæ diversa magnitudine, figura ac positione donantur. Innumera suppetunt hujusmodi experimenta quæ non solum confirmant doctrinam Nevvtonianam, verum etiam in arte pictoria & tinctoria utilitatis maximæ esse possunt; qua de re legi debet Boerrhavii *Chemia*. Sed utilitates illas persequi non finit præscripta brevitās.

Inst. III. Diversa radiorum refrangibilitas tribuenda esset vel diversæ radiorum massæ, vel diversæ illorum velocitati; utrumque autem caret verisimilitudine: Re quidem vera, si radiis rubris major assignatur massa, jam vis refringens minus in illos agit & inde intelligi posse videtur cur radii rubri minus refringantur. Simili ratione, si minorem massam habeant radii violacei, magis cedere debent vi refringenti, ideoque sunt magis refrangibiles. Hæc quidem ita se habere sibi quis persuadere posset, sed facilius. Etenim corpus quantumvis magnum vel exiguum, eadem velocitate projectum eandem parabolam describit, ut notum est ex demonstratis in *Physica generali*. Ergo a pari nullam diver-

sam

sam refrangibilitatem inducere debet diversa radiorum massa, quæ quidem minima omnino est & fere infinite parva, si conferatur cum medio refringente. Superest igitur ut diversa refrangibilitas in diversam radiorum velocitatem referatur. Verum hæc hypothesis gravissima & insuperabili premitur difficultate. Etenim in eclipsibus ubi planeta emergit ex umbra, radii quorum velocitas major est, primum appaterent, nempe rubri & tardius omnium violacei; tandem permixtis radiis sese conspicuum praberet color albus; quod repugnat phænomenis. His positis sic concluditur: admittenda non est illa diversa refrangibilitas quæ nulla hypothesi potest explicari, atqui &c. Ergo . . . Resp. N. Maj. & Min. Ubi factum aliquod certissime constat, non ideo negandum est quia nos lateret facti ratio; neque eos imitari volumus audaciores viros, Philosophorum nomine plane indignos, qui omnia explicare tentant & quos pudet in difficilioribus etiam quæstionibus suam, silentio saltem, fateri ignorantiam. Verum quod spectat refrangibilitatis causam, eam tribui aperte non repugnat diversæ radiorum massæ & naturæ, ita ut diversa evadat attractio ac proinde & refraction; sed diversam refrangibilitatem diversæ radiorum velocitati tribuendam esse, longe probabilius est; illi enim radii qui majorem habent velocitatem, magis resistunt vi refringenti, & contra facilius cedunt qui minori donantur velocitate. Nec valet proposita difficultas de colorum separatione in eclipsibus minime conspicua. Etenim cum planeta observari non possit, nisi pars ejus aliqua ex umbra emerferit, fieri potest ut tempore quo pars illa ex umbra emerfit, radii omnes ad oculum jam pervenerint. Ex data

data radorum refrangibilitate, velocitatum rationem in hac hypothesi determinant Geometræ, atque velocitatis differentiam in radiis rubris, & violaceis inveniunt $\frac{1}{41}$ circiter, quæ differentia, si transferatur ad Satellitum Jovialium eclipses, ad minuti unius intervallum reducitur inter radorum, & violaceorum appulsus ad oculos, jam vero conferamus temporis differentiam quæ ex ipsa organi constitutione inter duos observatores oritur, manifestum erit fieri omnino posse ut satelles non fiat conspicuus nisi post radorum omnium appulsus ad oculos. Præterea unico temporis puncto hæc colorum separatio permanet, radiique minus refrangibiles ita citissime cum aliis proxime magis refrangibilibus miscentur, ut acutissimo quidem oculo discerni non possint colores separati. Quæ cum ita sint, patet diversæ radorum refrangibilitati satisfacere posse diversam eorumdem velocitatem; neque repugnat radios inter se differre, tum massa, tum velocitate.

Ad præsentem doctrinam pertinent difficilissima crystalli islandicæ phænomena. Est crystallus islandica lapis pellucidus & fissilis, figuram habet certam, & constantem, quæ est fere parallelopipedi obliqui, lateribus sex parallelogrammis, & octo angulis solidis terminati. Porro illud est in crystallo islandica mirabile, quod radius quilibet in hanc crystallum incidens duplicem patiatur refractionem; Si enim hujus lapidis frustum libro typis impresso imponatur, literæ singulæ trans crystallum istam, gemina refractione, videntur binæ. Præterea si luminis radius in quamlibet crystalli islandicæ superficiem incidat, vel ad perpendicularum vel sub quovis angulo

PARS II. SECT. II. 185

gulo obliquo, confestim is dividetur per geminam hujusmodi refractionem in duos radios, quorum quidem radiorum uterque retinet colorem radii incidentis. Duarum autem istarum refractionum altera eo modo efficitur quo ex usitatis legibus fieri debet; nimirum sinus incidentiæ ex aere in crystallum eam habet rationem ad sinum refractionis quam habet numerus 5 ad numerum 3. Altera vero refractione quæ *inusitata* appellatur, lege protus diversa efficitur. Planum in quo jacent radius perpendiculariter incidens & radius lege inusitata ab eo divisus, *planum refractionis perpendicularis* appellatur a Nevvtono. Has easdem leges servant radii ubi ex crystallo emergunt; radius nempe qui in prima superficie refractionem *usitatam* vel *inusitatam* subiit, per alteram superficiem usitata quoque vel inusitata lege refringitur, sic tamen ut radius incidens & uterque radius emergens sint paralleli inter se. Si duo crystalli frustra sibi superimponentur, ita ut utriusque crystalli superficies sint accurate parallelæ, radii lege usitata vel inusitata per primam superficiem refracti, eadem quoque usitata vel inusitata lege per alteram superficiem refringentur; atque eadem contingunt phænomena, quæcumque sit mutua superficialium inclinatio, dummodo refractionum perpendicularium plana sint accurate parallela.

Ex his experimentis concludit Nevvtonus congenitam quandam esse in radiis luminis differentiam, qua fit ut in prædicto experimento radii alii perpetuo refringantur, ratione usitata; alii autem perpetuo ratione inusitata. Etenim si differentia ista non esset congenita, sed oriretur ex novis *modificationibus*;

ea quæ imprimeretur radiis modificatio in prima refractione, utique in tribus sequentibus modificationibus, aliis nempe refractionibus, immutaretur; quæ cum nihil variet, sed eadem perpetuo maneat, patet inusitatam refractionem pendere ex congenita quadam radiorum proprietate. Itaque censet vel potius conjectatur Nevvtonus radiorum luminis diversa esse latera diversis proprietatibus prædita, prout ad crystalli latera diversimode convertuntur. Id exinde colligit, quod si planum perpendicularis refractionis secundæ crystalli positum sit ad angulos rectos cum plano perpendicularis refractionis primæ crystalli, radii qui in transitu primæ crystalli refringebantur ratione inusitata, iidem omnes in transitu secundæ refringantur ratione inusitata. Inde autem infert, non esse duos radios inter se natura differentes quorum alii perpetuo & in omni positione refringantur ratione usitata, alii autem semper & in omni positione refringantur ratione inusitata. In hoc enim experimento unus idemque radius refringitur nunc ratione usitata, nunc vero ratione inusitata, prout ejus latera uno vel alio modo ad crystalli latera sunt conversa. Sed hæc meræ sunt conjecturæ, diversam radiorum refrangibilitatem demonstrasse satis sit; quia vero secunda quæstionis pars de iride, ex prima omnino pendet, nihil est quod adversus partem alteram amplius objiciatur.

Nec tamen ab instituto nostro alienum erit, si, hic data occasione, interpretemur versiculum 13. cap. 9. Geneseos ubi Deus arcum cœlestem in nubibus tanquam fœderis signum se ponere significat: *arcum meum ponam in nubibus, & erit signum fœderis inter me & inter terram*: variæ asserri solent horum verborum in-

PARS II. SECTIO II. 187

interpretationes: alii existimant arcum cœlestem diluvio antiquiorem non esse & vim refringentem aquæ, digito Dei fuisse suspensam; putant alii ante diluvium nihil pluuisse; ex præcedentibus demonstrationibus colligere etiam possent Interpretes in certis dumtaxat circumstantiis pluviam cecidisse: ut enim conspicuus sit arcus cœlestis, necessariæ sunt certæ conditiones. At probabilius sentiunt qui immensum divinæ omnipotentiae spatium curiosius scrutari non præsumentes, Sacrae Scripturae verba ita explicant ut arcus cœlestis pluviae signum naturale, fœderis signum supernaturale & divinæ bonitatis testimonium a Deo fuerit institutus; ita Gen. cap. 31. lapides qui nullum speciale signum repræsentant, fœderis testimonium fiunt inter Jacob & Laban: *tulit itaque Jacob lapidem, & erexit illum in titulum.*

A P P E N D I X

De quibusdam capitis præcedentis utilitatibus.

Telestropiorum utilitatem nemo ignorat, cum objecta longius remota distincte nobis exhibeant, iisque proinde tota innitatur Astronomia. *Telescopium astronomicum* est huiusmodi. Constat ex lente PQ oculo proxima quæ ideo *ocularis* appellatur (Fig. 22.); hæc autem vel utrinque convexa est vel ex una tantum parte. Ita vero posita est lens illa ut illius focus, o, cum foco vitri MN concurrat; illud autem vitrum vocatur *objectivum*; Sed focus ille communis inter utrumque vitrum occurrit. Ex hac constructione evidens fit, radios ex puncto aliquo O, objecti remotissimi

tissimi OB , emanantes per vitrum objectivum refractos, sese interfecando convenire in foco ibique imaginem o puncti O , exarare. Porro radii ex puncto remotissimo exeuntes ut AD , tanquam paralleli considerantur, & præterea punctum O , locatum fingitur in recta per vitrorum centra transeunte quæ ideo telescopii *axis* appellatur. His positis, jam imago puncti O , considerari potest tamquam objectum in foco ocularis PQ , collocatum, ac proinde radii qui objectum illud repræsentant in lentem ocularem incidentes, paralleli deinde debent emergere, atque eo densiores sunt radii illi quo minor est foci distantia in vitro oculari quam in objectivo. Quare radii illi eo vividiores in oculo pingere debent imaginem quo major erit vitri objectivi superficies, pro majori scilicet radiorum admissorum copia. Manifestum etiam est in qualibet a vitro oculari distantia, dummodo tamen oculus in radiorum parallelorum ex oculari emergentium directione sit constitutus, eadem perspicuitate sese conspicuam præbere objecti imaginem, quam radiorum fasciculus formavit in objectivi & ocularis foco communi. Præterea radii paralleli ex objecti OB , extremitate B , emanantes, ejusdem puncti imaginem formare debent in b , prope focum o , deinde per lentem ocularem refracti exire debent paralleli, sed eo magis ad axem AF inclinati quo major est ocularis curvatura, ita ut radiorum illorum fasciculus communi vitrorum axi in foco ocularis F , occurrat. Quare ut totam objecti imaginem, *ob*, oculus videre possit, ipsum locari necessum est in puncto F , in communi nempe intersectione fasciculorum omnium quos formant radii ex singulis imaginis *ob*, vel objecti OB , punctis emanantes. Ex
his

his patet objecti OB, imaginem in situ inverso apparere; cum illius imago ob, trans lentem ocularem visa positionem habeat ipsius objecti positioni oppositam, nempe extremitas b, videtur per radios in parte superiori ab axe recedentes; punctum autem B, per radios ab axe aberrantes in parte inferiori. Itaque telescopii *campus*, ut vocant, sive spatium totum quod oculus debito loco positus videre potest, maxime pendet ex magnitudine spatii totius versus ob; cum oculus in puncto F, constitutus videre possit singula puncta quorum imago est in foco vel prope focum lentis ocularis. Præterea si objectum magis ac magis ad objectivum accedat, magis ab eo recedit imago, ac proinde augeri debet distantia lentis ocularis ut nempe imago semper in foco maneat. Igitur pro majori vel minori objectorum distantia, ipsam quoque vitrorum distantiam mutari oportet. Simili ratione si myopum vitio laboret qui telescopio utitur, minuere debet objectivi & ocularis distantiam; nempe ocularis versus imaginem, ob, promoveri debet, ut, eadem imagine inter ocularem illiusque focum constituta, radii in hoc vitrum incidentes exeant divergentes.

In telescopio astronomico, objecta situ inverso apparent; verum additis duabus aliis lentibus quæ etiam *oculares* dicuntur, imagini situs rectus restituitur & telescopium rebus terrestribus contemplandis accommodatur. Lentes quatuor communem habent axem illarumque foci hinc & inde *respective* concurrunt. Jam radii ex puncto valde remoto quod in telescopii axe locatum fingitur, emanantes, per vitrum objectivum refracti sese interfecant, & in foco, ut jam diximus, puncti
ima-

imaginem delineant, hinc in alteram lentem ocularem incidentes exeunt paralleli, deinde in alteram ocularem incidunt & ex ea emergunt ad focum convergentes ibique alteram efformant puncti imaginem; tandem in ultimam ocularem incidentes exeunt deinde paralleli ac proinde in oculo vividam repræsentant objecti imaginem. Quod autem diximus de objecti puncto aliquo idem intelligi potest de puncto quolibet alio. Porro ex radorum directione patet objecti imaginem rectam esse, seu eandem ac ipsum objectum positionem habere. Hæc omnia manifesta sunt ex demonstratis art. 3.

Eadem omnino ratione explicatur microscopiorum vis. Sit MN, lens utrinque convexa (Fig. 23.) & eo situ positum sit objectum OB, ut lentis focus coincidat cum puncto O, radii ex hoc puncto emanantes & per lentem refracti deinde emergunt paralleli, ac proinde puncti O, imaginem vividam exhibent. Punctum B, ejusdem objecti ita est axi proximum ut in foco locatum fingi possit, ac proinde emittit quoque radios physice parallelos, sed ad ipsum axem eo magis inclinatos quo minor est foci distantia. Quare si oculus sit in puncto o, axis per quem transit radius *principalis* BC, objectum OB, distincte videbitur sub angulo BoO. Jam ponamus objecta clare non distingui, nisi ab oculo distent intervallo 7 vel 8 pollicum; & *c* hanc distantiam repræsentet, vis imaginandi fingere sibi non poterit objectum oculo ita proximum esse quale trans lentem apparet; sed objectum illud in *o* positum judicabitur, atque ita augebitur illius magnitudo in ratione *oo* ad *oO*. Quare magnitudo apparens objectorum quæ trans lentem observantur, pendet quoque ex ipsa

ipsa oculi conformatione. Parantur etiam microscopia ex minimis vitreis globulis; etenim in formula jam demonstrata

$$x = 6drR + 4eR - 2deR$$

$3dR - 6rR - de + 3dr + 2er$, fiat $e = 2r$, $r = R$ & $d = \infty$, habebitur $x = \frac{1}{2} r$, ac proinde si objectum in axe sphaerae collocatum fuerit ita ut quarta distet diametri parte, jam radii lucis per sphaeram refracti emergent paralleli; quare objectum illud distincte videbitur, atque eo majus quo proximius erit oculo, ac proinde quo minor erit sphaerae diameter. Alia etiam sunt microscopia ex duabus lentibus convexis composita, quarum lens objectiva MN (Fig. 24.) proximior habet focum; paululum ultra lentem illam constituitur objectum OB, ut illius imago *ob*, magis distet, ideoque & magis augeatur, deinde unius ocularis focus in loco hujus imaginis collocatur ut distincte videatur. Ex hac constructione patet distantiam imaginis a lente objectiva multum variare, mutata etiam tantisper objecti OB, distantia. Praeterea eo majus apparet objectum quo magis distat illius imago *ob*, ab objectivo MN. Tandem magnitudo apparens objecti mutatur pro majori illius ab objectivo distantia, cum imago, *ob*, ad objectivum accedat simulque decrescat.

Ex principiis antea demonstratis aestimari potest objectorum amplificatio, telescopiorum & microscopiorum ope. Extremitas B objecti (Fig. 22.) videtur per radiorum parallelorum, Fc, fasciculum, atque extremitas O, per fasciculum oK, ac proinde telescopii ope objectum videtur sub angulo cFK, quem comprehendunt radiorum fasciculi; quia vero ima-

go *ob*, est in foco lentis ocularis PQ, radii ex puncto *b*, emanantes & in ocularem incidentes, emergere debent radio principali *bK*, paralleli; quare angulus $cFK = bKo$. Quia autem radius *BD*, sine ulla refractione transit per vitrum *MN*, oculus in *D*, constitutus & nullo telescopio adjutus objectum conspiceret sub angulo *ODB*, vel æquali *bDo*, ideoque angulus sub quo videtur objectum telescopii ope est ad angulum sub quo videtur oculo inermi, ut angulus *bKo* ad angulum *bDo*. Sed in triangulis rectangulis *bKo*, *bDo*, sumpto *bo*, pro radio, erit *oK*, cotangens anguli *bKo*, & *oD* cotangens anguli *bDo*. Quare cotangentes illæ sunt ut *oK*, *oD*; ac proinde tangentes angulorum *bKo*, *bDo* sunt ut *oD* ad *oK*. Quare cum apparentes objectorum magnitudines maxime pendeant ex angulis sub quibus eorum semidiametri videntur, erit diameter objecti telescopio visi ad diametrum ejusdem objecti visi oculo nudo, ut distantia foci in lente objectiva ad foci distantiam in lente oculari. Hinc patet ad objectorum amplificationem id maxime conferre, ut lentis objectivæ focus majori donatus sit distantia; contra autem minori focus lentis ocularis. Præterea, si eadem servata in telescopio lentis objectivæ apertura, diversæ lentes oculares per vices adhibeantur, eo obscurius apparet idem objectum quo brevior est lentis ocularis focus. Etenim fasciculi radorum parallelorum qui in oculo sese interfecant, conum veluti quemdam efformant cujus basis est in lente oculari, vertex autem in oculo. Porro angulus ad verticem eo major est quo brevior est lentis ocularis focus, ac proinde radii lucis magis minusve dispersi oculum subeunt, ideoque objecti imago licet major,

PARS II. SECTIO II. 193

major, minus tamen vivida est. Quia vero eadem manente lentis objectivæ apertura, ideoque & eadem lucis copia, obscuritas eo major est quo minor fit lucis densitas, evidens est obscuritatem imaginis eo maiorem esse quo major est imaginis area, ac proinde obscuritas est in ratione duplicata diametrorum apparentium. Sed (ex dem.) diameter objecti telescopia visi est ad diametrum ejusdem objecti visi oculo inermi ut distantia foci in lente objectiva ad foci distantiam in lente oculari; ergo eadem manente lente objectiva, obscuritas imaginum est in ratione duplicata inversa distantie foci in lente oculari. Manifestum autem est hanc demonstrationem valere etiam in microscopiis compositis.

In præcedentibus demonstrationibus, superficiæ refringentis vel reflectentis focum tanquam unicum punctum consideravimus; ponitur enim superficiæ partem quæ est inter axem sphericitatis per objectum transeuntem & inter punctum quodlibet incidentiæ, donatam esse curvatura physice nulla. In hac hypothesis, singuli radii ex eodem objecti puncto emanantes post reflexionem vel refractionem in unico puncto sese intersecant. At hypothesis illa non potest esse accurata geometricæ: nullum enim est punctum unicum in quo radiorum singulorum intersectio fiat: quare focus seu vera objecti imago ille est locus in quo plurium radiorum fit intersectio; Sed eo plura sunt aliarum intersectionum puncta quo major est in superficie reflectente vel refringente graduum numerus. Jam vero quia quodlibet intersectionum punctum est locus imaginis, quæ eo magis vivida est quo major est radiorum sese intersecantium numerus, hinc patet diversis imaginibus illis ma-

Tom. V.

I

xime

xime turbari veræ imaginis repræsentationem. Hinc autem telescopiorum imperfectioni remedium afferri solet, si lentis objectivæ superficiei quæ versus objectum convertitur, minor apertura concedatur. Præterea foco adhiberi solet superficies nigra, plana & opaca, foramine rotundo pertusa, quæ *diaphragma* appellatur; hujus enim diaphragmatis margines radios superfluos absorbent. Tandem superficies interna tubi nigro colore tingitur, ita ut radii longius ab axe recedentes cohibeantur; alioquin radii illi nimia obliquitate incidentes in ipso tubo reflexi, ipsam imaginem vel lentem ocularem trajicere possent, visionemque confusam efficere. Doctissimi quidam Geometræ superficiei refringentis & reflectentis talem determinarunt curvaturam ita ut radii singuli ex eodem objecti puncto emanantes in unum concurrerent punctum; At præter difficilem talium curvarum constructionem, huic telescopiorum perfectioni obstat quoque diversa radiorum refrangibilitas; nam ex demonstratis de diversa radiorum refrangibilitate evidens est puncti alicujus imaginem ex diversis punctis coloratis esse compositam pro diverso refrangibilitatis gradu. Sed dum hæc scribo, a doctissimo amicissimoque viro D. Clairaut litteris ad me datis accipio, in Anglia a peritissimo viro D. Dollond compositum fuisse objectivum ex duabus lentibus quarum materia diversam habet vim refractivam ita ut sese mutuo corrigant aberrationes ex diversa radiorum refrangibilitate oriundæ. Quia vero in hac correctione superest aliud vitium ex lentium sphericitate oriundum & quidem non exiguum; adhibentur enim sphæræ minoris diametri pro eadem apertura, hanc aliam imperfectionis partem emendavit vir non satis

PARS II. SECT. II. 195

tis laudandus D. Clairaut, atque subtilissimo calculo sphaerarum illarum dimensiones ita combinavit, ut illæ duæ aberrationes sese mutuo compensarent simulque evanescerent. Sed hæc historice dicta sint, ut doctrinæ utilitatem intelligatis. Alias telescopiorum species omittimus, duas tantum quæ frequentius atque utilius usurpantur, vobis explicasse satis sit. Cæterum ex demonstratis patet cur telescopium duobus tantum vitris instructum adhibere soleant Astronomi. Etenim telescopium illud brevius est ac proinde commodius. Præterea minor est luminis jactura, cum radii duo tantum vitra trajiciant. Tandem telescopium astronomicum majorem campum admittit & brevioris foci lentem ocularem patitur, camque ob causam objecta magis amplificat.

C A P U T II.

De igne.

DE *ignis* natura præcipuisque characteribus obscurissima quæstio est; nec mirum quod in tanta rerum difficultate vix aliquid definire audeant accuratiores Physici. Nos autem illorum diligentiam imitati, varia referemus ignis phænomena & pauca quæ ex his certo colligi possunt, attingemus; de calore deinde & frigore aliqua explicabimus.

A R T I C U L U S I.

De ignis proprietatibus præcipuis.

I. **Q**uatuor præcipuos *ignis* characteres recensent Physici, lucem scilicet, rarefactionem, calorem, intestinumque

motum. Ignem ex ipsa lucis præsentia demonstrari ajunt, etiamsi absit calor omnis, qui sensus nostros afficere possit; quod ut ostendant utuntur exemplo Lunæ cujus radii in speculi ustorii foco collecti, plurimum lucis, nihil autem caloris præbent. Verum lucem hanc ignem esse non ita certum est ut in dubium vocari non possit; neque enim demonstratum est materiam hanc quæ lucem producit, eam ipsam esse qua calor excitatur. Re quidem ipsa lux lunaris emanat a Sole cujus lumen cum calore conjunctum est; Verum id probandum superest, Solis lucem & calorem ex eodem principio eademque materia originem habere. Præterea ponamus inter Lunæ Solisque lumen hoc unum esse discrimen, quod nempe lux lunaris debiliori motu producta, ad calorem excitandum satis non sit; id saltem reponi posset lucem lunarem verum & proprie dictum ignem non esse, cum eo careat motu qui ad ignis naturam necessarius omnino est.

Quod rarefactionem spectat, corpora omnia, paucissimis exceptis, in omnem dimensionem ad certos usque limites vi ignis expanduntur. Neque refert dura, mollia, an fluida sint, levia an magis ponderosa. Id autem extra omnem dubitationem positum est, corpora fluida majorem rarefactionem pati ab igne quam dura; dilatantur tamen corpora durissima, imo vehementiori igne solvuntur & liquefiunt; At cessante ignis actione contrahuntur. Ex hac ignis proprietate fit ut tempore æstivo dilatationem, hyberno autem tempore contractionem patiantur corpora. Sunt tamen corpora nonnulla quæ igne rigescunt & indurantur, qualia sunt ligna, ossa, lutum, creta, aliaque ejusmodi.

Ignem

Ignem definiebant Peripatetici : *elementum calidum siccum* : qua quidem definitione nihil edocemur de ignis natura ; maxima enim superest difficultas in explicanda caloris causa . Præterea licet calor & ignis arctissimo inter se vinculo cohærere soleant , nullum tamen satis tutum de igne ferri potest . iudicium ex calore quem persentimus . Etenim calor est qualitas *relativa* quæ ex incerto & mutabili sensuum testimonio æstimatur ; Si manus nostræ gelu rigescant , quod tepet , fervere videtur ; Si vero nimis incalescant , quod tepet experimur frigidissimum . Notum est in specubus & cryptis subterraneis eandem fere temperiem omnibus anni tempestatibus servari , thermometro iudice . Sed compertum quoque est huiusmodi specus valde frigidos a nobis persentiri tempore æstatis , valde autem calidos tempore hyemis . Hæc omnia aliaque multa quæ brevitatis studio prætermittimus , manifeste ostendunt nihil certi de ignis præsentia pronuntiari posse ex ipso caloris sensu quem experiuntur homines .

Alii Physici existimant ignem ex corpusculis tenuissimis , rotundis , maxime mobilibus componi , quæ cum maxima ac fere infinita celeritate moveantur & in singulas partes velocissime abripiantur ; non solum obvia corpora pervadere , agitare & comminuere possunt , sed etiam in nervorum fibrillis quas celeri vibratione percellunt , lucis & caloris sensum imprimere valeant . Ab ejusmodi sententia quam ex Epicuro instauravit Gassendus non multum differre videtur hypothesis Cartesii qui primum elementum , tenuissimum nempe pulverem , rapido perennique motu agitari arbitratur ; ubi vero corporum omnium poros pervadens , crassiores tertii elementi par-

ticulas reperit, celerrime illas agitât, contorquet, impellit, quo motu particulis etiâ secundi elementi quæ rotundæ ac mobiliore sunt, communicato, istæ splendorem & calorem in corporibus nostrisque sensibus excitant. Non omnes tamen tertiî elementi particulas igni excitando vel generando aptas existimant recentiores Cartesiani, sed illas solum quæ *nitrosæ*, *sulphuræ* & *oleaginosæ* sunt. Compertum est enim non ex omnibus tertiî elementi particulis etiâ celerrime agitatîs, splendorem aut calorem aut ignem excitari posse; sed aliqua determinata substantia requiritur quæ *combustibilis* & *inflammabilis* dici solet.

II. Inter tantas opinantium & dissidentium Philosophorum ambages, nihil est quod severioribus Physicis satisfacere possit; Hinc factum est ut Accademia Parisiensis an. 1738. investigandam proposuerit ignis naturam, statuto, de more, præmio, quod, pro parte sua, reportavit doctissimus Eulerus. Cartesianam hypothesim amplificavit vir clariss. & magno rationum pondere roboravit. Inter varia ignis phænomena illud potissimum seligit explicandum, quo nempe fit ut ignis propagetur, seu aliis corporibus communicetur eaque incendat. Cum autem præcipuus phænomeni nodus in hoc versetur, quod ignis maximam producat motus quantitatem sine ulla proprii motus jactura, is inveniendus est alicujus materiæ status in quo vis minima ingentem virium motusque quantitatem generare valeat. Hunc autem perniciosissimum ignis effectum in pulvere pyrio primum considerabimus; eadem enim vis exigua quæ unicuique pulvisculum valet incendere, ad explodendam quoque ingentem pulveris copiam po-

potentissima est. Inter Physicos satis jam constat in pulvere pyrio latere aerem aliudve fluidum elasticum vehementer compressum, quod, ruptis comprimentibus particulis permissoque exitu, ingenti vi sese expandat. Hinc manifestum est vim illam qua ignis expanditur ac multiplicatur, a propria vi pulveris pyrii distinguendam esse & prorsus separandam. Etenim in pulveris pyrii explosione, ignis hoc unum præstare videtur, aeris nempe vel fluidi compressi repagula seu claustra recludit. Porro primariis naturæ legibus repugnat omnino ut vis minima ingentem effectum producat; ubi autem tales effectus observantur, vires producentes in ipsa materia latere necessum est. Hæc autem vis nulla alia, præter vim elasticam, obtineri potest, nisi ad qualitates occultas ex Physica funditus exterminandas confugere velimus. Quæ cum ita sint, jam concipere licet materiam aliquam subtilissimam & eximie elasticam ad ignis effectus producendos aptissimam quæ materia ignea vocabitur. Quamobrem materiam *combustibilem* eam appellabimus quæ multas materiæ igneæ particulas continet, ac proinde & eo magis *combustibilis* erit materia aliqua quo plures sub eodem volumine continebit hujusmodi particulas. At præter particulas illas consideranda etiam est ipsa corporis materia quæ viribus effringentibus magis vel minus resistat, ita ut ab hac conditione plurimum etiam pendeat *combustibilitatis* differentia. Itaque ignis excitabitur, si vel unica particula compressam detinens igneam materiam, effringatur; Subito enim plures particulas simul recludi oportebit, erumpetque magno impetu materia ignea atque tandiu explodetur, donec nullæ supersint quæ disrumpi

valeant particulæ. Hæc igitur materiæ subtilis & elasticæ explosio est id quod *ignis* vocatur. Inter vires quæ ignem excitare valent, referendæ sunt illæ omnes quæ particulas ignea materia refertas frangere valent, inter quas primum locum tenet ipse ignis; atque hinc intelligitur vis qua ignis sese extendit & longe lateque propagat. Ex hac doctrina concludit vir summus Eulerus ea tantum corpora ad ignem concipiendum apta esse quæ particulas igneas explosioni obnoxias continent. At si corpora igneam contineant materiam quæ magna satis copia explodi non possit, jam particulæ illæ in reliquas partes circumjectas vim aliquam exerere quidem poterunt; atque hinc orietur calor duntaxat qui proinde est minimarum particularum motus sine explosione; cum in igne motus sit cum explosione conjunctus.

Hinc reddi potest ratio cur ignis, injecta non combustibili materia, aliquando extinguatur. Talis enim materia igneas ardentis corporis particulas obducit, seseque iis immiscet; quo fit ut vis explosionis in hanc materiam exerceatur in eaque tota consumatur, atque ideo reliquæ igneæ particulæ vim explosionis minus sentiant. Quare circa materiam igni injectam id notandum est, an cum materia ardente misceri eique adhærere queat. Si enim materia adjecta corpus ardens ingredi eique intrudi non possit, ignem extinguere non valet. Ita videmus, aspersa aqua, oleum accensum non extinguî, nisi omnino aqua opprimatur, cujus rei ratio est, quod oleum nullam cum aqua mixtionem patiatur. Præterea si materia non combustibilis, cæteris paribus, fuerit densior, eo promptius ignem suffocabit; in hac enim densiori materia vis
explo-

explosionis celerius consumitur. Hanc ob rem, aer licet combustionis incapax, tamen propter raritatem ad ignem extinguendum aptus non est, nisi magno impetu in ignem irruat; tunc enim corporis crassioris vices sustinet. Imo aer sæpius ad ignem conservandum est necessarius, ut demonstrat candela accensa quæ in vacuo Boyliano extinguitur; etenim ignis *nutrimentum* sunt particulæ ex sebo vel cera, quæ ab aere retinentur & dempto aere avolant calore solutæ, ideoque deficiente *pabulo* ignem deficere necessum est. Porro aer ad conservandum ignem necessarius, nec densior nec rarior esse debet. Ita carbo accensus compresso & densiori igne obruitur. Contraria ratione, carbo extinguitur, si vehementiori soli obijciatur. Eandem ob causam atque etiam ob imminutam aeris elasticitatem, flamma in camino præfocatur, si camini spiraculum pilea vel panno aqua imbutis obstruatur, quo quidem remedio in caminorum incendiis uti solent.

Quod *flammam* attinet, eam nihil aliud esse statuit Eulerus, nisi ipsam materiam subtilem & elasticam, cujus explosione ignis gignitur. Quia vero flamma determinatam habet figuram & circa ipsum ignem occupat datum spatium, necesse est ut aliud fluidum elasticum ubique expansum, sua elasticitate indefinitam materię subtilis igneę expansionem cohibeat, eandemque materiam in determinato spatio contineat. Hoc autem aliud fluidum elasticum *ætherem* esse ponit Eulerus. Itaque explosione materię igneę æther repellitur, ipsaque hæc materia tantum in æthere occupabit spatium, quantum necesse est ut vis elastica ætheris cum vi materię igneę consistat in æquilibrio. Spatium igitur in æthere

a materia subtili ignea occupatum erit ipsa flamma . Constituta flammæ natura , jam radiorum emissio explicatur ; factæ scilicet in æthere succussiones atque vibrationes in causa sunt , cur flammæ radii propagentur eodem modo quo in aere radii sonori producuntur . Neque difficilius intelligi posset flammæ propagatio per ipsam radiorum emissionem . Hæc ingeniose quidem constituit Eulerus quorum magna pars hypotheseos limites non excedit ; id unum certo affirmari & experimentis confirmari posse videtur , ignem coalescere ex minutissimis particulis in spatio non magno collectis , summa mobilitate donatis ; sed de illarum particularum natura nihil definiri potest . Nec caret verisimilitudine diversas esse ignis species diversamque naturam ; quidam enim ignes lucent tantum , alii autem lucent & urunt vehementissime . Nonnulli Physici ignem in certo quodam motu , non quidem facile definiendo , positum esse opinantur , ita ut , hoc motu in qualibet materiæ specie excitato , ignis produci valeat . In hanc hypothesein propendisse videtur Nevvtonus ; cæterum quemlibet motum ad ignem caloremque excitandum satis non esse certissimum videtur ; cum fermentationes plurimæ vehementissimum frigus producere observentur . Sed meris conjecturis diutius immorari nolumus .

III. Ex præcedentibus patet multas igni competere fluidorum proprietates , quales sunt partium mobilitas atque tenuitas , sed alias nonnullas fluidorum qualitates in igne hætenus observare non licuit , quales sunt præsertim duæ proprietates illæ , quibus fluida suam pressionem quaquaversum æqualiter exercent , & ad libellam sese componunt . Quare ignem e fluidorum numero rejicere vel inter fluida

recen-

recensere quæstio est nullius momenti . Quan-
 quam certissimum sit ignem esse materiam ,
 tantillum tamen est purioris ignis pondus ut
 nullo experimento sentiri possit . Quod enim
 se observasse ajunt plerique Physici , corpora
 vehementer calefacta pondere crevisse , cras-
 sioribus observationibus innititur , ut antea an-
 notavimus . Itaque latius erit aliqua ignis
 phenomena proponere . Si duo quævis corpo-
 ra coram sibi invicem imposita atterantur per
 aliquod tempus , calorem ingentem excita-
 bunt , & interdum quoque ignem , præsertim
 si corpora fuerint durissima . Sic mutuus ca-
 lybes & silicis attritus ignem excutit . In
 oriente frequentissimum est lignum durissimum
 ex quo ignis per attritum facile extunditur .
 Sic culter calybeus forti manu pressus ad co-
 tem rotantem incalcescit , rotaque celerius cir-
 cumacta ignis scintillæ emicant . Huic causæ
 tribuendum est quod ingentes etiam sylvæ
 magna ventorum vi agitatæ , aliquando igne
 consumantur & in apertum erumpant incen-
 dium . Generatur etiam ignis per *vegetabilia*
 semiexsiccata in magnos acervos extructa ,
 quod tristissimo fæni putrescentis exemplo sæ-
 pe innotuit . In iis enim acervis partes infe-
 riores valido superiorum partium pondere pre-
 muntur , ex illa pressione attritus oritur , mo-
 tusque & interdum flamma excitatur . Idem
 aliquando accidit præaltis pannorum sordido-
 rum molibus , atque huic causæ tribuitur quod
 paucis abhinc annis Nosocomium Parisiense to-
 tum fere exarserit atque conflagraverit . Pro-
 ducitur etiam ignis per liquidorum quo-
 rumdam mixtionem ; ea enim simul permixta
 primo effervescent , tum vero ignem produ-
 cunt . Si spiritus , ut vocant , *flammificus* &
oleum cinnamomi , æqua portione misceantur ,
 I 6 flam-

flammam producant clarissimam ita ut magnum etiam conclave spendeat. Imo si libra una liquoris unius cum una alterius libra permisceatur, idque fiat in conclavi ex omni parte clauso, tantus ignis excitabitur ut omnes cubiculi partes disjicere & solo æquare valeat, & quidem facilius quam præstare posset pulvis pyrius. Spiritus autem flammificus paratur ex nitro purissimo siccissimo & ex oleo vitrioli dupla proportionem inter se permixtis & igne subactis. Cæterum ignis excitatus ut conservetur, eget nutrimento, quo deficiente extinguitur, ut jam observatum est. Nutrimentum autem multiplex esse potest; ad ignis alimentum conferunt maxime olea quæ ex terra, vegetabilibus animalibus, nonnullisque fluidis extrahi solent. Ubi autem vi ignis ex tota massa avelluntur crassiores particule, partes scilicet aqueæ, salinæ, terrestres quæ nullum igni pabulum subministrare possunt, in modum fumi avolant & parietibus adhærescunt. At si fumus vel fuligo oleosis partibus abundaverit, in flammam facile redire potest.

IV. Hæc quæ hætenus diximus fere demonstrant ignem per omnia spatia esse diffusum, nec quidquam aliud requiri, ut ejus præsentia fiat manifesta, nisi ut colligatur & adunetur, id quod per attritum procul dubio obtinetur. Imo persuasum habet Boeravius ignem æqualiter per omnia spatia & per omnes corporum meatus esse dispersum, idque luculentissimis suadet experimentis. Et re quidem ipsa fidem facit thermometer in eodem aere, cæteris paribus, corpora omnia eundem calorem ac proinde & ignis gradum admittere. Illa autem æqualis per omnia corpora ignis distributio oritur ex ipsa ignis proprietate qua ad æ-

qui.

quilibrium tendere experimentis compertum est. Corpora omnia corporumque omnium partes, si igni objiciantur, eundem caloris gradum tandem acquirunt. Si corpori igne candenti admoveatur corpus frigidissimum, caloris pars a primo corpore admittitur quæ ab altero acquiritur, donec inter utramque ignis quantitatem restituatur æquilibrium. Nulli alteri causæ tribuendum videtur cur corpora etiam calidissima tandem frigescent. Quod ergo per diversa corpora ignis ut plurimum inæqualiter dispersus observetur, referendum est in causam aliquam impellentem quæ ignis æquilibrium turbet. De hac singulari & arte ignota ignis proprietate legi debent quæ diligentissime expertus est clariss. Boeravius in Chemia. Cæterum ignem in omnibus corporibus latere demonstratum omnino est; nulum enim est corpus quod calorem ac proinde & ignem non concipiat; vel natura vel arte corporum omnium partes in tenebris lucent, sive, ut vocant, sunt *Phosphoræ*. Tandem ex omnibus corporibus scintillæ per experimenta *electrica* educuntur. De phosphoris legantur experimenta quæ in opusculis hac de re editis summa diligentia describit clariss. Beccarius Chymices Professor Bononiensis; quod autem *factitias* scintillas attinet, argumentum illud nos deinde fusc revocabimus, ubi sermo erit de electricitate.

ARTICULUS II.

De calore & frigore.

I. **D**E caloris natura & origine pauca, quantum scire hactenus licuit, in articulo precedenti explicavimus; jam de frigore

re

re nonnulla adjungemus, & deinde varia caloris & frigoris phænomena considerabimus. De frigoris natura & origine plurimum inter se differunt Philosophi, & tot de frigore quot de calore instituunt hypotheses. Aristoteles cæterique Peripatetici existimant frigus esse *qualitatem aliquam ab entitate subiecti distinctam, qua congregantur homogenea simul, & heterogenea*: cum e contrario calor congreget homogenea, separet autem heterogenea. Hæc autem definitio refelli vix debet; & quidem præter quam quod vaga *entitatis* & *qualitatis* vocabula nullam menti exhibeant notionem, certum est eum non esse constantem frigoris effectum ut heterogenea congreget. Si vehementiori frigori subjiciantur vinum, acetum, spiritus vini, separantur atque solvuntur liquores illi; pars vini aquea in glaciem concrevit, spiritus suam fluiditatem retinet, & tartarum præcipitatur. Neque constans est caloris effectus ut *homogenea congreget*, & *segreget heterogenea*. Etenim massam ex auro, argento & ære constantem nullus calor segregare poterit; imo si diversæ argenti auri & æris portiones in vase contineantur ignique subjiciantur, vi caloris in unam congregantur massam.

Epicureorum hypothesim instauravit Gasendus qui ex certa quadam atomorum figura frigoris essentiam repetendam esse arbitratur. Neque desunt recentiores Philosophi qui *frigorigas* atomos vel spiritus *frigorigicos*, ut vocant, veluti frigoris causam & originem admittant atque his rationibus tueantur. Notissimæ sunt congelationes quæ arte fieri solent. Nix vel glacies sale vel nitro aut vitriolo permixta & vasi circumfusa, aquam in vase contentam tanta frigoris vi penetrat ut eam

eam igni quoque subjectam in glaciem facilius convertat. Quæ vero tanta frigoris virtus esse poterit? nisi corpuscula quædam ex glacie vel nitro descendant, penetratisque vasis lateribus in aqua recipiantur. Celebre est etiam illud experimentum ab Academicis Florentinis peractum; quemadmodum nempe calor ignis aut Solis in speculo collectus & ad proximum thermometrum reflexus, ejusdem thermometri liquorem rarefacit & altius illum cogit ascendere; ita si loco solis aut flammæ glacies substituatur, thermometri liquor descendit & condensatur. Cum igitur in primo casu corpuscula quædam egrediantur ab igne, quæ spiritum vini thermometro inclusum rarefaciunt, ita quoque corpuscula quædam ex glacie prodire debent quæ a speculo collecta in thermometrum reflectantur ejusque liquorem condensent. Illæ autem particulæ corpuscula *frigorifica* dici solent. Plurimi quoque effectus frigoris sine corpusculorum effluvio vix explicari posse videntur. Certe homines & stirpes *penetrabile frigus adurit*. Pedes, manus, cæteræque corporis humani partes vi frigoris intumescere, aliquando scindi, semper fere pallescere ac livorem inducere videntur, ex quibus effectibus acerrimus oritur dolor. Hæc autem omnia per spiritus quosdam & halitus salinos ac nitrosos fieri conjiciunt, cum ipsæ nitri particulæ carnibus impositæ eosdem fere effectus producant.

Plerique recentiores Physici frigus considerant tanquam corporum proprietatem mere *relativam*, seu tanquam minorem caloris gradum. Ita corpus certo caloris gradu præditum, si cum alio corpore calidiori conferatur, frigidum dici potest & contra. Itaque frigus cum nostro corpore comparatum nihil aliud

aliud est præter sensationem quam ex immixto corporis nostri calore percipimus. In corpore autem frigido datur calor, sed minor calore corporis nostri. Hæc quidem cuilibet hypothefi sunt communia; cum enim in opinione qualibet incrementi & decrementi capax fit calor, manifestum est frigus tanquam caloris decrementum considerari posse. Sed inter varias opiniones hoc discrimen est, utrum scilicet frigus ad absentiam ignis, aut ad materiæ alicujus peculiaris præsentiam referri debeat. Solam ignis diminutionem sufficere probabilissimum judicant nonnulli quibus persuasum est, ignem esse peculiarem quandam materiam cujus motus calorem producit, absente autem vel imminuta hac materia, frigus succedere opinantur. Sed quidquid sit de illa hypothefi, judicio nimis præcipiti negari non debent corpuscula *frigorifica* quæ ubi corpus penetrant, ignem saltem, pro parte, expellunt. Tales particulas aliquando adesse demonstrare videntur allata experimenta aliaque plurima; sed particulas illas semper existere, ubi datur frigus, seu caloris diminutio, probari certe non potest.

II. Cum sensationes nostræ accuratum præbere non possint caloris & frigoris testimonium, ad metiendas caloris frigorisque vicissitudines tutissimum instrumentum adhibent Physici, quod *thermoscopium*, seu *thermometrum* appellant: fluidum nullum inventum est quod vi caloris in amplius volumen expandi, aut vi frigoris in ætius spatium compingi queat quam spiritus vini, præsertim si probe, ut dicunt, *rectificatus* fuerit. Nemo vestrum oculis non usurpavit vitreos illos tubos quorum pars superior est *hermetice* sigillata, pars autem inferior in sphaerulam definit. Tubus autem
ille

ille aliqua ex parte spiritum vini continet ; statim ac calor augetur, spiritus vini rarefit & alius ascendit per tubum ; Si autem minuat^r calor, spiritus vini condensatur descenditque e tubo versus globum. Antequam tubi lumen hermetice sigilletur, aquæ calidæ immergi debet & in ea aliquandiu detineri, donec spiritus vini ebullitioni proximus fit ; atque in eo statu notari debet liquoris altitudo. Ut autem acutissimum frigus obtineatur, nix vel glacies sale detrita tubo conspergitur, spiritus vini condensatus descendit, rursusque notari debet liquoris altitudo. Quia vero in cellis vinariis habetur calor temperatus, qui veluti medius censi potest inter maximum æstatis calorem & acutissimum hyemis frigus, liquoris altitudo in hoc statu notetur illudque punctum velut temperati caloris indicium habeatur. Tandem totum intervallum inter glaciem & aquam calidam in partes æquales, pro arbitrio, dividatur, hoc artificio obtinebuntur diversi caloris gradus ad temperati caloris gradum referendi. De horum instrumentorum usu observandum est tantam non habere utilitatem, ut diversa thermometra varias frigoris calorisque constitutiones in variis regionibus certo demonstrarent. Etenim ad hunc usum obtinendum necessariæ forent conditiones plurimæ quæ vix sperari possunt ; necesse enim foret eandem esse tuborum perfectionem, internamque illorum superficiem æquali diligentia esse perpolitam & elaboratam. Præterea accuratissime cognitam esse oporteret diversam tuborum diametrum, atque etiam rationem quam habet expansio mercurii ad illius volumen ; tantæ autem subtilitates nulla fere diligentia obtineri possunt. At si eodem thermometro utamur, satis accurate diversis
anni

anni tempestatibus atque etiam in variis regionibus caloris frigorisque temperiem dignoscere licebit. De frigoris calorisque causis pro regionum varietate aliqua hic data occasione, possemus subungere, sed res in Geographia commodius tractabitur. In thermometris loco spiritus vini substitui etiam solet mercurius; At in talium instrumentorum constructione necessaria omnino est summa dexteritas; hinc mirum non est quod tam incerta sit thermometrorum fides.

III. Rerum connexio postulat ut de conglaciatione & glaciei formatione aliquid dicamus. Argumentum quidem obscurissimum est & difficultatibus plenum; quare probabiliores conjecturas exponere satis erit. Cum frigus nihil aliud sit quam caloris diminutio quæ cum motus diminutione conjuncta semper est, cessante vel saltem imminuta vi illa quæ fluidi calidi particulas agitât illasque a se invicem repellit, jam particulas illas ad se invicem majori vi tendere & in massam coalescere necessarium est. Hinc oriri poterunt diversi congelationis gradus ipsaque glacies. Patet autem huic explicationi posse accommodari varias de caloris natura hypotheses; etenim quæcumque sit vis fluidas particulas agitans atque perturbans, patet explicationem illam perinde se habere. Diximus etiam vix negari posse corpuscula quæ *frigorifica* appellare fas est. Illa scilicet corpuscula, vel materiæ igneæ particulas expellunt, ideoque intestinos fluidarum particularum motus debilitant, atque hinc fit cohæsiō; vel particulae illæ per fluidum dispersæ sese attrahunt vi maxima atque mutua attractione fluidum intermedium in duram compingunt massam.

Neutrum nobis compertum esse fatemur;
At

At citra corpusculorum effluvium explicari vix possunt plurima frigoris & glaciei phænomena. Referunt Scriptores in Ukrania Poloniæ Provincia esse acerrimum frigus longeque intensius quam in Normanna Galliæ Provincia, cum tamen in globo terrestri idem sit respectivus locorum situs. Fluvius qui regiam Sinarum Urbem alluit circa mensem Novembris tanta vi frigoris intra diem unum concrevit & induratur, ut quatuor mensium spatio currus & ingentia pondera sustineat, quamvis aquæ & aeris frigus non ita intensum videatur; ille tamen Sinensis fluvius eandem habet respectivam in globo terrestri positionem quam obtinet Tyberis in quo certe tanta non viget frigoris vis. Hinc probabilissimum est ventos quosdam aliis frigidiores esse qui salinos, nitrosos halitus secum deferant, & ipsis referti ac permixti corporum poros pervadant, prædictosque effectus producant. In hac etiam hypothesi intelligitur ratio cur rivuli quidam hyberno tempore liberrime fluant, tempore autem æstivo in durissimam glaciem concrevant; observatum enim est rivulorum illorum littora plurimis nitri salisque particulis abundare, quæ quidem particulæ æstivo calore solvantur & in rivuli aquas defluunt iisque permiscentur.

IV. Sæpe etiam sunt & quidem simillimæ caloris & frigoris causæ in locis subterraneis. Per meatus subterraneos fluunt succi varii qui sibi mutuo occurrentes vel aliis corpusculis permixti incalescunt; in aliis autem locis terra abundat nitrosis salinisque particulis quæ frigus acre inducunt. Nonnullis experimentis rem confirmabimus. Si limaturæ ferri & sulphuris partes æquales bene permisceantur & modica aqua perfundantur ut in massam duru-

riu-

rinſculam evadant, in ea primum calor excitabitur, tum flammulæ etiam emicabunt. Notiſſima eſt in Anglia cretæ cujuſdam albæ ſpecies; hujus cretæ fruſtum, ſi in aquam frigidam injiciatur, excitata ingenti ebullitione, illam adeo calefacit ut in ea ovum ad duri-
tiem uſque coqui poſſit. Quid ergo vetat in terræ penetralibus latere plurimas id genus particulas? Quæ torpidæ jacent & inertes, terreis particulis implicitæ; at ſi aqua ſolvantur & agitentur, ſtatim fermentationis motum acquirunt & in ipſa aqua fervorem inducunt. Id vero non ſolum non repugnat, ſed etiam ita eſſe indiciiſ manifestis comprobant aquæ minerales, ſulphuræ, chalybeatæ & calidæ. Quod frigoris geneſim ſpectat. Si aquæ libris quatuor una ſalis ammoniaci libra permiſceatur, aqua ſatis intenſum frigus concipit. Id autem fuſius confirmabitur in appendice ubi plurima & quidem utiliſſima referemus congelationum quas vocant *artificiales*, exempla.

Ex his experimentis patet in partibus terræ interioribus temperiem poſſe variis modis mutari nulla habita ſolis ratione. Et quidem caloris & frigoris cauſa in locis ſubterraneis non ſunt radii ſolares, ut pote qui eo penetrare non poſſunt; quare mirum non eſt ſi viciffitudines caloris & frigoris in ſuperficie telluris, quæ a Sole ortum ducunt, minime convenient cum iis quæ in ſpecubus & antris deprehenduntur; & re quidem ipſa, adhibito thermometro compertum eſt in multis locis ſubterraneis eandem eſſe tam hyeme quam æſtate caloris frigoriſque temperiem. Attamen teſte etiam thermometro cognitum eſt in multis locis ſubterraneis mutari interdum caloris frigoriſque gradum, ita ut mutatio iſta nullum habeat nexum cum viciffitudinibus quæ in

in telluris superficie contingunt . Itaque harum vicissitudinum causa quærenda est in ipsis terræ visceribus . Et certe credi non potest perpetuum & semper æquabilem esse eorum corporum concursus ex quorum mixtione calor & frigus excitantur . Hanc mutationem demonstrant montes *ignivomi* qui in majora , vel minora erumpunt incendia , & post maximam ignium flammarumque ejectionem aliquando conquiescunt , quare merito canit Ovidius .

*Nec quæ sulphureis ardet fornacibus ætna ,
Ignea semper erit , neque enim fuit ignea
semper .*

V. Corpora calore dilatari , frigore contrahi jam sæpius observavimus ; verum in congelatione aquæ phænomenum succedit plane singulare ; rarefiunt aquæ partes & in majus volumen expanduntur contra quam faciunt alia fluida . Universam congelationis seriem hoc ordine profecuti sunt Academici Florentini . Tubum vitreum aqua plenum sumpserunt cuius pars superior aperta foret , inferior vero in excavatam sphæram desineret , ut in thermometris fieri solet . Tum sphærulem vitream , hoc est , inferiorem tubi partem in vas subjectum immergebant , quod nivem aut glaciem salibus permixtam continebat . Ubi primum sphærule glaciei immersa fuit , aqua in tubulo existens aliquantulum ascendit , deinde vero motu fere æquabili ad certum quemdam gradum descendit , tuncque immota & veluti *stationaria* permanere videbatur . Tandem motu quodam tardissimo , æquabili tamen , iterum ascendebat , donec maxima tandem profiliret celeritate , qua brevi cessante , in glaciem aqua convertebatur . Rem paulo aliter tentavit & accuratissime demonstravit D.

D. Mariotte. Cum enim scyphum fere aqua plenum aeri frigidissimo exposuisset, primo veluti oblonga quædam filamenta ex glacie composita emergebant; atque ubi maxima pars aquæ in glaciem concreverat; exigua pars illius quæ adhuc fluida inanebat, in medium fere scyphi locum sese recepit; sed cum plurimæ tenuissimæ bullulæ ex illa erumperent, aqua ipsa per exiguum foramen in summa parte conspicuum sensim exiit, quæ similiter in glaciem conversa veluti in cumulum assurgebat. Occluso foramine, glacies ipsa ultro fracta est & divisa fere in medio scyphi. De glaciei formatione totoque congelationis progressu nihil religiosius observari potest quam quod tradidit Clariss. D. De Mairau in eximio opusculo de hac re edito.

Ex præcedentibus id colligitur aquæ partes, dum in glaciem convertuntur, non condensari sed maxime rarefieri. Hoc idem innumeris comprobatum est experimentis; vi glaciei durissima quoque vasa franguntur. Tubum ferreum cujus crassities erat digiti unius aqua impleverat Hughenius, & hunc tubum probe clausum intensissimo frigori objecit, post duodecim horas rupta dissiluisse tubi latera. Huic expansioni tribuendum est quod sæviente gelu, viarum publicarum pavimenta evellantur, quod saxa arboresque dissolvantur, nova plantarum germina, & fructus tenelli corrumpantur, quod aquarum canales confringantur; atque ut alia omittam hujus rarefactionis argumenta, glacies aquæ innatare observatur, quod certe fieri non posset, nisi glacies aqua levior, & rarior etiam existeret. Hi quidem effectus obvii sunt & frequentissimi, at effectuum causa difficilis omnino est. Singularis hujus dilatationis rationem aliqui ducunt ex

vi elastica aeris; cum enim in ipso congelationis actu erumpant magna copia aeris bullæ, aquæ particulas in amplius volumen expandi ajunt. Satis quidem ad rem accommodata videretur explicatio, nisi in aqua, omni aëre, quantum fieri potest, purgata, expansio aque succederet. Alii expansionem repetunt ex particulis *frigorificis* quæ in aquam introductæ illius volumen dilatant. Alii tandem id totum fieri opinantur ob mutatam particularum aquearum respectivam positionem. Calor, scilicet, aquæ particulas segregat illasque in fluiditatis statu continet: At calore imminuto & succedente frigore, jam alius fit partium situs, aquæ moleculæ ad alios contactus tendunt; neque repugnat particulas illas ita se mutuo attrahere in statu congelationis ut in amplius volumen expandantur. Cum autem expansio illa ex minimarum particularum textura pendeat, hac ratione intelligi poterit cur talis expansio aliis fluidis non accadat. Verum satius est ea quæ a frigore metuenda sunt, cavere, quæ autem nobis utilia esse possunt investigare, vanasque & inutiles hypotheses relinquere.

A P P E N D I X

*De quibusdam capituli præcedentis
utilitatibus.*

DE congelationis causa, & origine jam aliqua explicavimus in capite præcedenti; verum quidquid sit de variis Physicorum hypothesibus, certissimum est salium vi congelationem, & glaciem creari posse. Aquam sale refrigerari patet hoc experimento. Aqua frigida poculo immittatur, eique thermometrum

trum immergatur . Statim ac certo constat thermometro eum accessisse frigoris gradum qui aquæ inest, sal in aquam injiciatur . Rebus ita comparatis , antequam sal in aqua probe solutum appareat , spiritus vini jam in thermometro descendere observatur . Ubi autem rursus compertum est thermometro eum frigoris gradum acquisitum esse qui aquæ sale imbutæ convenit, immoto, scilicet, manente spiritu vini, thermometrum extrahatur & in aquam dulcem poculo contentam inferatur , quæ quidem cum aqua prius adhibita eundem habeat caloris gradum ; Spiritus vini ad eam rursus conscendit altitudinem ad quam prius in aqua dulci attollebatur, antequam scilicet aquam salis attingeret . Porro non omnes sales eidem frigori producendo pares sunt ; si in prædicto experimento tria salium genera adhibeantur, scilicet *sal commune* seu *culinarè*, *sal ammoniacum* & *sal petre* ; inter tres hos sales, primus minimum , postremus maximum effectum producit ; pro aquæ varietate aliquod etiam circa frigoris gradum discrimen observatur . Nitri ope frigus producitur intensum quod manu vitrum tenente facile sentitur ; interdum etiam exterior vitri superficies tenui velut nebula obducitur . Idcirco ut vinum aliæque potiones refringerentur tempore æstivo, hæ immitti solent aquæ in qua nitrum solutum sit .

Vulgatissimum omnibusque notissimum jam memoravimus artificium quo glacies , nivis aut glaciei & nitri mixtione parari solet . At sine glaciei auxilio, solis salis ope glacies obtineri potest , quod quidem commodissimum est, si parata ad manus non sit glacies . Adhibeatur aqua frigidissima , & congelationi proxima ; frigoris gradus maxime augebitur,

fo-

soluta salis ammoniaci parte tertia. Huic
 mixturæ immitatur vas aquam aliam frigidis-
 simam continens; hæc aqua majorem acqui-
 ret frigoris gradum. In ipsa eadem aqua ite-
 rum solvatur sal ammoniacus, atque repetita
 operatione obtinebitur tandem aqua sale per-
 mixta, quam glaciæ ipsa multo frigidior
 esse thermometro constabit. Quare si tali a-
 quæ immittatur ampulla aquam continens,
 hæc ultima aqua in glaciem concreſcet ipsum-
 que glaciæ frigus acquirat. Suspiciatur vir
 clariss. De Mairan sine glaciæ & sale glaciem
 produci posse; quæ quidem conjectura non
 caret verisimilitudine. Et quidem certissimum
 est aquam intensissimum frigoris gradum con-
 cipere, si in vase ex porosa terra confato,
 aeri currenti obijciatur; idem est experimen-
 ti successus, si aqua infundantur ampullæ,
 circumposito linteo aqua imbuto, & aeris per-
 flantis directioni exponatur. Frequentissimum
 est hoc refrigerandæ aquæ artificium in Ægy-
 pto, apud Sinas, aliosque populos plurimos.

Frigoris gradum ad glaciæ naturalis forma-
 tionem necessarium indicat altitudo ad quam
 spiritus vini subsistit in thermometro; ubi
 nempe thermometri globulus immergitur gla-
 ciæ, aut nivi quæ jam solutioni proxima sit;
 nec congelatio apparet antequam thermome-
 tri liquor hunc gradum attigerit. Non ta-
 men glaciæ statim solvi deprehenditur, ubi
 spiritus vini in thermometro ascendit; certis-
 simisque experimentis compertum est lentio-
 rem esse glaciæ solutionem quam sit ipsa for-
 matio. Porro, utilitatis causa, observare non
 abs re erit ad tuendam hominum valetudinem
 necessarium omnino esse lentum frigoris ca-
 lorisque progressum; hinc D. O. M. infinita
 providentia conservationi nostræ consuluit, in-

stituta, admirandis legibus, tempestatum vicissitudine. Et re quidem ipsa, subitanea ferventioris caloris intensique frigoris vicissitudo, nostra corpora necaret animamque intercluderet. Si conclave, dum rigidissimo gelu aquæ tenentur, igne calefiat ita ut æstivi temporis calorem adæquet, nullus mortalium tantum calorem ferre posset, sed viribus resolutus deficeret. Quæ cum ita sint, salutis suæ parum invigilant homines qui, frigore aut gelu correpta aliqua corporis parte, statim in igne promptoque calore remedium querunt: quod quidem faciunt incaute omnino atque imprudenter. Etenim nimia caloris succedentis velocitas non sinit ut corporis partes amissum recuperent ordinem, sed potius universum *œconomiae animalis* systema labefaciunt atque omnino perturbant. Quare satius est, imo necessarium, corporis partem frigore geluque rigescentem, nivi per aliquod tempus subjici, antequam calidiori aeri obiciatur. Et certe si fructus, carnes aliaque corpora gelu & frigore correpta calori exponantur, hæc statim tabescere, & corrumpi observantur. At si in aqua frigida deponantur, ita ut congelata desuper crusta protegantur, hæc sensim ablata, integra prorsus inveniuntur corpora illa ex aqua extracta. Ita pomum quod in frigida aqua servatum fuit, eundem præferat saporem quem ante congelationem habuerat. Neque etiam superfluum erit, hic data occasione, subungere perniciosissimum atque saluberrimum esse posse frigidi potus usum, pro diversa corporis nostri conditione. Si vehementiori excitatione & qualibet alia corporis agitatione vel *physica* vel *mechanica* aliquis æstuaverit caloremque nimium contraxerit, id summopere vitare debet quod refrigerationem interius vel

vel exterius asferre possit. Ex imprudenti balneorum frigidorum usu subitanam mortem non raro originem habuisse testantur doctissimi Medici inter quos Lancisius lib. 2. de morbis subitaneis. Etenim frigoris impressio solidas corporis animalis partes constringit, fluidas autem condensat, atque talis esse potest effectus ut partium solidarum actio, fluidarum autem motus nimis minuatur. Hinc maxime turbari potest tota corporis machina. Hinc nascuntur in canalibus obstructions, & frequentissima in humorum secretionibus impedimenta, ex quibus innumera morborum genera. Ex portionis frigidioris abusu intelligitur quoque illius usus. Si nempe nimia sit in fibris extensio, relaxatio, nervorumque, ut dicunt, *atonnia*, in his casibus utilissime adhibentur portiones frigidae. Quæ cum ita sint, mirum esse non debet quod vir clariss. Hoffmannus: duo ediderit opuscula quorum unum inscribitur: *de frigido potu, vitæ & sanitatis hominum inimicissimo*, alterum vero: *de aquæ frigidae potu salutari*.

SECTIO III.

De astronomia.

Astronomia ea est Philosophiæ pars quæ corporum cælestium motus, ordinem, magnitudinem, contemplatur, & eorundem motuum leges atque causas expendit. Hinc patet duas esse præcipuas Astronomiæ partes 1^a quæ vocatur *Theoretica*, diversa corporum cælestium phænomena considerat, eaque ad calculum revocat. Alia autem quæ *Astronomia Physica* dicitur, motuum cælestium causas explicat, vel saltem investigat. Ita-

220 INSTITUTIONES PHYSICÆ
que duo primum sese offerunt hujus sectionis
capita. Verum quia ad Astronomiam referun-
tur *Kalendarii & Chronologiæ* elementa, de
Kalendario, & Chronologia quoque tertium
caput subjungemus.

C A P U T I.

*De variis corporum caelestium phænomenis
& motibus.*

ANtequam caelestium motuum veras leges
explicare aggrediamur, universam cæle-
stem sphaeram qualem nempe oculis nostris se-
se conspiciendam præbet, primum contempla-
bimur, deinde veram corporum caelestium dis-
positionem expendemus, illorumque motus
calculo subjiciemus. Recta docendi ratio po-
stulat ut amplissimam hanc materiam in di-
versos articulos dividamus atque contrahamus.

A R T I C U L U S I.

*De mundi systemate quale oculis apparet, &
de sphaera caelesti.*

I. **S**pectatori terrestri cælum apparet tan-
quam superficies sphaerica concava, stel-
lis plurimis distincta, cujus ipse spectator cen-
trum occupat, quæque circa puncta fixa ve-
lut cardines ab ortu ad occasum æquabiliter
convertitur, & 24 circiter horis integram re-
volutionem absolvit. Puncta illa opposita P,
p, circa quæ rotari videtur sphaera (Fig. 25.)
poli mundi dicuntur, quorum is qui nobis con-
spicius est ut, P, *arcticus*, vel *borealis* di-
citur; ipsi vero oppositus, p, *antarcticus*, seu
australis appellatur. Recta linea Pp, utrum-
que

PARS II. SECT. III. 221

que polum connectens *axis mundi*, vocatur. *Æquator*, sive *æquinoctialis* est circulus sphæræ cælestis maximus cujus poli iidem sunt cum polis mundi, proindeque sphæram mundanam dividit in duo hemisphæria, *Boreale*, APQ, in quo est polus borealis P, & australe ApQ, in quo est polus australis p. Stellæ singulæ ut S, in circulis Ss, æquatori AQ parallelis, communi sphæræ cælestis motu revolvi quotidie videntur. *Fixæ* nominantur quæ eandem inter se distantiam perpetuo servant; *erraticæ* vero seu *Planetæ* vocantur quæ distantias suas a fixis mutant, & motu proprio ferri conspiciuntur. Planetæ sunt septem *Sol*, *Luna*, *Mercurius*, *Venus*, *Mars*, *Jupiter*, & *Saturnus*; inter planetas tellurem non recensemus; hic enim consideramus spectatorem terrestrem tanquam immotum.

Ecliptica est circulus sphæræ maximus quem centrum solis proprio motu ab occasu ad ortum singulis annis describere videtur. Hic circulus æquatorem oblique intersecat sub angulo inclinationis ATC, graduum $23\frac{1}{2}$ circiter. Puncta duo opposita in quibus æquator, & ecliptica sese mutuo secant, *æquinoctialia* dicuntur; puncta autem *solstitialia* appellantur eclipticæ puncta duo opposita quæ a punctis æquinoctialibus toto circuli quadrante distant, quæque proinde maxime recedunt ab æquatore & in quibus ascensus solis supra æquatorem, & descensus infra eundem terminatur. Circulus maximus qui transit per utrumque polum, & per puncta æquinoctialia, appellatur *colarus æquinoctiorum*. At *colarus solstitialium* dicitur circulus maximus qui per utrumque polum, & per puncta solstitialia traducitur. Cur vero æquinoctialibus & solstitialibus punctis hæc facta sint nomina, in Astronomiæ progressu ex-

222 INSTITUTIONES PHYSICÆ

plicabimus. *Signum celeste* est duodecima pars eclipticæ, & in 30 gradus iterum dividitur. Sex sunt signa borealia per borealem eclipticæ partem distributa, hisque nominibus designata: *Aries, Taurus, Gemini, Cancer, Leo, Virgo*; Sex autem Australia: *Libra, Scorpius, Sagittarius, Capricornus, Aquarius, Pisces*.

Zodiacus est sphaeræ celestis portio, seu zona duobus circulis eclipticæ parallelis & gradibus 8. vel 9. hinc inde ab ecliptica distantibus terminata, sub qua planetæ omnes motus suos absolvunt. Dum planeta ab occasu in ortum seu secundum *ordinem signorum*, aut quod idem significat, in *signa consequentia*, nimirum ab ariete ad taurum, a tauro ad geminos &c. motu proprio fertur, ille planeta tunc temperis *directus* vocatur. Dum autem planetæ motus proprius cessare videtur, seu dum planeta in eodem cæli puncto morari per aliquot dies cernitur, eundem situm fixarum respectu servans, *stationarius* dicitur; *retrogradus* tandem appellatur, ubi contra *signorum ordinem* seu in *antecedentia*, nempe a tauro ad arietem, ab ariete ad pisces &c. proprio motu incedit.

II. *Circuli declinationis*, seu *circuli borarii* sunt circuli maximi per mundi polos transeuntes & proinde æquatori perpendiculares. Sideris vel puncti cujuslibet in sphaera mundana *declinatio* est arcus circuli declinationis inter sidus vel datum punctum & æquatorem interceptus. *Ascensio recta* sideris est arcus æquatoris inter initium Arietis & circulum declinationis sideris illius comprehensus, ac secundum ordinem signorum numeratus. *Circuli latitudinis* syderum sunt circuli sphaeræ maximi per polos eclipticæ, & per sidera transeuntes, atque ideo eclipticæ perpendiculares.

Hinc

Hinc *latitudo* sideris est arcus circuli latitudinis inter sidus, & eclipticam interceptus. *Longitudo* sideris est arcus eclipticæ ab arietis initio versus ortum seu in consequentia usque ad latitudinis circulum numeratus. Punctum intersectionis eclipticæ cum circulo latitudinis sideris, dicitur locus sideris *eclipticus* sive locus in *ecliptica*, vel locus ad *eclipticam* *reductus*.

III. Si per locum quemvis S, in superficie terræ (Fig. 26.) ducatur per terræ centrum T, linea recta ZSN, quæ sphaeræ cælesti occurrat in Z, & N, punctum Z, dicitur loci S, *zenith* seu vertex, & punctum N, vocatur ejusdem loci *Nadir*. *Horizon sensibilis*, seu *apparens* loci S, est sphaeræ circulus, hujus centrum habens in S, & polos in Z, & N. *Horizon rationalis* seu *verus* est circulus HVRX, centrum habens in T, & polos in Z, & N, ideoque horizonti sensibili parallelus.

Circulus *verticalis* est circulus quilibet maximus ZVNX, per Zenith atque Nadir, & per aliud quodcumque punctum in sphaera mundana transiens, ideoque horizonti perpendicularis. *Meridianus* est circulus verticalis, PZNR, per polos mundi P, & p transiens, ac proinde æquatori perpendicularis, & circulos omnes æquatori parallelos bifariam dividens. Intersectio plani meridiani cum plano horizontis HR vel hr, dicitur *linea meridiana*. Circulus verticalis *primarius* dicitur verticalis ille qui per polos meridiani transit. Sit ZVNX, verticalis primarius horizontem rationalem HVRX, interfecans in V, & X, quem meridianus etiam secant in H, & R. Puncta quatuor R, X, H, V dicuntur *cardines mundi*; punctum quidem R, in hemispha-

phærio boreali cardo *septentrionis* H, cardo *meridiei* V, ad partes orientis cardo *orientis*, & punctum oppositum X cardo *occidentis*. Distantia horizontis apparentis ab horizonte vero, sive telluris semidiameter ST, sensibilis non est, si conferatur cum stellarum distantis, & ideo terra respectu sphaeræ stellarum tamquam punctum, & quilibet terræ locus tanquam hujus sphaeræ centrum considerari potest. Nam omnes fere Astronomorum observationes id supponunt, qua facta hypothese, computationes astronomicæ cum phænomenis cælestibus quadrant. Porro quemadmodum singula terræ loca pro centro sphaeræ stellarum usurpari possunt, ita fingi potest in spatiis cælestibus sphaerica superficies cujus tanta sit diameter ut illius respectu evanescat solis vel stellæ datæ a tellure distantia, & hujus sphaeræ centrum poterit indiscriminatim collocari vel in terra, vel in sole, aut in spatio intermedio.

IV. *Altitudo poli* P supra horizontem est meridiani arcus, PR, a polo ad horizontem interceptus. Ea semper æqualis est arcui, ZA, a vertice Z, ad æquatorem, AQ, intercepto. Nam si ex circuli quadrantibus ZPR, & AZP subducatur arcus communis, ZP, remanebunt arcus æquales AZ, & PR. *Altitudo æquatoris* supra horizontem est arcus meridiani AH, inter æquatorem, & horizontem comprehensus; æqualis est complemento altitudinis poli seu arcui ZP; quod quidem, ablato ex quadrantibus HAZ, & AZP, communi arcu AZ, manifestum est. *Altitudo apparetis sideris vel puncti* cujuslibet L, in sphaera mundana est angulus Lsv sub quo ex centro S, horizontis sensibilis, videtur arcus Lu, circuli verticalis per L, ducti usque ad hq.

horizontem sensibilem *hvx*. Altitudo *vera* puncti *L*, est angulus *LTV*, seu ipsius mensura, arcus scilicet *LV*, in circulo verticali per *L*, ducto usque ad horizontem rationalem *HVRX*. Quare stellarum fixarum altitudines apparentes, & veræ coincidunt.

Apparentes siderum altitudines totius Astronomiæ basis sunt, & fundamentum; igitur qua ratione observari possunt, breviter exponemus. Circuli quadrans *SAB*, (Fig. 27.) cuius limbus *ACB*, in gradus & minuta divisus est, ita statuitur ut filum *SCD*, pondere *D*, tensum, ideoque verticale, limbum illius radat; deinde ita vertitur ut sidus *L*, cuius altitudo observanda est, per *dioptras* aut per telescopium lateri *SB*, affixum videatur in eodem latere *SB*, producto. Quo facto, habetur arcus *AC*, mensura altitudinis apparentis; nam cum filum e quadrantis centro *S*, pendens, sit semper in plano verticali, quadrans *ASB*, erit etiam in eodem plano, ideoque *hr* ad *SD*, perpendicularis, erit intersectio horizontis sensibilis, & plani verticalis per *L*, ducti, atque angulus *Lsh*, erit sideris *L*, altitudo apparens. Sed si ab angulis rectis *lsA*, & *hSD*, subducatur communis *hSA*, remanent æquales anguli *LSh*, & *ASC*; hujus vero mensura est arcus *AC*.

V. Si sæpius observetur tum motus solis in eclyptica, tum ipsius diameter apparens, quam fieri potest accuratissime; circa datum punctum in plano describi poterit curva similis orbitæ quam sol circa terram percurrere videtur. Nam cum diametri solis apparentis sint reciproce ut ipsius a tellure distantia, ex datis diametris apparentibus dantur distantiarum rationes, & ex dato solis motu in eclyptica, dantur anguli inter distantias illas contenti.

K 5. Dies

Dies *solaris* est tempus unius revolutionis diurnæ solis a meridiano ad eundem meridianum; dies autem *sidereus* seu *primi mobilis*, ut dicunt, qui semper idem manet, est tempus revolutionis diurnæ stellæ fixæ a meridiano ad eundem. Si stella fixa & sol in eodem meridiano simul observentur, stella ad eundem meridianum prius redibit quam sol. Præterea, collatis æquinoctiorum & solstitiorum observationibus, innotuit solem intervallo 8 fere dierum diutius morari in signis borealibus quam in australibus; ac tandem æquinoctiorum & solstitiorum antiquas observationes cum recentioribus comparando definita est quantitas *anni æquinoctialis*, sive tempus quo sol motu proprio ab uno æquinoctio ad idem æquinoctium vel ab uno solstitio ad idem solstitium progreditur, & ab auctoribus Calendarii Gregoriani constituta est 365 dieb. 5 hor. 49'. Data autem quantitate anni æquinoctialis, datur motus solis medius pro quolibet dato tempore, hoc est, motus qui soli competeret, si uniformiter in ecliptica progredieretur. Est enim, ut 365^d 5^h. 49' ad tempus datum ita 360^d quos sol anni æquinoctialis tempore describit proprio motu, ad arcum eclipticæ dato tempore conficiendum. Hac proportionem arcus eclipticæ anno communi 365^d, describendus, est 11 signorum, 29°. 45' 40"; die uno est 59' 8" 20"; hora una est, 2' 28"; minuto uno est 2" 28". Arcus æquatoris qui dato tempore sub meridiano transit simili modo invenietur; dicendo: ut 24 horæ sidereæ ad tempus datum; ita 360° ad arcum quæsitum; is ergo una hora erit 15°, minuto uno primo erit 15', minuto secundo 15". Cum autem sol die uno describat motu proprio ad æquatorem relato, arcum 59' 8" 20' ab occasu

fu ad ortum, ut inveniatur arcus æquatoris dato tempore solari medio sub meridiano transiens, dicatur: ut 24 horæ solares ad datum tempus solare, ita $360^{\circ} 59' 8'' 20'''$ ad arcum quæsitum. His igitur proportionibus tempus solare medium vel tempus sidereum convertitur in gradus æquatoris. Facile autem patet ex dictis diem solarem medium æqualem esse 24 horis sidereis cum $3' 56'' 32'''$. Jam vero si adhibitis observationibus accuratissimis conferantur diametri apparentes solis cum illius angulari velocitate circa terram, apparet areas quas sol radio ad terram ducto describit, esse temporibus proportionales, solisque orbitam non multum differre a circulo & haberi posse pro ellipsi cujus focum alterum occupat terra. Est autem solis diameter apparens maxima $32' 40''$ & minima $31' 36''$ & ideo maxima distantia solis a terra est ad distantiam minimam ut $32' 40''$ ad $31' 36''$, sive ut 1960. ad 1896. circiter, sive ut 245 ad 237.

VI. Ex præcedentibus patet in sphaera cœlesti sex circulos maximos potissimum numerari, nempe *Æquatorem*, *Meridianum*, *Horizontem*, *Zodiacum* & utrumque *Colurum*. Præter circulos sex maximos, considerari etiam solent in sphaeræ cœlestis doctrina quatuor præcipui minores circuli. Circuli qui æquatori paralleli per polos Zodiaci transeunt, sive qui a polis Zodiaci describuntur, dum sphaera circa proprium axem convertitur, *Polares* vocantur; *arcticus* quidem qui circa arcticum; *antarcticus* vero qui circa antarcticum; circuli denique æquatori paralleli qui per puncta solstitialia ducuntur, sive a punctis solstitialibus describuntur, dum sphaera circa polos mundi rotatur, *Tropici* dicuntur. Qui polo arctico proximior est *Tropicus Cancræ* dicitur; qui au-

tem ad polum antarcticum accedit, *Tropicus Capricorni* vocatur. Porro cum polares circuli a polis eclipticæ describantur, evidens est circulorum illorum a polis mundi distantiam esse 23°. 29'. Quia vero tropici duo describuntur a punctis solstitialibus quæ ab æquatore distant 23°. 29', patet quoque tropicorum ab æquatore distantiam eandem esse, nempe 23°. 29'. Cæterum evidens est omnes cælestes circulos ad telluris superficiem transferri posse. Itaque *axis telluris* dicitur pars axis mundi per telluris centrum transiens, telluris superficie terminata in punctis duobus quæ *poli terræ* vocantur. Polus nobis conspicuus *borealis* vel *arcticus*, alter autem *australis* vel *antarcticus* appellatur. Intersectio plani æquatoris cælestis cum telluris superficie, dicitur *æquator terrestris*, aut etiam circulus *æquinotialis*. Quare latitudo loci cujusvis in superficie terræ est ejus distantia ab æquatore, sive est meridiani terrestris arcus inter locum datum & æquatorem interceptus. Unde patet latitudinem loci in superficie terræ, numero graduum, æqualem esse declinationi cælesti verticis, ejusdem loci, seu altitudini poli. Simili ratione alii quilibet circuli ad telluris superficiem referuntur. Verum ut tota hæc sphaeræ cælestis doctrina tironibus perspicue explicetur, in memoriam revocari debent quæ de planorum proprietatibus in Geometria demonstravimus; atque etiam oculis subjicienda *armillaris*, ut vocant, sphaera; circulis ligneis, vel metallicis, eo quem enumeravimus ordine, distincta.

VII. Superest jam ut siderum parallaxim breviter explicemus. Distantia locorum in sphaera cælesti ad quæ sidus vel phænomenum quodvis e superficie telluris & ex ejus centro
spe-

spectatum refertur, sive arcus circuli maximè
 inter illa duo loca interceptus, ipsius sideris
 aut phænomeni *parallaxis* appellatur, quæ
 proinde nulla est, nisi terræ semidiameter sen-
 sibilem habeat rationem ad distantiam sideris
 a terra. Sit T, centrum telluris ac cæli (Fig.
 28.) A, oculus in superficie terræ, Z, Ze-
 nith loci A, Q, sidus vel phænomenum
 quodvis, CPQ verticalis per Q, transiens,
 ZSXH, verticalis in superficie sphæræ cælestis.
 ABE, verticalis in superficie terræ TH, ho-
 rizon rationalis & Ah, horizon sensibilis. H
 ita constitutis, locus *physicus* sideris Q, est
 punctum illud in quo sideris centrum hæret.
 Locus *opticus apparens* seu *visus* est punctum
 V, in superficie sphæræ cælestis, in quo recta
 ex oculo A, per centrum sideris Q, ducta
 terminatur. Locus *opticus verus* est punctum
 S, in superficie sphæræ cælestis in quo termi-
 natur recta linea TQS, ex terræ centro T,
 per Q, ducta. Parallaxis est arcus SV, sive
 differentia duorum locorum optidorum. An-
 gulus *parallacticus* qui plerumque etiam pa-
 rallaxis vocatur, est angulus AQT, quem in
 centro sideris efficiunt rectæ AQ, & TQ, ex
 oculo A, & ex centro terræ T, ad sideris
 centrum Q, ductæ. Parallaxis *altitudinis* quæ
 & parallaxis *simpliciter* dicitur, est differentia
 inter distantiam ZV, a zenith Z, ex loco
 A, visam, & distantiam veram ZS, sive est
 arcus SV, in circulo verticali ZSVH; quare
 manifestum est altitudinem sideris veram per
 parallaxim minui & ejus a vertice distantiam
 augeri. Parallaxis *horizontalis* est parallaxis
 Xh, sideris P, in horizonte sensibili Ah, ap-
 parentis. Evidens autem est arcum SV esse
 mensuram anguli parallactici AQT. Etenim
 jungatur TV, erit angulus externus AQT,
 aqua-

α qualis duobus internis oppositis QTV & QVT; sed angulus QVT, sive AVT, evanescente AT, respectu TV, nullus est, ergo angulus paraliacticus AQT α qualis est angulo QTV, seu STV cujus mensura est arcus SV.

Manente sideris a centro terræ distantia, sinus parallaxeos est ad sinum distantiae visæ sideris a vertice, in ratione data semidiametri telluris ad distantiam sideris a centro terræ. Nam in triangulo AQT, est AT ad QT in ratione sinus anguli parallaëctici AQT, seu sinus parallaxeos ad sinum anguli TAQ, sive ad sinum distantiae visæ ZV, a vertice, & ideo datis AT, & QT, data est ratio sinuum illorum. Hinc patet sideris in vertice Z, constibuti parallaxim esse nullam, eandem crescere cum distantia a vertice & in horizonte fieri maximam. Hinc etiam colligitur sinus parallaxium, in paribus sideris a centro terræ distantis, esse ut sinus distantiarum visarum a vertice, & ideo si detur parallaxis sideris in aliqua a vertice distantia, dabitur in aliqua distantia a vertice.

Data sideris Q, parallaxi AQT, cum angulo ZAV, seu distantia apparente a vertice, datur in semidiametris terræ, tum distantia QT, sideris Q, a centro terræ, tum distantia ejus AQ, a loco A. Dato enim angulo ZAQ, datur TAQ, complementum illius ad duos rectos; unde ob datum etiam angulum TAQ, dantur tres anguli trianguli QAT; ac proinde datur ratio laterum inter se. Hinc data sideris P, parallaxi horizontali; si inferatur: ut sinus parallaxeos ad sinum totum, ita semidiameter telluris AT, ad quartum, obtinebitur distantia PT, sideris a centro terræ ob angulum TAP, rectum.

Tan-

PARS II. SECT. III. 231

Tandem sinus parallaxon siderum Q, q , in æqualibus distantis apparentibus a vertice, sunt in ratione reciproca distantiarum siderum a centro terræ. Etenim ut sinus parallaxeos AQT , ad sinum anguli ZAV , ita est AT ad QT ; & ut sinus anguli ZAV , ad sinum parallaxeos AqT , ita qT , ad AT , ideoque ex æquo sinus parallaxeos AQT est ad sinum parallaxeos AqT , ut qT ad QT . Hinc patet siderum in eadem altitudine apparente existentium, illud habere maiorem parallaxim quod minus distat a centro terræ. Porro hujus doctrinæ frequens recurret usus in Physices progressu.

ARTICULUS II.

*De variis mundani systematis
hypothesibus.*

I. **C**æteras inter hypothesas quæ ad explicanda cælestium corporum phænomena inventæ sunt, illa prior nobis occurrit quæ *Ptolemaica* dici solet, non quod veterum Astronomorum facile princeps Ptolomeus omnia docuerit quæ de illa hypothesi exponi solent, sed quia ab illo præcipuum veluti lumen ac nomen ipsum accepit.

In mundi centro immobilis terra statuitur. Hanc diversæ, ordine suo, ambiunt sphæræ; prima est *Luna*, post hanc *Mercurii*, deinde *Veneris*, tum *Solis*, dein *Martis*, postea *Jovis* ac tandem *Saturni*. Prædictas sphæras completur fixarum sphæra quam *firmamentum* appellant. Fixarum orbem amplectantur cæli duos quos *crystallinos* vocant; horum primum dicitur *sphæra nona*, alterum vero *decima*, sequitur tandem & cælum undecimum quod
pri.

primum mobile vocatur. Duodecimum cælum addiderunt alii quod *Empyreum* dixerunt & in quo Beatorum Sedem constituebant. Jam vero in hypothēsi Ptolemaica diurnus siderum & planetarum omnium motus ex ortu in occasum a primo mobili omnibus cælis inferioribus imprimitur; motus autem proprius siderum ab occidente in orientem a firmamento vel sidereo cælo producitur; singulorum vero planetarum motus ab occidente in orientem a proprio cælo oritur, ita ut horum omnium periodus illo temporis spatio absolvatur, quod ex astronomicis observationibus in planetis singulis definitur. Duos cælos crystallinos in astronomiam invexit Alphonsus Rex Castiliæ Astronomicarum rerum peritissimus. Primo crystallino tribuebatur motus quem *librationis* motum appellant; ad explicandum scilicet motum quo stellæ fixæ 70. annorum spatio, uno circiter gradu versus orientem progredi videntur. Alteri autem crystallino tribuebatur *trepidationis*, quem dicunt, motus, ad explicandum nempe motum quo sphaera cælestis ab uno polo ad alterum, quasdam veluti oscillationes absolvere credebatur.

Explicandæ supererant variæ planetarum a terra distantia, illorumque retrogradationes ac stationes. Planetas in circulis terræ excentricis revolvī ponebant veteres Astronomi, atque ita facili negotio diversas a terra planetarum distantias expediebant. Ut autem afferrent rationem cur planetæ modo *directi*, modo *retrogradi*, aliquando *stationarii* appareant, in ipsâ circuli excentrici circumferentia revolvī intelligebant circuli minoris centrum, hunc vero minorem circulum appellarunt *Epicyclum*; circulum autem excentricum vocabant *deferentem*. Jam fingatur circulum deferentem

tem illiusque Epicyclum moveri motu uniformi ab occidente in orientem secundum ordinem signorum, & utrumque circulum circa proprium centrum eodem tempore revolvi; spectator in centro *deferentis* collocatus, hunc circulum moveri videbit secundum ordinem signorum; at eidem spectatori Epicyclus moveri non apparebit secundum hanc directionem, nisi in parte superiori *deferentis*, in parte autem inferiori motu apparenti videbitur progredi contra signorum ordinem. Id quidem ex ipsa spectatoris positione respectu Epicycli facile colligitur. Præterea cum motus directus Epicycli in retrogradum habeat, mutationem hanc per gradus fieri manifestum est, ac proinde *deferentis* motu manente uniformi, ipsum Epicycli motum variabilem apparere necessum est. Ut autem rei totius distincta notio habeatur, per centrum circuli *deferentis* seu oculum spectatoris, & per ipsum epicycli centrum ducta intelligatur recta ad superiorem epicycli circumferentiam terminata; punctum rectæ superius designabit maiorem a terra distantiam seu *apogæum*; ut vocant, punctum autem inferius distantiam minorem seu *perigæum*. Diameter Epicycli ad hanc rectam perpendicularis hunc dividet in duas partes æquales, superiorem & inferiorem. In puncto Apogæi motus apparet directus, qualis revera est; & velocitas *apparens* non differt a velocitate vera, seu *reali*. In sequente circuli quadrante, motus quidem manet directus; at velocitas *apparens* reali velocitate minor est; cum motus directus ad retrogradum vergat. In secundo circuli quadrante motus directus abit in retrogradum, qui motus perpetuo crescit ad totam usque semicircumferentiam, ubi directo motui æqualis fit; in altera semicircum-

cumferentia res ordine inverso peragitur . Evidens autem est stationem denique fieri in transitu e motu directo in retrogradum , vel e retrogrado in directum .

In hac hypothefi , eodem tempore moveri ponuntur , tum *deferens* , tum *epicyclus* ; ac proinde respectu spectatoris , res perinde se habet ac si epicyclus in circuli *deferentis* immoti peripheria moveretur ; quare diversarum circumferentiarum velocitatis nulla ratio habenda est ; at in alio quolibet casu motuum compositio considerari debet . Punctum perigæi quod ad planum circuli deferentis pertinet , & ad ipsam Epicycli circumferentiam , duplicem admittit motum , unum scilicet qui ex ipso deferente originem habet secundum ordinem Signorum , alterum vero contra Signorum ordinem qui erit directus epicycli motus ; hic autem motus ob perigæi motum mutatur in retrogradum . Hinc patet ex Geometria colligi posse varias in *deferente* & *epicyclo* motuum hypothefes quæ recensitis planetarum phænomenis satisfaciant . Quamvis autem hypothefis ptolæmica difficilioribus laboret motuum ambagibus , eam tamen ingeniosissime excogitatam fuisse fatendum est . At negari non potest systema illud in quo Mercurii ac Veneris orbitæ tellurem ambiunt , astronomicis observationibus omnino repugnare . Observatur enim Venerem modo ultra , modo cirra Solem revolvi , quod de Mercurio constanter etiam demonstrant observationes astronomicæ . Hinc illud in confesso est apud omnes , Venerem & Mercurium circa solem revolvi , minime vero circa terram , ut fingebat Ptolomæus , ita ut tamen orbita Mercurii ab orbita Veneris contineatur . Præterea Mars aliquando nobis fit sole vicinior ; Mars enim perigæus , ex obser-

va-

vationibus astronomicis, telluri proximior apparet quam sol; quod fieri nequaquam posset; cum orbita Martis orbitam Solis contineat. Hæc Mercurii, Veneris & Martis phaenomena primis Ptolemaici systematis autoribus ignota fuere.

Neque est quod cælorum soliditatem refellamus; hanc prorsus evertunt Cometæ qui libere ab altissimis circa nos spatiis ad solem delapsi, inde rursus emergunt, atque huc illuc sine certa lege vagantur. Hæc cælorum omnium soliditas, etiam si diaphaneitas foret maxima, luminis transmissionem ad immensa spatia tandem interciperet. De cælorum substantia nihil definiverat Ptolomeus, solida ne potius, an tenuis haberi debeat. Posteriores quidam Astronomi cælos solidissimos esse voluerunt ut admirabilis motuum cælestium constantia, cælorumque incorruptibilitas salvari possent. At constantes quas observamus motuum cælestium leges, jam breviter explicavimus in Physica generali, & in sequenti capite fusius evolvemus. Quod spectat cælorum incorruptibilitatem, observationibus astronomicis certissimum est, in sole & planetis nasci maculas, variasque accumulari materiæ congeries quæ tandem evanescunt atque dissipantur. Nullum dubium est quin planetæ non secus ac tellus nostra, variis intestinis motibus sint obnoxii, ac proinde etiam frequentissimas mutationes patiantur. Quare generalis materiæ corruptio ad corpora quælibet etiam remotissima extendi debet; cum *motus sit corruptionis & generationis principium*.

II. Aliam mundani systematis hypothesim excogitavit Tycho Braheus Nobilis Danus. Hæc hypothesi quæ ab auctore *Tichonica* nomen obtinuit, tellurem in centro universi col-

collocat, circa terram proxime revolvitur Luna, dein Sol, qui, licet moveatur, ipse tamen est centrum motus reliquorum planetarum, ita ut solem statim ambiat orbita Mercurii, postea Veneris, deinde Martis. Tandem post Martem veniunt Jupiter & Saturnus; orbitæ Martis, Jovis & Saturni terram continent atque orbitam Lunæ; sed orbitæ Veneris & Mercurii terram lunæque orbitam perpetuo excludunt; Martis vero orbita ita solem terramque complectitur ut illius orbita orbitam solis intersecet, nempe Mars aliquando terræ proximior est quam sit ipse sol; omnium tandem planetarum orbitas fixarum sphaera complectitur; hæc autem sphaera non ponitur immobilis, sed duplici agitur motu, uno scilicet quo circa tellurem ab ortu in occasum fertur tempore 24 hor., altero autem quo lentissime progreditur ab occasu in ortum sub Zodiaco tempore 25000 annorum. Itaque in hypothese Tichonica, Sidera, Sol, & Luna circa terram 24 horarum spatio simul cum cæteris planetis ex ortu in occasum feruntur. Hoc autem a Tichonicis ita exponi solet, ut Luna quidem, Sol & Sidera secundum Zodiacum lenta periodo ex occasu in ortum moveantur; interim tamen singulis diebus circa terram ex ortu in occasum circulos æquatori parallelos describant. Dum vero sol circa terram 24 horarum spatio convertitur, planetas omnes secum circumvehit & abducit, ut ipsi quoque eodem tempore circa terram circulos excentricos peragere videantur; atque ita quidem diurnus Siderum & planetarum omnium motus circa tellurem & propius circa Solem & terram ipsam, inæqualis etiam magnitudo vel distantia planetarum a terra in hac hypothese explicantur.

tur. Sed explicandum adhuc supererat quæ ratione directiones, stationes, retrogradationes planetarum fierent, & cætera sequerentur phænomena quæ in planetis deprehenduntur.

Itaque cum animadverteret superioris sæculi decus Joannes Keplerus duplicem motum in hac hypothefi planetis concedi, alterum quidem quo circa terram abducerentur a Sole, alium vero quo interim certa quadam periodo circa solem moverentur, ex utroque motu, *abductionis* a sole circa terram, & *conversionis* circa solem, tertium motum instar spiralis componi demonstravit. Jam tellus in centro T, posita sit (Fig. 29.) circa quam moveatur sol in circulo ABCD, secumque abripiat Jovem circa terram, dum ille interim lentiori motu circa solem movetur; si Jupiter ex F, tendat in G celerius moveri videbitur juxta signorum ordinem; cum duplici motu, proprio nimirum & alio quo a sole abripitur, versus eandem partem feratur, ideoque *directus* vocabitur. Si ex G in H vel ex I in G moveatur, *stationarius* dicetur, quod ibi fere quiescat & sub eodem firmamenti loco appareat; Si denique ex H moveatur in I, *retrogradus* erit; videbitur enim ex ortu in occasum regredi. Cum itaque singulis annis unicam convolutionem vel spiræ partem, planetæ circa solem describant, neque tamen integram periodum suam circa ipsum vel circa terram singulis annis perficiant, necessum est ut integra spira quæ circa solem a Jove describitur, paucioribus convolutionibus componatur, spira autem Saturni pluribus, & ita de aliis planetis. Quare frequentiores esse debent retrogradationes in Jove quàm in Marte, & in Saturno quàm in Jove.

Hæc

mira ingenii sagacitate, fufe postea declarabimus.

Sol veluti centrum universi in medio collocatur. Circa ipsum Mercurius trium fere mensium spatio convertitur. Deinde sequitur Venus octo mensium periodo circa solem revolvens; tum orbis ille magnus quem annuo motu circa solem peragit terra. Hunc excipit cælum Martis qui duobus annis movetur. Hoc sequitur cælum Jovis qui duodecim annorum spatio periodum suam absolvit. Omnium denique planetarum supremus Saturnus triginta annorum spatio circulum peragit. Postremo sidera fixa prorsus immota quiescunt, etsi circa solem ipsum lento motu progredi videantur, ut 36000 annis integram periodum absolvant. Quemadmodum vero Luna non circa Solem, sed circa tellurem ipsam intra mensem movetur, ita quoque satellites aut lunulæ quatuor Jovem motibus suis coronant & quinque Saturnum. Cum vero cæteri planetæ unico motu ex occasu in ortum, juxta Copernicum, moverentur, triplicem in sola tellure distinguebat motum; *diurnum* nempe circa seipsam vel proprium axem, *annuum* per eclipticam circa solem, & motum *parallelismi vel inclinationis* juxta quem axis terræ sibi constanter parallelus eandem semper cæli partem respiciat; non dissimili fere ratione qua globus aliquis ita super planum rotari aut etiam supra curvam rotæ superficiem circumduci potest, ut interim circa seipsum moveatur & axem semper sibi metipsum parallelum retineat. Hypothesim copernicam eo loci breviter proposuisse satis sit. Cæterum patet systema Tichonicum ex copernicano & ptolemaico esse conflatum; seu potius esse systema copernicanum, ut ita dicam, in-

ver-

versum. Jam nonnulla cælestium motuum phænomena in systemate Copernicano exponamus, ut systematum facilitatem inter se conferre liceat.

Cum terra perenni & æquabili motu ex occidente in orientem spatio 24. horarum circa seipsam rotatur, sidera, Sol & cæteri planetæ ex notissimis Opticæ legibus diurno motu ferri videntur ex ortu in occasum. Planetæ tamen singuli proprio motu atque inæquali periodo ex occasu in ortum circa solem feruntur, si solem exceperis, qui licet immobilis in universi medio perseveret, annua tamen periodo circa tellurem converti videtur. Si quidem terra, dum circa proprium axem movetur, tardiori etiam motu per orbem magnum sive zodiacum sensim progreditur juxta signorum seriem, vel ex occasu in ortum ut unicum fere gradum singulis diebus, omnemque periodum unius anni spatio conficiat; hinc nobis apparet solem per eadem signa moveri, hac tamen lege ut cum terra in aliquo signo reperitur, E. G. *Ariete*, sol in opposito signo *Libræ* videatur; cum terra in *Cancro* moratur, Sol *Capricornum* occupet. Deinde vero cum terra circa Solem annua periodo revolvens, modo accedat, modo recedat a planetis, debent illi modo majores, modo minores, modo proximiores, modo remotiores videri.

Planetarum stationes, directiones & retrogradationes mira facilitate explicantur. Circa solem S, in centro positum (Fig. 30.) describatur circulus ABCD, quem annuo motu terra percurrit, sitque EFG circulus alter quem aliquis planeta superior, puta Saturnus, motu proprio peragit. Si terra ponatur in A, Saturnus apparebit sub aliquo puncto vel si-

Tom. V.

L

dere

tem ad polum antarcticum accedit, *Tropicus Capricorni* vocatur. Porro cum polares circuli a polis eclipticæ describantur, evidens est circulorum illorum a polis mundi distantiam esse $23^{\circ} . 29'$. Quia vero tropici duo describuntur a punctis solstitialibus quæ ab æquatore distant $23^{\circ} . 29'$, patet quoque tropicorum ab æquatore distantiam eandem esse, nempe $23^{\circ} . 29'$. Cæterum evidens est omnes cælestes circulos ad telluris superficiem transferri posse. Itaque *axis telluris* dicitur pars axis mundi per telluris centrum transiens, telluris superficie terminata in punctis duobus quæ *poli terræ* vocantur. Polus nobis conspicuus *borealis* vel *arcticus*, alter autem *australis* vel *antarcticus* appellatur. Intersectio plani æquatoris cælestis cum telluris superficie, dicitur *æquator terrestris*, aut etiam circulus *æquinotialis*. Quare latitudo loci cujusvis, in superficie terræ est ejus distantia ab æquatore, sive est meridiani terrestris arcus inter locum datum & æquatorem interceptus. Unde patet latitudinem loci in superficie terræ, numero graduum, æqualem esse declinationi cælesti verticis, ejusdem loci, seu altitudini poli. Simili ratione alii quilibet circuli ad telluris superficiem referuntur. Verum ut tota hæc sphaeræ cælestis doctrina tironibus perspicue explicetur, in memoriam revocari debent quæ de planorum proprietatibus in Geometria demonstravimus; atque etiam oculis subjicienda *armillaris*, ut vocant, sphaera; circulis ligneis vel metallicis, eo quem enumeravimus ordine, distincta.

VII. Superest jam ut siderum parallaxim breviter explicemus. Distantia locorum in sphaera cælesti ad quæ sidus vel phænomenum quodvis e superficie telluris & ex ejus centro
spe.

spectatum refertur, sive arcus circuli maximè inter illa duo loca interceptus, ipsius sideris aut phœnomeni *parallaxis* appellatur, quæ proinde nulla est, nisi terræ semidiameter sensibilē habeat rationem ad distantiam sideris a terra. Sit T, centrum telluris ac cæli (Fig. 28.) A, oculus in superficie terræ, Z, Zenith loci A, Q, sidus vel phœnomenum quodvis, CPQ verticalis per Q, transiens, ZSXH, verticalis in superficie sphæræ cælestis. ABE, verticalis in superficie terræ TH, horizon rationalis & Ah, horizon sensibilis. His ita constitutis, locus *physicus* sideris Q, est punctum illud in quo sideris centrum hæret. Locus *opticus apparens* seu *visus* est punctum V, in superficie sphæræ cælestis, in quo recta ex oculo A, per centrum sideris Q, ducta terminatur. Locus *opticus verus* est punctum S, in superficie sphæræ cælestis in quo terminatur recta linea TQS, ex terræ centro T, per Q, ducta. Parallaxis est arcus SV, sive differentia duorum locorum opticorum. Angulus *parallacticus* qui plerumque etiam parallaxis vocatur, est angulus AQT, quem in centro sideris efficiunt rectæ AQ, & TQ, ex oculo A, & ex centro terræ T, ad sideris centrum Q, ductæ. Parallaxis *altitudinis* quæ & parallaxis *simpliciter* dicitur, est differentia inter distantiam ZV, a zenith Z, ex loco A, visam, & distantiam veram ZS, sive est arcus SV, in circulo verticali ZSVH; quare manifestum est altitudinem sideris veram per parallaxim minui & ejus a vertice distantiam augeri. Parallaxis *horizontalis* est parallaxis Xh, sideris P, in horizonte sensibili Ah, apparentis. Evidens autem est arcum SV esse mensuram anguli parallactici AQT. Etenim jungatur TV, erit angulus externus AQT, æqua-

æqualis duobus internis oppositis QTV & QVT; sed angulus QVT, sive AVT, evanescente AT, respectu TV, nullus est, ergo angulus parallaxicus AQT æqualis est angulo QTV, seu STV cujus mensura est arcus SV.

Manente sideris a centro terræ distantia, sinus parallaxeos est ad sinum distantiae visæ sideris a vertice, in ratione data semidiametri telluris ad distantiam sideris a centro terræ. Nam in triangulo AQT, est AT ad QT in ratione sinus anguli parallaxici AQT, seu sinus parallaxeos ad sinum anguli TAQ, sive ad sinum distantiae visæ ZV, a vertice, & ideo datis AT, & QT, data est ratio sinuum illorum. Hinc patet sideris in vertice Z, consistenti parallaxim esse nullam, eandem crescere cum distantia a vertice & in horizonte fieri maximam. Hinc etiam colligitur sinus parallaxium, in paribus sideris a centro terræ distantibus, esse ut sinus distantiarum visarum a vertice, & ideo si detur parallaxis sideris in aliqua a vertice distantia, dabitur in aliquavis distantia a vertice.

Data sideris Q, parallaxi AQT, cum angulo ZAV, seu distantia apparente a vertice, datur in semidiametris terræ, tum distantia QT, sideris Q, a centro terræ, tum distantia ejus AQ, a loco A. Dato enim angulo ZAQ, datur TAQ, complementum illius ad duos rectos; unde ob datum etiam angulum TAQ, dantur tres anguli trianguli QAT; ac proinde datur ratio laterum inter se. Hinc data sideris P, parallaxi horizontali; si inferatur: ut sinus parallaxeos ad sinum totum, ita semidiameter telluris AT, ad quartum, obtinebitur distantia PT, sideris a centro terræ ob angulum TAP, rectum.

Tan-

PARS II. SECT. III. 231

Tandem sinus parallaxon siderum Q, q , in æqualibus distantibus apparentibus a vertice, sunt in ratione reciproca distantiarum siderum a centro terræ. Etenim ut sinus parallaxeos AQT , ad sinum anguli ZAV , ita est AT ad QT ; & ut sinus anguli ZAV , ad sinum parallaxeos AqT , ita qT , ad AT , ideoque ex æquo sinus parallaxeos AQT est ad sinum parallaxeos AqT , ut qT ad QT . Hinc patet siderum in eadem altitudine apparente existentium, illud habere maiorem parallaxim quod minus distat a centro terræ. Porro hujus doctrinæ frequens recurret usus in Physices progressu.

ARTICULUS II.

*De variis mundani systematis
hypothesibus.*

I. **C**æteras inter hypothesas quæ ad explicanda cælestium corporum phænomena inventæ sunt, illa prior nobis occurrit quæ *Prolemaica* dici solet, non quod veterum Astronomorum facile princeps Ptolomeus omnia docuerit quæ de illa hypothesi exponi solent, sed quia ab illo præcipuum veluti lumen ac nomen ipsum accepit.

In mundi centro immobilis terra statuitur. Hanc diversæ, ordine suo, ambiunt sphæræ; prima est *Lunæ*, post hanc *Mercurii*, deinde *Veneris*, tum *Solis*, dein *Martis*, postea *Jovis* ac tandem *Saturni*. Prædictas sphæras complectitur fixarum sphæra quam *firmamentum* appellant. Fixarum orbem amplectantur cæli duos quos *crystallinos* vocant; horum primum dicitur *sphæra nona*, alterum vero *decima*, sequitur tandem & cælum undecimum quod
pri.

primum mobile vocatur. Duodecimum cælum addiderunt alii quod *Empyreum* dixerunt & in quo Beatorum Sedem constituebant. Jam vero in hypothēsi Ptolemaica diurnus siderum & planetarum omnium motus ex ortu in occasum a primo mobili omnibus cælis inferioribus imprimitur; motus autem proprius siderum ab occidente in orientem a firmamento vel sidereo cælo producitur; singulorum vero planetarum motus ab occidente in orientem a proprio cælo oritur, ita ut horum omnium periodus illo temporis spatio absolvatur, quod ex astronomicis observationibus in planetis singulis definitur. Duos cælos crystallinos in astronomiam invexit Alphonsus Rex Castiliæ Astronomicarum rerum peritissimus. Primo crystallino tribuebatur motus quem *librationis* motum appellant; ad explicandum scilicet motum quo stellæ fixæ 70. annorum spatio, uno circiter gradu versus orientem progredi videntur. Alteri autem crystallino tribuebatur *trepidationis*, quem dicunt, motus, ad explicandum nempe motum quo sphaera cælestis ab uno polo ad alterum, quasdam veluti oscillationes absolvere credebatur.

Explicandæ supererant variæ planetarum a terra distantia, illorumque retrogradationes ac stationes. Planetas in circulis terræ excentricis revolvi ponebant veteres Astronomi, atque ita facili negotio diversas a terra planetarum distantias expediebant. Ut autem afferrent rationem cur planetæ modo *directi*, modo *retrogradi*, aliquando *stationarii* appareant, in ipsâ circuli excentrici circumferentia revolvi intelligebant circuli minoris centrum, hunc vero minorem circulum appellabant *Epiculum*; circulum autem excentricum vocabant *deferentem*. Jam fingatur circulum deferentem

tem illiusque Epicyclum moveri motu uniformi ab occidente in orientem secundum ordinem signorum, & utrumque circulum circa proprium centrum eodem tempore revolvi; spectator in centro *deferentis* collocatus, hunc circulum moveri videbit secundum ordinem signorum; at eidem spectatori Epicyclus moveri non apparebit secundum hanc directionem, nisi in parte superiori *deferentis*, in parte autem inferiori motu apparenti videbitur progredi contra signorum ordinem. Id quidem ex ipsa spectatoris positione respectu Epicycli facile colligitur. Præterea cum motus directus Epicycli in retrogradum habeat, mutationem hanc per gradus fieri manifestum est, ac proinde *deferentis* motu manente uniformi, ipsum Epicycli motum variabilem apparere necessum est. Ut autem rei totius distincta notio habeatur, per centrum circuli *deferentis* seu oculum spectatoris, & per ipsum epicycli centrum ducta intelligatur recta ad superiorem epicycli circumferentiam terminata; punctum rectæ superius designabit majorem a terra distantiam seu *apogæum*; ut vocant, punctum autem inferius distantiam minorem seu *perigæum*. Diameter Epicycli ad hanc rectam perpendicularis hunc dividet in duas partes æquales, superiorem & inferiorem. In puncto Apogæi motus apparet directus, qualis revera est, & velocitas *apparens* non differt a velocitate vera, seu *reali*. In sequente circuli quadrante, motus quidem manet directus; at velocitas *apparens* reali velocitate minor est; cum motus directus ad retrogradum vergat. In secundo circuli quadrante motus directus abit in retrogradum, qui motus perpetuo crescit ad totam usque semicircumferentiam, ubi directo motui æqualis fit; in altera semicir-

cum.

cumferentia res ordine inverso peragitur . Evidens autem est stationem denique fieri in transitu e motu directo in retrogradum , vel e retrogrado in directum .

In hac hypothesi , eodem tempore moveri ponuntur , tum *deferens* , tum *epicyclus* ; ac proinde respectu spectatoris , res perinde se habet ac si epicyclus in circuli *deferentis* immoti peripheria moveretur ; quare diversarum circumferentiarum velocitatis nulla ratio habenda est ; at in alio quolibet casu motuum compositio considerari debet . Punctum perigæi quod ad planum circuli deferentis pertinet & ad ipsam Epicycli circumferentiam , duplicem admittit motum , unum scilicet qui ex ipso deferente originem habet secundum ordinem Signorum , alterum vero contra Signorum ordinem qui erit directus epicycli motus ; hic autem motus ob perigæi motum mutatur in retrogradum . Hinc patet ex Geometria colligi posse varias in *deferente* & *epicyclo* motuum hypothèses quæ recensitis planetarum phaenomenis satisfaciant . Quamvis autem hypothèsis ptolemaica difficilioribus laboret motuum ambagibus , eam tamen ingeniosissime excogitatam fuisse fatendum est . At negari non potest systema illud in quo Mercurii ac Veneris orbitæ tellurem ambiunt , astronomicis observationibus omnino repugnare . Observatur enim Venerem modo ultra , modo cirra Solem revolvi , quod de Mercurio constanter etiam demonstrant observationes astronomicæ . Hinc illud in confesso est apud omnes , Venerem & Mercurium circa solem revolvi , minime vero circa terram , ut fingebat Ptolomæus , ita ut tamen orbita Mercurii ab orbita Veneris contineatur . Præterea Mars aliquando nobis fit sole vicinior ; Mars enim perigæus , ex observa-

va-

vationibus astronomicis, telluri proximior apparet quam sol; quod fieri nequaquam posset; cum orbita Martis orbitam Solis contineat. Hæc Mercurii, Veneris & Martis phænomena primis Ptolemaici systematis autoribus ignota fuere.

Neque est quod cælorum soliditatem refellamus; hanc prorsus evertunt Cometæ qui libere ab altissimis circa nos spatiis ad solem delapsi, inde rursus emergunt, atque huc illuc sine certa lege vagantur. Hæc cælorum omnium soliditas, etiam si diaphaneitas foret maxima, luminis transmissionem ad immensa spatia tandem interciperet. De cælorum substantia nihil definiverat Ptolomeus, solida ne potius, an tenuis haberi debeat. Posteriores quidam Astronomi cælos solidissimos esse voluerunt ut admirabilis motuum cælestium constantia, cælorumque incorruptibilitas salvari possent. At constantes quas observamus motuum cælestium leges, jam breviter explicavimus in Physica generali, & in sequenti capite fusius evolvemus. Quod spectat cælorum incorruptibilitatem, observationibus astronomicis certissimum est, in sole & planetis nasci maculas, variasque accumulari materiæ congeries quæ tandem evanescunt atque dissipantur. Nullum dubium est quin planetæ non secus ac tellus nostra, variis intestinis motibus sint obnoxii, ac proinde etiam frequentissimas mutationes patiantur. Quare generalis materiæ corruptio ad corpora quælibet etiam remotissima extendi debet; cum *motus sit corruptionis & generationis principium*.

II. Aliam mundani systematis hypothesin excogitavit Tycho Braheus Nobilis Danus. Hæc hypothesi quæ ab auctore *Tichonica* nomen obtinuit, tellurem in centro universi col-

collocat, circa terram proxime revolvitur Luna, dein Sol, qui, licet moveatur, ipse tamen est centrum motus reliquorum planetarum, ita ut solem statim ambiat orbita Mercurii, postea Veneris, deinde Martis. Tandem post Martem veniunt Jupiter & Saturnus; orbitæ Martis, Jovis & Saturni terram continent atque orbitam Lunæ; sed orbitæ Veneris & Mercurii terram lunæque orbitam perpetuo excludunt; Martis vero orbita ita solem terramque complectitur ut illius orbita orbitam solis interfecet, nempe Mars aliquando terræ proximior est quam sit ipse sol; omnium tandem planetarum orbitas fixarum sphaera complectitur; hæc autem sphaera non ponitur immobilis, sed duplici agitur motu, uno scilicet quo circa tellurem ab ortu in occasum fertur tempore 24 hor., altero autem quo lentissime progreditur ab occasu in ortum sub Zodiaco tempore 25000 annorum. Itaque in hypothesi Tichonica, Sidera, Sol, & Luna circa terram 24 horarum spatio simul cum cæteris planetis ex ortu in occasum feruntur. Hoc autem a Tichonicis ita exponi solet, ut Luna quidem, Sol & Sidera secundum Zodiacum lenta periodo ex occasu in ortum moveantur; interim tamen singulis diebus circa terram ex ortu in occasum circulos æquatori parallelos describant. Dum vero sol circa terram 24 horarum spatio convertitur, planetas omnes secum circumvehit & abducit, ut ipsi quoque eodem tempore circa terram circulos excentricos peragere videantur; atque ita quidem diurnus Siderum & planetarum omnium motus circa tellurem & propius circa Solem & terram ipsam, inæqualis etiam magnitudo vel distantia planetarum a terra in hac hypothesi explicantur.

tur. Sed explicandum adhuc supererat quæ ratione directiones, stationes, retrogradationes planetarum fierent, & cætera sequerentur phænomena quæ in planetisprehenduntur.

Itaque cum animadverteret superioris sæculi decus Joannes Keplerus duplicem motum in hac hypothefi planetis concedi, alterum quidem quo circa terram abducerentur a Sole, alium vero quo interim certa quadam periodo circa solem moverentur, ex utroque motu, *abductionis* a sole circa terram, & *conversionis* circa solem, tertium motum instar spiralis componi demonstravit. Jam tellus in centro T, posita sit (Fig. 29.) circa quam moveatur sol in circulo ABCD, secumque abripiat Jovem circa terram, dum ille interim lentiori motu circa solem movetur; si Jupiter ex F, tendat in G celerius moveri videbitur juxta signorum ordinem; cum duplici motu, proprio nimirum & alio quo a sole abripitur, versus eandem partem feratur, ideoque *directus* vocabitur. Si ex G in H vel ex I in G moveatur, *stationarius* dicetur, quod ibi fere quiescat & sub eodem firmamenti loco appareat; Si denique ex H moveatur in I, *retrogradus* erit; videbitur enim ex ortu in occasum regredi. Cum itaque singulis annis unicam convolutionem vel spiræ partem, planetæ circa solem describant, neque tamen integram periodum suam circa ipsum vel circa terram singulis annis perficiant, necessum est ut integra spira quæ circa solem a Jove describitur, paucioribus convolutionibus componatur, spira autem Saturni pluribus, & ita de aliis planetis. Quare frequentiores esse debent retrogradationes in Jove quam in Marte, & in Saturno quam in Jove.

Hæc

Hæc quidem hypothesis cum phænomenis quæ ad siderum motum, distantiam, magnitudinem pertinent, satis feliciter consentit; at communis est opinio illam a Physicæ legibus abhorrere. Tichonicum sistema prorsus evertere videntur incredibiles illi motus omnino oppositi qui eidem corpori conceduntur, Soli, nimirum, Lunæ & fixis sideribus, ut diurno motu circa tellurem ex ortu in occasum ferantur, eodemque tempore certa periodo juxta zodiaci obliquitatem ex occasu in ortum progrediantur. Hinc factum est ut systema Tichonicum temperare satius existimaverint nonnulli, motum diurnum circa proprium axem telluri tribuendo, dummodo tamen nihil amplius de annuo telluris motu quæreretur. Verum an systema Tichonicum accuratiori Physicæ satisfaciât, definiri non potest, nisi antea motuum cælestium causas explicare aggrediamur, quod quidem præstabimus in capite sequenti.

III. Ab antiquissimis temporibus jam innotuerat, systema aliud quod solem veluti centrum universi constituebat, planetasque omnes, ne terra quidem excepta, mobiles circa solem ponebat. Quidquid sit de prima hujus hypothesis origine quæ certe antiquissima est, hanc excoluit Pythagoras, unde systema *Pythagoricum* fuit appellatum. Hæc hypothesis ab Aristotelis usque temporibus fere omnino obsoleverat, cum litterarum & dignitatis splendore celebris Nicolaus Cusanus S. R. E. Cardinalis illam instaurare cepit. Eam deinde rudiorem adhuc & imperfectam Nicolaus Copernicus Torunensis & Varmiensis Ecclesiæ in Polonia Canonicus, indefesso 30 annorum studio ita illustravit atque auxit, omnique observationum genere perfecit, ut jure merito-

toque hæc ab illo nomen acceperit. Hanc Copernicus ipse Romæ innumeris fere auditoribus qui ultra duo millia confluere ad ipsum solebant, exposuit, & Paulo III. Pontifici Maximo dicavit. At nondum comparata fuerat hypothesi Copernicana cum plurimis Sacre Scripturæ testimoniis quæ tellurem immobilem adstruunt. Sic Ecclesiasticis cap. i. v. 40. legitur: *Generatio aduenit, generatio præterit, terra autem in æternum stat.* Psalm. 103: *Qui fundavit terram super stabilitatem suam, non inclinabitur in sæculum sæculi.* Quod vero sidera, atque præsertim sol ipse circa terram immobilem moveatur, celebre illud imperium Josue testatur cap. 10. Jos. v. 13.: *Sol contra Gabaon ne movearis. . . . stetitque sol.* Non desunt tamen Interpretes qui liberius respondent allata S. Scripturæ testimonia non maximam vim habere; cum Scriptores Sacri sæpissime juxta communem hominum opinionem & ad captum vulgi loquantur: *Moses rudi populo condescendens sequutus est quod sensibilibus apparet*: inquit S. Thom. i. part. quæst. 70. art. 1. ad 3. At Sacre Scripturæ sensum explicarunt S. R. E. Cardinales fidei Inquisitores a quibus damnata fuit hypothesi Copernicana sub Paulo V. an. 1616. atque iterum sub Urbano VIII. an. 1633., eamque Galilæus solemniter velut erroneam sacrisque litteris contrariam ejuravit; licebit tamen Copernicanum systema usurpare tanquam hypothesim quæ sine ullis excentricorum orbium & epicyclorum ambagibus phænomena cælestia facilius explicat. Copernicanam hypothesim qualis ab ipso Copernico tradita fuit, hic juvabit exponere; cætera autem quæ ad accuratius explicandos cælestes motus illorumque causam investigandam addidit Nevvtonus mi-

mira ingenii sagacitate, fufe postea declarabimus.

Sol veluti centrum universi in medio collocatur. Circa ipsum Mercurius trium fere mensium spatio convertitur. Deinde sequitur Venus octo mensium periodo circa solem revolvens; tum orbis ille magnus quem annuo motu circa solem peragit terra. Hunc excipit cælum Martis qui duobus annis movetur. Hoc sequitur cælum Jovis qui duodecim annorum spatio periodum suam absolvit. Omnium denique planetarum supremus Saturnus triginta annorum spatio circulum peragit. Postremo sidera fixa prorsus immota quiescunt, etsi circa solem ipsum lento motu progredi videantur, ut 36000 annis integram periodum absolvant. Quemadmodum vero Luna non circa Solem, sed circa tellurem ipsam intra mensem movetur, ita quoque satellites aut lunulæ quatuor Jovem motibus suis coronant & quinque Saturnum. Cum vero cæteri planetæ unico motu ex occasu in ortum, juxta Copernicum, moverentur, triplicem in sola tellure distinguebat motum; *diurnum* nempe circa seipsam vel proprium axem, *annuum* per eclipticam circa solem, & motum *parallelismi vel inclinationis* juxta quem axis terræ sibi constanter parallelus eandem semper cæli partem respiciat; non dissimili fere ratione qua globus aliquis ita super planum rotari aut etiam supra curvam rotæ superficiem circumduci potest, ut interim circa seipsum moveatur & axem semper sibimetipsum parallelum retineat. Hypothesim copernicam eo loci breviter proposuisse satis sit. Cæterum patet systema Tichonicum ex copernicano & ptolemaico esse conflatum; seu potius esse systema copernicanum, ut ita dicam, in-

versum. Jam nonnulla cælestium motuum phænomena in systemate Copernicano exponamus, ut systematum facilitatem inter se conferre liceat.

Cum terra perenni & æquabili motu ex occidente in orientem spatio 24. horarum circa seipsam rotatur, sidera, Sol & cæteri planetæ ex notissimis Opticæ legibus diurno motu ferri videntur ex ortu in occasum. Planetæ tamen singuli proprio motu atque inæquali periodo ex occasu in ortum circa solem feruntur, si solem exceperis, qui licet immobilis in universi medio perseveret, annua tamen periodo circa tellurem converti videtur. Si quidem terra, dum circa proprium axem movetur, tardiori etiam motu per orbem magnum sive zodiacum sensim progreditur juxta signorum seriem, vel ex occasu in ortum ut unicum fere gradum singulis diebus, omnemque periodum unius anni spatio conficiat; hinc nobis apparet solem per eadem signa moveri, hac tamen lege ut cum terra in aliquo signo reperitur, E. G. *Ariete*, sol in opposito signo *Libræ* videatur; cum terra in *Cancro* moratur, Sol *Capricornum* occupet. Deinde vero cum terra circa Solem annua periodo revolvens, modo accedat, modo recedat a planetis, debent illi modo majores, modo minores, modo proximiores, modo remotiores videri.

Planetarum stationes, directiones & retrogradationes mira facilitate explicantur. Circa solem S, in centro positum (Fig. 30.) describatur circulus ABCD, quem annuo motu terra percurrit, sitque EFG circulus alter quem aliquis planeta superior, puta Saturnus, motu proprio peragit. Si terra ponatur in A, Saturnus apparebit sub aliquo puncto vel si-

Tom. V.

L

dere

dere firmamenti in M; Si autem terra progrediatur in B & C, Saturnus apparebit in N & O. Quare moveri videbitur planeta ex oriente in occidentem & *retrogradus* vocabitur. Si vero terra ex C, descendat in D, planeta sub eodem firmamenti loco consistere ac quiescere videbitur, unde *stationarius* dicetur. Quandiu vero terra ex C, in D & A movebitur, planeta ejusque locus in firmamento progredietur ex O in N & M juxta signorum seriem, unde *directus* appellabitur.

Ex his intelligitur frequentiores esse retrogradationes in Saturno quam Jove, & in Jove quam Marte; sive quo planeta remotiora tellure fuerit tardiorque motu in orbita propria feratur, eo citius redire debent ipsius retrogradationes. Si quidem terra quæ proprio motu retrogradationes illas producit, ubi ab aliquo planeta digressa fuerit, atque integram periodum suam circa solem confecerit, citius planetam illum qui tardior fuerit assequetur, ut ille iterum retrogradus videatur. Quod ut illustrius intelligatur, observare juvat dimidiam retrogradationis partem in aliquo planeta tunc peractam esse, cum terra eidem planetæ conjuncta fuerit, sive inter planetam ipsum, & solem reperiatur; sic tellus in puncto B, Saturnus in F, esse debet. Itaque dum tellus a puncto B, vel conjunctione digressa integram periodum circa solem peragit, Saturnus etiam in orbita propria movetur, atque a puncto F, versus G per aliquot gradus progreditur; ubi tellus absoluta periodo circa solem ad punctum B, pervenerit, iterum Saturno ibi conjungi non poterit; sed totivem insuper gradus in orbe proprio debet percurrere quots a Saturno in orbita propria peracti fuerint, ut illi iterum jungatur, ideo.

ideoque Saturnus dimidiam novæ retrogradationis partem peregrisse videatur. Itaque quo plures gradus a planeta in orbita peracti fuerint, sive quo celerior sit planeta, eo tardius planetam terra assequetur, ut illi conjuncta ipsum rursus efficiat retrogradum. Quo vero tardior planeta fuerit minoremque graduum numerum in orbita propria descripserit, citius illi iterum conjungetur terra, ipsumque citius retrogradum efficiet. Cum igitur planetæ quo superiores fuerint atque a tellure remotiores, eo etiam tardiores sint, frequentiores in illis quam in inferioribus retrogradationes contingent. Evidens etiam est superiores planetas retrogrados fieri, cum inter illos & solem tellus excurrit, dum nempe soli opponuntur, sicut vicissim semper directi esse debent, dum inter illos ac terram sol reperitur, dum nempe planetæ cum sole conjunguntur.

Eadem omnino ratio adhiberi facile poterit in inferioribus quoque planetis Mercurio, & Venere; qui cum celerius periodum suam circa solem perficiant, inter solem, & terram ipsam aliquando reperiuntur; unde directi, retrogradi, & stationarii videbuntur. Hæc leviter duntaxat attigisse satis sit; cæterum ex data telluris, & planetarum theoria, Geometris difficile non est puncta *stationum* definire. Mirum autem est quam præclare Astronomorum calculis respondeant observationes.

Ex solo telluris motu facile colliguntur explicata in articulo præcedenti sphaeræ elementa. Dimidia telluris pars radiis solaribus exposita, semper illuminatur; pars autem altera a sole averfa umbræ immergitur. Verum quidem non est accurate integrum telluris hemisphaerium a sole illustrari: sed, ob magnam

solis a tellure distantiam , pars terræ illuminata ita parum differt ab hemisphærio ut sine errore velut hemisphærium haberi possit. Itaque circulus qui dimidiam terrestris superficiei partem ab altera dirimit, lucisque & umbræ confinia terminat, atque ideo *lucis & umbræ terminator* dicitur, pro circulo terræ maximo haberi potest. Si locus aliquis superficiei terrestris in parte illuminata revolvatur, huic loco *Dies* est; contra autem *Nox* est, si revolvatur in parte obscura. Motus diurnus ab occidente in orientem peragitur; & in loco aliquo dato sol oritur, ubi locus ille lucis & umbræ terminum, versus occidentem attingit, contra autem sol occidit ubi locus ad eundem terminum versus orientem pertingit. Punctum in quo linea recta telluris, & solis centra conjungens superficiei terrestris occurrit, solem habere dicitur in zenith, qui proinde est polus seu medium hemisphærii illuminati punctum. Circulus motu annuo telluris descriptus, est *Ecliptica*; quia vero axis terræ ad hujus circuli planum obliquus est, æquatorem secat (sub angulo nempe $23^{\circ} 29'$); duo intersectionum puncta, *æquinoctialia* appellantur, in quibus sol apparet, dum axis terræ ad rectam centra solis, & terræ jungentem perpendicularis est. Puncta *solstitialia* dicuntur quæ a præcedentibus distant 90° , & in iis sol apparet ubi maxime versus polos declinat. Cum autem æquator sit circulus maximus quem proinde circulus maximus *lucis & umbræ terminator* in duas partes æquales dividit, dies sub æquatore nocti perpetuo æqualis est. Evidens est, sole versus borealem æquatoris partem apparente, polum borealem esse in hemisphærio illuminato, ac proinde ibi futuram diem ab æquinoctio vernali usque ad æquinoctium au-

autumnale; contrarium autem accidet polo meridionali. Si locus aliquis ad eam positus sit æquatoris partem versus quam cadit recta solis & terræ centra conjungens, locus ille majorem habet paralleli partem in hemisphærio illuminato, ac proinde hujus loci incolis dies sunt noctibus longiores; sed contrarium experiuntur incolæ in opposita æquatoris parte quibus nox est die longior. Sed hæc omnia fusius explicabimus in Geographia, ubi etiam alia exponemus phænomena quæ ex axis terrestris *parallelismo* oriuntur. Interim monere satis erit, axem terrestrem, quamvis ab ipsa terra circumducatur, dum hæc circa solem convertitur, semper tamen sibi ipsi, & axi mundi vel æquatoris manere parallelum. Si telluris axis ad planum eclipticæ normalis esset, coincideret æquatoris planum cum plano Eclipticæ, & circulus *lucis terminator* in eo casu per polos semper transiret, & æquatorem omnesque ejus parallelos in partes æquales secaret, ideoque dies noctibus per totum terrarum orbem perpetuo forent æquales, ut ex dictis evidens est. Verum axis terræ non est ad eclipticæ planum perpendicularis, sed ad illud inclinatur sub angulo $66^{\circ} \frac{1}{2}$. Si autem planum æquatoris ad cælum usque protendatur, efficiet in cælo circulum quem æquatorem cælestem appellavimus, & hi duo circuli æquator nimirum, & ecliptica angulum constituunt $23^{\circ} \frac{1}{2}$. Ita vero in sua orbita progreditur tellus ut axem suum retineat sibi semper parallelum; hoc est, si ducatur linea quævis axi in quovis ejus situ parallela, axis ille in omnibus aliis orbitæ suæ punctis eidem lineæ parallelus manebit, nec unquam directionem mutabit, sed versus eandem mundi plagam perpetuo dirigetur. Inde autem hic

breviter observare licet constantes dierum tempestatumque vicissitudines ; Hæ enim non aliunde oriuntur quam ex diverso modo quo sol diversis temporibus terram respicit . Cum igitur Copernicana hypothesis modum illum quo terra a sole respicitur , perpetuo conservet , ac solum transferat in terram motum qui in aliis hypothesis soli conceditur , ita ut terra eadem prorsus velocitate , obliquitate & inclinatione circa solem moveatur , illumque respiciat eodem plane modo quo circa terram sol movebatur , & illam illuminabat , manifestum est eadem manente causa , eodem quoque manere effectus , sive eadem phenomena . Verum quamvis parallelismum perpetuo servare debeat axis telluris , minime tamen necessum est ut tertius quidam motus terram exercent , ut comminiscuntur aliqui . Et quidem , si terra nullo alio motu præter *translationis* motum in orbita sua feratur , evidens est diametrum quamlibet sibi manere parallelam . Jam telluri circa axem rotatio imprimatur , omnes telluris diametri , præter axem , situs suos constanter mutabunt . At axis per rotationem illam e statu suo non turbabitur , ac proinde ut prius sibi semper manebit parallelus . Hinc manifestum est necessarium non esse tertium quemdam motum ut terra axis sui parallelismum conservet ; nihil enim aliud requiritur nisi ut prædicti duo motus *translationis* scilicet , & *rotationis* telluri imprimantur . Nam si nullus accedat tertius motus , axis necessario eidem rectæ perpetuo parallelus erit cui antea fuerat . Hæc autem omnia Tironibus demonstrari debent , subjecto illorum oculis terrestri globo ex charta vel metallo , suis circulis rite distincto . Hic autem non consideravimus lentissimam in axis

ter-

terrestris *parallelismo* mutationem quam axis *mutationem* dicunt; hanc deinde opportuniori loco exponemus.

ARTICULUS III.

De Sole, & Stellis fixis.

I. **S**olem stellasque fixas, ut pote quæ sunt corpora ejusdem generis, eodem articulo complectimur. Igneam esse solis substantiam aut igni simillimam demonstrant similes ignis solisque effectus. Observationes circa solare corpus institutæ ostendunt illius superficiem nequaquam esse æqualem, & pacatam, sed veluti mare ignitis fluctibus asperum candelentibusque undis crispatum. At præcipue circa solem notandum est in ejus superficie apparere fuligines quasdam seu maculas subnigras, quæ figuras habent irregulares, & inconstantes. Solares maculas primus omnium telescopio detexit Galilæus an. 1610. & eodem fere tempore illas in Germania deprehendit Christophorus Scheinerus. Solares maculæ aliquando plures, aliquando pauciores observantur, interdum nullæ; ita ab anno 1653. ad 1670. vix una aut altera deprehendi potuit, cum plures tamen ingentesque maculæ temporibus aliis fuerint observatæ. Quædam ex illis in Solis superficie repente oriuntur ac veluti erumpunt, & lenta periodo circa solem ab ortu in occasum ita moveri videntur, ut post aliquod temporis spatium nempe dierum 27., ad eandem iterum solis partem vel limbum redire observentur. Itaque cum maculæ plurimæ duas aut tres periodos perfecerint, & quidem singulas 27 dierum intervallo, ex macularum solarium ob-

servatione omnino constat solem circa proprium axem revolvi; atque hac rotatione fit ut maculæ a margine solis orientali, medium versus progredi videantur, deinde ulterius proVectæ in opposita margine, scilicet occidentali, videantur occidere. Ex macularum solarium motu demonstratum omnino est axem circa quem vertitur sol, non esse ad orbitæ telluris planum perpendicularem; si nempe per centrum solis traductus intelligatur axis orbitæ terrestris, angulum circiter 7° efficiet idem axis cum rotationis solaris axe. Itaque æquator solis, hoc est, circulus qui æqualiter distat a duabus axis extremitatibus, vel duobus polis, efficiet cum orbitæ terrestris plano angulum 7° . Si autem communis planorum illorum interfectio, ad orbitæ terrestris circumferentiam hinc, & inde producta fingatur; dum tellus ad alterutrum ex illis punctis e diametro oppositis perveniet, macularum semita apparens in hoc casu erit linea recta, ut patet, cum oculus sit in ipso plano motus; sed in qualibet alia telluris positione, æquator solaris supra oculum attollitur aut infra illum deprimitur; vestigia macularum erunt ellipsium quædam species, quod quidem non solum demonstratione geometrica, sed etiam observationibus astronomicis compertum est. Cæterum quamvis tota macularum periodus spatio 27 dierum absolvatur, non tamen hoc ipso tempore perficitur solis circa axem rotatio quæ calculo astronomico definitur dierum $25\frac{1}{2}$. Et quidem macularum solarium motus apparens componitur ex motu vero ipsius solis circa axem, & ex motu axis solis circa axem eclipticæ; qui quidem duo axes anni unus intervallo eandem servant mutuam inclinationem 7° circiter. Quare ad definiendam

dam rotationem solis circa axem, hujus quoque posterioris motus ratio habenda est. Verum hæc pauca monuisse satis sit; neque enim universam, data opera, tractamus Astronomiam, sed ea tantum seligimus quæ ad Physicam proprio jure pertinent, & harum institutionum facilitati atque brevitati sunt accommodata.

In iis quæ de solis rotatione diximus, ponitur maculas corpori solari adhærere, quod quidem negarunt nonnulli qui existimant solares maculas ab ipso sole aliquantulum distare illasque circa solem revolvi ad modum satellitum Jovis; sed facile refellitur hæc opinio; omni enim caret verisimilitudine maculas illas quæ sine ulla constanti lege nascuntur & dissolvuntur, tam regulari motu revolvi, nisi ab ipso sole certa periodo abripiantur. Cæterum quæ de macularum illarum natura, & de ipsa solis substantia a Physicis dici solent, incerta omnino sunt, neque iis diutius immorandum putamus.

II. Antequam de stellis fixis quidquam statuamus, immensam esse illarum a terra distantiam pro certo haberi debet. Etenim nullam in stellis fixis parallaxim demonstrare hæcenus potuerunt subtilissimæ etiam observationes; eodem plane modo apparent in remotissimis etiam & e diametro oppositis orbitæ terrestris seu *orbis magni* punctis, ac proinde orbis magni diameter nullam cum fixarum distantia habet proportionem quæ observari possit, & instar puncti se habet. Cum autem diameter illa duplæ distantie solis a terra æqualis sit, hinc immanem stellarum a terra distantiam judicare licet. Et requidem ipsa stellarum magnitudo diversis anni temporibus eadem apparet, atque etiam invariabilis omni-

no observatur mutua stellarum distantia , quamvis terra ad stellas aliquas sex mensium spatio per totam orbitæ suæ diametrum accedat , ac proinde etiam per eandem distantiam sequentibus aliis sex mensibus ab iis recedat . Cum ergo in apparenti stellarum situ nullam variationem deprehendere possimus , id manifesto est indicio illas ad ingentem a tellure distantiam positas esse , & rem perinde se habere ac si terra locum non mutaret . Quamvis autem systema Copernicanum velut hypotheseum tantum proponamus , hic tamen obiter observandum est nullius roboris esse argumentum , quod ex parallaxeos defectu & ex constanti stellarum distantia apparente adversus systema illud objiciunt aliqui ; ex dictis enim evidens est nihil aliud inde concludi posse , nisi maximam stellarum distantiam , quæ quidem in dubium vocari non potest , etiamsi ignota omnino sit ; rem facili exemplo illustrabimus ; si turres duas conspiciamus in exigua a se invicem distantia , sed plusquam decem mille passuum intervallo ab oculis remotas , turrium illarum mutuam distantiam & apparentem magnitudinem haud mutatas observabimus , si unico passu accedamus ; multo propius nos accedere necessum est ut mutatio aliqua percipi possit . Igitur quamvis terra ad stellas nonnullas accedat & ab iis recedat , tantilla tamen est differentia , si cum stellarum distantia comparetur , ut omnino evanescat , non secus ac in exemplo proposito .

III. Diversæ observantur stellarum magnitudines , quæ quidem varietas , saltem ex parte , tribui potest ipsi distantiarum differentiæ , non autem alicui in ipsa reali magnitudine diversitati . Sed quicquid sit , recepta est apud Astronomos stellarum in septem magnitudinis clas-

PARS II. SECTIO III. 251

classes distributio ; illas nempe quæ luce præcellunt , stellas vocant *primæ magnitudinis* , deinde *secundæ* quæ paulo minori splendore fulgent , & ita deinceps ad septimum usque ordinem . Licet vero antiquum & vulgatum sit septem tantum esse fixarum classes & magnitudines ; non tamen existimandum est unamquamque stellam ad classem aliquam ita accurate referri posse , ut eundem omnino splendorem demonstrarent stellæ quæ ad eundem ordinem pertinent ; imo tot constituendi sunt magnitudinum ordines quot fere sunt stellæ , & raro admodum duæ cernuntur fixæ ejusdem lucis ; atque hinc factum est ut stellas quasdam velut primæ magnitudinis habeant nonnulli Astronomi , quas inter stellas secundæ magnitudinis recensent alii . Verum stellas non tantum magnitudine sua designant Astronomi , sed eas quoque per situm mutuamque positionem in ordinem referunt & in *asterismos* seu *constellationes* distribuunt ; itaque *constellationem* vocant plurium stellarum certo ordine dispositarum systema . In his autem constellationibus animantium formas aliarumve rerum imagines finxerunt veteres Astronomi quas recentioribus retinere placuit . Quod spectat apparentem stellarum diametrum , omnem fugit oculorum aciem , quidquid dicant Astronomi nonnulli . Etenim fingamus diametrum apparentem *Sirii* esse 18" qualem sibi apparuisse affirmant aliqui . Si rectæ duæ ex duabus diametri extremitatibus ad oculum protensæ inermi oculo appareant sub angulo 18" ; adhibito telescopio quod ducentis vicibus objectum amplificaret , eadem stella sub angulo 3600" , hoc est , unius gradus sese conspicuam præberet . Quare *Sirius* telescopio observatus diametrum solari vel lunari diametro duplo majorem

rem exhiberet. At certum est Sirius eximio etiam telescopio observatum; ipso Marte haud majorem apparere; est autem diameter Martis in minima a tellure distantia circiter $30''$. Quare cum telescopium apparentem Sirii diametrum ducenties augeat, quæ tamen diameter est $30''$; hinc patet oculo inermi diametrum hanc esse duntaxat tringinta secundorum partem ducentessimam, hoc est, circiter $9''$; quæ quidem diameter nulla oculorum acie percipi potest. Itaque quod stellas fixas ad enormem distantiam præclare videamus, id tribuendum est ascititiis stellarum radiis quibus telescopiorum ope exuuntur; id autem vulgaris lucis exemplo illustrabimus. Experientia notum est candelam accensam in distantia sex milliarium sub angulo satis magno, noctu pulchre lucere. At si interdiu aliud quodlibet objectum ejusdem magnitudinis ad eandem distantiam contemplemur, oculis sese omnino subducet. Hujus quidem phænomeni ratio est quod corpora lucida radios undequaque emittant longe vividiores, quam faciant corpora non lucida ex quibus emanant languidiores radii & reflexione debilitati. Itaque lux vividior retinæ fibras vi longe majori percellit, atque inde fit ut lucida corpora justo majora errore optico judicemus.

IV. Ingentem & fere immensam stellarum multitudinem admirabitur qui telescopio cælum voluerit contemplari. In catalogo Flamstedii longe amplissimo numerantur suoque loco accurate notantur stellæ ter mille, sed minima omnino & fere nulla pars est infiniti prope modum stellarum numeri quibus exornatur cælestis fornix majestas, admirandum plane divinumque spectaculum. Mutationes aliquas in stellis observavit Astronomi; perierunt stel-

la

læ plures a veteribus notatæ, novæ renascuntur, ipsæ etiam aliquando perituræ; stellæ quædam extinguuntur & post certam periodum rursus resplendent. Inter stellas illas maxime celebris est quæ in *collo ceri* videtur; hæc octo vel novem anni mensibus evanescit, reliquis quatuor vel tribus mensibus varia magnitudine se videndam præbet; neque singulis annis eandem obtinet magnitudinem; quandoque secundi ordinis fixas superat, aliquando in tertio ordine vix consistere videtur, nec eodem semper temporis spatio sui copiam facit; nam sæpe non ultra tres menses, sæpe etiam per quatuor integros & amplius conspicitur, neque æquis temporum intervallis incrementa sumit. Præterea ex Astronomorum observationibus constat sæpius novas aliquas prius latentes emicuisse stellas quæ per aliquod tempus insignes & maxime conspicuæ apparere, sed deinde paulatim decrecentes, tandem evanescere quasi extinctæ. Ex his stellarum mutationibus factum est ut suspicati sint aliqui in stellarum illarum superficie generari crassiores maculas quæ primum aliqua ex parte, deinde totam stellam tegunt & tandem dissipantur. Verum hæc opinio omni caret verisimilitudine; creditu enim difficile est maculas illas constanti periodo nasci atque dissipari. Præterea suis quoque maculis obnoxie essent stellæ omnes aliæ. Igitur longe probabilius conjectatur clariss. D. de Maupertuis in opusculo de figura astrorum, magis attenuata & compressa esse aliquarum stellarum corpora. Hinc fit ut dum stellæ illæ circa axem convertuntur, pro majori vel minori respectu terræ inclinatione, majorem vel minorem ostendant disci sui partem. Hinc pro varia rotationis periodo, certa lege mutatio.

tationes varias subire videbitur stellarum illarum lux, imo extingui omnino, deinde ad pristinum splendorem per gradus reditura. Verum hæ sunt probabiles quidem, sed meræ tamen conjecturæ.

Quamvis de stellarum natura, ob immensam illarum distantiam, iudicium ferre vix liceat, certum tamen est stellas esse totidem soles qui proprio fulgent lumine. Etenim stellæ a nobis longe remotiores sunt quam Saturnus; ipso Saturno licet minores appareant, longe tamen splendidius refulgent; stellæ igitur ex sole, quemadmodum faciunt planetæ, lucem suam mutuari non possunt. Verum nullus alius, præter solem, cognitus est fons ex quo lumen suum haurire possint; propria igitur splendent luce ac proinde velut soles haberi debent. Quæ cum ita sint, vix credibile est Deum tot soles in remotissimis locis solitarie locasse, nullaque proximiora iis adiunxisse corpora quæ horum luce & calore foveantur. Cum enim Deus sapientissimus nihil frustra creaverit, probabilissimum est solem unumquemque suo quoque planetarum agmine adornari qui circa hos soles, diversis periodis, ad diversas distantias, lunis quoque suis stipati revolvuntur.

V. Duplicem esse stellarum motum jam antea generatim observavimus, unum nempe diurnum quo fixæ ab ortu in occasum singulis 24 horis moveri videntur in circulis æquatori parallelis; alter autem est motus quo circa polos eclipticæ secundum ordinem signorum ferri videntur lentissime, ita ut 71 vel 72 annorum spatio unicum circuli sui gradum describant, hoc est, 51" singulis annis. Hunc duplicem motum apparentem esse duntaxat tumentur Copernicani; primam motus speciem jam

jam satis explicavimus, motum alterum nunc
 exponemus. Si veteres observationes cum re-
 centioribus comparentur, eandem stellarum la-
 titudinem sive distantiam ab ecliptica nullate-
 nus mutatam deprehendemus; seclusa tamen
 exigua variatione quæ ex axis terrestris mu-
 tatione minima oritur. At longitudinem suam
 stellæ mutare deprehenduntur; ita longitudo
 stellæ quæ *cor Leonis* appellatur, Ptolomei
 temporibus an. 138 erat $20. 3''$; Flamstedius
 an. 1690. ejusdem stellæ longitudinem inve-
 nit $25. 31' 20''$. Collatis autem intermediis
 observationibus plurimis, annum longitudinis
 incrementum colligitur $5''$. Itaque ponamus
 stellam aliquam dato aliquo tempore in eclip-
 ticæ & æquatoris intersectione locatam esse,
 post 100. annos stella ista versus orientem pro-
 movetur longitudine $10. 23'$ circiter; hæc stel-
 la adhuc quidem manebit in ecliptica, sed
 extra æquatorem. Igitur stella cum versus
 orientem progrediatur, eclipticæ & æquatoris
 intersectionem præcedit, quæ proinde interse-
 ctio versus occidentem respectu stellæ consti-
 tuitur. Quare sol ad eclipticæ & æquatoris
 intersectionem pertingit ideoque æquinoctium
 celebrat, antequam perveniat ad stellam in
 qua æquinoctium centum ante annos contige-
 rat. Hæc anticipatio vocari solet *præcessio æ-*
quinottiorum; evidens autem est hanc præ-
 cessionem in punctis solstitialibus locum etiam
 habere.

In hypothesi Copernicana motus ille est
 duntaxat *apparens*; rem totam ita explicant.
 Intelligamus axem diurni motus telluris esse
 semper inclinatum sub angulo $23^{\circ} \frac{1}{2}$ ad pla-
 num eclipticæ; quæ est telluris orbita circa
 solem, vel, quod idem est, ponamus axem
 æquatoris terrestris efficere angulum $23^{\circ} \frac{1}{2}$ cum
 axe

axe eclipticæ . Jam si axes illi ad stellas usque producti intelligantur , axis unus inter stellas designabit punctum quod erit polus eclipticæ terrestris , alter autem axis designabit punctum $23^{\circ} \frac{1}{2}$ remotum quod erit polus nostri æquatoris . Hi duo poli necessario determinant suos circulos a quibus distant 90° , ac proinde notæ sunt stellæ per quas transeunt telluris ecliptica & æquator , ideoque notæ sunt etiam aliarum fixarum ab iisdem circulis distantiz . Hæc quidem omnia manent omnino immutata . Si terrestris æquatoris axis sibi semper maneat parallelus ; neque enim orbis annui magnitudo obstare potest quominus axis ille iisdem cæli punctis per totum annum respondere & iisdem imminere polis ; cum orbis annuus velut punctum respectu immensæ stellarum distantiz considerari debeat . At ponamus axem illum esse mobilem respectu axis eclipticæ immotum circa quem dato tempore revolvatur , eundem tamen cum ipso angulum servans ; tunc axis ille mobilis varios terræ polos in cælo successive designabit , ac proinde æquator terrestris in cælo perpetuo mutabitur , immutata tamen manente telluris ecliptica cujus axis est immobilis , ac proinde ecliptica per easdem fixas perpetuo transibit , constante manente illius angulo cum æquatore , ideoque nulla erit in stellarum positione variatio respectu eclipticæ , sed tantum respectu æquatoris ; quod idem omnino est ac si fixæ circa æquatoris polos revera moverentur . Huc ergo tota redit Copernicana explicatio , ut nempe terrestris æquatoris axis circa axem eclipticæ circulari motu deferatur , eodem manente angulo . Requidem vera axis æquatoris hoc modo moveri non potest , nisi suum parallelismum turbet aliquantulum , quod contra-

tra-

trarium videtur iis quæ de axis terrestris parallelismo jam ante constituimus. Verum de præcessionem æquinotiorum & de axis terrestris nutatione opportunior dicendi locus recurrit in Astronomia physica; hæc pauca generatim attigisse nunc satis sit. Cæterum cum immobiles sint stellæ fixæ, earumque positio & mutus ordo astronomicis observationibus innotescant, hinc patet stellarum usus in Astronomia; nempe ad loca stellarum velut ad puncta fixa & *comparationis terminos*, referendi sunt cælestium corporum motus. Etenim motuum mensuram ex eodem loco habere non possumus, nisi ope angulorum quos spatia percurra in oculo spectatoris efficiunt; quare ad hunc usum adhiberi debent stellæ tanquam puncta lucida in sphæræ concavitate locata, cujus sphæræ radius est indefinitus, centrum autem est oculus spectatoris.

ARTICULUS IV.

De Stellis Erraticis, sive de planetis & cometis.

I. **C**Opernicanam hypothesim explicantes jam diximus in nostri systematis centro positum esse Solem circa quem trium mensium spatio Mercurius revolvitur. Verum an circa proprium axem revolvatur, astronomicis observationibus compertum non est. Hujus planetæ diameter est $\frac{1}{300}$ diametri solis. Illius a Sole distantia maxima est 5137 diametrorum terrestrium, minima autem 3377. Alii deinde planetæ hoc ordine sequuntur. Venus diametrum habet $\frac{1}{100}$ diametri Solis; circa a-

xem

xem revolvitur, horarum spatio circiter 24; & circa Solem intervallo mensium septem, dierum 15. Maxima illius a Sole distantia est 8008 diametrorum terrestrium, minima autem 7898. Telluris a Sole distantia maxima est diametrorum 11187, minima autem 10813. Circa proprium axem revolvitur spatio 24 horarum, & præterea axis ille motu conico defertur illiusque revolutio absolvitur annis 25000. Mars circa seipsum rotatur intervallo 25 horarum & circa solem duorum annorum spatio periodum suam absolvit. Maxima illius a Sole distantia est 18315 diametrorum terrestrium, minima autem 15213. Illius diameter est $\frac{1}{170}$ diametri solaris. Jupiter horarum 10 intervallo circa suum axem convertitur, duodecim autem annorum spatio circa Solem; ejus diameter est $\frac{1}{10}$ diametri solaris illiusque maxima a Sole distantia est diametrorum terrestrium 59950, minima autem 54450. Saturnus circa solem triginta annorum spatio revolvitur; an vero circa axem convertatur, astronomicis observationibus definitum non est. Maxima illius a Sole distantia est diametrorum terrestrium 110935, minima autem 98901. Præter illos sex planetas qui *primarii* appellantur, alii quoque observantur minores planetæ qui *secundarii* seu *satellites* dicuntur; hi revolvuntur circa Solem & circa planetas primarios. Ita Luna est Satelles terræ; Jupiter habet quatuor Satellites, & Saturnus quinque, sed de planetis secundariis sermo erit in articulo sequenti. Aliud est planetarum genus qui *cometæ* vocantur; hi autem in orbitis valde excentricis, multumque elongatis suas periodos circa Solem absolvunt; atque hinc fit
ut

ut in exigua duntaxat cursus sui parte sese conspiciendos præbeant. Mirari ergo non debemus quod de cometarum periodis nihil reliquerint veteres Astronomi. Sic tamen vaticinatus est Seneca: *Veniet tempus quo ipsa que nunc latent, dies extrahet & longioris ævi diligentia*. Astronomicum illud vaticinium implevit Newtonus qui planetarum legibus ipsos quoque cometas subjici demonstravit. Doctrinam Newtonianam perfecit & incredibili diligentia nuperrime tractavit vir non satis laudandus Clairautius in eximio opusculo: *de Cometarum Theoria*.

II. His de planetarum ordine generatim præmissis, jam qua ratione planetarum cometarumque phænomena innotuerint paulo fufius explicandum est. Quod planetas spectat, Mercurius ac Venus dicuntur planetæ inferiores eo quod uterque infra tellurem circa Solem revolvantur; & contraria ratione Mars, Jupiter & Saturnus dicuntur planetæ superiores, eo quod supra terram suas periodos absolvant. Mercurius & Venus diversis phasibus non secus ac Luna sunt obnoxii. Pleno orbe modo fulgere videntur, modo autem falcati apparent; per ipsum Solem transire aliquando observantur, & in illius disco maculam nigram atque rotundam pingunt, donec ex ipso solis disco emergant. Inde autem evidens est Mercurium & Venerem esse corpora opaca & reflexo Solis lumine duntaxat fulgere. Etenim si propria splenderent luce, jam in diversis cum sole aspectibus suum retinerent splendorem, nec discum solarem macula nigra inficerent. Suas quoque phases Mars patitur, totus rotundus aliquando observatur, aliquando autem tantisper falcatus. Quare Martem opacum esse eadem ratione concluditur. Quod
Jo-

Jovem & Saturnum attinet, nullas in iis phases deprehendere licet, ob maximam illorum a Sole distantiam qua fit ut eodem fere modo e terra videantur quo viderentur e Sole. Verum cum planetæ illi umbram projiciant Soli oppositam qua fit ut Satellites huic umbræ immersi per vices oculis evanescant & in conspectu redeant; atque etiam cum ipsi Satellites inter planetas primarios & Solem constituti, umbram facile conspicuam in suos planetas emittant; certum omnino est tum planetas, tum Satellites esse corpora opaca.

III. Cum planetæ sint corpora opaca, mirandum non est eos maculis scædari, quandoquidem splendidissimum corpus solare suis quoque non caret nævis. Jupiter, Mars & Venus, si telescopio spectentur, suas nobis manifestant maculas, ex quarum motu constat planetas illos circa axes rotari, simili prorsus argumento quo solarem vertiginem demonstravimus. Mercurius in solis vicinia perpetuo commorans, solaribus radiis ita absorbetur atque immergitur ut nullas in eo maculas dignoscere liceat; & contraria ratione nullas maculas ostendit Saturnus ob maximam planetæ hujus a Sole distantiam lucemque debiliorem. Probabile tamen est & ex analogia naturæ colligitur Mercurium quoque & Saturnum circa axes suos revolvi. In Jove præter maculas, plures observantur *fasciæ* sibi invicem parallelæ quæ eandem non servant constantem magnitudinem nec easdem distantias; modo crescunt, modo decrescunt, aliquando a se invicem longius recedunt, aliquando accedunt propius & plures una cum maculis mutationes patiuntur.

Saturni figura singularis omnino est; hunc exornat annulus lucidus, formæ ellipticæ cuius

jus axis major constans est & diametri Saturni plusquam duplus; axis autem minor alternis vicibus certaue periodo dilatatur & contrahitur; hinc fit ut annulus ille diversas induat formas atque aliquando etiam omnino evanescat. Ex diversis annuli Saturnii phœnomenis facile intelligitur annulum hunc esse veluti discum tenuissimum qui pro diversa positione, secundum Opticæ leges, diversas debet figuras referre. Talis esse posset hujus annuli positio ut Saturnum coronæ instar cingeret, atque constanti manente hac positione, integra corona semperque lucida fulgeret, non secus ac lucidum perpetuo appareret Saturni hemispherium telluri obversum. In hoc casu recta ex oculo sive ex telluris centro ad centrum Saturni ducta, quæ *visualis radius* appellari potest, ad planum annuli perpendicularis foret vel parum inclinata. At Saturni annulus longe aliam positionem habet; illius planum ad *visualem radium* valde inclinatur ita ut magna pars annuli pone Saturni globum semper lateat, altera autem versus apparentem Saturni discum promineat. Itaque annuli partes illæ dumtaxat sunt conspicuæ quæ extra ipsum Saturni globum erumpunt; duæ scilicet oppositæ, similes & æquales annuli portiones, quæ, ob figuram, *ansulæ* solent appellari. Suis ansulis aliquando spoliatus observatur Saturnus totusque rotundus apparet; Ita nempe respectu Solis positus esse potest annulus, ut illius planum productum transeat per centrum Solis. In hoc casu tenuior annuli pars radiis solaribus illustratur; quia vero tanta non est annuli crassities ut oculos nostros possit afficere, annulus oculis sese subducit. In hac positione, dimidio Solis disco illustratur unaquæque opposi-

posita annuli superficies, & præterea solares radii in superficies illas valde oblique incidunt ac proinde etiam ad oculos nostros oblique reflectuntur. Quare cum reflexio lucis sit valde obliqua & in tanta distantia debilior, conspicuæ esse non possunt ansulæ. Si annulus productus non transeat per centrum Solis, parum tamen distet a centro, res peinde se habebit, donec tandem annulus ad eam perveniat positionem in qua radios sub angulo satis magno excipere possit, atque in hoc casu una dumtaxat annuli superficies illuminabitur, altera manente in umbra. Si annuli superficies illuminata oculo nostro obvertatur, jam conspicuæ fient ansulæ, at si pars obscura ad nos convertatur, ansulæ evanescent & Saturnus apparebit rotundus. Quare patet in definiendis annuli Saturnii phasibus habendam esse rationem positionis annuli respectu Solis & respectu oculi. Si planum annuli transeat per oculum, jam angustior annuli pars versus oculum dirigitur, ac proinde annulus evanescit; mutata autem annuli positione respectu oculi, supra alterutrius superficiei planum attollitur oculus. Si attollatur supra illuminatæ superficiei partem, ansulæ apparent, dummodo tamen radios sub nimia obliquitate oculus non excipiat: Si vero attollatur oculus supra obscuratam superficiem, ansulæ iterum evanescent. Hæc satis sint de annulo Saturnio quæ ita feliciter inventa sunt, ut pro varia Solis, telluris & Saturni positione, varias annuli Saturnii phases certo prædicere liceat.

IV. Planetarum a terra distantias cum recentioribus Astronomis jam constituimus, qua methodo autem definiri possint distantiæ illæ, explicavimus capite primo ubi de siderum parallaxi. Tota parallaxium doctrina pendet ex
con-

conditionibus quinque, scilicet ex distantia oculi a planeta, ex distantia planetæ a centro terræ, ex telluris semidiametro, ex altitudine sideris vera aut apparente, tandem ex angulo parallaxeos. Datis autem tribus conditionibus ex his quinque, aliæ duæ facile inveniuntur, ut patet ex elementis Geom; cum in triangulo parallactico tria data sint ex quibus alia duo colliguntur. Nunc vero exponamus qua ratione investigari possint planetarum a sole distantia. Sit S, sol, T, terra (Fig. 31.), sitque AVB orbita Veneris quam velut circularem consideramus, & ducatur tangens TV; angulus STV, erit elongatio maxima Veneris a Sole; patet enim in hoc casu omnium maximum esse angulum rectis e terra ad Solem, & ad Venerem ductis comprehensum, quem angulum *elongationem* Veneris appellant. Jam in triangulo rectangulo SVT, erit ST, distantia solis a terra ad SV, distantiam Veneris a sole ut radius ad sinum anguli STV, elongationis a sole quæ observatione nota est. Hæc methodus valet tantum in planetis inferioribus; at in planetis superioribus alia ineunda est via. Si planetæ superiores habeant satellites quales sunt Jupiter & Saturnus, distantia obtinetur hoc modo. Sit I locus Jovis (Fig. 32.) ducatur SI centra Jovis, & solis conjungens, producatque in M, erit IM, axis umbræ Jovis cujus positio per satellitum eclipses determinatur, ac proinde habetur locus *heliocentricus* Jovis seu e sole visus. Agatur TI centra Jovis, & terræ conjungens, eaque producat in N, erit N, locus Jovis e terra visus, seu locus *geocentricus*. Angulus NIM vel TIS, est differentia locorum heliocentri, & geocentri, observatione autem notus est angulus ITS, elon-

elongatio Jovis a sole, ac proinde in triangulo TIS, dati sunt anguli omnes, ideoque data est ratio laterum; quare dabitur ratio distantiae Jovis a sole SI, ad distantiam ST, telluris a sole. Porro sub angulo TIS, videretur e Jove semidiameter ST, orbitæ terrestris, sive quod idem est, angulus TIS, est elongatio terræ a sole qualis videretur spectatori in Jove.

In planeta quolibet superiore adhibetur parallaxis annua ad determinandam planetæ distantiam a Sole. Sit I, planeta quilibet superior, sitque A, locus terræ inter solem, & planetam. Ducatur tangens IT, ad telluris orbitam, planeta I, ad eundem locum referretur ex sole S, & ex tellure in A, visus. At si tellus sit in T, & ibi quiescat, e terra videbitur planeta secundum directionem TI, ac proinde motu retrogrado percurreret arcum qui est mensura anguli TIS, quem nempe orbitæ terrestris semidiameter ST, subtendit in I. Quare, angulo illo per observationem dato, erit illius sinus ad radium ut ST ad SI, sive, ut distantia terræ a sole, ad distantiam planetæ a sole; verum habenda est ratio motus proprii planetæ, qui quidem motus observatione notus est. Cæterum ex demonstratis evidens est, hanc methodum in planetis inferioribus non valere, cum telluris orbita planetarum inferiorum orbes contineat. Porro ob maximam planetarum superiorum a terra distantiam manifestum est, satis non esse illam adhibere parallaxim quæ ex telluris semidiametro pendet, & quæ vocatur *parallaxis diurna*, basis enim in tanta distantia nimis exigua foret; atque necessarium omnino est confugere ad *parallaxim annuam*, quæ nempe pendet ex terrestris orbitæ semidiametro; Scilicet

licet in parallaxi diurna considerantur stationes duæ, vel spectatores duo, unus in telluris superficie, alter autem in centro. At in parallaxi annua substituuntur spectatores, unus in tellure, alter autem in sole, atque in hoc casu habetur basis satis magna ad quam referri possunt aliæ quælibet in systemate solari distantiae. Cæterum quæ hætenus diximus valent dumtaxat in orbitarum circularium hypothese; sed veras planetarum orbitas deinde considerabimus.

V. Demonstrationes præcedentes pendent ex distantia solis a terra; hanc autem distantiam variis methodis quæsiuerunt Astronomi. Parallaxium ope inveniri posse distantiam sideris cuiusvis a terra jam demonstravimus cap. I. Superest ergo ut paucis explicemus qua ratione investigari possit parallaxis. Si data sint sideris alicujus latitudo, & longitudo, observetur transitus sideris hujus per meridianum, ejusdemque sideris altitudo supra horizontem; præterea inveniatur declinatio sideris, quæ, si fuerit meridionalis, auferatur ex altitudine æquatoris; addatur autem, si fuerit borealis; differentia vel summa erit altitudo sideris vera, quæ corrigatur secundum accuratas refractionum tabulas, altitudo correctæ subtrahatur ab altitudine vera, residuum erit parallaxis altitudinis quæsitæ, ex qua tandem invenitur distantia sideris a terra. Cum autem nimia sit distantia solis a terra, illius parallaxis per observationes immediate satis tuto haberi non potest. Hinc factum est ut parallaxes Martis & Veneris diligenter investigaverint Astronomi; quæ si darentur, solis quoque parallaxis, & distantia non laterent; nam ex theoria telluris, & planetarum datur pro quolibet temporis momento ratio distantiarum solis, &

Tom. V.

M

pla.

planetæ a terra ; sunt autem parallaxes horizontales in earundem distantiarum ratione reciproca ; quare si detur parallaxis planetæ cuiusvis, dabitur quoque parallaxis solis. Porro Mars soli oppositus , ubi nempe terra inter Martem, & solem constituitur , telluri plusquam duplo propior est quam sol , ac proinde ejus parallaxis plusquam duplo major erit ; at Venus dum est in conjunctione inferiore cum sole , ubi nempe Venus inter solem , & terram versatur , telluri fere quadruplo vicinior est quam sol ejusque proinde parallaxis in eadem ratione major erit ; quare licet exigua solis parallaxis vix observari possit , Veneris tamen , & Martis duplo vel quadruplo majores parallaxes sese facile conspicuas præbent . Itaque Mars, & Venus sunt astra omnium aptissima ad definiendam parallaxim , ex qua solis & planetarum omnium parallaxeos erueri licebit. Interim ex accuratissimis observationibus Martis ad *promontorium bonæ spei* habitis parallaxim solis determinavit D. de la Caille secundorum $12\frac{1}{2}$. Sed hoc ipso anno 1761. quo hæc scribimus die 6. Junii expectatur transitus Veneris sub sole ex quo multo certius atque accuratius elici poterit parallaxis solis ; Verum hujus transitus theoriam explicare non est hujus loci.

VI. Si omnes stellæ quæ in planetæ aliqujus semita occurrunt , conferantur inter se, ternario vel quaternario numero sumptæ, hæ in linea recta apparent ; quod unusquisque observare facile poterit, tenso filo , & oculis ad-moto . Hinc concludet planetæ orbitam jace-re in plano circuli maximi sphaeræ ; nam singula maximorum circularum plana sese intersecant in centro ; at filum tensum simul cum oculi circuli maximi positionem determinat :
igitur

igitur stellæ secundum sui directionem obser-
 vatæ sunt in plano circuli maximi, ac pro-
 inde & in plano circuli maximi jacent pla-
 netæ. Eadem ratione, facta scilicet stellarum
 comparatione, observabit orbitarum plana ad
 se invicem parum esse inclinata, eaque duo-
 decim zodiaci constellationibus contineri, ita
 ut planetarum orbitæ per zodiaci constellatio-
 nes excurrant; ac proinde orbitæ illæ modo
 sese interfecant, modo autem a se invicem
 discedunt, suisque vestigiis formant zonam
 illam quæ *zodiacus* appellatur. At ultra spa-
 tium octo circiter graduum hinc, & inde non
 recedunt; quare si concipiatur circularis fascia
 sexdecim circiter gradus lata, cujus medium
 tenet Ecliptica, hæc designabit in cælo spa-
 tium in quo planetæ motus suos peragunt.
 Itaque cum planetarum orbitæ in diversis ja-
 ceant planis per centrum solis transeuntibus,
 uniuscujusque plani intersectio cum plano ecli-
 pticæ transit etiam per centrum solis, ac pro-
 inde puncta duo in quibus unaquæque orbita
 eclipticæ occurrit, sunt e diametro opposita,
 & 180° distant e sole visa. Igitur in singulis
 revolutionibus planeta quilibet e sole visus di-
 midiam orbitæ suæ partem supra planum ecli-
 pticæ, alteram vero infra describit. Quia ve-
 ro ecliptica est circulus sphaeræ maximus, cu-
 jus planum proinde sphaeram dividit in duo
 hemispheria æqualia, unum boreale, alterum
 australe, hinc patet unumquemque planetam
 habere latitudinem borealem, dum borealem
 orbitæ suæ partem describit, alteram vero au-
 stralem, dum australem partem percurrit. Pun-
 cta duo in quibus planetæ orbita secatur pla-
 num eclipticæ, dicuntur planetæ *Nodi*; nodus
 quidem *ascendens* vocatur punctum ubi pla-
 neta transit e latitudine australi ad borealem,

& contra punctum ubi transit e latitudine boreali ad australem, nodus *descendens* appellatur; recta autem conjungens duo opposita intersectionum puncta *linea nodorum* dicitur.

VII. Quod cometas spectat, per omnes cæli plagas secundum quamlibet directionem vagantur nullo terminati zodiaco, illorumque motus a planetarum motibus longe differunt. Hac tamen non obstante motuum diversitate, certissimum est cometas inter meteora corporaque sublunaria rejiciendos non esse, quæ fuit Peripateticorum opinio; sed eos certis legibus circa solem planetarum instar revolvii in sequenti conclusione demonstrabimus; atque hinc etiam simul refellitur eorum error qui cometas a planetarum vel solis exhalationibus oriri comminiscuntur.

CONCLUSIO.

COMETÆ NON SUNT CORPORA SUBLUNARIA AUT METEORA, SED CIRCA SOLEM CERTA PERIODO REVOLVUNTUR.

PROB. Cometas aere & luna longe superiores esse demonstrat nulla illorum parallaxis diurna, aut saltem valde exigua. Cometæ ex diversis locis observati eandem a stella aliqua vicina distantiam servare deprehenduntur. Exemplo sit cometa quem Ticho Brahe Uranoburgi, & Hagecius Pragæ in Bohemia eodem temporis puncto observarunt, quæ duo loca sub eodem meridiano distant milliaribus circiter 450; uterque eandem observavit cometæ distantiam a stella quæ *vulturis lucida* appellatur. Hinc concludebant cometam illum carere parallaxi diurna sensibili, quæ cum observetur in luna, & quidem satis magna, hinc

hinc patet cometam fuisse luna longe sublimiorem. At quemadmodum parallaxeos diurnæ defectus cometas supra regiones lunares longe evexit, sic ex parallaxi orbis annui evincitur cometas in planetarum regiones descendere. Etenim cometæ qui progrediuntur secundum ordinem signorum, sub exitu apparitionis sunt omnes aut solito tardiores aut retrogradi, si terra sit inter ipsos, & solem; aut celeriores, si terra vergat ad oppositionem, hoc est, si in conjunctione cum sole videantur. Et contra cometæ qui pergunt contra ordinem Signorum, sunt celeriores sub finem apparitionis, si terra versatur inter ipsos & solem; aut tardiores vel retrogradi, si terra ad contrarias partes sita sit. Hæc eadem phænomena observantur in planetis qui pro motu terræ vel conspirante vel contrario, nunc retrogradi sunt, nunc tardius progredi videntur, nunc vero celerius.

Cometas non esse corpora ex vaporibus & exhalationibus conflata, hac ratiocinatione ostendit Nevvtonus. Uritur exemplo cometæ qui an. 1680. observatus fuit, cujus minima distantia a sole fuit ad distantiam telluris a sole ut 6 ad 1000. Jam vero calor solis decrescit in ratione distantiarum duplicata a sole; quare sumptis quadratis, calor ab ipso cometa admissus erit ad calorem æstivum in telluris superficie ut 1000000 ad 36, vel ut 28000 ad 1. præterea notum est experientiæ calorem aquæ ebullientis esse paulo triplo majorem vehementiori calore æstivo: ponamus autem ferri candentis calorem esse ter vel quater aquæ ebullientis calore majorem, hinc concluditur calorem cometæ in minima a sole distantia esse bis millies majorem ferri candentis calore. Porro si cometæ nihil aliud for-

rent quam vaporum atque exhalationum congeries, tantam caloris vim sustinere minime potuisset prædictus cometa tam vehementi igne statim dissipandus. Quamvis præcedens demonstratio quæ ex parallaxi desumitur, parem cometarum planetarumque conditionem satis constituere videatur, alia tamen opinionum commenta breviter refellere nostramque demonstrationem fusius confirmare utilissimum erit.

Cometas ex planetarum exhalationibus suam non habere originem facile evincitur. Et quidem etiamsi remotissimi sint, sæpe tamen apparentes diametros habent apparentibus planetarum diamétris longe majores; sunt ergo ingentis magnitudinis, & planetas primarios aliquando superant. Præterea cometæ in maxima a planetis distantia fere semper apparere incipiunt; Ecquis autem crediderit cometarum vapores tam longe ab ipsis cometis avelli, & ad tantam distantiam dissipari? Et certe si cometæ suas habent exhalationes, hæc in cometas ipsos vi gravitatis recidere debent atque in iis non secus ac in terra nostra pluvias aliaque meteora producere. Eodem argumento refelluntur qui cometas ex solis exhalationibus enasci fabulantur; cometæ enim in maxima a sole distantia sæpissime apparere incipiunt, ad quam distantiam ascendere repugnat omnino densiores graviorefque vapores. Nihilo solidior est Cartesiana hypothesis. Fingit Cartesius cometas olim ex fixarum numero fuisse; aliquæ scilicet stellæ maculis crustisque obductæ lumen suum amiserunt, penitus extinctæ. Tum fixarum illarum vortices a vorticibus proximis abrepti fuere, atque hinc fixæ ex alio vortice in alium translatae temere errarunt, donec illarum aliquæ, pro
sua

sua magnitudine, & soliditate, ad orbem usque Saturni rapi potuerint, in qua distantia satis magnam radiorum solarium copiam excipientes iterum fulgere cæperint. At præterquam quod commentitia vorticum hypothesis, post excultam diligentius sublimiorem mechanicam, profligata omnino fuerit, merum figmentum est nulla ratione innixum prædicta opinio. Nec minus fictitius est planeta quem remotissimum, & longe ultra Saturnum circa solem revolvi ponit Jacobus Bernoullius; Planetam hunc fingit suos habere satellites qui ubi ad nos propius accesserint in orbitæ suæ parte inferiore, a sole magis illustrati sub aspectu cadant, occulto semper manente planeta primario ob immanem illius a terra distantiam; sed hoc fuit merum magni viri in juvenili adhuc ætate *conamen*, ut ipse fatetur, irritum tamen omnino, quod quidem facile demonstrat cometarum & planetarum analogia summa, magis ac magis in hujus conclusionis progressu declaranda.

Cometæ via mechanice in cælis explorari potest hoc modo. Observentur quotidie stellæ quatuor quarum ea sit positio ut cometa reperiatur in concursu duarum linearum quæ oppositas stellas jungunt: id autem examinari facile potest, si filum tensum oculis admoveatur. Observatio quotidie iteretur, & pro singulis diebus in globo cælesti cometæ loca notentur, delineata habebitur via cometæ in cælis, qui deprehendetur esse circulus maximus; omnia enim notata puncta in circuli maximi peripheria invenientur. Hinc manifestum est cometas moveri in plano quod per oculum spectatoris, seu potius per solem transit, quemadmodum antea de planetis obser-

vavimus. Datis autem duobus hujus circuli punctis, dantur ejus inclinatio ad eclipticam ac proinde, & interseccio cum ecliptica, sive nodorum locus, in quo nempe extensum filum secat eclipticam. Porro quamvis cometae motus fieri videatur in circulo maximo, vera tamen ejus semita multum differt a circulo; omnis quidem motus qui in plano per oculum transeunte peragitur, fieri videtur in circulo maximo, quaecumque sit semita. At cometarum orbitam circularem non esse manifestum est; etenim cometae fere semper conspicui essent, ut sunt planetae. Quoniam vero cometae brevi tempore apparent, & diutissime latent, oportet ut exigua omnino sit illorum orbitae pars soli nobisque proxima, reliquo omni arcu longissime recedente; sed de cometarum orbita sermo erit in sequenti capite. Interim ex observationibus colligitur cometarum orbitas neque esse lineas rectas neque curvas versus solem convexas. Etenim cometae aliqui toto apparitionis suae cursu describere observantur arcum caelestem 80° . 100° ; nonnulli describunt 150° . 200° , 250° , 300° , &c. Porro fieri nequaquam potest ut linea recta, vel curva convexa, quaecumque sit illius magnitudo vel positio, sub angulo 180° videatur: igitur cometarum orbitae versus solem sunt concavae. Et quidem cometae circa solem, non secus ac faciunt planetae, areas describere observantur temporibus proportionales; tendunt ergo in solem, & circa ipsum revolvuntur; ut patet ex demonstratis in Physica generali sect. 1. cap. 2. Caeterum haec pauca attigisse nunc satis sit; alia plurima in refellendis objectionibus explicabimus. Interim concludere licet: sidera illa planetis sunt an-

PARS II. SECTIO III. 273

numeranda quæ in planetarum regione moventur, & eadem cum planetis habent phænomena, atqui &c. Ergo.

Objic. Inter cometas, & planetas varietates plurimæ jam antea breviter observatæ sunt. Proprius cometarum motus non est idem in omnibus, alii ab oriente in occidentem tendunt, aliorum motus fit in antecedentia planetarum cursui contrarius, omnes cometas diligenter observati deflectunt ad boream vel austrum, neque planetarum more in aliquo spatio comprehenduntur; sed inde migrant magna motuum varietate, & in omnes cælorum regiones feruntur, alii celerius, alii tardius. Cometam observavit Regiomontanus cujus tanta erat velocitas ut uno die gradus quadraginta peregerit. Tandem cometas spectatorum oculis sese citissime subducunt. Hinc concludere licet. Planetis annumerandos esse cometas ex analogia demonstrari solet, atqui analogiam tollit cometarum, & planetarum comparatio. Ergo &c. . . . Resp. N. Min. Prima hujus objectionis pars facile evanescit, si revocemus in memoriam vi duplici una scilicet semel impressa & uniformi, altera autem centripeta & variabili curvam circa centrum aliquod describi posse, quod quidem in planetis circa solem fieri jam demonstravimus. Verum directio motus impressi non est ad aliquam partem determinata, ad sinistram vel dexteram; ad Boream vel austrum aut quamlibet aliam plagam. At directio motus compositi ex vi uniformi impressa, & ex vi centripeta, pendet tantum ex directione vis impressæ, & ex positione centri virium. Quare cum supremus motor pro sua omnipotenti & libera voluntate astris motum imprimere poterit, diversa motuum directio non tollit co-

metas inter, & planetas analogiam, quæ in eo posita est quod nempe utrumque siderum genus circa solem revolvatur. Quod autem cometæ saltem plurimi per breve tempus sese conspicuos præbeant, repetendum est ex ipsa orbitæ excentricitate. Si planetæ orbita ita sit excentrica ut diameter illius in *aphelio*, seu in maxima a sole distantia sub angulo infinite parvo conspiciatur, jam manifestum est diametrum ac proinde & planetam in aphelio evanescere; conspicuus igitur erit planeta duntaxat in *perihelio* seu in minima a sole distantia, atque tandiu conspicuus manebit, donec nimia non sit illius a sole distantia, ita ut diameter sub angulo non valde exiguo observari possit.

Inst. I. Cometæ nullas certas periodos habere observantur. Anno 1702. Romæ conspicuus fuit cometa, eumque ipsum fuisse credidit Cassinus quem Aristoteles observaverat; & qui an. 1668. rursus sese conspicuum præbuit. Ille igitur cometa brevi 34 annorum periodo, in hac hypothese, revolvitur. Anno 1702 observatus fuit alius cometa, ex cuius velocitate & directione conjecerunt Blanchinius & Maraldus eundem fuisse qui anno 1664 jam apparuerat. Hunc cometam an. 1750. apparuisse refert Cassinus, iterumque anno 1698. conspicuum fuisse testis est Lahiri. Itaque hujus cometæ periodus foret mensium 43, ac proinde ab an. 1652 ad 1698. quatuordecim periodos absolvisset. Equis autem crediderit cometam hunc in tanta observationum astronomicarum assiduitate & diligentia, Astronomorum oculis per integras revolutiones quatuordecim non patuisse? Verum ut alias omittamus plurimas cometarum observationes, satis erit referre cometas duos qui

qui præ aliis omnibus majori diligentia observati fuere. Unus scilicet observatus fuit annis 1531, 1607, 1682, qui proinde quarto conspicuus esse debuit an. 1758. Alter cometa observatus est an. 1680. & is ipse creditur qui annis 531, & 1106 visus est, cujus proinde periodus est annorum 575. Verum si accurate conferantur inter se cometarum observationes, nec satis congruunt conditiones singulæ, neque etiam ipsa tempora periodica. Nulli hæcenus observati fuerunt cometæ quorum orbitæ eandem retinuerint ad eclipticam inclinationem eandemque in perihelio velocitatem, quæ tamen conditiones duæ omnino observari debuissent, si idem cometa iterum rediisset. Quod spectat cometam an. 1682. observatum & anno 1758 expectatum, Astronomorum expectationem elusit; apparuit quidem cometa an. 1759, sed præterquam quod integro anno tardior fuit, non conveniebant accurate omnes utriusque cometæ circumstantiæ: ex his observationibus sic concluditur. Si cometæ planetarum more circa Solem revolverentur, certo innotuisset multis abhinc annis cometarum reditus, atqui &c. Ergo. Resp. N. Min. De certis cometarum periodis nullus est dubitandi locus. Quod autem rarissimus sit cometarum reditus, tribuendum est duplici causæ. Longissima est cometarum periodus ideoque & tardissimus illorum reditus. Præterea nullas satis tutas cometarum observationes reliquerunt veteres Astronomi; neque enim temporibus antiquis ea quæ omnino necessaria est subtilitate habebantur observationes, & maxime circa cometas quorum brevior apparitio diuturnas observationes non permittebat. Hinc fit ut duo tantum hæcenus noti sint cometæ quorum tempus periodicum certo cognitum est. Unus observatus fuit

M 6 annis

annis 1531, 1607, 1682 & quarto visus est anno 1759. Alter cometa observatus fuit anno 1689 atque is ipse est quem apparuisse referunt Astronomi annis 531, 1106 ita ut tempus periodicum constitui debeat annorum circiter 575. Neque cometarum periodo certisque legibus ob stare debet quod non convenient accurate omnia motuum elementa in observationibus cometarum, qui pro uno eodemque cometa habentur. Etenim inæqualitas illa, ut jam antea annotavimus, causis physicis adscribi debet. Saturni motus a cæteris planetis & præsertim a Jove maxime perturbatur. Fieri ergo potest ut unus idemque cometa bis observatus non secet eclipticam sub eodem angulo & in iisdem locis; neque repugnat eandem non esse ejusdem cometæ velocitatem in perigæo; talibus enim erroribus aliisque plurimis obnoxia est luna. Igitur quod cometa anno 1759 observatus Astronomorum quorundam expectationem sefellerit referri debet variationibus quas præcipiti nimis judicio neglexerant aliqui; has autem incredibili solertia ad calculum revocavit Clairaultius tantaque diligentia ut cometæ reditus, paucis diebus, a calculo aberraverit.

Inst. II. Cometæ aliqui ad terram proxime accesserunt. Anno 1472 observatus fuit cometa cujus parallaxis plusquam vigesies major erat parallaxi solari. Cometa observatus anno 1680, computante Hallejo, a boreali orbitæ terrestris parte distabat die 11 Novembris intervallo circiter semidiametrorum terrestrium 60; quare si tunc temporis ad hanc orbitæ suæ partem tellus pervenisset, parallaxis cometæ haud major fuisset parallaxi lunari. Porro in tam exigua cometæ tellurisque distantia, multum nobis ex cometarum vicinia timen-

timendum foret ; immo si cometæ planetarum
 densitatem amulentur, ex attractionis legibus
 fieri facile posset ut cometa circa terram vel
 etiam tellus circa cometam lunæ instar revol-
 veretur, atque deinde tum cometa, tum ter-
 ra in remotissimas planetarum regiones rape-
 rentur. His positis sic argumentari licet. Ad-
 mittenda non est hypothesis illa quæ univer-
 sam mundi compagem turbaret variosque pla-
 netarum cælos confunderet, atqui &c. Ergo...
 Resp. Dist. Maj. hypothesis illa mundi com-
 pagem turbaret, nisi D. O. M. planetarum
 cometarumque systemati certas leges præscri-
 pssisset. C. Maj. Si Deus certis legibus plane-
 tarum orbitas motusque coerceat. N. Maj. &
 Conf. Re quidem vera si cometa aliquis ad
 tellurem vel planetam quemlibet propius ac-
 cederet, variis modis pro massarum varietate
 diversaque velocitate turbari posset mutuis il-
 lorum motus, imo ad contactum pervenire
 possent, & in unicam massam coalescere pla-
 neta & cometa. At sapientissimo divinæ Pro-
 videntię consilio systemata omnia certis legi-
 bus ita gubernat supremus rerum omnium ar-
 tifex, ut mundus hic, quamdiu omnipotens
 auctor jusserit, perseveret. Metuenda quidem
 est & adoranda Dei punientis manus ; verum
 divinæ ultionis arcana non sunt curiosius scru-
 tanda ; sed precibus exoranda divina clemen-
 tia vitæque sanctitate obtinenda. Itaque inter
 vanissima deliramenta rejici debent quæ de
 universali diluvio & de ultima orbis conflagra-
 tione fabulatur Wisthonius in *systemate solari*.
 Advertit Halleius cometam qui mense Septem-
 bri post Julii Cæsaris mortem anno 440 ante
 Christum natum, visus est, rursus apparuisse
 anno Christi 531 Lampadio & Oreste consuli-
 bus, deinde in conspectum rediisse mense Fe-
 brua-

bruarii anno 1660, & tandem observatum fuisse an. 1680. Itaque hujus cometæ periodus foret annorum 575. Hanc autem periodum a morte Julii Cæsaris ad retroacta tempora ex ordine numerans Wislthonus, affirmat eundem cometam diluvii anno apparuisse, & hujus cometæ vapores atque exhalationes diluvii aquas subministrasse. Alteri cometæ ad Solem propius & deinde ad terram accedenti ultimam terræ conflagrationem tribuit; sed hæc mera sunt viri somniantis potius quam philosophantis figmenta. Nec refelli debet ineptissimus error qui apud cultiores gentes jam omnino exolevit; ea nempe, fuit vulgi, atque etiam veterum quorundam Philosophorum opinio, cometas esse funestorum eventuum causas vel signa prævia; quod quidem si verum esset, frequentissimi essent cometæ, cum nulum sit tempus quo miseri mortales ingentibus malis alicubi non premantur.

Inst. III Cometæ in cælis trahere solent interdum longiorem quemdam nebulosum ductum, qui si a nucleo cometæ protenditur in eas partes ad quas motu proprio tendit cometa, dici solet *barba*, Si autem in partes oppositas, *cauda* vocatur. Ille autem nebulosus cometarum tractus mutabilis omnino est, brevior aliquando, ad maximam deinde longitudinem exporrigitur, postea decrescit atque omnino evanescit. His positis sic concluditur. Omni caret verisimilitudine planetis annumeranda esse corpora illa quæ in vapores atque exhalationes abire ac tandem evanescere omnino videntur, atqui &c. Ergo . . . Resp. N. Min. Probabilissimum est cometarum caudas nihil aliud esse quam vapores seu exhalationes ex ipso cometæ nucleo exeuntes, agente sole ad quem proxime accedunt. Et re quidem ipsa, eo longior ob-

observatur cometarum cauda quo minor est distantia illorum *perihelia* & contra. Cum autem cometæ ad longissimas deinde excurrant a sole distantias, magnam humorum copiam admittere & concipere debent; illi autem humores vi solis in distantia *perihelia* rapiuntur atque sublevantur. Quare verisimile est illas cometarum nebulas in majori a sole distantia decrefcere atque tandem dissipari, in reditu ad solem iterum formandas. Hinc etiam intelligere est cur planetæ qui ad tantas a sole distantias non evagantur, his vaporibus non observentur obnoxii. Porro quamvis cometarum caudæ, si motum impressum retinerent & in solem vi gravitatis tenderent, orbitas curvilineas circa solem simul cum cometis describere debeant, iterum in conspectum reditura, de his tamen vaporibus idem non debet fieri iudicium quod de corporibus fixis quæ easdem perpetuo servant motuum viriumque leges. Hinc longe probabilius iudicamus vapores illos inconstanti motuum varietati omnino obnoxios; & atmospheræ nostræ vaporibus fortasse simillimos omnino dispergi atque dissipari. Sed quidquid sit, ex vaporum illorum inconstantia atque mutabilitate minime concludi potest iisdem mutationibus obnoxios esse cometas; inepte enim argumentaretur qui ex telluris vaporum incerta lege nascentibus & evanescentibus, tellurem quoque iisdem legibus subjectam & ex planetarum numero excludendam colligeret. Cæterum quo evadant cometarum caudæ; an a planetis attractæ in illorum substantiam transeant, ignotum omnino est. At materiam illam tenuissimam esse certissimum est, cum pellucidæ sint cometarum caudæ & trans ipsas splendide luceant stellæ. Ex his autem quæ
bre-

breviter diximus, facile intelliguntur præcipua caudarum phænomena. Si cometa sit *perihelius*, maxima velocitate e cometæ nucleo erumpunt vapores qui deinde particularum gravitate retardati ascendunt & caudæ longitudinem augent. Hujus autem caudæ extremitas a sole remotior, satis magnam non reflectens lucis copiam, saltem oculis, evanescit. Hinc patet cur breviores cometarum caudæ diutius fiant conspicuæ; sunt enim veluti permanentes vaporum columnæ quæ minori vi e nucleo erumpunt & motu tardiori in spatiis nihil aut fere nihil resistentibus delatæ, tardius evanescunt. Declinare observantur cometarum caudæ paululum a linea per solem & cometam ducta, viam flectendo ad latus. Etenim fumus aut vapor quilibet a corpore moto impulsus, oblique ascendit, aliquantulum scilicet deflectens a semita corporis impellentis. Hæc autem deviatio minor est prope ipsum cometæ nucleum & in minori a sole distantia; majori enim velocitate ascendit vapor in minori a cometa & a sole distantia. Tandem latior est cauda versus extremitatem quam versus caput, vapores enim in spatiis liberis rarefiunt & dilatantur. Cæterum fumi exemplum pleraque caudarum phænomena feliciter illustrat. Etenim sicut in aere nostro, corporis cujusvis igniti fumus petit superiora & quidem perpendiculariter si corpus quiescat, oblique autem in latus si corpus moveatur; ita in cælis ubi corpora gravitant in solem, fumi & vapores ascendere debent a sole, eodem modo quo fumus in camino ascendit impulsu aeris cui innatat. Aer ille per calorem rarefactus ascendit ob diminutam gravitatem specificam, fumumque implicatum rapit secum; ita calore solis rarefa-

refacta aura ætherea, ob imminutam gravitatem specificam ascendet, & secum rapiet tenuissimas caudæ particulas, adjuvante atque impellente lucis solaris impetu. Inde manifestum est cur vaporum ascendentium tractus ad partes soli oppositas dirigatur. Quare ubi cometa ad solem tendit, vapor relinquitur post cometam & dicitur *cauda*. Ubi autem cometa recedit a sole, vapor præit & *barba* vocatur. Porro ascensus obliquitas minor est ubi velocior fit vaporis ascensus, nempe in vicinia solis & corporis fumantis; cum potentior sit vis qua vapor ascendit. Ex obliquitatis autem diversitate incurvabitur vaporis columna, & quia vapor in curvaturæ parte convexa prior erupit, is ibidem paulo densior est lucemque copiosius reflectet, ideoque pars convexa limite magis distincto terminatur. Hæc omnia cum phænomenis, licet probe consentiant, probabilissime tantum dicta volumus, sine ulla aliarum hypothesen quæ maximo ingenio excogitatæ fuerunt, injuria; imo ad cometarum caudas plurimum etiam conferre atmosphæræ solaris particulas certum videtur, ut opinatur doctissimus Mairanius, ubi cometæ ad solarem atmosphæram descendunt; atque etiam iisdem caudis materiam subministrat ipsarum cometarum atmosphæra, ut doctissimo Eulero visum est.

ARTICULUS V.

De planetis secundariis & de eclipsibus.

I. DE planetis secundariis sæpius jam data occasione mentionem fecimus; Saturnum comitantur satellites quinque, Jovem quatuor, tellus autem unicum habet Satellitem

tem, lunam scilicet. De Saturni & Jovis Satellitibus pauca adjungemus, Lunæ phænomena fufius explicaturi. Satellites Saturni & Jovis atque etiam Satelles terræ ad orientem & occidentem planetæ primarii alternis vicibus sunt pofiti, ad partes oppofitas per vi-
ces redeunt; ubi autem Satelles ad *elongationem* maximam pervenit, eandem ex utraque parte fervat a planeta diftantiam, atque eodem circiter tempore ad eandem elongationem redit. Ex his digreffionibus diftinguuntur a fe invicem Jovis & Saturni Satellites; ita primus Satelles appellatur qui minus digreditur a planeta primario, feu cujus brevius eft tempus periodicum, & fic de aliis, pro digreffionis ordine, in qualibet Satellitum revolutione duæ fiunt Satellitis cum planeta primario conjunctiones; una *superior* quæ ultra planetam refpectu folis contingit, dum nempe Satelles a digreffione occidentali, tranfit ad orientalem; altera autem *inferior* quæ fit cis planetam, dum Satelles ab orientali digreffione ad occidentalem tranfit. Quia vero planetæ primarii & fecundarii fuam lucem mutantur a fole, Satelles tranfiens per difcum planetæ primarii in conjunctione inferiore, *fiditiis* planetæ incolis qui infra Satellitis femitam effent pofiti, folares radios occultabit iisque eclipfem folis creabit. At ubi Satelles in conjunctione fuperiore tranfit pone difcum planetæ, Satelles ipfe umbræ immergitur feu eclipfem patitur; fed eclipfium doctrina commodè explicari non potefl, nifi de luna paulo fufius dicamus.

II. Lunæ *phafes* appellantur diverfæ figuræ quas illius difcus terræ incolis exhibet. Si luna fit in *conjunctione* cum fole, dum nempe luna e tellure vifa eidem zodiaci gra-
dui

dni imminet, cui respondet sol ipse, lunæ discus in cælo evanescit, fitque *novilunium*, ut omnibus notum est. Si luna sit in *oppositio-
ne*, dum nempe distat a sole per 180. gradus, lunæ discus integro circulo terminatur, habeturque *plenilunium*. In primo casu luna medium inter solem & terram locum obtinet; in secundo terra inter solem & lunam versatur. Lunæ conjunctio & oppositio communi nomine *Syzigiæ* appellantur; luna autem dicitur esse in *quadraturis*, dum a sole distat per gradus 90. Varias lunæ phases per integram *lunationem*, dum nempe luna ab una conjunctione cum sole ad proximam redit, haud difficile est intelligere. Quoniam luna est corpus sphæricum & opacum, dimidius lunæ discus radiis solaribus semper illustratur, altero hemispherio in umbra latente; Igitur hemispherium lucidum ab hemispherio obscuro dirimit circulus maximus cujus planum semper perpendiculare est ad rectam quæ e sole ad lunam ducitur. Compendii ergo circulus ille dicatur E. Quia vero dimidia duntaxat globi superficies circiter conspicua esse potest, ex omnibus circulis maximis superficiei sphæricæ, ille duntaxat integer videri potest cujus planum est perpendiculare ad radium ex oculo ductum ad centrum sphære, qui proinde circulus hemispherium visibile terminat; aliorum autem circulorum pars dimidia tantum videri potest. Dicatur V circulus qui terminat hemispherium lunæ e terra conspicuum. Porro positio plani V, constans semper manet respectu terræ, hujusque circuli figura circulum constanter representat, ut patet. Præterea ex lunæ phasibus manifestum est hemispherium illuminatum respectu hemispherii e terra visibilis,
luna.

lunationibus singulis integram revolutionem absolvere circa communem intersectionem utriusque plani, circulorum nempe E, V; hæc autem communis intersectio est diameter sphaeræ, quod evidens est, cum duo circuli maximi sphaeræ sese in partes æquales dividant. Itaque planum circuli E, qui hemisphaerium illuminatum terminat, transit per omnes positiones possibiles respectu radii ex oculo ad centrum lunæ ducti, ac proinde hujus circuli figura modo circularis apparet, modo elliptica, aliquando rectilinea, prout circuli planum vel ad radium perpendiculare est, vel obliquum, aut cum ipso radio coincidens. Jam vero ob revolutionem circuli E circa diametrum circuli V, pars superficiei lunaris quæ respectu terræ illuminata apparet, semper clauditur duobus semicirculis quorum unus circuli V dimidius figuram semicirculi semper exhibet (ex dem.) alter autem circuli E, dimidius, modo tanquam semicirculus, modo tanquam semiellipsis, aliquando velut linea recta conspicitur.

III. Ex his intelliguntur phasæ lunares. In conjunctione lunæ cum sole, dum luna inter solem & terram versatur, circulus E, qui hemisphaerium illuminatum terminat coincidit cum circulo V, qui terminat hemisphaerium visibile. Verum quia hemisphaerium illuminatum directe soli expositum, telluri opponitur, nulla pars lunæ illuminata apparet. Dum vero luna in sua revolutione progreditur, hemisphaerium illuminatum versus hemisphaerium visibile promovetur, semicirculi E, V; mutua intersectione efficiunt duos angulos sphaericos acutos. Igitur paulo post novilunium, videri debet spatium lucidum dimidia occidentali parte circuli V & dimidia parte circuli

culi E, terminatum. Hæc pars dimidia E, elliptica conspicitur, primo tamen fere circularis apparet; planum enim circuli E, multum distat ab illa positione in qua radio e terra ad lunam ducto perpendiculariter insistit, atque hujus ellipseos convexitas semicirculi V concavitati obvertitur, & apparent *cornua* lunæ, quorum apices, angulorum nempe sphericorum vertices, sunt extremitates diametri lunaris circa quam circulus E, volvitur. Hic autem circulus E, magis ac magis promovetur versus hemispherium visibile & ad lunæ cornua efficit angulos sphericos continuo majores; quare hujus circuli planum magis ac magis inclinatur ad radium ex tellure ad lunam ductum; igitur dimidia pars circuli E, semiellipseos figuram refert quæ magis ac magis contrahitur usque ad quartam revolutionis lunaris partem; tunc enim semicirculi E planum ad planum semicirculi V perpendiculariter insistit, ac proinde coincidit cum radio ex terra ad lunam ducto. Quare hæc semiellipsi abit in lineam rectam, & pars lunæ illuminata imitatur semicirculum diametro terminatum. Hæc phasis *primus lunæ quadrans* dicitur.

Deinde semicirculus E, versus hemispherium visibile perpetuo progreditur, & cum semicirculo V, angulos sphericos magis ac magis obtusos efficit; tunc semiellipsi quæ est semicirculi E, representatio, suam convexitatem obvertit ad partes circuli V, semissi occidentali oppositas, magis ac magis dilatatur, ac proinde pars illuminata ad circuli integri figuram accedit magis; hanc figuram tandem acquirit dum in oppositione lunæ cum sole, planum circuli E, perpendiculariter insistit radio e terra ad lunam ducto, tum-

tumque circulus ille integer conspicitur & cum circulo V, coincidit. Hæc phasis *plenilunium* appellatur, tumque circulus E & luna ipsa dimidiam compleverunt revolutionis partem. Deinde circulus E, dimidiam alteram revolutionis suæ partem absolvens, eandem figuras iterum lunæ restituit. Semicirculus E, qui cum dimidia circuli V, parte orientali, illuminatam partem claudit, rursus abit in semiellipsim quæ primum ad semicirculi figuram magis accedit, deinde contrahitur magis donec in lineam rectam abeat post tres revolutionis quadrantes, atque hæc phasis *ultimus lunæ quadrans* vocatur. Tandem semiellipsis magis ac magis dilaturatur suam convexitatem, semicirculi V, parti concavæ obvertens, atque omnino evanescit coincidens cum circulo V, in sequente novilunio. Cæterum facili machina adolescentum imaginatio sublevari potest, adhibendo scilicet globulos duos quorum unus terram, alter vero lunam referat; deinde efficiatur ut lucentis candelæ radios, pro diversis lunæ phasibus, excipiat globulus lunam repræsentans, hoc artificio lunares phases quodam modo adumbrare licebit.

IV. *Mensis synodicus* seu *lunatio* appellatur tempus quod impendit luna, dum ab una conjunctione cum sole ad conjunctionem proximam redit; illud autem tempus definitur spatio 29^{die}. 12^{hor}. 44. *Mensis autem periodicus* vocatur tempus quo luna terram circumeundo, orbitam suam describit spatio 27^{die}. 7^{hor}. 43. Mensem Synodicum majorem esse mense periodico manifestum est; etenim dum luna in propria orbita periodum absolvit, interea tellus ejusque comes luna circa solem eundo, integro fere signo versus orientem.

orientem promoventur , & punctum orbitæ quod in priore situ , in recta scilicet centra terræ & solis iungente , jacebat , nunc sole paulo occidentalius est , ac proinde cum luna ad illud punctum pervenit , nondum in conjunctione cum sole versatur . Præter motum lunæ in sua orbita , ipsam quoque circa axem revolvi compertum est , atque rotatio illa fit spatio 27^{dier.} 7^{hor.} 43' , nempe ipso tempore periodico lunæ ; idque facile colligitur ex eadem lunæ facie quæ telluri perpetuo obvertitur . Etenim si objectum aliquod circa aliud revolvat , eadem semper conspicua manente objecti facie , evidens est , idque unusquisque facile experiri potest , objectum quod eandem semper faciem ostendit , eodem modo circa propriam axem moveri quo ipsum motu periodico circa objectum aliud revolvitur .

Lunæ facies inæqualis omnino est & aspera . Etenim si lunæ superficies terfa omnino esset & polita , ut in speculis , undequaque lucem non reflecteret , sed solis imaginem exiguum admodum instar puncti splendidissime micantis tantum ostenderet ; verum sicut in corporibus terrestribus , sic in luna scabra est superficies ; unde fit ut lucem solarem undequaque diffundat & corpora terrestria illuminet . Non solum inæqualis & aspera est lunæ superficies , sed altissimis montibus profundissimisque vallibus tota obsita creditur . Et quidem si nullæ in luna extarent partes reliquis altiores , in diversis lunæ phasibus , semper accurate terminata apparerent confinia lucis & umbræ . Verum si telescopio lunæ vultum quis contemplatus fuerit , confinium illud nulla regulari linea , sed dentatum , serratum , multisque anfractibus intercisum observabit . Tota lunæ superficies mirabili varietate distin-

stincta apparet; quædam enim partes splendidissime lucent, aliæ autem non paucæ tanquam maculæ obscuriores videntur. Sed inanes de macularum illarum natura quæstiones prætermittimus, atque ad eclipses tum lunæ, tum solis properamus.

V. Si planetæ primarii discum propius amplectatur Satellitis orbita, sitque hujus orbitæ planum ad planetæ orbitam parum inclinatum, evidens est in omnibus conjunctionibus inferioribus Satellitem hunc aliquam superficiei planetæ partem soli eripere, ac proinde umbra Satellitis in planeta primario eclipsim creare debet. At in conjunctionibus superioribus Satelles planetæ primarii umbram subit ideoque ipse eclipsim patitur. Verum si orbita Satellitis ad planetæ orbitam sit vel parum inclinata, sitque orbita illa satis magna quales sunt orbitæ Saturniorum Satellitum quarti & quinti, Jovialis autem quarti, & ipsius lunæ orbita, evidens est in conjunctionibus quæ longius a nodis sunt, dum nempe apparens Satellitum semita abit in eclipsim valde elongatam ita ut minor illius axis planetæ diametrum excedat, jam Satelles in conjunctionibus inferioribus nullam soli occultare potest planetæ partem, ac proinde nulla est eclipsis solis; in conjunctionibus autem superioribus planetæ discus Satellitem soli non subtrahit, ideoque nulla eclipsis Satellitis vel lunæ. Igitur contingere non possunt eclipses nisi *syzigie* prope nodos celebrentur. Itaque si planeta in conjunctione inferiore nodum alterutrum teneat, jam eclipsis solis transit per medium planetæ discum; in conjunctione autem superiore Satelles transit per axem conii quem planetæ primarii umbra projicit & quem *conum umbrosum* vocant.

Igi-

Igitur quo longius planeta distat a nodo , eo longius distat Satellitis umbra a planetæ centro in conjunctionibus inferioribus ; in conjunctionibus autem superioribus eo longius distat Satelles a centro umbræ planetæ .

Si planeta excurrat paululum citra puncta orbitæ in quibus Satellitum remotiorum conjunctiones desinunt esse *eclipticæ* , puncta illa appellantur *limites eclipsium* ; tunc vero pars aliqua Satellitis duntaxat in conjunctionibus inferioribus planetæ partem occultat ; & in conjunctionibus superioribus pars aliqua Satellitis tantum planetæ umbram ingreditur , atque eo minor est pars illa quo propior est planeta prædictis limitibus . Tales eclipses dicuntur *partiales* , aliæ autem *totales* vocantur . Itaque prope nodos totales fiunt eclipses ; prope vel citra limites , sunt tantum partiales . Ex his etiam patet in conjunctionibus inferioribus *eclipticis* solem eclipsim pati duntaxat in iis planetæ punctis quæ imminet vestigiis umbræ Satellitis . Quare si paulo major sit planeta respectu Satellitis , jam planetæ incolæ in iis superficiei planetariæ punctis quæ a sectione globi planetæ & plani ecliptici longius distant , eclipsim solis non patiuntur nisi Satelles paulo removeatur a plano ecliptico ad partes scilicet in quibus positi finguntur incolæ ; in hoc casu incolæ ad alteram plani ecliptici partem positi , nullam pati possunt solis eclipsim . Contra autem in conjunctionibus superioribus eclipticis , dum Satelles umbræ immergitur , fieri non potest ut Satelles quibusdam incolis eclipsim pati videatur , aliis autem incolis splendeat . Itaque eclipses lunæ vel Satellitum *universales* dici possunt ; at solis eclipses quibusdam tantum planetæ primarii incolis sunt conspicuæ . Præ-

rea in eclipsibus solis fieri posse intelligitur ut Satellitis discus e suo planeta primario visus non ita magnus appareat quin aliquam solis partem circa limbos undequaque conspicuam spectatori permittat; in hoc casu circa solis limbum quaquaversum conspicitur annulus lucidus, & ideo eclipsis illa *annularis* dicitur. Verum si tantum sit Satellitis corpus ut quibusdam planetæ primarii incolis totum solis discum subtrahat, tunc eclipsis simpliciter *totalis* vocatur.

VI. Ex hætenus explicatis tandem intelligitur eclipseos solaris initium tunc spectatori alicui contingere, dum satelles motu suo ad eum ita accessit cæli locum in quo sol videtur, ut distantia centri Satellitis a centro solis, æqualis appareat summæ angulorum sub quibus spectator videt Satellitis & solis semidiametros. Itaque *eclipseos* initium esse potest spectatori alicui, dum spectatori alteri finis, vel medium contingit; aut etiam nondum inchoata eclipsi spectatoribus aliis. Patet etiam iis incolis qui in vestigii umbrosi limbo interiori versantur, eclipsim totalem unico duntaxat instanti apparere, talis eclipsis dicitur *totalis sine mora*; qui autem umbræ profundius immerguntur, eclipsim totalem habent diuturniorem, atque eclipsis dicitur *totalis cum mora*. Simili ratione manifestum est iis qui limbo exteriori umbræ immerfi sunt, obscuratam solis partem aliquam duntaxat apparere, & quidem eo minorem quo remotiores sunt ab eodem limbo; cum aliqua duntaxat pars Satellitis solem occultet, ita ut in certa a limbo umbroso distantia eclipsis nulla fiat. Igitur solaris eclipsis in quibusdam locis totalis esse potest, partialis in aliis; quibusdam incolis in disci solaris septen-

septentrionali parte potest apparere ; aliis autem in parte australi . At contra in eclipsibus satellitum , dum Satelles magis ac magis umbræ immergitur , ejus disci partes variæ obscurantur atque occultantur . Spectatores singuli quibus Satelles conspicuus esse potest , hunc vident eodem temporis puncto atque eodem modo umbræ immersum ; nempe totalem vident eclipsim , si totalis est : partialem si partialis . Generatim spectatores duo in quolibet planetæ loco nullam in eclipseos lunæ aut Satellitis phasibus differentiam observant ; dummodo Satelles duobus spectatoribus sit conspicuus . Igitur eclipses lunares sunt *universales* , hoc est , in omnibus terrestribus globi partibus conspicuæ , si luna sit supra horizontem ; ejusdem ubique sunt magnitudinis , eodem tempore initium & finem habent . Id quidem evidens est ; cum enim eclipsis lunaris inde oriatur quod luna telluris umbram subeat , eodem omnino tempore luna telluris umbram ingredi videtur ubique terrarum , non secus ac candelæ lumen in cubiculo extinctæ omnibus qui in eodem sunt cubiculo evanescit . Hinc patet maximam esse eclipsium lunæ vel Satellitum utilitatem ad definiendam meridianorum differentiam in diversis locis ; at eclipsium solarium observationes sine reductionum ambagibus hunc usum præbere non possunt ; hæc autem in Geographia commodius explicabimus .

VII. Ex hætenus explicatis determinari possunt & ad calculum revocari eclipsium lunarium & solarium phasēs . Solaris eclipseos initium & finis celebrantur , dum arcus qui centrorum solis & Satellitis distantiam metitur , semidiametrorum solis & satellitis sum-

mæ æqualis apparet. Itaque computatis per tabulas astronomicas loco & tempore conjunctionis veræ Satellitis cum sole; si latitudo apparens Satellitis minor est prædicta semidiametrorum summa, eclipsim solis contingere necessum est. Etenim cum latitudo Satellitis sit illius distantia ab ecliptica, hanc distantiam metitur arcus circuli maximi ad planum eclipticæ perpendicularis & per Satellitis centrum transeuntis, ac proinde in hoc casu latitudo est arcus distantiae centrorum Satellitis & solis, visorum e planeta primario.

Simili modo Satellitis vel lunæ eclipsis initium & finem habet, ubi distantia centri Satellitis a puncto planetæ ecliptico quod centro solis directe opponitur & *centrum umbræ* dici solet, æqualis est summæ semidiametri Satellitis e planeta visi & semidiametri umbræ in transitu per planetam. Eclipsis autem Satellitis tunc totalis esse incipit vel desinit, dum centrorum Satellitis & umbræ distantia semidiametrorum umbræ & satellitis differentiae æqualis est; tunc enim Satellitis discus interiorum umbræ limbum attingit. Itaque per tabulas astronomicas computentur momentum & locus oppositionis Satellitis, habebitur eclipsis si latitudo Satellitis in ipsa oppositione minor sit summa semidiametrorum umbræ & Satellitis e planeta visi, atque eclipsis erit totalis si latitudo minor sit semidiametrorum umbræ & satellitis differentia, ut patet.

Neque prætermittenda est methodus qua inveniri potest umbræ semidiameter. Sit SA, semidiameter solis S, (Fig. 33.) e planeta T, sub angulo STA, visi, sitque Cl arcus orbitæ Satellitis L, per umbram BEG planetæ T, transitori. Centrum umbræ

bræ

bræ est in L, & arcus CL, qui tanquam linea recta haberi potest, est semidiameter umbræ. Præterea angulus BAT, æqualis est parallaxi horizontali solis, angulus autem BCT, parallaxi horizontali Satellitis; quod manifestum est ex demonstratis cap. i. Quare angulus CTD, utriusque parallaxeos summæ æqualis est, ex qua subtracto angulo LTD, vel ATS qui semidiametro solis & planeta visi æqualis est, remanet angulus CTL, vel arcus CL, semidiameter umbræ planetæ in transitu Satellitis per ipsum planetam. Quamvis punctum C, sit terminus umbræ, debiliior tamen fit lux Satellitis antequam terminum illum attingat; dum enim Satelles progreditur a puncto H ubi tangenti HBM occurrit, versus C, magis ac magis subtrahitur conspectus disci solaris S qui umbræ planetæ T immergitur, ideoque debilitatur lux Satellitis, donec in C, sol oculis omnino subducatur. Spatium HC quod radiis solaribus minus illustratur, *penumbra* dicitur; atque etiam spatium KI quod majorem splendorem per gradus acquirit. Umbræ terrestris magnitudinem auget atmosphæræ nostræ densitas, quare parallaxi horizontali lunæ addi solent aliquot minuta secunda, pro diversa de atmosphæræ altitudine Astronomorum opinione. Atmosphæræ etiam trubuendus est alter effectus; nempe refringuntur solares radii planetam tangentes, & versus umbram L, accedunt ac proinde obscuritatem minuunt. Huic refractionis effectui referendum est quod in eclipsibus lunæ totalibus debiliiori luce resplendeat luna; imo majorem lucem acquirit versus eclipseos medium L, quam prope terminos umbræ C & K. Diametrum solis & lunæ dividere solent

Astronomi in partes duodecim quas *digitos* appellant, iisque utuntur ad exprimendam eclipsios quantitatem, nempe eclipsium dicunt tot digitorum quot duodecimæ partes diametro-
rum apparentium lunæ vel solis obscurari debent. Cæterum qui explicatam eclipsium doctrinam probe intelligent, adhibitis astronomis vulgaribus tabulis atque præceptis, eclipsium durationem & quantitatem ad calculum revocare & prædicere facile poterunt, sed singula persequi non licet.

A P P E N D I X

De quibusdam capitis præcedentis utilitatibus.

Ingenii humani sagacitatem egregie demonstrat certus omnino fallique nescius eclipsium redivisus. Rudioribus hominibus fere videtur incredibile ita accurate notas esse Astronomis corporum cælestium distantias legesque, ut eclipses prædicere ipsumque temporis articulum facile definire possint. Eclipsium utilitatem summam in Geographia deinde explicabimus; nec minus certum est ex cognita eclipsium periodo multum splendoris atque præsidii in exploranda temporum serie derivasse. Ubi nempe in historia quadam aliquid eo tempore contigisse dicitur, quo solis aut lunæ eclipsis observata fuit, eadem eclipsi veluti perspicuo certissimoque caractere cognosci potest annus ac dies quibus res illa ab historico narrata contigerit, quod nonnullis exemplis in Chronologia demonstrabimus. Itaque desinat imperitum vulgus hanc præclarissimam scientiam aspernari, & cum *Astrologia* vanissimo virisque Philosophis indigno studio confundere. Astronomia certissimis methodis

cælestes motus ad calculum revocat; Astrologia autem quam *judiciariam* vocant, ex iisdem motibus expiscatur morales eventus, eos scilicet qui ex voluntate liberisque hominum actionibus pendent. Stultum autem non solum est sed etiam superstitiosum & religioni adversum sideribus tribuere talem vim atque auctoritatem in hominum voluntatem quasi corporum cælestium influxu in nostris actionibus dirigamur. Nec minus imperite præclarissima Astronomiæ scientia abutuntur qui lunæ solisque eclipsibus aliisque planetarum aspectibus calamitates prænuntiari vanissimo terrore in animum sibi inducunt. Hunc turpissimum errorem apud veteres frequentissimum fuisse testantur antiqui Scriptores. Archelaus, referente Seneca, quo die sol defecit, regiam clausit & filium, quod in luctu rebusque adversis moris est, totondit. Nicias, narrante Plutarcho, per plurimos dies, maxima Atheniensium jactura, classis expeditionem retardavit. Inanem hunc terrorem a mortalium animis avertere curavit egregius philosophus Anaximander qui eclipsium rationem primus omnium perspicue docuit; quam ob causam eum in vincula conjectum fuisse scribit Plutarchus. Sed apage hæc ineptissima deliramenta quæ in hodierna rerum astronomicarum luce rudiores duntaxat superstitiosamque plebem occupant; meliorem præcedentis capituli usum demonstramus.

Admirandam & fere infinitam cælorum varietatem contemplemur, animo intueamur innumerabiles stellas circa quas tanquam soles divinis legibus revolvuntur atque gubernantur planetarum systemata, universum hunc globum nostrum in tanta corporum cælestium immensitate velut tenuissimum pulvisculum

facile reputabimus. Ecquis divinorum operum magnitudinem serio meditatus omnem non deponet fastum atque superbiam, suamque tenuitatem & ignorantiam non fatebitur? Etenim doctissimi etiam viri vix aliquid norunt, & universa illorum scientia ne primam quidem, ut ita dicam, alphabeti infiniti litteram continet. Superest ergo ut gloriam nostram in animæ nostræ dignitate & immortalitate collocemus atque supremo rerum omnium auctori perpetuas agamus gratias, quod eam nobis concefferit facultatem qua in hac mortali vita, divina illius opera attingere & laudare possimus; altera immortalis vita perfectaque cognitione fruituri, quod taxit D.O.M.

C A P U T I I.

*De Astronomia Physica, seu de phenomenon
caelestium causis.*

Astronomia physica duas continet partes præcipuas quarum 1^a planetarum orbitas considerat, altera autem mutuam planetarum actionem & inde oriundos errores explicat. Quod spectat hanc secundam partem, hæc cum planetarum densitate & figura conjuncta omnino est. Quare, pro rerum varietate, distinctos instituemus articulos ita ut tamen ea quæ ante jam explicata sunt, breviter tantum revocemus, cætera autem fusius persequamur.

ARTICULUS I.

*De gravitatis celestis systemate & de
planetarum orbita.*

I. **S**I corpus moveatur in Ellipsi vel in alia qualibet sectione conica cujus focus sit in centro virium, ea erit lex vis centripetæ ut sit ubique reciproce proportionalis quadrato distantiae locorum a centro virium : & viceversa, si vis centripeta sit reciproce proportionalis quadrato distantiae locorum a centro virium, & corpus quodvis secundum directionem quamlibet ad centrum virium non convergentem, de loco quovis & quacumque velocitate projiciatur, movebitur corpus illud in aliqua sectione conica focum habente in centro virium. Quia vero planetarum orbitas in seipsas redire astronomicis observationibus compertum est, patet ellipticas esse orbitas illas. Neque enim circulares esse possunt, cum cælestia corpora, modo in suis motibus accelerari modo retardari observentur; porro in orbitis circularibus eadem perpetuo maneret velocitas, ut demonstratum est in Physica generali. Verum si ellipticæ sint corporum cælestium trajectoriæ, jam velocitates in eadem ellipsi sunt reciproce ut perpendicularia ex centro virium, sive ex foco in orbitæ tangentes respectivé demissa, ex demonstratis in virium centralium doctrina. Itaque ellipticæ planetarum orbitæ, & diversæ illorum velocitati & illorum excentricitati probe satisfaciunt. Verum ut systematis hujus veritas confirmetur, in memoriam revocandæ sunt celeberrimæ duæ Kepleri leges, quarum prima hæc est: *Dum planeta in orbi-*

ta circa solem tanquam centrum movetur, si fingantur lineæ ex centro virium ad planetæ loca perpetuo ductæ, spatia ex his lineis composita erunt semper temporibus quibus orbita planetaria portio iisdem rectis comprehensa describitur, proportionalia. Secunda lex est: Tempora periodica planetarum sunt in ratione sesquuplicata mediocrium distantiarum a sole. Hæc autem secunda lex quæ ex astronomicis observationibus colligitur, fluit quoque ex ipsa gravitatis natura; Si nempe planetæ tendant in solem vi centripeta decrescente in ratione distantiarum duplicata, prædicta vis centripetæ lex eam omnino postulat temporum periodicorum & distantiarum rationem quam astronomicæ observationes demonstrant. Eadem quoque phænomena ac proinde & lex eadem in planetis secundariis observantur; sed hæc omnia conferantur cum iis quæ de gravitate universali demonstravimus in Physica generali.

II. Ex phænomenis cælestibus in præcedenti capite descriptis & ex virium centralium doctrina id tandem omnino concludendum est, planetas singulos tendere in solem eosque circa solem revolvi in vacuo, aut in medio rarissimo, vel etiam in medio quantumvis denso nec tamen resistente; hanc autem ultimam hypothesim admittere non parum repugnabunt Philosophi qui patriis opinionibus non mancipati, veritatem physicam in experimentis & observationibus investigant. Cæterum quamvis planetarii systematis centrum sol statuatur, ex mutua tamen attractione æquali & contraria fieri debet ut sol ipse tendat in planetas, ac proinde & solem agitari necessum est, sed motu valde exiguo ob ingentem massam solarem, si cum aliis planetis conferatur.

PARS II. SECTIO III. 299

tur. Itaque si mutuam planetarum & solis actionem consideremus, ellipticarum orbitarum communem focum sol accurate non occupat, sed planetæ & sol ipse circa commune gravitatis centrum revolvi debent. Et re quidem ipsa, si areæ a planetis descriptæ non ad solem, sed ad commune gravitatis centrum referantur, hæ temporibus magis accurate proportionales inveniuntur. Hæc quidem mutæ attractionis lex ipsam quoque terram in ellipti circa commune gravitatis centrum revolvi necessario postularet; Verum cum supremus rerum omnium autor universas naturæ leges præscripserit & constituerit, naturæ legumque omnium auctori lex nulla præscribi potest, leges omnes pro omnipotentissima voluntate potest suspendere atque immutare. Quare hujus systematis partem quæ telluris motum spectat, tanquam faciliorem motuum cælestium explicationem nobis duntaxat concedi postulamus.

Neque a communi planetarum lege immunes esse debent cometæ qui planetarii nostri systematis partem constituunt. Re quidem vera cometæ in orbitis parabolicis revolvi aliquando finguntur, atque hæc hypothesis cum observationibus probe consentit. Verum hanc hypothesim, commoditatis & facilitatis ergo, adhibent Astronomi; Etenim cometæ in ellipsis valde excentricis suas periodos peragunt & per exiguum duntaxat suæ revolutionis tempus observari possunt. Quare cum parabola haberi possit tanquam ellipsis cujus foci duo in infinitum distant, evidens est tanquam portionem parabolæ sine errore sensibili considerari posse visibilem atque exiguum orbitæ cometæ arcum. Hanc autem hypothesim Astronomis facere placuit ad vitandas calculi am-

bages quibus necessario implicatur elliptica & valde excentrica cometarum orbita.

III. Quæ de elliptica planetarum orbita in Physica generali atque etiam in Physica particulari hætenus diximus, observatione magis quam accurata ratiocinatione geometrica demonstrata sunt. Vim centalem in circulo tantum consideravimus, & ellipticam planetarum trajectoriam ad circulare minus accurate revocavimus; hæc autem hypothesis licet ad præsens institutum sufficere videatur, rem tamen utilissimam diligentius considerare convenientissimum est.

Vis acceleratrix quælibet variabilis tempore infinitesimo tanquam constans haberi potest, ac proinde vi centrali hoc modo considerata conveniunt theoremata omnia quæ de motu uniformiter accelerato demonstravimus in Physica generali. Quare vires centrales sunt ut spatia descripta directe & temporum quadrata inverse. Jam sint trajectoriæ cujuslibet puncta tria p, Q, P (Fig. 34.) tempus infinitesimum quo planeta orbitæ suæ arcum describit vi tendente ad S , erit ut area trianguli SPp , vel SPF , coeuntibus punctis p, F ; sunt autem triangulorum illorum areae ut $SP \times pM$ & $ST \times PF$; quare quadratum temporis erit ut $ST^2 \times PF^2 = SP^2 \times PM^2$,

$$pF^2$$

ac proinde vis centralis ut $\frac{pF^2}{ST^2 \times PF^2}$.

vel $\frac{pF}{SP^2 \times pM^2}$. Producantur PS, FS donec circuli osculatoris peripheriæ occurrant, erit $pF : PF = PF : pB$, ideoque ob cordas PV, pB , infinitæ proximæ
 mas

mas, erit $pF = \frac{PF^2}{PV}$, ac proinde vis cen-

tralis quæ erat ut $\frac{PF}{ST^2 \times PF^2}$ fiet $=$

$\frac{1}{ST^2 \times PV}$. Tandem in triangulis re-

ctangulis similibus STP, PVN, erit $SP : ST = PN : PV$, ideoque $PV = \frac{ST \times PN}{SP}$,

& $PV \times ST^2 = \frac{ST^3 \times PN}{SP}$. Hinc formu-

la præcedens evadit $\frac{ST^3 \times PN}{SP}$.

Hæc formula generalis ad ellipticam plane-
tarum orbitam transferri facile poterit, si ra-
dium osculatorem in ellipsi inveniamus, quod
facile præstari poterit. Sint MO, DN, dia-
metri conjugatæ ellipseos, cujus axes Ss, IL,
(Fig. 35.) sitque punctum K, in circum-
ferentia circuli per tria puncta infinite proxi-
ma M, m, μ , transeuntis, erit $\mu H \times Hm = MH \times HK$, vel $\mu H^2 = MH \times HK$.
Sed $\mu H^2 : MH \times HO = CD^2 : CM^2$ (ex
appendice ad Geometriam), ergo $MH \times HK : MH \times HO = CD^2 : CM^2$, vel $HK : HO = CD^2 : CM^2$; atque tandem ob evane-
scentem MH, respectu mH, erit $MK : MO = CD^2 : CM^2$. Quare $MK = \frac{CM^2}{MO}$.

Jam sit MA, diameter circuli oscu-
latoris, ducta corda AK, triangulum AKM,
est

est rectangulum in K, & simile triangulo MCR, rectangulo in R, ob MA perpendicularē arcui $m\mu$, vel tangenti MX, ac proinde & diametro conjugatæ ND. Igitur MR :

$$MC = MK \left(\frac{2CD^2}{CM} \right) : MA = \frac{2CD^2}{MR},$$

$$\text{ac proinde } \frac{1}{2} MA = \frac{CD^2}{MR}.$$

Supereſt ut vim centralem in ellipſi conſideremus. Sit APHL ellipſis a planeta P deſcripta (Fig. 36.) vi centripeta tendente ad focum ſive ſolem S. Ducatur recta TV, orbitam tangens in P, & ex focis S, Q, agantur perpendiculares ST, QV, itemque ex C, demittatur perpendicularis CK. Jam ob trianguſa, SPT, QPV, ſimilia (ex natura ellipſeos) erit $SP : ST = PQ : QV$. Quare $SP + PQ : ST + QV = SP : ST$; ſed $SP + PQ = 2CA$, & $ST + QV = 2CK$; ſunt enim diſtantiæ CS, CQ, æquales, ac proinde perpendicularis CK, eſt media arithmetice proportionalis inter perpendiculares ST, QV. Ergo $2CA : 2CK = SP : ST = CA : CK$, vel PD. Præterea $CA : PD = CN : CB$ (ex proprietate ellipſeos); ergo $SP : ST = CN : CB$, ideoque $ST =$

$$\frac{CB \times SP}{CN}. \text{ Tandem ſit PG radius oſculi}$$

$$\text{in puncto P, erit } PG = \frac{CN^2}{PD} \text{ (ex dem).}$$

$$\text{Sed (ex appendice ad Geom.) } PD = \frac{CA \times CB}{CN},$$

$$\frac{CN^2}{\frac{CA \times CB}{CN}}, \text{ ergo } PG = \frac{CN^3}{CA \times CB}.$$

In
for.

PARS II. SECTIO III. 303

formula generali vis centralis substituantur valores rectorum ST, PG, formula

$$SP \times CN^2 \times CA \times CB$$

abit in hanc

$$SP^2 \times CB^2 \times 2CN^2$$

CA

I

$$= \frac{CA}{SP^2 \times CB^2 \times 2CN^2} = \frac{I}{SP^2}, \text{ ob constan-}$$

tes CA, CB. Hinc patet planetam revolventem in ellipsi vi centripeta tendente ad focus servare prædictam legem, qua nempe decreascit in ratione duplicata distantiarum a foco. Hæc eadem lex obtinet quoque in aliis sectionibus conicis, sed ellipseos casum qui solus ad Astronomiam pertinet, demonstrasse satis sit.

IV. Si Parameter axis principalis dicatur π ,

$$2CB^2$$

$$\text{erit } \pi = \frac{2CB^2}{CA} \text{ (ex append. ad Geom.) ;}$$

CA

$$\text{quare vis centralis quæ est ut } \frac{CA}{SP^2 \times 2CB^2}$$

$$\text{erit ut } \frac{I}{SP^2 \times \pi}. \text{ Sed vis centralis est ut}$$

$$\frac{pF}{SP^2 \times pM^2} \text{ (ex dem.), ergo } \frac{I}{SP^2 \times \pi} = \frac{pF}{SP^2 \times pM^2}$$

$$\frac{pF}{SP^2 \times pM^2}; \text{ Sed } pF \text{ quæ exprimit vim cen-}$$

$$\text{tralem est ut } \frac{I}{SP^2}; \text{ ergo } \frac{pF}{\pi} = \frac{pF}{SP^2 \times pM^2},$$

$$\text{ac proinde } \pi = SP^2 \times pM^2 \text{ \& } \sqrt{\pi} = SP \times pM; \text{ sed } SP \times pM \text{ est ut area secto-}$$

ris

ris PSp; quare si corpora plura in ellipsis revolvantur vi centripeta tendente ad focum communem, erunt sectores eodem tempore descripti in ratione subduplicata parametri axium principalium in qualibet ellipsi.

Præterea velocitas tempore infinitesimo est ut arcus descriptus Pp, & ob triangula rectangula SPT, pMP, similia, erit ST: SP

$$= pM: pP = \frac{SP \times pM}{ST} \quad \text{Sed } \sqrt{\pi} = \frac{SP \times pM}{ST} \quad \text{ergo } pP = \frac{ST}{\sqrt{\pi}}, \text{ nempe veloci-}$$

tas est in ratione subduplicata parametri directe & perpendicularis ex foco ad tangentem demissæ inverse.

Tandem quo major est ellipseos descriptæ area & quo minor areæ pars dato tempore percurfa, eo majus est tempus periodicum. Quare tempus periodicum est ut area tota ellipseos directe & sector dato tempore descriptus inverse; Sed sector est in ratione subduplicata parametri; ergo tempus periodicum est ut area tota directe & parametri radix quadrata inverse. Jam major axis ellipseos dicatur, d, cujus parameter π , axis minor, b, erit $\pi d = bb$ (ex append.) ac proinde $\pi d = b b d$; Sed area ellipseos est ut rectangulum ex axibus ac proinde ut, bd, $= t\sqrt{\pi}$, ubi, t, exprimit tempus periodicum, ergo $b b d = \pi t^2$ & $\pi d = \pi t^2$, nempe $d = t^2$, seu temporum periodicorum quadrata sunt in ratione triplicata axium principalium in ellipsi. Hinc datis planetarum temporibus periodicis, innotescit majorum axium ratio in orbita qualibet elliptica. Ut autem in præcedenti demonstratione quæ magni sane mo,

PARS II. SECT. III. 305

momenti est, nihil prætermittatur, ellipsium areas esse ut axium rectangula demonstrabimus; quæ quidem proprietas ex appendice facile colligitur. Etenim intelligatur semicirculus super axem principalem ellipseos tanquam diametrum descriptus. Ex ellipseos peripheria ad axem ducantur semiordinatæ infinite proximæ quæ circulo & ellipsi erunt communes, rectangula duabus illis semiordinatis comprehensa in ellipsi & circulo erunt ut altitudines, hoc est, ut semiordinatæ, sed semiordinatæ illæ sunt in constanti ratione semidiametri circuli ad semiaxem minorem ellipsis, (ex proprietate ellipsis & circuli.) Ergo rectangulorum omnium summa, hoc est, area circuli est ad aream ellipsis in ratione semidiametri circuli ad semiaxem ellipsis. Hinc comparatis duobus circulis duabusque ellipsis, facile colligitur areas ellipsium esse inter se ut axium rectangula, cum areae circulorum sint ut radiorum quadrata.

ARTICULUS II.

De planetarum densitate & figura, præsertim de figura telluris.

I. **E**X articulo præcedenti innotescit distantia planerarum a sole, sive potius distantiarum ratio; quare si observetur planetarum diameter in data aliqua distantia, dabitur ratio superficierum & magnitudinum. Etenim evidens est eo majorem esse veram planetæ diametrum, quo majorem arcum cælestem subtendit & quo major est planetæ distantia. Quare planetarum diametri veræ sunt ut arcus quos subtendunt, & distantia
pla-

planetæ conjunctim. Quia vero sphaerarum superficies sunt ut quadrata diametrorum, soliditates autem ut diametrorum cubi (ex elem. Geom.), erunt planetarum superficies ut arcus subtenfi quadratum & distantia quadratum simul, magnitudines autem ut arcus subtenfi cubus & cubus distantia simul. His principiis innituntur planetarum diametri, superficies & magnitudines quæ in tabulis astronomicis legi solent. Verum quod spectat planetarum densitatem, qua ratione investigari possit, jam explicavimus in Physica generali ubi virium centralium doctrinam tradidimus. At dolendum est methodos hætenus cognitæ in iis tantum valere planetis qui habent Satellites; eo autem tempore quo hæc scribo, non sine magna animi voluptate mihi nuntiatum est a clarissimo viro D. Montaigne Astronomo Lemovicensi detectum fuisse Veneris Satellitem cujus distantia a planeta primario est semidiametrorum Veneris 50, tempus autem periodicum est dierum 12. Præcedentis doctrinæ usum in hoc Satellite ostendere non abs re erit. In memoriam revocandum est, ex Physica generali, massas planetarum qui Satellites habent, esse in ratione triplicata directa distantiarum Satellitis a planeta primario & duplicata inversa temporum periodi-

corum. Itaque multiplicetur fractio $\frac{1075}{1558}$ quæ
 rationem diametrorum Veneris & telluris ex-
 primit per $\frac{50}{60}$ quæ est ratio distantiarum

Satellitis a Venere & lunæ a terra, producti
 sumatur cubus qui dividatur per quadratum fra-

fractionis —, quæ fractio exprimit rationem

temporum periodicorum Satellitis & lunæ, his peractis operationibus invenitur 0,98 qui numerus unitati proxime æqualis est; quare massa Veneris massæ telluris fere æqualis invenitur. Data autem quantitate materiæ in duobus planetis illorumque magnitudine, innotescit illorum densitas quæ est in ratione reciproca voluminis, seu in ratione reciproca triplicata diametri; factaque operatione arithmetica, invenitur densitas Veneris fere triplo major densitate telluris. Simili instituto calculo in aliis planetis invenitur densiores esse planetas soli proximiores; in qua quidem dispositione, admiranda est infinita Dei providentia; Si enim tellus nostra in orbe Mercurii aut Veneris collocata fuisset, nobis mortalibus minime foret idonea, nimio calore ebullirent aquæ oceani & in vapores dissiparentur. Contraria ratione, si ad orbem Saturni removeretur tellus, in tanta a sole distantia nimio frigore rigescerent aquæ, cito interirent animalia & plantæ. Ecquis ergo sancte non adorabit sapientissimas leges quibus reguntur atque gubernantur corpora cælestia, ita ut mutato illorum situ atque ordine perniciosissimos effectus inde nasci, totumque mundi systema perturbari oporteat?

II. Corpora cælestia hætenus consideravimus tanquam spherica; at certissimum est planetas non esse globos accurate rotundos, sed paululum compressos; ita ut axis rotationis sit paulo minor diametro æquatoris. Hanc figuram in Jove & tellure tantum observare licuit; cæteri enim planetæ sub angulis minoribus videntur, neque conspicua esse potest dia-

diametrorum inæqualitas. Verum si planetarum superficies vel totas vel ex parte immerfas ponamus fluido homogeneo, qualia sunt telluris nostræ maria, rotationis motus planetis concedi non potest, nisi eos sub polis compressos, sub æquatore autem oblongatos esse concedatur. Et quidem in hac hypothefi, talis esse debet figura planetæ ut tota fluidi massa cujus partes singulæ ad planetæ centrum tendunt, maneat in æquilibrio. Etenim cum particulæ illæ (ex natura fluidorum.) vi cuicumque illatæ cedant & cedendo facile moveantur inter se; ita disponi debent ut vi æquali tendant ad punctum fixum versus quod graves sunt, ac proinde & circa punctum illud consistant in æquilibrio. At si planeta sit globus accurate rotundus, jam æquilibrium cum motu rotationis conciliari nequaquam potest. Etenim superficiei planetariæ puncta singula circa axem describerent circulos eo majores & eo majori velocitate, quo a polis remotiores sunt circuli illi & æquatori propiores; hinc puncta illa versus æquatorem acquirerent vim majorem centrifugam. Hæc autem vis centrifuga ut pote contraria vi centripetæ imminueret gravitatem, & quidem eo magis quo minor foret distantia ab æquatore. Igitur particulæ fluidæ versus æquatorem minus resisterent vi qua particulæ polis proximæ tenderent ad centrum, quæ proinde particulæ resfluerent ad æquatorem ibique particulas fluidas sursum coegerent ascendere, ideoque in eodem loco accumulata superficiem planetæ attollerent, vel quod perinde est, particulæ fluidæ in partibus æquatoris exundantes figuram planetæ mutarent. Itaque ad cavendam exundationem hanc oporteret planetam intumescere versus

PARS II. SECT. III. 309

fus æquatorem ; hoc enim materiæ excessu compensaretur decrementum gravitatis ex rotationis motu oriundum, atque omnia manerent in æquilibrio.

III. Ex demonstratis evidens est pro majori rotationis velocitate majorem etiam esse planetæ compressionem . Hac de causa facile conspicua est compressa Jovis figura ; cum planeta ille licet terra longe major, breviori quam decem horarum spatio suam rotationem absolvat . Ex præcedentibus etiam patet inter circulos omnes quos in planetæ superficie fingunt Astronomi, æquatorem duntaxat circulosque æquatori parallelos vere circulos esse ; alii autem circuli quales sunt Meridianus, Verticalis ; Horizon &c. ad figuram ellipticam accedunt . Meridiani sunt ellipses quarum axis minor transit per polos , axis autem major æqualis est diametro æquatoris & in ipso æquatoris plano : Hinc colligitur æquales meridiani cælestis gradus 360 , accurate non respondere æqualibus meridiani planetarii partibus 360 ; Ita in tellure arcus meridiani terrestris qui cælestis meridiani partibus æqualibus respondent, æquales non sunt, sed minores in iis locis in quibus magis convexa est telluris superficies , majores autem ubi superficies est magis compressa . Verum gravissimam de figura telluris quæstionem in sequenti conclusione explicabimus.

C O N.

CONCLUSIO.

QUAMVIS CERTO COGNITA NON SIT ACCURATA TELLURIS FIGURA, EAM TAMEN VERSUS POLOS COMPRESSAM ESSE DEMONSTRANT OBSERVATIONES ATQUE EXPERIMENTA.

PROB. I. Definiendæ telluris figuræ prima methodus ad duas operationes reducitur; nempe ad mensuram arcus cælestis inter duo terræ loca sub eodem meridiano & in diversis latitudinibus constituta, atque præterea ad locorum illorum distantiam terrestrem: totam hujus methodi rationem exponemus. Arcus cælestis amplitudo investigatur observando in duobus propositis locis ejusdem stellæ altitudinem meridianam, differentia altitudinum præbet ipsam arcus amplitudinem, hoc est, numerum graduum in arcu cælesti qui terrestri locorum distantia respondet. Res perinde se habet, si observetur stellæ alicujus distantia a Zenith, deinde iter fiat ad austrum vel boream, donec altitudinis differentia sit unius gradus; tandem locorum distantia geometricis operationibus capiatur, ut fieri solet, cælestis gradus mensura habebitur. Et requidem ipsa, duos fingamus observatores in eodem meridiano, ita ut ejusdem stellæ altitudo respectu utriusque Zenith uno gradu differat. Ex duobus illis locis ductæ intelligantur in meridiano tangentes duæ quæ respectivos horizontes determinabunt, atque ad tangentes illas agantur perpendiculares quæ lineas verticales seu lineas ipsorum Zenith respective exhibebunt. Jam vero quia stella immenso fere intervallo distat, radii *visuales* utriusque spe-

PARS II. SECT. III. 311

ſpectatoris ad ſtellam erunt paralleli, ac proinde altitudinum differentia ex diverſa tantum utriusque horizon- tis inclinatione oriri poteſt. Quare angulus utriusque horizon- tis vel utriusque tangentis inclinatione comprehen- ſus, erit unius gradus, ideoque etiam angulus utriusque perpendicularis. Si terra ſit ſphærica, duæ perpendiculares in centro concurrent, atque locorum diſtantia erit unius gradus ſive pars 360° meridiani. Porro evidens eſt ad accuratam graduum æſtimationem, a refractionum erroribus liberandas eſſe ſtellarum altitudines, atque ut error minuatur adhiberi debet ſtella ipſi Zenith proxima, cum in Zenith refraction ſit nulla & in diſtantia quatuor vel quinque graduum pro nulla fere haberi poſſit. Deinde ejuſdem ſtellæ obſervationes, quantum fieri poteſt, eodem tempore in duobus locis haberi deſiderandum eſt; hac enim adhibita diligentia tolluntur reductiones & correctiones, ob apparentes ſtellarum motus, omnino neceſſariæ, ſi obſervationes eodem tempore fieri non poſſint. Tandem ſi loca non ſint ſub eodem meridiano accurate poſita, arcus amplitudo, prædictis cautionibus adhibitis obſervata præbet arcus cæleſtis amplitudinem inter duos utriusque loci circulos parallelos. Sed his præmiſſis jam accuratiſſimas obſervationes afferamus iſque ad definiendam telluris figuram utamur.

Si terra ponatur ſphærica, gradus omnes æquales eſſe jam demonſtravimus, nempe idem omnino iter faciendum eſſet in meridiano ut ejuſdem ſtellæ altitudo gradus unius angulo creſceret vel decreſceret. At ſi tellus non ſit ſphærica, gradus inæquales eſſe brevi ratiocinatione facile intelligitur. Ponamus primum terram ſphæricam & ex molli materia com-
pa-

factam, eamque duabus viribus in utraque axis extremitate comprimi fingamus secundum axis directionem, ita ut axis ille contrahatur, æquator autem dilatetur; Jam tellus in utriusque axis extremitate magis erit complanata ideoque minor telluris curvatura in axe, major autem in æquatore. At quo major est telluris curvatura secundum directionem meridiani, eo brevius iter fieri necessum est secundum eandem directionem, ut observata stellæ altitudo gradus unus angulo augeatur vel minuat. Itaque si terra sit compressa versus polos, brevius iter faciendum est in meridiano prope æquatorem quam versus polos, ut gradum unum latitudinis acquiramus vel amittamus. Igitur si terra sit compressa versus polos, gradus crescere debent ab æquatore ad polos & contra. Idem magis geometricè demonstrari posset ex *radiorum osculatorum* natura. Etenim si curvatura sit major, minor est radius osculator, ac proinde & minor circuli osculantis peripheria, ideoque minor etiam circuli gradus. Longius esset exhibere diversas graduum mensuras quæ in egregiis operibus de figura telluris nuperrime editis fuscè describuntur, satis sit observare accuratissimas graduum dimensiones in id omnes conspirare ut exhibeant figuram telluris compressam ad polos, versus æquatorem oblongatam.

Prob. II. Si tellus compressa sit versus polos, generatim certissimum est gravitatem minorem esse sub æquatore & maiorem sub polis, ac proinde, eadem manente longitudine, retardatur pendulorum motus pergendo a polis ad æquatorem & viceversa. At gravitatis inæqualitas conciliari non potest cum spherica telluris figura, & maiore existente vi gravita-

vitatis sub polis, tellurem versus æquatorem elatam esse demonstravimus (nam. præc.). Hinc concludere licet: telluri tribuenda est figura illa quam observationes & experimenta omnino postulant; atqui &c. Ergo.

Porro quamvis tellurem versus polos compressam, & versus æquatorem oblongatam compertum omnino sit, non tamen æque certum est ellipticam esse telluris figuram, neque certo cognita est axium ratio. Et quidem ex observationibus astronomicis res non satis accurate confici videtur. In his observationibus fingitur lineam verticalem per axem telluris transire, eamque perpendicularem esse ad horizontem; ponitur etiam meridianum sive planum in quo sol, meridiei tempore, versatur, & quod transit per lineam verticalem, per axem telluris quoque transire. Verum hæc tria non ea subtilitate, quæ necessaria omnino est, determinata videntur; pendent enim ex partium telluris homogeneitate aliisque hypothesibus omnino incertis.

At si ponamus diversam omnino esse & sine certa lege partium telluris densitatem, jam quia gravitas corporis ex singulis partium terræ attractionibus componitur, major vel minor partium densitas gravitatis legem omnino immutabit, atque hinc diversa axium terræ proportio pro diversa internarum partium dispositione variaque densitate. Verum quamvis certo cognita non sit telluris figura, vix tamen in dubium vocari potest figuram telluris esse quamproxime regularem & similes esse terrestres meridianos. Etenim in sequenti articulo demonstrabimus *præcessionem æquinotiorum* ellipticæ telluris figuræ tribuendam esse, atque hæc hypothesis cum observationibus astronomicis probe consentit. Porro si ex-

Tom. V.

O

terio-

teriores globi nostri partes sine ordine forent dispositæ, hæc irregularitas præcessionis phænomena & leges maxime turbaret.

Tandem ellipticam telluris figuram saltem quamproxime ostendere videntur accuratissima pendulorum experimenta. Ita se habent experimenta illa ut gravitatis incrementa quæ auctis penduli longitudinibus sunt proportionalia, satis accurate inveniuntur ut quadrata sinuum latitudinis, quæ quidem observationes non solum regularem sed ellipticam quoque telluris figuram confirmant. Verum quia subtilissimæ sunt observationes illæ & in iis peccari facile potest errore quidem licet levi, in re tamen periculosa maxime gravi, ideo satis nobis erit affirmare terram versus polos compressam esse. Hæc autem conclusio comparari debet cum iis quæ in Physica generali de gravitatis variatione demonstrata sunt. Porro axis terrestris diametro æquatoris bre-

vior statuitur differentia —, secundum ac-

175

curatissimas observationes quas Academici Parisienses immortalis labore versus polum & æquatorem habuere.

Objic. Figura telluris est admodum scabra & montibus aspera. Nullis experimentis, nullis observationibus definiri potest irregularis terræ curvatura quæ per tot anfractus & valles, per tot colles altioresque montes sese perpetuo sinuat & nulla certa lege variat. Ergo &c.... Resp. N. Conf. Quæstionis propositæ statum minus assequuntur qui hanc telluris irregularitatem objiciunt. Inæqualis admodum est externa telluris figura, in amplissima camporum planitie nulla sæpe curvatura apparet, valles autem curvaturam habent ex-

extrorsum, montes introrsum obversam; hanc irregularitatem nemo non videt. Figura hæc etiam perpetuo mutatur montium & rupum lapsu, imo in mari, mutato undarum rumore, succedentibus sibi fluctibus, telluris superficies perpetuo mutatur. Itaque dum figuram telluris investigamus, nulla montium & vallium irregularitas consideratur. Tota quæstio in eo posita est: assumpto nempe puncto quolibet in superficie terrestri, quæritur superficies continua ab eo puncto circumquaque ducta tali lege ut ad superficiem illam ubique perpendicularis sit directio gravitatis vi. centrifuga affectæ. Igitur figura telluris pendet omnino ex lege gravitatis, ut sæpius observavimus, nec satis accurate & ad amissim definiri potest; attamen tellurem compressam esse ad polos, non solum ostendunt observati meridianorum gradus & instituta pendulorum experimenta, sed etiam confirmat lex analogiæ; nam accuratissimis observationibus compertum est, satis notabiliter oblongatum esse Jovis æquatorem, quæ quidem Jovis figura ex rapidissima planetæ hujus ratione repetenda est.

Inst. I. Figuræ terrestris irregularitatem nullis unquam experimentis aut observationibus definiendam demonstrant observationes astronomiæ. Terram non esse solidum ex rotatione curvæ alicujus circa axem genitum ostendunt graduum mensuræ in Gallia atque in Italia a doctissimis viris habitæ. Et quidem in Italia, eadem manente latitudine, sed mutato meridiano, gradus minor quam in Gallia observatus est. At si telluris figuræ regularis foret, æquales essent gradus æqualiter distantes ab æquatore, seu meridiani omnes essent similes, quod cum non observe-

tur, hinc argumentari licet: De figura telluris nil affirmari potest, si irregulares observentur meridiani terrestres illorumque irregularitas nonnisi per observationes ubique locorum instituendas definiri possit, atqui &c. Ergo..... Resp. Dist. Maj. Et inde colligitur fieri posse ut meridiani terrestres neque similes sint neque elliptici, C. Maj. ex observationibus colligitur terram non esse versus polos compressam. N. Maj. & conf. In præsentī quæstione hoc unum ostendere volumus telluris figuram ad æquatorem esse oblongatam, quod quidem variis argumentis probavimus, quidquid sit de figuræ terrestris irregularitate. Neque necesse est singulos dimetiri longitudinis & latitudinis gradus ad determinandam hanc quam diximus telluris figuram, satis enim est varios gradus in locis valde diffitis summa diligentia metiri, factasque observationes ad alia terræ loca transferre licebit, præsertim cum id fieri, generatim saltem, postulet gravitatis & vis centrifugæ doctrina. Tandem quod spectat graduum differentiam in Gallia & Italia, hæc differentia inter utrumque gradum est hexapedarum 70 duntaxat, quarum pars dimidia, 35, unicuique gradui potest tribui. Porro si duorum minutorum secundorum error duntaxat in arcus cælestis mensura committatur, hexapedarum 32 errore in gradus mensura peccabitur. Quamvis autem minime suspecta sit clarissimorum virorum diligentia, nobis tamen facile persuademus rem tam periculosam aliis mensuris & in locis remotioribus confirmandam esse, ita ut tanta sit differentia quæ fidem omnino indubitatam faciat & in ipsam observationem refundi nequaquam possit.

Inst. II. Tellurem versus polos compressam esse

esse concluditur ex incremento graduum per-
 gendo ab æquatore ad polum ; at conclusio-
 nem omnino contrariam ex iisdem observatio-
 nibus derivarunt doctissimi etiam in Gallia
 viri Picardus & alii . Et quidem sit C, cen-
 trum telluris, P, polus (Fig. 37.) EHP
 meridianus . Ex centro C, ducatur recta CH,
 comprehendens cum CE, angulum unius gra-
 dus ; fingatur EC, major quam CP ; arcus
 terrestris duabus rectis CH, CE, comprehen-
 sus, major erit, quam versus P, quod evi-
 dens est, ac proinde gradus major foret ver-
 sus æquatorem quam versus polos ; Ergo tan-
 tum abest ut ex graduum mensura colligatur
 terram esse oblongatam versus æquatorem,
 quin contra versus polos oblongata esse de-
 beat Resp. N. Conf. Allato aut fortasse
 alio simili paralogismo in errorem inducti
 fuerunt clarissimi etiam viri qui ex suis ob-
 servationibus terram versus polos oblongatam
 esse concludebant, contra quam facere debue-
 runt . Totus paralogismus in eo latet, quod
 nempe gradus terrestris non eo determinetur
 angulo qui duabus lineis e centro ad circum-
 ferentiam ductis continetur, sed gradus defi-
 nitur duabus perpendicularibus quæ ad tel-
 luris superficiem ductæ angulum unius gradus
 efficiunt . Distantia stellarum a Zenith ac pro-
 inde & illarum altitudo harum perpendicula-
 rium respectu æstimatur ; porro perpendicula-
 res illæ per centrum telluris non transeunt,
 nisi tellus sit sphærica, ut antea explicavimus,
 atque hic est fons paralogismi . Pendulorum
 observationes plurimis objectionibus impugnari
 solent, sed his abunde satisfactum est in Phy-
 sica generali .

ARTICULUS III.

*De phænomenis pendentibus ex mutua
planetarum actione, præsertim de
æstu maris.*

I. **I**N præcedentibus articulis planetarum orbitas velut ellipticas consideravimus, quales omnino esse debent, si nulla alia vis agat præter attractionem in solem quæ decreseat in ratione distantiarum duplicata. At mutua est, atque eadem lege, planetarum actio in se invicem; ita Saturni & Jovis actionis utriusque planetæ motus perturbatur pro diversa Jovis, Saturni & solis positione; verum errores ex mutua attractione oriundi in motibus lunaribus maxime fiunt conspicui. Massa solis est circiter centies septuagesies millies major massa telluris & septem mille millies major massa lunæ; cum autem tanta sit solaris massa, si cum tellure & luna conferatur, ex theoria Newtoniana intelligitur potentissimam esse in utrumque corpus solis actionem, qua fieri debet ut minoris corporis motus & orbita circa corpus majus non parum turbetur. Facile etiam patet errores illos variis de causis implicari; orbis annuus telluris est soli excentricus, & præterea orbita lunæ non est in plano orbitæ telluris, sed eam in duobus punctis seu nodis interfecat, atque deinde hinc & inde desceat spatio circiter graduum quinque. Evidens autem est pro diversa virium directione diversaque velocitate multas oriri errorum ambages explicatu difficiles. Huc tota res reducitur: *dati scilicet tribus corporibus, eorum mutua positione, massa & velocitate, invenire curvas de-*
scri-

scribendas, posita attractione in ratione directa
massarum & duplicata inversa distantiarum :
difficillimum problema illud primus omnium
aggressus est & sagacitate mirabili solvit ce-
leberrimus vir D. Clairaut. Tantam calcu-
lorum difficultatem hic persequi non licet,
sed satis sit monere hujus problematis ope
comparatas fuisse lunares tabulas cælo appri-
me consentaneas. Hinc de laudato viro dice-
re licet, quod de Nevvtono cecinit Hallejus :
Discimus hinc tandem qua causa argentea phæ-
be, passibus baud æquis eat & cur subdita
nulli : hætenus astronomo numerorum freno re-
cuset.

Ex mutua planetarum actione generatim in-
telligitur apsidum motus. Apsides appellant
Astronomi duo illa orbitæ puncta in quibus
planeta maximam vel minimam a sole aut
terra distantiam obtinet; punctum maximæ di-
stantiæ *summa apsis* dicitur, minimæ autem
distantiæ punctum *apsis ima* vocatur; tandem
linea per centrum orbitæ transiens & duo il-
la puncta coniungens *linea apsidum* nomina-
tur. Jam vero si planeta nulla alia vi urgea-
tur præter attractionem in ratione distantia-
rum duplicata decrescentem, evidens est ex
demonstratis lineam apsidum esse ipsum orbi-
tæ ellipticæ axem majorem. At ponamus ac-
cedere vim aliam quæ tendat quidem ad el-
lipseos focum, sed vis tota minor sit quam in
ratione duplicata inversa distantiarum, evi-
dens est planetam in priori orbita manere non
posse, sed extra ipsam debet excurrere,
cum minori vi ad focum urgeatur. Quare vel
planeta aliam curvam describet ipsamque el-
lipseos circumferentiam deseret, vel ipsam el-
lipsem circa focum revolvī necesse est ea lege
ut planeta maneat in pristina orbitæ circum-

ferentia. In hoc casu, si planeta versus apsidem superiorem sit positus & ad inferiorem promoveatur, manifestum est superiorem ellipseos apsidem versus planetam promovendam esse, cum ellipseos puncta versus apsidem hanc sint magis remota a foco qui est centrum virium. Igitur axis major secundum planetæ directionem progredi debet, atque eo majori velocitate quo magis decrescit vis centripeta. At contra si crescat vis centripeta, planeta vi majori ad focum tendit; ac proinde intra ipsam ellipsim curvam aliam describeret, nisi ellipsis circa focum ita revolvi intelligatur ut planeta in iis maneat orbitæ ellipticæ punctis quæ auctæ vi centrali conveniunt. Quare apsidem superiorem quæ longius distat a foco, ab ipso planeta recedere oportet; ac proinde in hoc casu apsidem progredi necessum est secundum directionem planetæ directioni contrariam, atque eo majori velocitate quo magis crescit vis centripeta; Itaque apsidum motus per ellipsim mobilem ingeniosissime repræsentant Astronomi. Errores ex mutua attractione in motibus lunaribus oriundos generatim tantum explicabimus; nihil enim in universa Astronomia difficilius. Apsidum motus in planetis fere nullus est, sed in luna maximus observatur; tantus nempe est ut linea apsidum lunæ eadem cæli puncta nonnisi post novem annos respondere videatur; hoc scilicet temporis intervallo apogæum lunæ progreditur ab occidente in orientem seu secundum ordinem signorum, suamque revolutionem absolvit. Singulas hujus motus circumstantias persequi res est difficillima neque ad Physicæ elementa pertinet, sed ex præcedentibus generatim intelligitur. Ex iisdem etiam principiis patet ratio generalis cur

moveantur orbitæ lunaris *nodi* ; etenim vires perturbantes suam quoque exercent actionem in orbitæ lunaris planum quod ad planum eclipticæ sub angulo circiter novem graduum inclinatum est . Igitur vires illæ pro diversa illarum directione , plani lunaris positionem situmque nodorum mutant . Porro quamvis pro diversa telluris , lunæ & solis positione in diversas partes agant vires perturbantes ac proinde motus directos & retrogrados per vices efficere possint ; si tamen post plures revolutiones motuum directorum summa excedat motus retrogrados , jam motus fit in consequentia seu secundum signorum ordinem ; sic apogæum lunæ novem annorum spatio revolvitur in consequentia , sed nodi regrediuntur seu feruntur in antecedentia . Porro evidens etiam est easdem vires perturbantes in periodicis lunæ temporibus inæqualitates aliquas efficere atque etiam orbitæ lunaris excentricitatem mutare . Hæ sunt præcipuæ motuum lunarium inæqualitates ex mutua attractione procul dubio derivandæ , sed virium perturbantium quantitatem explicare longius & difficilius foret .

II. Breviter jam consideratis lunarium motuum inæqualitatibus , eadem brevitate inæqualitates alias attingemus in telluris motibus ex lunæ gravitate oriundas . Si tellus nullum haberet Satellitem , sola vi centripeta in Solem urgeretur . At quia luna in terram gravis est , evidens fit inde turbandum esse motum telluris circa solem . Illæ tamen inæqualitates in motu annuo sunt valde exiguæ ; alioquin in motu apparenti Solis observarentur . Et quidem recensitæ jam inæqualitates lunares , actionibus Solis , Lunæ & telluris productæ , sunt valde magnæ ob Lunæ tellurisque proxi-

mitatem. Verum inæqualitates illæ e sole visæ apparere debent omnino minimæ, ac proinde motus apparens Solis parum turbatur. Præterea cum lunæ massa sit longe minor quam massa telluris, manifestum est inæqualitates ex actione lunæ in terram oriundas longe minores esse erroribus actione lunæ in terram productis. Hinc ergo intelligitur actione mutua lunæ & terræ motus Solis apparentes leviter tantum mutari, seu quod idem est motus veri telluris eodem fere modo se habent ac si tellus nullum haberet Satellitem. Attamen in Solis theoria *æquationem* adhibere solent Astronomi his erroribus convenientem, si magna calculorum subtilitate opus sit.

At gravitas lunæ in terram effectum alium satis sensibilem producit; tanta est nempe actio lunæ in terram ut in mutua plani æquatoris & eclipticæ variationem inducat. Quod ut intelligatur, aliqua in memoriam revocari debent. Poni solet in Astronomia, tellure circa solem revolvente, ipsum telluris axem sibi semper manere parallelum, ita ut cum ecliptica angulum efficiat $66^{\circ}\frac{1}{2}$; unde colligitur planum æquatoris esse inclinatum ad planum eclipticæ sub angulo $23^{\circ}\frac{1}{2}$, & planum illud productum bis tantummodo in qualibet revolutione transire per centrum solis, atque illa duo cæli puncta quibus, in his duobus casibus, respondere videtur centrum solis, dicuntur *puncta æquinoctialia*. In alio quolibet casu sol ad alterutram æquatoris partem jacet, nempe ad partem borealem tempore æstivo, & ad partem australem tempore hyberno. Puncta hæc æquinoctialia fixa non manent, sed lentissime inter stellas moveri videntur ab Oriente in Occidentem, atque hoc est phenomenon quod *æquinoctiorum præcessionem* jam ap-

appellavimus . Illud vero phænomenum ex motu retrogrado nodorum æquatoris & eclipticæ intelligitur . Etenim quemadmodum actio Solis efficit ut lunares nodi regrediantur, ita etiam si planeta aliquis circa terram prope illius superficiem revolveret in plano æquatoris, nodi regrederentur quoque . Jam ponamus augeri planetarum numerum donec se invicem tangant & annulum in æquatore componant, nodi hujus annuli regrediuntur etiam non secus ac singulorum planetarum nodi . Fingamus tandem hunc annulum telluri adhærescere, illius nodi deberent regredi sed lentiori motu, cum annulus tellurem totam cui adhærescit movere deberet . Jam vero quia tellus est oblongata versus æquatorem, excessus materiæ in hoc loco gerit vices annuli ; sed tardior est motus nodorum æquatoris, cum partes telluris accumulatae quibus fit ut tellus non sit sphaerica, per illius superficiem sint dispersæ ; ac proinde minorem producant effectum, qui majori omnino foret si addita materia in plano æquatoris sub annuli forma foret disposita . Luna in hunc annulum vim majorem exercet quam Sol ob minorem illius distantiam, & utriusque actio simul in punctis æquinoctialibus regressum inducit, ita ut temporis intervallum inter duo proxima æquinoctia quod *annum tropicum* vocant Astronomi, minus sit anno periodico quo scilicet tellus ab uno orbitæ suæ puncto ad idem punctum regreditur . Itaque generalem explicavimus præcessionis æquinoctiorum causam ; Si autem ponamus tellurem proxime sphaericam & versus æquatorem oblongatam, quantitas motus Solis & Lunæ viribus in hunc annulum producta & accuratiori calculo computata cum observationibus Astronomicis præclare consentit ;

O 6 qua-

quare hic rursus confirmantur quæ de figura telluris jam ante ostendimus. Hæc dicta sint de lunæ & solis actione in motum telluris, prætermittis aliorum planetarum actionibus; singuli enim planetæ, in attractionis generalis systemate, telluris motum turbare debent; sed errores inde oriundi ob maximam planetarum distantiam, vel minorem illorum massam, ab Astronomis negligi solent; verum actionem Veneris in terram, post detectum ejus Satellitem, majori diligentia nunc æstimare licebit. De his omnibus mutæ gravitatis effectibus præclarissima opuscula tradiderunt magni quidam viri; sed sublimiorem explicant doctrinam quam quæ hic locum habere possit.

III. Non solum in corporum cælestium motibus sese manifestant mutæ gravitatis effectus, sed in terrestribus quoque phænomenis & qui omnium oculis obversantur, facile conspicua est attractio. Ineptissimas de fluxu & refluxu maris Philosophorum quorundam opiniones referre superfluum omnino est, genuinam atque omnino indubitatam hujus phænomeni causam in sequenti conclusione explicabimus.

C O N C L U S I O.

EX ACTIONE LUNÆ ET SOLIS REPETENDA
SUNT ÆSTUS MARINI PHÆNOMENA.

PROB. Constat æstus maris duobus oppositis motibus fluxu scilicet & refluxu. In Oceano præsertimque sub Zona torrida maxime conspicui sunt hujusmodi motus, maris aquæ per horas circiter sex fluunt versus littora eaque latissime occupant, perque horas totidem re.

refluunt inde longissime, & littora sicca relinquunt, horum motuum primus dicitur *fluxus*, alter vero *refluxus*. Ut autem conclusionem hanc recto ordine demonstramus, varia præmitti debent æstus marini phænomena. Triplex observatur æstus marini periodus, *diurna*, *menstrua* & *annua*. Periodus diurna definitur spatium horarum 24 & minorum primorum 49, quo scilicet tempore fluxus & refluxus bis contingit, atque hoc intervallum est tempus ipsum inter transitum lunæ per meridianum & reditum ad eundem. Periodus menstrua in eo posita est quod æstus sint majores in noviluniis & pleniluniis quam in quadraturis, sive ut accuratius loquamur, in quolibet lunatione æstus contingunt maximi ubi luna 18 circiter gradibus distat a plenilunio vel novilunio, æstus autem sunt minimi ubi luna totidem gradibus 18 distat a quadraturis. Tandem quod spectat periodum annuam, hæc in eo sita est quod æstus in diebus æquinoctialibus celebrati sint maximi in noviluniis & pleniluniis, in quadraturis autem majores sint quam in aliis lunationibus. Contra autem in diebus solstitialibus, æstus minores sunt in pleniluniis & noviluniis quam in aliis lunationibus; at in quadraturis majores quam in lunationibus aliis æstus contingunt. Ex his generalibus phænomenis jam evidens est æstum maris reciprocum magnam cum moribus lunaribus societatem habere, sed rem totam distincte explicemus. Fingamus lunam quiescere & ponamus terram esse globum, solidum quiescentem, ad datam altitudinem immersum fluido homogeneo & elasticitate destituto cujus superficies sit sphaerica. Ponamus deinde hujus fluidi partes singulas ad centrum globi vi gravitatis tendere, easque a sole & luna at-

attrahi; si fluidi & globi immerſi partes ſingulæ vi æquali & ſecundum directiones parallelas traherentur, evidens eſt in hoc caſu lunæ & ſolis actione moveri duntaxat totam globi & fluidi maſſam, eadem manente partium poſitione reſpectiva. At ſecundum attractionis leges, hemiſpherii ſuperioris partes, luminari ſcilicet proximiores, majori vi attrahuntur quam centrum globi, & contra vi minori attrahuntur partes hemiſpherii inferioris; quare ſi actione ſolis vel lunæ centrum globi moveatur, fluidum ſuperius vi majori attractum, ad motum vi majori tendere debet quam centrum, ac proinde ascendere debet fluidum vi quæ æqualis ſit differentiæ virium quæ fluidum ſuperius & centrum globi attrahunt. Contra hemiſpherii inferioris fluidum cum minus attrahatur quam centrum globi, tardius movebitur, ideoque centrum, ut ita dicam, fugiet, hoc eſt, a centro recedet vi quæ circiter æqualis ſit vi hemiſpherii inferioris. Igitur intumefcet fluidum in duobus punctis oppoſitis lineæ per ſolem & lunam tranſeuntis, accurrent ſingulæ fluidi partes ad puncta illa & eo majori velocitate quo iſdem punctis proximiores ſunt. Hinc manifeſtum eſt cur aquæ maris in duobus ejuſdem meridiani punctis oppoſitis eodem tempore intumefcant atque detumefcant. Hinc etiam intelligitur æſtum maris non ex tota ſolis & lunæ actione provenire, ſed ex differentia virium quas luminaria illa exercent in centrum terræ & in fluidum tam ſuperius quam inferius; hanc virium differentiam appellabimus deinceps, *actionem ſolarem*, vel *lunarem*. Vires illas ſeorſim æſtimare & cum vi gravitatis comparare docuit Nevvtonus & ex virium centralium doctrina demonſtravit actionem

PARS II. SECT. III. 327

nem solis esse ad vim gravitatis ut 1 ad 128682000; quamvis autem non ita accurate determinata sit actio lunaris, ut pote quia pendet ex massa lunæ nondum satis cognita, attamen ex quibusdam æstus marini phænomenis, actio lunaris fere quadruplo major invenitur actione solari; at quidquid sit de justa virium illarum differentia, certissimum est actionem lunæ multo majorem esse actione solis. Jam præcipua phænomena persequamur.

Cum aquæ intumescere debeant in eo maris loco quod lunæ imminet & in telluris puncto diametraliter opposito, aquas deprimi necessum est in distantia graduum 90 ab iisdem punctis; simili modo actio solaris efficere debet ut aquæ superiores soli subjectæ intumescant ac proinde & detumescant aquæ ab iisdem punctis distantes gradibus 90. Porro si actiones illæ duæ simul componentur, evidens est aquarum ascensum in eodem loco varietatibus plurimis esse obnoxium, tum quoad ipsam æstus marini quantitatem, tum quoad horam, pro diversa scilicet loci positione respectu solis & lunæ.

Generatim in conjunctionibus & oppositionibus luminarium, conspirant vires duæ quibus aqua tendit in solem & lunam. Nam in conjunctionibus solis & lunæ, luminaria duo supra meridianum eodem tempore transeunt; in oppositionibus autem, infra meridianum transeunte altero luminari, supra meridianum transit alterum, ac proinde aquas maris conjunctis viribus trahunt luminaria duo. Contra autem in quadraturis, aqua quæ vi solis attollitur, vi lunæ deprimitur. Etenim in quadraturis luna distat 90° a sole, ergo aquæ actioni lunari subjectæ, ab aquis soli subjectis distat

stant 90°. Igitur in hoc casu luna attollit aquas, sol eas deprimit. Quare in Syzigiis actio lunæ conspirat cum actione solari, in quadraturis autem vires duæ opponuntur, ac proinde, cæteris paribus, æstus marini maximi esse debent in Syzigiis, minimi autem in quadraturis; ut demonstrant æstus marini phænomena.

Diei cujuslibet naturalis intervallo duplex contigint fluxus & refluxus solis actione productus, non secus ac die qualibet lunari duplex æstus celebratur ob actionem lunæ, atque ambo illi æstus iisdem legibus peraguntur, hoc solum observato discrimine quod æstus lunari actione producti majores sint iis qui solis actioni debentur; quamvis enim solis massa longe major sit massa lunæ, ob maximam tamen solis distantiam illius actio longe minor fit actione lunari. Evidens etiam est ex attractionis legibus eo majorem esse solis & lunæ actionem quo minor est illorum a terra distantia. Si abstrahamus a solis actione, æstus marini altitudo maxima contingere deberet in transitu lunæ per meridianum, non tamen considerata vi inertię qua aquæ non secus ac alia omnia corpora, donatæ sunt; qua nempe impressum motum servare conantur; hujus autem vis duplex effectus esse debet, horam scilicet qua contingeret maxima aquarum altitudo, seclusa vi inertię, debet retardare & ipsam aquarum altitudinem minuere, ut patet. Etenim ponamus terram quiescere & lunam dato alicui terræ loco respondentem considerare; seposita solari actione quæ lunari longe minor est, aqua intumescet in loco qui lunæ imminet. Ponamus deinde terram revolvī, hæc respectu motus lunaris velocissime revolvitur, & præterea aqua quæ vi lunæ attol-

litur

litur & simul revolvitur cum terra, acquisitam altitudinem vi inertia servare nititur, interim vero recedens a luna aliquam amittit altitudinis suae partem; quare cum duo illi effectus sibi sint mutuo contrarii, aqua telluris motu translata, intumescet versus orientem lunae magis quam facere debuisset sine hoc motu, minus tamen ascenderet quam ascendere debuisset sub luna, quiescente tellure. Igitur telluris motus aestum marinum retardare & aquarum altitudinem minuire debet.

Post fluxum & refluxum per aliquod tempus exiguum neque ascendit mare neque descendit; aquae enim vi inertia quietem & æquilibrium in utroque statu vel fluxus vel refluxus servare conantur; præterea cum telluris motus aquarum positionem mutet respectu lunae, ac proinde & ipsius lunae in aquas actionem, turbatur aquarum æquilibrium, & duæ illæ vires per aliquod tempus mutuo pugnant. His viribus jungi etiam debent aquarum tenacitas aliæque impedimenta plurima quæ aquarum motum retardant, proindeque efficiunt ut aquæ e statu altitudinis ad statum depressio- nis statim non transeant. Luna supra orienta- les plagas transit antequam ad occidentales perveniat, quare in prioribus locis fluxus de- bet citius contingere. Hæc omnia cum aestus marini phaenomenis omnino consentiunt.

Si luna in æquatore semper maneret, evi- dens est eam 90° a polis remotam fore ac proinde sub polis nullus foret fluxus & refluxus, quare in locis polo proximis, fluxus & refluxus esset minimus & nequaquam conspi- cuus, præsertim si consideremus enormes gla- cies quæ in his locis maxime obstant aquarum motibus. Verum quamvis luna non semper maneat in æquatore, 28 gradibus duntaxat

ab

ab eo deflectit, ac proinde mirum non est quod prope polos in latitudine 65° , nullus observetur fluxus & refluxus. Jam ponamus lunam 24 horarum intervallo describere circum æquatori parallelum, aqua in polo per totam hanc diem quiescet, cum luna eandem servet a polo distantiam. At si die sequenti alterum parallelum luna percurrat, aqua eadem quoque die in polo quiescet, sed magis minusve alta, prout luna minus magisque distabat ab incolarum polarium Zenit vel Nadir. Si consideremus locum aliquem inter lunam & polum, lunæ per superiorem meridiani partem transeuntis distantia ab eodem loco deficient a gradibus 90 magis quam excedet gradus 90 dum luna transit per inferiorem partem meridiani. Hæc est ratio generalis cur æstus versus polum borealem majores esse soleant in parte superiori, luna in hemisphærio boreali constituta; contra autem æstus sunt minores in parte inferiori; uno longius progrediendo versus polum, unicus duntaxat fluxus & refluxus 24 horarum spatio contingit; dum enim luna est infra meridianum, a loco dato multo minus distat quam per gradus 180, imo distantia illa ita parum differt a gradibus 90 ut aquæ deprimi potius debeant quam attolli.

Cum bis tantummodo in quolibet mense contingat solem & lunam eidem cæli puncto vel iisdem punctis oppositis respondere, aquæ ut plurimum non debent sub luna vel sole immediate ascendere, sed in loco inter hæc puncta medio; ita dum luna pergat a Syzigiis ad quadraturas, hoc est, dum nondum distat a sole per gradus 90, maxima aquarum altitudo fieri debet versus occidentem lunæ, & contra dum luna pergat a quadraturis ad Syzigi-
gias.

gias . Itaque in primo casu , æstus maximus præcedere debet tertiam horam lunarem ; nam aquarum inertia faceret ut aquæ intumesce-
 rent tribus horis post transitum lunæ per me-
 ridianum , at positio respectiva solis & lunæ
 aquarum tumorem produceret ante transitum
 lunæ per meridianum . Contra autem in alio
 casu , æstus maximus tertia hora tardior esse
 debet . Varia æstus marini phænomena quæ ex
 privatis lunæ & solis actionibus pendent , non
 possunt a se invicem distingui , sed simul con-
 funduntur . Æstus lunaris actione solis aliquan-
 tulum turbatur , quod quidem singulis diebus
 contingere necessum est ob diei naturalis &
 lunaris inæqualitatem . Porro quia aquarum
 inertia & undulatio æstum marinum retardant ,
 hinc fit ut æstus maximi non contingant in
 conjunctione vel oppositione lunæ , sed post
 duos vel tres æstus . Simili ratione æstus mi-
 nimi contingunt paulo post quadraturas . Tan-
 dem cum hyberno tempore sol telluri proxi-
 mior sit quam tempore æstivo , æstus marini
 qui solstitio hyberno contingunt , cæteris pari-
 bus , majores observantur quam solstitio æsti-
 vo . Præcipua æstus marini phænomena gene-
 ratim enuntiasse satis sit ; alia sunt plurimia
 quæ sublimiorem postulant Algebræ doctrinam
 atque vix unquam explicanda . Interim con-
 cludere licet : lunæ solisque actioni tribuenda
 sunt phænomena illa quæ non solum cum ge-
 nerali attractionis doctrina probe conveniunt ,
 sed etiam cum lunæ solisque motibus , atqui
 &c. Ergo .

Objic. Si attractioni lunæ referenda sint
 æstus marini phænomena , dum attolluntur
 aquæ supra meridianum , eas infra eundem me-
 ridianum deprimi necessum est ; atqui observa-
 tionibus compertum est aquas in eodem me-
 ridia-

ridiano æque attolli tum supra, tum infra horizon-
tem. Ergo &c. Resp. N. Maj.
Hanc objectionem adversus attractionem Nevv-
tonianam jactare non desinunt Cartesiani; Ve-
rum quam frivola sit ex demonstratis intelli-
gitur; manifestum enim est aquas infra meri-
dianum vi minori attrahi quam supra meri-
dianum, atque hac attractionum inæqualitate
fit ut aquæ in duobus punctis oppositis eodem
fere modo intumescere videantur, ut antea
explicavimus. In eo situm est Cartesianorum
sophisma, quod nempe fingant aquas attolli
tota attractione lunæ, cum attollantur dun-
taxat attractionum differentia, nempe diffe-
rentia inter attractionem totam & illam at-
tractionem quam luna in centrum telluris
exercet.

Inst. I. Si luna supra mare transiens ipsius
aquas alliciat, post transitum vero relaxet
sicque fluxum & refluxum producat, in zona
torrida ubi actio lunæ est potentissima, mare
potissimum intumesceret. At constat in insu-
la *D. Thomæ* appellata & sub ipso æquatore
constituta, mare vix ad quatuor pedes assur-
gere; in *Molucis Philippinisque insulis* vix
ad pedes duos aut tres, cum tamen in Belgi-
cis oris quæ extra zonæ torridæ fines sunt,
ad octodecim usque pedes aquæ evehantur.
Sic ergo objici potest: In hypothesi Nevvto-
niana actio lunæ, ubi potentior est, æstum
majorem produceret, atqui &c. Ergo
Resp. Dist. Maj. æstum majorem produceret,
si cætera sint paria C. Maj. Secus N. Maj.
& Conf. Itaque in æstimandis æstus marini
phænomenis attendi maxime debet loci con-
ditio, æstus magnitudo ex ipsa marium ma-
gnitudine plurimum pendet; ita nulli æstui
obnoxia observantur maria angustiori spatio
clausa,

clausa, liberrimus esse debet aquarum fluentium & refluxuum motus atque ab oriente in occidentem satis vasto intervallo mare extensum esse oportet; quod quidem ex ipsa attractionis doctrina facile colligitur. Etenim ad producendum æstum necessaria est virium inæqualitas in diversas fluidi partes, attractio scilicet alibi major, alibi minor esse debet; Porro hæc inæqualitas ingentem satis tractum requirit; in tractu enim exiguo actio lunæ æqualem ad sensum addit vel demit gravitatem omnibus fluidi partibus quas proinde eodem semper plano horizontali terminatas esse oportet. Hinc est quod prope æquatorem ubi mare inter Africam & Americam angustum est, æstus sint multo minores quam hinc inde in zonis temperatis ubi maria late patent. Eadem ratione intelligitur quare ad littora major sit aquarum motus & ad freta angusta major esse soleat aquarum altitudo quam in aperto mari. Etenim motum actione lunæ impressum per longum tempus aquæ retinent, quæ proinde sustentur & novis aquis advenientibus attolluntur magis ac magis, præsertim si procurrentibus aquis impedimenta objiciantur. Tale phænomenum observatur ad *Plymuthum* & pontem *Chepstovæ* in Anglia aliisque locis plurimis. Ex his patet accuratam æstuum rationem asserri non posse nisi certissimis observationibus compertæ sint singulæ locorum circumstantiæ: Itaque quidquid demonstravimus in conclusionis probatione verum est duntaxat, si maria eodem modo se habeant. Ex his locorum conditionibus pendet quod mare *Caspium*, Mediterraneum, Balticum nullos aut fere nullos æstus patiantur; hæc enim maria sunt veluti lacus qui vel nihil vel per angustum fretum cum oceano

oceanò communicant; eam ob causam in mare Nigro & mare Caspio fere nullus esse debet fluxus & refluxus, atque & minimus etiam in mari Mediterraneo; Sed minor est in mare Baltico ob maiorem illius ab æquatore distantiam. In sinu Veneto æstus est manifestissimus & maxime regularis, id vero repetendum est ex ipsa sinus Veneti figura quæ talis est ut aquas magis restringat easque ad ascensum cogat. Itaque angustiora quoque maria fluxum & refluxum pari possunt, favente locorum opportunitate. Eadem de causa intelligitur fluminum quorundam atque etiam nonnullorum puteorum æstus; hæc phænomena procul dubio repeti debent ex occulta cum mari communicatione; quia vero incertæ & maxime irregulares sunt hujus communicationis viæ, tales æstus incertos & maxime irregulares esse oportet.

Inst. II. Præcedentibus demonstrationibus repugnare omnino videntur æstus marini phænomena quæ in portu *Tunquini* observantur. In hoc portu unicus fluxus & refluxus 24 horarum spatio absolvitur, & quidem singulari lege. Dum luna ad æquatorem accedit, nullus fit æstus & aqua immota manet. At ubi luna aliquam habet declinationem, jam deprehenditur æstus aliquis & fit maximus dum luna ad tropicos accedit. Hoc autem notandum est discrimen quod nempe, luna ad partem æquatoris borealem existente, aqua ascendat dum luna est supra horizontem, contra autem descendat si luna sit infra horizontem; nempe fluxus contingit in ortu lunæ, refluxus autem in occasu; at si luna declinationem australem habeat, contraria omnino lege æstus peragitur, aqua intumescit in occasu lunæ, refluit autem in ortu. Ergo &c.

Resp.

Resp. N. Ant. & Conf. Ex præmissis principiis phænomena explicantur. Phænomenum illud plane singulare repetit Nevvtonus ex duorum æstuum concursu quorum æstuum unus ex mari australi per litora Sinensia originem habet, alter autem ex mari Indico. Cum horum æstuum prior proficiscatur e locis quorum latitudo est borealis; dum lunæ declinatio borealis est, & dum luna est supra horizontem æstus fit major quam luna existente sub horizonte; alter autem æstus qui proficiscitur e regionibus meridionalibus quarum latitudo australis est, major est dum declinatio lunæ australis est, luna existente supra horizontem, minor autem dum luna est sub horizonte. Itaque inter æstus illos alternis vicibus majores & minores, duo majores & duo minores singulis diebus simul recurrunt. Dum luna accedit ad æquatorem fluxusque alterni æquales fiunt, jam æstus omnis cessat & aqua quiescit. At dum luna ad alteram transit æquatoris partem, fluxus qui antea erant minimi, fiunt maximi, ac proinde ubi antea contingebant æstus maximi, nunc contingunt æstus minimi & contra. Itaque singularis ille æstus qui ad portum *Tunquini* observatur, ex prædictis principiis pendet; etenim idem æstus in duos vel plures successive advenientes divisus, componere potest alios motus plane diversos.

Inst. III. Vis attractiva quæ mari commovendo satis esset, in experimentis pendulorum, barometrorum, in corporibus aquæ insidentibus aliisque id genus effectibus conspicua maxime foret. Atmosphæra nostra perpetuo fluxu & refluxu tantis viribus agitata, vehementissimis ventorum tempestatibus jactaretur. Hinc concluditur; æstus marini causa

non

non est vis illa quæ in prædictis effectibus minime conspicua est, atqui &c. Ergo . . . Resp. N. Maj. Quod primam spectat objectionis partem, certissimum est vires illas, licet mare commovere valeant, nullos tamen effectus sensibiles in gravitatem terrestrem exercere posse. Etenim vim solarem ad excitandos æstus marinos ita exiguam calculo invenit Nevvtonus ut minor sit vi gravitatis 12868200 vicibus; summa autem virium solis & lunæ invenitur 2032890 vicibus minor vi eadem gravitatis. Igitur cum *grani* unius differentia in pondere granorum 4000 vix sentiiri possit accuratissima etiam statera, perspicuum est vires solis & lunæ simul conjunctas vicibus quingentis minores esse quam quæ pondus corporis cujusvis statera appensi sensibilibiter augere vel minuere possint. Quare nec in pendulorum, barometrorum experimentis, aliisve similibus gravitatis effectibus conspicua esse poterit harum virium actio. Idem facilius intelligitur facta densitatum aeris & aquæ comparatione. Ponamus aquam in aperto mari ad pedum 60 altitudinem assurgere; loco aquæ substituatur aliud quodlibet fluidum, ad similem circiter altitudinem illud quoque debet ascendere, quod evidens est. Etenim si fluidum majorem vel minorem oceani aqua densitatem habuerit, actio solaris singulas fluidi partes attrahens, in massa tota vim majorem vel minorem in eadem ratione producet, ac proinde eædem forent fluidorum duorum velocitas atque altitudo. Ita columna aeris homogenei & ejusdem cum aere nostro densitatis ad pedum 60 altitudinem ascenderet, ejusque altitudo singulis diebus 120 pedum differentia variaret, nempe pedibus 60 in ascensu totidemque pedibus in descensu.

At

At cum mercurius aere nostro undecies milles circiter gravior sit, differentia 120 pedum in altitudine atmosphæræ linearum duarum duntaxat differentiam in altitudine barometri produceret; verum tantilla differentia aliarque variationes longe majores aliis causis innumeris tribui possunt; mirum ergo non est quod oscillationes actione solis & lunæ in barometro excitatæ difficiliter distingui possint. Hortandi tamen sunt diligentiores Physici ut minimas illas differentias subtiliter & scrupulose attendant.

Quod spectat alteram objectionis partem, certum est actionem solis & lunæ quæ æstus marini causa est, per atmosphæram nostram transmitti, antequam ad maris aquas perveniat. Itaque necessum est actionem hanc; quodcumque sit illius principium, in aerem nostrum exerceri ac proinde massæ aeris partes commoveri. Nullum ergo dubium esse videtur quin actio solis & lunæ ad generalem ventorum causam pertineat. Et quidem ex demonstratis evidens est æstus marini ventorumque originem generatim consideratam esse phænomena ejusdem generis, ac proinde ad eandem generalem causam referenda; Id autem maxime confirmant venti qui sub zona torrida ab orientali plaga, & sub zonis temperatis a plaga occidentali certis legibus spirare observantur. Ex illa actione repetendum videtur quod frequentissimis vehementissimisque ventorum procellis in certis latitudinibus jactentur naves intra tropicos. Et certe in locis oceani liberioribus quæ obstaculis minus sunt impedita, leges magis constantes in ipsa ventorum vi & directione observantur. Porro hic sermo est duntaxat de causa generali ventorum quæ solis & lunæ viribus de-

Tom. V. P betur;

betur; neque Physicis enumerare licet alias innumeras accidentales ventorum causas, quæ ex vaporibus per aerem infinita propemodum varietate dispersis oriuntur. Neque etiam attingimus obstacula plurima quæ generalem ventorum causam turbant, illorum vim frangunt atque directionem mutant. Tandem certissimum est in generali ventorum causa solis calori partes maximas tribuendas esse; sed tot tamque difficiles conditiones ad calculum revocari nequaquam possunt. Unum observare satis erit actionem lunæ in aerem nostrum longe majorem esse quam vulgo creditur a Physicis. Absit quidem ut vanissima de lunari influxu imperitæ plebis somnia amplectamur; at cum actio lunæ ad mare turbandum vim solarem longe superet, fateri necessum est hujus planetæ actionem in aerem nostrum maximam esse & tantam ut in nostra atmosphæra plurimas diversi generis mutationes asserere possit.

A P P E N D I X

De quibusdam præcedentis capitis utilitatibus.

UTilissimam esse in Narteautica æstus marini doctrinam omnibus notum est, nec rem fusius probare opus est. Quamvis autem in navigationis usu tantam fortasse quantam nonnulli prædicant, utilitatem habere non videatur telluris figura, eam tamen utilitates maximas habere posse manifestum est, si ad tantam quæ necessaria est, observationum & experimentorum subtilitatem feliciter unquam pervenire possit hominum industria. At dolendum est ita imperfectum esse præsentem navi-

navigationis statum ut errores qui in æstimando navis itinere committi solent, erroribus ex telluris figura oriundis longe majores sint. Quare licet laudandi maxime sint doctissimi viri qui, pro sphæroidica telluris figura, marinas tabulas reformarunt, hæ tamen tabulæ nullius utilitatis esse possunt, donec, arte nautica ad majorem perfectionem adducta, manifesta tandem esse possit navigationis differentia vel in sphæra vel in sphæroide. Itaque his prætermiſſis adhuc expectandis utilitatibus, adolescentes Theologiæ studiosos monemus, quod vix credi posset, non deesse perversissimos homines qui physica mundani systematis causa tam impie abutuntur ut negandæ providentiæ divinæ occasionem inde arripiant. Data semel, inquiunt, planetarum impulsione, concessaque attractione, per solas naturæ leges, universa mundi structura perpetuæque rerum ordo perseverare debent, sine ulla conservantis vel dirigentis auctoris providentia; tota scilicet natura his duobus innixa principiis, motu nempe primum impresso & mutua attractione, stabilis firmissimæque manebit, nec continua supremi artificis actione indigebit. En impietatem non satis deplorandam & ex iis quæ de rerum conservatione in Metaphysica demonstravimus, facile refellendam. Et certe, ecquis motum materiæ impressit? Ecquis materiæ vim attractivam certa lege indidit? nisi rerum omnium conditor D. O. M. qui omnia uno intuitu videt eaque proinde vult existere, quandiu existunt. Ineptum enim est fingere Deum qui de rebus a se creatis nihil cogitat easque constitutis semel legibus permittit. Etenim cum Deus sit ens infinite intelligens, ipsi præsentissima sunt omnia, ac proinde res

existunt & tali modo existunt, quia Deus vult; alioqui Deus nec foret infinite intelligens nec omnipotens, seu non foret Deus. Igitur non philosophantur, sed *blasphemant* increduli homines qui materiam a Deo creatam & primo mundi initio certis legibus dispositam concedunt quidem, sed deinde iisdem legibus eam deserui & veluti sponte regi affirmant; quod explicare solent exemplo horologii affabre elaborati cuius motus sine assidua artificis manu perseverat. Hoc quidem exemplo nihil absurdius quo Deus cum hominibus comparatur; ens infinite perfectum unico intuitu complectitur omnia eaque unico voluntatis actu conservat. Hæc omnia conferantur cum iis quæ diximus in Metaphysica.

Physicam mundani systematis causam generatim exposuisse nobis satis fuit, nec vanissimas *Cosmologie* hypotheses recensere placuit. Duæ tamen circa hypotheses illas monenda sunt. Et 1º. quidem in nullo Physices systemate licet recedere a veritatibus revelatis atque a sacris dogmatibus quæ de mundi creatione tradit Moses. 2º. Hypotheses fingere licet in iis quæ revelationis & sacre Scripturæ autoritas non docet. Minime ergo probandi sunt severiores nonnulli Scriptores, & plus æquo religiosi, qui Physicam universam exigere volunt ad normam sacre Scripturæ, innoxiasque hypotheses nec Scripturæ sacre nec Ecclesiæ autoritate damnatas impietatis accusare non dubitant. Exemplo sit hypothesis Newtoniana de radiorum lucis a sole emanatione quam intemperantiores quidam & imperiti critici ajunt adversari primo Geneseos capiti in quo lux primo die producta dicitur, sol autem deinde creatus legitur; quam inepta & maligna sit talis

talis accusatio, nemo non videt ; Nevvtonus enim de præfenti rerum ftatu loquitur & de lucis folaris propagatione . Præterea non defunt doctiffimi optimique nominis Interpretes qui folis creatione ipfam Angelorum creationem intelligunt, quam quidem interpretationem non improbat Ecclefia . Neque etiam æquiores feſe oftendunt Scriptores alii qui velut impiam & ſacræ Scripturæ contrariam traducunt opinionem quæ terram in mundi creatione aquis coopertam fuiſſe contendit . In hac ſententia nihil omnino eſt quod ſacræ Scripturæ contrarium videatur , & quidem legitur in laudato capite : *Spiritus Dei ferebatur ſuper aquas : fiat firmamentum in medio aquarum & dividat aquas ab aquis . Congregentur aquæ quæ ſub cælo ſunt in locum unum, & appareat arida , & vocavit Deus aridam terram .* Hic data occaſione paucis verbis hortari non abs re eſt ſtudioſos adoleſcentes ut in ſacra Scriptura non prophanas quærant ſcientias, ſed fidei dogmata morumque regulas quibus credere & ſanctè vivere diſcant; ac in philoſophicis opinionibus de quibus nihil pronuntiavit Ecclefia, ſeſe indulgentiores præbeant.

C A P U T III.

De Chronologia & Kalendario.

Chronologia nomine intelligitur temporum doctrina; hæc autem innititur illuſtrioribus quibuſdam factis ſeu monumentis ad quæ velut ad puncta fixa revocari ſolet univerſa temporum antiquitas ; illuſtiora hæc documenta quæ Chronologiæ baſis ſunt & fundamentum, *Epoche* veletiam *æra* appel-

lantur. Neque in explicanda duntaxat atque illustranda temporum antiquitate versatur Chronologia, sed etiam *Epaclarum*, *Periodorum* & *Cyclorum* ope festa mobilia Paschatifque celebrationem consignat atque definit. Itaque, proprie loquendo, duplex distingui debet Chronologiæ pars; prima est tota *Historica* in evolvendis factis occupata, altera autem *Mathematica* est atque *Astronomica* quæ observationes calculosque astronomicos adhibet ad figendas epochas festosque Religionis dies constituendos. Hæc ultima Chronologiæ pars Kalendarii doctrinam complectitur. Porro manifestum est temporum doctrinam clare explicari non posse, nisi de temporis mensura apud veteres præsertim usitata aliquid præmittamus.

ARTICULUS I.

De temporis partibus atque mensura.

I. **O**Mnibus notæ sunt vulgares temporis partes, *Dies*, *Horæ*, *Hebdomades*, *Menses* & *Anni*. *Dies naturalis* qui motu apparenti solis ab oriente in occidentem definitur, est illud temporis spatium quod numeratur dum sol a meridiano vel aliquo alio circulo horario digressus ad eundem redit; naturalis dicitur ut distinguatur a vulgari die *artificiali* quæ *dies* simpliciter dicitur quatenus nocti opponitur. Non idem est apud omnes gentes diei initium; Babylonii diem auspicabantur ab ortu solis, Judæi & Athenienses ab occasu quod Itali nunc faciunt, & a sole occidente horam vigesimam quartam numerant, proximam post solis occasum ho-

horam diei *primam* vocant; diem a media nocte olim inchoabant Ægyptii a quibus Hipparchus hunc computandi morem in Astronomiam induxit eumque secuti sunt Copernicus aliique Astronomi; maxima tamen Astronomorum pars commodius duxerunt diem a meridie auspicari. Sed mos incipiendi diem a media nocte obtinet apud Gallos, Hispanos, Britannos & alias plerasque Europæ gentes.

Hora alia est *æqualis*, alia *inequalis*; Hora æqualis est vigesima quarta pars diei naturalis; sed præter crassiorem illam computationem, recepta est divisio horæ in sexaginta minuta prima & uniuscujusque minuti primi in sexaginta secunda &c. Hora inæqualis est duodecima pars diei artificialis, item pars duodecima noctis. Horæ inæquales dicuntur etiam *temporaneæ* eo quod diversis anni tempestatibus variæ sint; nempe hora diurna æstiva longior est hyberna & nocturna brevior. In die autem æquinoctiali, hora diurna nocturnæ æqualis est, quare horæ æquales dicuntur *Æquinoctiales*. His horis uti sunt olim Judæi, Romani, hodieque utuntur Turcæ, atque ita meridies in horam diei sextam incidit.

II Hebdomas est septem dierum spatium; variis appellationibus hebdomadis dies distinguuntur. Cum in ipsa mundi creatione divinus artifex sex diebus cuncta digesserit, & septima tandem die *requieverit ab omni opere quod patrarat*, ad divini operis memoriam institutum videtur ut hebdomadæ septem dierum sibi succedentium ordine distinguerentur; quorum dierum ultimus, *Sabbatum* vel *requies* diceretur, eo quod in illo olim Creator, ejusque deinde jussu homines requiesce-

rent; quin etiam hebdomada ipsa sabbatum & quælibet hebdomadæ dies *prima*, *secunda*, &c. *sabbati* dici consueverit, ut sæpissime in Evangelio legitur; præsertim vero cum Phariseus gloriabatur se *bis in sabbato ieiunare*. Quamvis autem Christiani, sabbati loco Dominicum diem quo Christus a mortuis surrexit, sacrum semper habuerint & singulas hebdomadæ dies *feriæ primæ*, *secundæ* &c. nomine designaverint, plerumque tamen veterem retinuerunt Ethnicorum morem qui singulis diebus planetæ alicujus nomen imposuere; sic *Dominica* vel *feria prima dies solis*, *secunda lune* &c. appellantur. Mensis nomine proprie intelligitur illud temporis spatium quo luna Zodiacum proprio motu percurrit. Est alius mensis huic prope modum equalis quem solis motus meritar, estque spatium temporis quo sol unum signum, seu partem eclipticæ duodecimam describit. Præter menses prædictos de quibus diximus in Astronomia, usurpatus etiam fuit mensium civilium usus; hi autem menses pro Regni alicujus aut Reipublicæ instituto, pluribus vel paucioribus constant diebus. Ita Ægyptiis olim placuit mensem quemlibet diebus triginta constare, diesque illi quinque ex quibus annus constabat ultra dierum in mensibus numerum, *Epagomenæ* dicebantur.

III. Annus est vel *astronomicus* vel *civilis*; anni astronomici utramque speciem, *tropicum* scilicet & *periodicum*, in præcedenti capite explicavimus. Annus civilis in Republica aut Regno aliquo receptus, est quoque duplex, *lunaris* aut *solaris* prout lunæ vel solis motibus est accommodatus. Rursus duplex est *annus lunaris*, *vagus* vel *fixus*, Annus lunaris
vagus

vagus constat duodecim mensibus Sinodicis, vel duodecim lunationibus quæ diebus 354 ab-
solvuntur. Deficit itaque hic annus a solari diebus undecim; unde fit ut annorum initia per omnes anni tempestates, 32 annorum spatio vagari debeant, atque eam ob causam vagus annus dicitur; hac anni forma utuntur Turcæ & Mahumedani. Jam vero quia duodecim lunationes deficiunt ab anno solari diebus undecim, in tribus annis solaribus lunationes 36 seu tres anni lunares deficerent a solaribus 33 diebus. Itaque ut retineantur menses in iisdem anni solaris cardinibus, anno tertio mensis integer superadditur; quod factum est, quoties opus fuerit, ut anni initium in eadem tempestate retineretur, & mensis hic superadditus *Embolimæus*, seu *intercalaris* dicebatur. In annis novemdecim, hujusmodi menses intercalares sunt septem, annusque hujus formæ *lunaris fixus* nominatur. Tali anno usi sunt Græci, hosque imitati Romani usque ad Julium Cæsarem.

Annus civilis quem metitur solis motus, duplex quoque est vel *fixus* vel *vagus*. Vagus dicitur *ægyptiacus* quo utebantur Ægyptii, & constabat diebus 365, ac proinde ab anno tropico horis fere sex deficit; quibus sex horis neglectis fit ut quarto quolibet anno, uno die annum solarem antevertat annus vagus; ideoque quater 365 annis, hoc est, annis 1460, initium ejus vagatur per singulas anni tempestates.

IV. Cum annus ægyptiacus qui 365 diebus constat, fere sex horis deficiat a vero anno solari, horarum illarum ratio habenda est ut anni ægyptiaci solaribus conformes fiant. Præterea anni civilis idem initium esse debet, ab eadem scilicet diei hora; neque enim convenit

nit annum inconstanter incipere modo ab una diei hora, modo ab alia; quod tamen contineret, si singulis annis adderentur sex prædictæ horæ. Quare opportunum judicatum est ut horæ illæ trium annorum spatio accumulatae, quarti anni horis sex adderentur integrumque diem efficerent; hac enim die addita quarti anni diebus 365, idem quartus annus cum motu solis congruet. Hujus emendationis commodum intelligens Julius Cæsar quarto cuilibet anno diem *intercalarem* adjiciendum jussit, ut nempe adhibita hac correctione quartus annus constaret diebus 366. Hæc autem dies addita est mensi Februario; quia vero in anno vulgari dies Februarii 24 dicitur *sextus Kalendas Martii*, seu *sextus ante Kalendas*, statuit Cæsar ut quarto quolibet anno hæc dies bis diceretur ita ut in illo anno sint binæ dies quorum quilibet erit *sextus ante Kalendas Martii*; qua de causa annus ille *Bissextilis* dicebatur. Hæc forma anni a Julio Cæsare constituta vocabatur *Juliana*, atque hæc est illius dispositio ut quartus annus quilibet sit Bissextilis dierum 366, reliqui tres communes 365 dierum. Observandum tamen est justo majus esse tempus anno solari a Julio Cæsare tributum; nam sol periodum suam in Ecliptica absolvit diebus 365, hor. 5. min. 49, ac proinde undecim minutis primis citius cursum suum sol repetit, & ab initio anni Juliani hoc temporis intervallo aberrat. Si, exempli gratia, sol in aliquo anno, vigesima die Martii æquinoctium meridie celebraverit, proximo anno undecim minutis ante meridiem ad æquinoctialem circulum perveniet, & anno sequenti viginti duobus minutis ante meridiem, eundem circulum attinget, atque ita singulis annis sol motu suo undecim minutis annum civilem

lem

lem antevertet, ac proinde annis 131 integræ diei *anticipationem* produci necessum est. Quare æquinoctium cæleste non in eodem semper anni civilis die hærebit, sed sensim versus initium anni regredietur, errore tam manifesto ut in dubium vocari non possit.

Dum tempore Concilii Niceni de Pâschatis celebrandi terminis actum est, æquinoctium vernale in diem 21^{am} Martii incidebat; sed perpetua ejusdem æquinoctii anticipatione, tandem anno Domini 1572. quo Kalendarii Juliani reformatio agitata est, observatum est solem jam a die undecima Martii æquatorem attigisse, hoc est, per integros decem dies citius quam tempore Concilii Niceni. Itaque cum summus Pontifex Gregorius XIII. æquinoctium ad diem 21. Martii restituere cuperet, dies illos decem e Calendario exemit, statuitque ut dies undecimus Martii, vigesimus primus numeraretur; ne autem deinceps idem incommodum obreperet, cautum est ut centesimus quisque annus *communis* esset, qui secundum Juliani Kalendarii formam debebat esse *bissextilis*, at quartus quisque centesimus bissextilis maneret. Nova hæc anni forma summo Pontifice Gregorio XIII. cujus auctoritate stabilita est, *Gregorianæ* nomen habuit. Hanc receperunt Catholicæ omnes regiones atque etiam inter Protestantes plurimæ, & paucis abhinc annis Anglia quæ hætenus repugnaverat, huic emendationi subscripsit. Hæc de anno Gregoriano obiter dicta sint, rem enim fusius explicabimus in speciali articulo de Calendario.

ARTICULUS II.

*De illustrioribus Epochis præcipuisque
periodis.*

I. **Q**uemadmodum in cælo sunt certa puncta a quibus Astronomi in motuum cælestium computatione initium capiunt, ita etiam sunt certa temporis puncta a quibus tanquam radicibus calculos suos inchoant Chronologi. Hæ radices *Epochæ* seu *eræ* dicuntur a quibus anni & tempora numerantur. Duplex est epocharum genus; aliæ nimirum sunt epochæ *sacræ* quæ in sacris litteris traditæ sunt vel adhibitæ, in quibus nempe annorum series ab aliqua re gesta in sacris Scripturis memorata, numeratur. Aliæ sunt *profanæ* quibus alii Scriptores utuntur & ab aliquo facto quod a profanis solum Scriptoribus memoratur, originem sumunt. Prima inter epochas sacras est illa quæ ab ipsa mundi origine incipit, diciturque epocha *orbis conditi*. De hac epocha insignes sunt controversiæ; alii contendunt mundum conditum esse ante Christum natum annis 3950. Alii Christo nascente ætatem mundi fuisse annorum 3983 affirmant. Ecclesia græca & Imperatores orientis utuntur epocha quæ mundum longe antiquiorem facit; secundum illorum æram mundus conditus est annis ante Christum 5509. Prolixius esset referre varias de mundi antiquitate opiniones, hanc quæstionem iterum revocabimus in Appendice. Aliæ sunt epochæ sacræ quamplures quarum præcipuæ sunt *diluvium*, *vocatio Abrahæ*, *exitus ex Ægypto*, *Judæi a Regibus gubernati*, *captivitas Babylonica*; Sed epochæ illæ apud varios auctores variæ sunt pro diverso quod quisque ample-

plectitur Chronologiæ systemate ; hanc autem Chronologiæ varietatem , paucis deinde quantum licet , expendemus atque etiam æræ Christianæ difficultates exponemus . Hujus celebris epochæ initium ex recepto Ecclesiæ usu post Dyonisiî exigui tempora conjicitur in annum Urbis conditæ 753 ; Dionysius Exiguus sexto Ecclesiæ sæculo profanis epochis antea usitatis natalem Christi Domini diem substituit . Consensu unanimi recepta atque approbata fuit hæc epocha quæ ideo *vulgaris* appellatur , atque juxta hanc epocham præsens annus numeratur 1761. post Christum natum . Verum quamvis æræ Christianæ initium a prima die Januarii post Christum natum sumi debeat , quia tamen annum quo Christus natus est , nondum pro comperto habent Chronologi , hinc factum est ut , servata vulgari æra Ecclesiæ usu consecrata , de æræ Christianæ initio varias proponant opiniones . Sed quidquid sit de illa opinionum varietate quam deinde examinabimus , nullus hodie extat in doctrina temporum vel mediocriter versatus qui Dionysianam epocham pro vera habeat . Hanc tamen epocham plurimum sæculorum usu frequentatam merito retinet Ecclesia ne temporum ordo & recepta rerum ecclesiasticarum series turbentur .

II. Longe major in profanis quam in sacris epochis varietas reperitur . Inter profanas epochas antiquissima & celeberrima est *Olympiadum* epocha , cujus initium refertur ad annum 776 ante Christum natum , in ipso plenilunio post solstitium æstivum . Frequentissimi usus est hæc epocha in historia antiqua ; originem habuit ex ludis *olympicis* qui singulis quatuor annis quinto ineunte , celebrari consueverant .

Olympiadum epocha non multo posterior est

est epocha *Romæ* seu *Urbis conditæ* quæ duplex est, *Varoniana* & *Capitolina*; prior Urbem conditam ponit anno ante Christum 753, altera anno 752. Quamvis autem prioris temporibus præcedentium epocharum usus apud Græcos maxime floruerit, Ptolomæus tamen aliique Astronomi veteres æra Nabonassarîi Babylonii Regis sæpissime usi sunt. Hæc autem æra cæpit anno ante Christum 747. Aliæ sunt epochæ plurimæ quas recensere longius foret & superfluum; cum in omnibus Chronologorum libris passim reperiantur. Verum ad perfectam epocharum omnium notitiam necessaria omnino est periodus *Juliana* quæ constat annis 7980. Hujus periodi initium figitur annis 764 ante mundum conditum, & nondum est terminata, ac proinde res omnes gestas universasque epochas complectitur. Annus ante Christum fuit periodi Julianæ annus 4713, ideoque ex dato æræ Christianæ anno statim invenitur annus periodi Julianæ respondens, si nempe proposito anno addantur 4713. Et contra si ab anno periodi Julianæ auferantur 4713, differentia præbet annum æræ Christianæ quæsitum. Sed rem utilissimam explicemus.

III. Ex trium cyclorum lunæ, solis & indicationis multiplicatione conflatur periodus *Juliana* annorum 7980. Cyclorum illorum rationem exponemus. *Cyclus* appellatur certa series numerorum ex ordine ad fixos usque terminos progredientium & eodem deinde non interrupto ordine redeuntium. Hæc fuit cyclorum origo; revolutio nempe apparens solis circa terram in 24 horas pro arbitrio primum divisa fuit, atque ad hanc divisionem tanquam ad basim & fundamentum revocatz fuerunt omnes temporis mensuræ. In usu civili

PARS II. SECT. III. 351

vili usurpabantur duntaxat horæ vel horarum tempora *multipla*, dies scilicet anni &c. At solis aut corporis cuiusvis alterius cælestis motus annuus, neque per horas neque per tempora horarum *multipla* accurate mensurari & dividi potest. E. G. revolutio solis annua est dierum 365. hor. 5. m. 49, quamproxime; revolutio lunæ est dierum 29. hor. 12. min. 44. Itaque ad eliminandas fractiones obtinendisque numeros integros qui dies & annos duntaxat continerent, excogitati fuerunt cycli qui plures ejusdem syderis revolutiones comprehenderent ita ut post certam annorum seriem ad eundem cæli locum sydus rediret. Talis est celebris cyclus lunaris qui est periodus annorum 19 solarium, vel annorum 19 lunarium cum mensibus 7 intercalariis, quo tempore elapso plenilunia & novilunia in eadem anni Juliani dies incidunt. Hæc periodus vocatur etiam *Metonica* ab autore suo Metone Atheniensi, illiusque commoditatem & excellentiam tanti faciebant veteres, ut annum cycli pro quolibet anno proposito aureis litteris inscribere consueverint, illumque *numerus aureum* appellaverint. Sed cycli hujus utilitatem explicabimus in proximo articulo ubi de Kalendario. Primus annus æræ christianæ numerum aureum habuit 2, seu cyclus initium habuit anno ante Christum natum. Quare si anno Christi cuilibet proposito addatur 1 & summa per 19 dividatur, numerus præter quotientem residuus, aureum propositi anni numerum exhibebit. Cyclus solaris est 28 annorum periodus quæ in 1 initium & in 28 finem habet. Ille autem cyclus non ita appellatur quasi ex motu solari pendeat, sed quod adhibeatur ad definiendam diem *Dominicam* quæ olim *dies solis* vocabatur.

Ta-

Talis est nempe hujus cycli periodus ut annis 28. completis, anni dies in iisdem hebdomadæ diebus recurrant. Hujus quoque cycli constructionem & usum in proximo articulo ostendemus. Cycli solaris epocha novem annis ante Christum natum incipit; quare ad inveniendum anni cujuslibet propositi cyclum solare, numero dato addantur 9 summaque per 28 dividatur, residuum exprimet cyclum quæsitum; quotus autem cycli solaris periodos post Christum natum indicabit. Si vero nullum sit residuum, annus propositus erit ultimus cycli solaris annus; quod evidens est ex cycli solaris natura. Præter cyclos lunæ & solis est & alius cyclus qui *indictionum* dicitur, apud Romanos in diplomatibus Cæsareis frequenter usurpatus; nullam habet cum motibus cælestibus connexionem, isque nihil aliud est quam annorum 15 revolutio, quibus expletis, rursus ejusdem periodi recurrit initium. Anno ante Christum natum, indictionis numerus fuit 3; ac proinde si anno Christi addantur 3 & summa dividatur per 15, residuum erit ipse indictionis annus. His præmissis inveniendæ periodi Julianæ rationem exponamus.

Problema huc reducitur: datis annis cycli solaris, lunaris, & indictionis, invenire annum periodi Julianæ. Ex periodi Julianæ natura evidens est inveniendos esse tres numeros hujus conditionis, ut primus sit *multiplus* numerorum 19 & 15 seu eorum producti 285, at per 28 divisus relinquat numerum cycli solaris; secundus sit *multiplus* numerorum 28 & 15 seu eorum producti 420, at divisus per 28 relinquat numerum cycli lunaris; tertius denique sit *multiplus* numerorum 28 & 19, at per 15 divisus relinquat nu-

numerum cycli indictionis. Horum numero-
 rum summa, si minor sit 7980, erit annus
 periodi Julianæ quæsitus; Si autem major
 fuerit, dividatur per 7980 & residuus nu-
 merus erit annus periodi Julianæ. His condi-
 tionibus satisfieri facile potest ope Algebræ,
 primus numerus est 4845, secundus 4200;
 tertius 6980, ut patet; illi enim numeri ha-
 bent conditiones requisitas. E. G. Sit cyclus
 solaris 3, lunaris 4, indictionis 5, ducatur
 4849 in 3, productum erit 14535; item
 multiplicetur 420 per 4, habebitur produ-
 ctum 16800, tandem fiat multiplicatio nume-
 ri 6916 per 5, productum fiet 34580, habe-
 biturque 69515 productorum summa, qua di-
 visa per 7980, quotus erit 8, residuum au-
 tem 2075 exhibebit annum periodi Julianæ
 quæsitum. Porro ex datis conditionibus pro-
 blematis patet in tota periodo unicum esse
 annum qui datis cyclis respondeat, ac proinde
 si cujusque anni cyclos in suis annalibus
 notassent Historici, omnis tolleretur tempo-
 rum ambiguitas.

Præter periodum Julianam est & alia perio-
 dus quæ *Victoriana* a suo auctore Victorio,
 aut *Dionysiana* a reformatore Dionysio dici-
 tur. Periodus illa ex cyclis solis & lunæ in
 se invicem multiplicatis conflatur ac proinde
 annis 532 absolvitur. Manifestum est præce-
 denti methodo inveniri posse annum periodi
 Dionysianæ, datis cyclorum solis & lunæ an-
 nis. Problema huc revocatur, ut nempe in-
 veniantur duo numeri tales, quorum unus di-
 vidi possit per 28 sine residuo, at si per 19
 dividatur residuum sit 1, alter autem sine re-
 siduo dividatur per numerum, 19; at si per
 numerum 28 dividatur, residuum sit 1; ut
 patet ex natura periodi Dyonisiæ. Numeri

354 INSTITUTIONES PHYSICÆ
autem illi per Algebram quæsitæ prodeunt 476
& 57; manifestum enim est numeros illos
conditionibus propositis satisfacere. Itaque nu-
merus cycli solaris datus pro quolibet anno
proposito multiplicetur per 57, itemque nu-
merus cycli lunaris ducatur in 476. Produ-
ctorum summa dividatur per 532, numerus
residuus, nulla habita ratione quoti, erit an-
nus periodi Dionysianæ quæsitus. At si dato
anno æræ Christianæ, inveniendus proponatur
annus periodi Dionysianæ, res est magis ex-
pedita. Anno dato addatur numerus 475,
summa dividatur per 532, numerus residuus,
præter quotientem, indicat annum periodi
quæsitum. Cæterum totam hujus problematis
rationem arithmeticam declarare longius fo-
rer, satis sit observare inventos numeros pro-
positæ quæstioni satisfacere, quod evidens est.

ARTICULUS III.

De Kalendario.

I. **K**alendarium est dierum in anno civili
dispositio secundum proprios menses &
eorundem in hebdomadas distributio, festis
etiam assignatis. Inter varias Kalendariorum
formas, Kalendarium *Julianum* & *Gregorianum*
considerabimus. Calendarium Julianum illud
est in quo cycli solaris ope distribuuntur heb-
domadæ dies secundum seriem litterarum A,
B, C, D, E, F, G; novilunia autem &
plenilunia, præsertimque plenilunium Pascha-
le, numeri aurei ope disponuntur. Totam
Kalendarii hujus formam breviter explicabi-
mus. Hebdomadarum distributio fit per litt-
eras alphabeti septem priores A, B, C, D, E,
F, G, hoc ordine; prima scilicet Januarii
dies

PARS II. SECTIO III. 355

dies notatur littera , A , secunda , B , tertia C , & ita deinceps usque ad G , quæ diei septimæ affigitur ; & rursus eodem servato ordine , diei octavæ iterum apponitur littera A , nonæ diei B , decimæ C , atque sic continua litterarum repetitione , singulæ anni dies aliquam obtinent litteram in Kalendario , & ultimo diei Decembris adscribitur littera A . Nam si 365 dies dividantur per 7 , proveniunt hebdomadæ 52 & unus præterea superest dies . Si nullus superesset dies , anni omnes ab eodem hebdomadæ die semper inciperent , & quilibet mensis dies in determinatum hebdomadis diem perpetuo incideret ; quia vero in anno , præter hebdomadas completas , remanet unus dies , factum est ut annus in eodem designat die a quo incepit , ac proinde proximus annus a proximo die incipit . Exempli gratia in anno communi 365 dierum , si annus incipit die Dominica , ultimus anni dies erit etiam dies Dominica , & primus sequentis anni dies est dies lunæ . Litteris hac ratione dispositis in anno communi , littera quæ primæ Januarii Dominicæ responderet , per totum illum annum , Dominicas indicabit , ideoque littera illa istius anni *Dominicalis* vocatur . Si prima Januarii dies sit Dominica cui respondet littera A , ultima erit quoque Dominica , ut patet ex dictis , ac proinde annus sequens die lunæ incipiet & Dominica cadet in diem septimum cui respondet littera G , quæ ideo erit littera Dominicalis per totum illum annum . Si annus die lunæ incipiat , die quoque lunæ desinet , & anno sequente prima Januarii dies cadet in diem *Martis* , primaque Dominica cadet in sextam mensis diem cui in Kalendario responderet littera F , atque eodem modo anno sequen-

quente littera Dominicalis foret E, & hac ratione litteræ Dominicales ordine semper retrogrado feruntur per G, F, E, D, C, B, A. Evidens est, ut jam diximus, per totum annum *communem* seu non Bissextilem eadem littera cujuslibet hebdomadæ diem semper indicari, cum Dominica septem dierum ordine constanter redeat. Verum quoniam quartus quilibet annus est Bissextilis dierum scilicet 366, ultra hebdomadas 52 supersunt dies duo; quare si annus ille incipiat die Dominica, in die lunæ terminabitur, & proximus post hunc bissextilem annus a die martis incipiet, primaque ejusdem anni Dominica in sextam mensis diem cadet, cui respondet littera F, pro sequentis anni Dominicali. Itaque cum annus bissextilis post singulos quatuor annos recurrat, hinc manifestum est singulis septem annis quater sumptis, hoc est, 28 annorum intervallo recurrere eundem litterarum Dominicalium ordinem, qui quidem ordo, annorum bissextilium recurso non turbatus, singulis septenniis rediret. Hinc oritur cyclus *solaris* annorum 28, de quo jam mentionem fecimus, quo nempe completo, eadem recurrit litterarum Dominicalium series. Ex his autem patet qua ratione constitui possit, pro Calendario Juliano, litterarum Dominicalium vulgaris tabula. Cycli solaris primus annus est bissextilis cui respondent litteræ Dominicales, G, F. Secundi anni littera Dominicalis est E, tertii D, quarti C; quintus cycli annus rursus est bissextilis cui congruunt litteræ Dominicales B, A, & ita deinceps. Hinc facile comparatur tabula quæ litteras Dominicales cuilibet cycli solaris anno respondentes exhibet. Quare si inveniatur cycli solaris annus, ut antea do-

cui-

cuius, statim patet littera Dominicalis elatere respondens. Si tabula duas demonstret litteras Dominicales, quod in anno quolibet bissextili contingit, litterarum prima valet usque ad 24^{am} diem Februarii *inclusivè*, altera autem reliqua anni parte usurpatur.

II. Præter hancquam explicavimus, litterarum Dominicalium distributionem quæ stabiles dies festos certis anni diebus alligatos determinat, in Kalendario consignantur etiam dies festi mutabiles qui in diversis annis, diversis diebus celebrantur, qui proinde non ex solis, sed ex lunæ motu pendent. Tale est sanctum Paschatis festum quod die Dominica post plenilunium *vernale* celebrari præcipit Ecclesia; plenilunium autem *vernale* illud appellatur quod in ipsam æquinoctii vernalis diem incidit vel eam proxime sequitur. Primo itaque ad definiendum Paschatis celebrandi tempus constituendum est æquinoctium quod diei Martii 21^æ affixum statuitur in Kalendario Juliano. Novilunia autem & plenilunia cycli lunaris & numeri aurei ope in eodem Kalendario definiuntur. Hac autem ratione numeri aurei diebus Kalendarii adscribuntur; adhibito quolibet anno, pro initio cycli, cui numerus aureus I, tribuitur, notentur in singulis mensibus noviluniorum dies, atque eo anno e regione horum dierum scribatur character I; Quoniam autem, exempli gratia, novilunia accidebant Januarii 23, Februarii 21, Martii 23 &c., e regione horum dierum in cycli lunaris columna scribitur unitas. Sequenti anno notatis noviluniis e regione dierum quibus acciderunt, inscribitur in numerorum aureorum columna character 2; idem fit tertio anno & ita deinceps donec absolutus fuerit cyclus annorum 19. Juliani Kalen-

lendarii constructionem explicavimus, nunc Kalendarium Gregorianum exponamus, & deinde Kalendarium utrumque diligentius expendemus.

III. Alia est Kalendarii Gregoriani forma tum quoad litteras Dominicales, tum etiam quoad festa *mobilia*. Kalendarii reformatio sub Gregorio XIII. litterarum Dominicalium sedem mutavit; nam ineunte anno 1582, littera Dominicalis fuit G, sed demptis diebus decem post quartam diem Octobris, littera Dominicalis pro reliquo anno fuit C. Et enim anno 1582 pro die 5 Octobris diem 15^{am} numerari decrevit summus Pontifex, ut nempe æquinoctium ad eam rejiceretur diem in quam incidebat tempore Concilii Niceni. Jam vero ejusdem anni cyclus solaris fuit 23, ac proinde G fuit littera Dominicalis (ex dem.). Quare septima dies Octobris in qua occurrit littera G, debuit esse Dominica, ideoque dies 4 Octobris cui respondet littera, D, fuit dies jovis, dies 15 cui respondet littera A, fuit dies veneris, ac proinde littera C, quæ diei 15 respondet, Dominicam diem indicabat. Quare littera Dominicalis in Kalendario Juliano litteræ Dominicalis sedem in Kalendario Gregoriano locorum quatuor intervallo præcedit; cum in primi Kalendarii forma, littera A, respondeat litteræ D, in Kalendario Gregoriano. Præterea in eodem Kalendario perpetuus non est litterarum Dominicalium ordo; nam cum annus 1600 fuerit bissextilis, communis autem fuerit annus 1700, litterarum Dominicalium seriem anno 1700 turbari oportuit; idem ordo mutabitur quoque annis 1800, 1900., 2100 &c, in omnium denique sæculorum initio, si primus sæculi annus non sit bissextilis.

Inde

Inde autem facile colligitur qua ratione in
 Calendario Gregoriano cycli solaris tabula
 construi possit. In cyclo solari, pro Kalenda-
 rio Juliano, loco litteræ G, substituatur lit-
 tera C, quæ nempe respondeat cyclo solari
 23, atque ita facile comparabitur cycli sola-
 ris tabula in Calendario Gregoriano. At ma-
 nifestum est tabulam illam valere duntaxat ab
 anno 1682 usque ad 1700. Etenim cum sin-
 gulis quater centesimis annis unicus duntaxat
 annus centesimus sit bissextilis in Calendario
 Gregoriano, bissextiles autem sint anni sin-
 guli centesimi in anno Juliano, patet annos
 1700, 1800, 1900, non esse bissextiles, qua-
 les esse debent in Calendario Juliano, ac pro-
 inde pervertitur litterarum Dominicalium or-
 do. Superfluum judicamus hic describere cy-
 cli solaris tabulas quæ passim reperiuntur,
 fatis fuit explicasse principia ex quibus intel-
 ligi & construi possunt. Cæterum litteræ Do-
 minicales sine cyclorum ope facile inveniun-
 tur hoc modo. Invenienda proponatur littera
 Dominicalis an. 1755, disponantur litteræ
 Dominicales hoc ordine B, A, G, F, E,
 D, C, addantur 55 numero 13, ob 13 an-
 nos bissextiles qui ab anno 1701 usque ad
 1755 interfluxere *exclusive*, hoc est, non nu-
 merato anno 1755, fiatque divisio per 7,
 residuum 5 exhibet litteram Dominicalem E.
 Si autem annus sit bissextilis, jam litteræ per
 residuum numerum datæ jungenda est littera
 proxime sequens. Hujus operationis ratio sta-
 tim patet. Etenim an. 1701 littera Domini-
 calis fuit B. Si anni singuli unicam habe-
 rent litteram diviso, per 7 annorum numero
 qui ab anno 1700 elapsi sunt; quotus hanc
 litteram indicaret; verum annus quilibet bis-
 sextilis facit ut annus sequens litteræ unius
 in-

Intervallo regrediatur . E. G. annus 1705 loco litteræ Dominicalis E habuit D . Igitur duo anni bissextiles efficiunt ut annus duarum litterarum intervallo retrahatur , ideoque septem anni bissextiles efficiunt ut toto septem litterarum intervallo regressus fiat ; hoc est , litterarum ordo rursus incipit . En totam hujus operationis rationem ex qua etiam facile inrelligitur ultimam litteram C , fore Dominicalem , si divisione facta , nullum superfit residuum .

IV. In Kalendario Gregoriano *Epaëtarum* ope definiuntur novilunia & plenilunia , Paschatis festum & quæ ex eo pendent festa *mobilia* . *Epaëtam* appellant Chronologi mensis solaris & mensis lunaris synodici differentiam , vel etiam differentiam anni solaris & anni lunaris Synodici , aut etiam plurium utcumque mensium aut annorum solarium itidemque lunarium numero æqualium differentiam . Igitur Epaëta vel sunt *annuæ* vel *menstruæ* , prout nempe sunt annorum vel mensium solarium & lunarium differentia . Itaque cum annus Julianus sit 365 dieb. 6 hor. , annus autem lunaris sit 354 dieb. 8 hor. 48' 38" , epaëta annua est 10 dieb. 21 hor. 11' 22" , hoc est , dierum circiter 11 , ideoque duorum annorum Epaëta est dieb. 22 , annorum trium epaëta est dieb. 33 vel potius dierum 3 , cum 30 dies constituent mensem *embolismicum* , sive *intercalarem* . Simili ratione epaëta annorum 4 erit dierum 14 & ita deinceps , ac proinde epaëta anno quolibet 19^o . erit 30 vel 0 . Quare vigesima epaëta erit 11 , ac proinde epaëtarum cyclus cum numero aureo , seu epaëtarum cyclo annorum 19 definit , & cum eodem rursus incipit .

Præterea cum menses lunares post singulos

19 annos iidem redeant, hoc est, desinente hac periodo iisdem diebus recurrant, ita differentia inter annum solare & lunarem post annos 19 eadem redit. Quia vero anno lunari hæc addenda est differentia ut cum anno solari concilietur, sive ut anno solari æqualis fiat, differentia illæ quæ ad singulos cycli lunaris annos respective pertinent, *Epactæ annue* vel simpliciter *Epactæ* appellantur. Quare *Epactæ* nomen in usu vulgari significat numerum anno lunari addendum ut cum solari congruat. Ex hac mutua cycli lunaris & cycli epactarum connexionione pendet regula quæ ad inveniendam epactam dato cuilibet cycli lunaris anno convenientem adhiberi solet; multiplicetur nempe datus cycli lunaris annus per numerum 11; si productum sit minus quam 30, pro epacta quæ sita haberi debet; Si autem majus sit, hoc dividatur per 30; facta divisione, quod residuum est erit epacta quæ sita. Porro ex his præceptis evidens est epactam inventam esse *Julianam*; qua ratione inveniri possit epacta *Gregoriana*, mox præscribemus. Interim patet epactæ ope pro quolibet anno dato inveniri posse novilunii dies. Anni dati epacta mensis numero addatur, sumpto initio a mense Martio *inclusive*; si summa minor fuerit quam 30, hæc ex 30 subtrahatur; Si major hæc auferatur ex 60, quod remanet novilunii diem indicabit. Si pro mensibus Januario & Martio quæ ratur novilunium, tunc epactæ nihil addi debet in utroque casu: at si pro mensibus Februario & Aprili inveniendum sit novilunium, unitas addenda est. E. G. Si invenienda proponatur mensis Decembris dies in quam incidit novilunium an. 1711. cujus epacta erat 22; dies quæ sita erit 28 Decembris, nam $22 + 10 =$

32 & 60 $32 = 28$. Tota operationis ratio manifesta est; nam cum epacta sit 22, ætas lunæ prima die Martii erit dierum 22, prima autem die Aprilis erit dierum circiter 23, prima die Maji dierum 24 &c. cum enim Epacta dierum 11 intervallo annuatim crescat, fingi potest eam unius diei intervallo circiter per menses crescere a mense Martio usque ad Decembrem. Itaque prima die Decembris lunæ ætas erit dierum 32, hoc est, novilunium jam duobus ante diebus contigit. Quare ut pro mense Decembri habeatur novilunii dies, ex numero 30 auferatur 2, vel ex 60 subtrahatur 32. Inventa autem novilunii die, ætas lunæ pro quolibet die dato statim colligitur.

V. Epacta Juliana a Gregoriana distingui debet; in eo nempe sita est Epactæ utriusque differentia quod annus Julianus dierum undecim intervallo tardius incipiat quam Gregorianus. Quare inventa epacta Juliana, ab ea, si necesse sit, 30 diebus aucta, subtrahatur numerus 11, habebitur epacta Gregoriana. Ita anno 1712 epacta Gregoriana est 22, & novilunia hujus anni mense quolibet undecim diebus tardius quam in anno Juliano contingent, ut oportet. Felici autem casu accidit ut numerus dierum in anno Gregoriano differat ab anno Juliano eadem ipsa differentia quæ annus solaris superat annum lunarem; ita autem fit ut epacta Gregoriana pro dato quolibet anno conveniat cum epacta Juliana anni præcedentis. Porro quia cycli 19 annorum die una integra, spatio annorum 312, novilunia antevertit, ita etiam epactarum cycli idem non semper obtinet; nempe in hoc casu unitate multari debent epactæ methodo præcedenti inventæ. Igitur accurata non est epacta quam Kalendarium exhibet; nempe si
epa-

epacta Kalendarii fuerit 22, adhiberi debet epacta 21, cum novilunium non in diem 22, sed 21 incidat. Quare elapso hoc temporis intervallo mutantur epactæ, atque ita deinceps post singulos 312 annos. Præter hanc variationis causam aliam quoque ob rationem in Kalendario Gregoriano epactarum cyclum mutari necessum est. Nam ex quatuor annis *secularibus*, tres non sunt bissextiles, ita ut his annis novilunia non incidant in diem quam Kalendarium indicat, sed in diem sequentem. Ita si 10 die Martii E. G. contingere debeat novilunium, ponendo annum una die auctum, novilunium illud incidet duntaxat in diem 11, si annus non augeatur. Hinc pro his casibus aliæ duæ fuerunt compositæ epactarum tabulæ quæ apud omnes Kalendarii Scriptores reperiuntur; tabularum rationem atque artificium exposuisse satis sit.

VI. Ex iis quæ hætenus de Kalendario Juliano & Gregoriano explicavimus, intelligitur Kalendarii utriusque differentia. Kalendarium Gregorianum differt a Juliano tum quoad ipsam anni formam, tum quoad epactas numero aureo substitutas, quarum usus & dispositio in Kalendario Gregoriano longe aliter se habent. Kalendarium Julianum erroribus plurimis obnoxium esse patet; Etenim in hoc Kalendario æquinoctium vernale fixum ponitur diei 21 Martii, atque cyclo 19 annorum vel numeris aureis novilunia & plenilunia constanter indicari fingitur; utrumque autem a vero longe aberrat, & in Paschatis celebratione crassiores errores inducit; quod ut demonstramus, hanc Kalendarii formam ad annum 1715 transferamus; æquinoctium vernale in Kalendario Juliano, hoc est, *stilo veteri*, ut dicunt, in diem 10 Martii incidebat, *stilo au-*

tem *novo*, nempe in Kalendario Gregoriano, in diem 21 ejuldem mensis cadebat. Plenilunium verum post æquinoctium cadebat in diem 7^{am} Aprilis ac proinde trium dierum differentia tardius, pro ratione cycli lunaris vel numeri aurei qui plenilunium Paschale diei 10 Aprilis consignabat. At cum dies 10 Aprilis in diem Dominicam incidat, Paschatis festum secundum Kalendarii Ecclesiastici leges, ad diem 1^{am} transferri debet; quare Pascha die 10 Aprilis celebrandum, in diem 17^{am} caderet; hic error qui in *pos. positione* plenilunii positus est, ex cycli lunaris vitio originem habet. Successu temporis ita creverant Kalendarii errores ut Paschatis celebratio nullis jam certis legibus subjici posset; qua de causa factum est ut anno 1582, quod antea dictum est, Gregorius XIII. ex mense Octobri decem dies expunxerit, & æquinoctium proprio loco, diei scilicet 21 Martii restituerit. Jussit Summus Pontifex novilunia & plenilunia, non aureis numeris sed epactarum ope definienda esse; totam hujus reformationis artem explicavimus. Verum quamvis Kalendarium Gregorianum Juliano longe sit anteponendum, non tamen ab omni errore immune est. Etenim non obstante Gregoriana *intercalatione*, æquinoctium post vel ante 21^{am} Martii contingere potest; die 23 Martii aliquando contingit; cadit aliquando in 19^{am}, atque in hoc casu plenilunium quod die 20 Martii accideret, est verum plenilunium Paschale, nec tamen ut tale habetur in Kalendario Gregoriano. Præterea in eodem Kalendario tamquam luna *Paschalis* habetur plenilunium quod die 22 Martii contingit; illud tamen Paschale non est, si ante æquinoctium contingat, ac proinde in utroque casu error committitur.

Tan.

Tandem ex epactarum constructione patet fieri posse ut novilunia quæ epactarum ope inveniuntur, novilunia vera horis quibusdam præcedant vel subsequantur, ac proinde in hoc casu plenilunium Paschale in diem Sabbati potest incidere, quamvis diei Dominicæ in epactarum tabulis consignetur, & viceversa plenilunium quod in diem Dominicam cadit, diei Sabbati epacta consignaret. Quare in primo casu octo dierum intervallo tardius Pascha celebratur, in casu autem altero celebratur in ipso plenilunii die cum ipsis Judæis. Erroris exempla afferre non abs re erit: anno 1724 plenilunium verum Paschale contigit die Sabbati, 8 die Aprilis, horis 4, minutis primis 21 post meridiem, atque æquinoctium die 20 Martii contigerat. At inito per epactas calculo, plenilunium Paschale invenitur die 9 Aprilis quæ erat dies Dominica; quare, ex Kalendarii lege, festum Paschatis in diem 16^{am} Aprilis incidit, die tamen 9 revera celebrandum. Idem contigit anno 1744, quo Paschatis festum octo diebus, quam pro veritate Astronomica, tardius celebratum est; nam plenilunium Paschale contigit die Sabbati, 28 Martii, ac proinde die Dominica sequenti celebrandum erat Paschatis festum; cum tamen, ex calculo epactarum, die 29 quæ erat Dominica, plenilunium contigerit, ideoque Paschatis celebratio ad diem 5^{am} Aprilis erat removenda. Idem continget annis 1778, 1798, aliisque deinde annis plurimis. Itaque licet novilunia & plenilunia epactarum ope in Calendario Gregoriano multo accuratius quam in Juliano definiantur, fieri tamen nequaquam potest ut in eundem diem cum Astronomicis pleniluniis & noviluniis accurate semper coincidant.

VII. Hic data occasione paucis verbis observare non abs re erit quid conjunctionis habeat legitima Paschatis celebratio cum sacra Theologia. In Paschatis celebratione primis duobus Ecclesiæ sæculis diversa fuit disciplina. Asiæ Ecclesiæ servantes traditionem quam a S. Joanne Evangelista se hausisse prædicabant, Pascha cum Judæis celebrarunt luna 14; aliæ autem Ecclesiæ traditioni a S. Marco acceptæ inhærentes Paschatis celebrationem protraxerunt usque ad Dominicam post lunam 14^{am}. Hæc disciplinæ varietas perduravit ad medium usque secundum sæculum quo S. Pii Papæ autoritate in eandem cum latinis disciplinam convenerunt Asiani. Hæc celebrandi Paschatis consuetudo a summo Pontifice præscripta Conciliorum decretis & præsertim Concilii Niceni definitione fuit confirmata, statutumque est: *Pascha celebrandum esse prima Dominica post lunam 14^{am} primi mensis, ita ut tamen, luna 14. in diem Dominicam incidente, Paschatis celebratio ad Dominicam proxime sequentem transferri debeat*. Ex Concilii Niceni decreto intelligitur ad legitimam Paschatis diem definiendam quatuor esse necessaria. 1^o. Nota sit oportet anni solaris dies quo sol primum Arietis gradum ingreditur. 2^o. Nota quoque esse debet dies novilunii cujus luna 14 vel in diem æquinoctii vernalis incidat, vel proxime post ipsum æquinoctium vernalis. 3^o. Cognita sit oportet luna illa 14. 4^o. Tandem notum esse debet in quam mensis diem incidat Dominica quæ lunam 14^{am} primi mensis proxime sequitur. Hæc quidem omnia, quoad usum ecclesiasticum, satis accurate præstat explicata Kalendarii doctrina, non tamen ea diligentia quæ Concilii Niceni decretis adamussim respondere

dere possit ita ut nostri Paschatis dies cum Judæorum Paschate nunquam concurrat.

Immerito tamen Ecclesiam quis reprehenderet quasi in Paschatis celebratione cum *Quartodecimanis* errare possit; quod quidem obijciunt aliqui, nec quæstionis theologicæ nec Kalendarii doctrinæ satis periti. Qui summorum Pontificum & Concilii Niceni decretis pertinaciter obstiterunt, tanquam hæretici damnati fuere, quibus, ab hæresi sua, hæsit *Quartodecimanorum* nomen. In hac celeberrima de Paschatis celebratione controversia distinguere debent partes duæ, quarum una spectat disciplinam, altera vero ad dogma pertinet. Disciplina posita est in mero Paschatis celebrandi ritu, qui quidem ritus libere usurpari potuit, antequam Ecclesiæ præceptum accederet. Theologis notissimæ sunt litteræ quibus S. Ireneus Victorem Summum Pontificem hortatur ut Majorum suorum exemplo Asianorum consuetudini ac disciplinæ indulgeat. Quæstionis pars alia cum dogmate conjuncta in eo consistit, quod *Quartodecimanis* non solum Pascha celebraverint luna 14, sed etiam Paschatis tali die celebrandi præceptum atque necessitatem imposuerint, & ita ritus Mosæicos revocare tentaverint; quod *hæreticum* omnino est. Ex his autem manifestum est primam quæstionis partem quæ mera est consuetudo atque disciplina, ex Ecclesiæ institutione pendere, ideoque nullus erroris reprehendi posse Ecclesiam, etiam si Pascha cum Judæis celebrari aliquando contigerit. Et requidem ipsa, talis *astronomicus* error nullo declinari potest Kalendario perpetuo, nisi ad Astronomiæ severitatem sit compositum, quod in usu vulgari non satis commodum foret atque expeditum. Quæ cum ita sint, in Pas-

368 INSTITUTIONES PHYSICÆ
chatis festorumque omnium celebratione Ec-
clesiæ disciplina religiose tenenda est, *Resur-*
rectionis Christi Domini memoria sancte reco-
lenda, atque ita vivendum nobis est & mo-
riendum ut tandem in vitam æternam resur-
gamus.

A P P E N D I X

De quibusdam capitulis præcedentis utilitatibus.

P Ræcedentis doctrinæ utilitatem in defi-
nienda æra Christiana epocharum omnium
longe nobilissima, primum demonstrabimus.
Quamvis æræ Christianæ initium certo figere
non audeant accuratiores Chronologi, æræ ta-
men Dionysianæ seu vulgaris errorem facile
ostendunt. Tota quæstionis hujus difficultas
ex triplici capite oritur. 1º. Ex morte He-
rodis, quo adhuc vivente Christus Dominus
natus est: *In diebus Herodis Regis: Matth. xxi.*
2º. Ex imperii Augusti initio, cujus imperii
anno 42. Christus natus creditur, anno autem
15. Imperii Tiberii Cæsaris. Luc. 3. Tandem
ex censu Populi Romani factò sub Cyrino
Præside Syriæ. Cap. xi. Lucæ. De his tri-
bus varia est Chronologorum opinio. Nonnul-
li mortem Herodis consignant anno ab Urbe
condita 754, alii autem nonnullis ante an-
nis. Aliqui regnum Augusti auspicantur a
morte Cæsaris, alii a primo illius consulatu.
Aliqui initium imperii Tiberii sumunt a mor-
te Augusti, alii biennio ante; cum tunc tem-
poris collega Augusti jam fuerit. Denique
cum plures sub hoc principe facti fuerint Po-
puli Romani census, annum quo contigit de-
scriptio memorata a S. Luca, haud facile est
definire. Quæstionis difficultatem augent ad-
hibitæ

hibitæ a SS. Patribus epochæ; ii enim a Salvatoris nostri natali annos numerare non consueverant, sed primis Ecclesiæ temporibus aliæ usurpabantur epochæ, vel æra *Æliaca*, *Diocletiana*, *ab Urbe condita*, *fastorum consularium*, aut aliæ etiam pro varia populorum apud quos SS. PP. degebant consuetudine. Sed quidquid sit de illa quæstione cujus tractatio ad Chronologos proprio jure pertinet, certum est eam magna periodorum & cyclo-
rum varietate esse implicatam, & ab iis tantum intelligi posse qui harum rerum doctrinæ probe sunt imbuti. Diligenter autem observandum est in Chronologicis controversiis obscuritatem maximam persæpe oriri ex ipsa periodorum hypothese non satis accurate definita; ita si Scriptor aliquis coetaneus certo periodi Julianæ vel alterius periodi anno factum aliquod consignaverit, ejusdem facti ætas definita habebitur, dummodo tamen probe cognita sit Scriptoris hujus de usurpata periodo hypothesis. Cum enim periodi ad alias epochas referantur, certo constare debet epocharum illarum initium, quale scilicet adhibetur a Scriptoribus quorum autoritate utimur. Quamvis ergo utilissimus sit Periodi Julianæ usus, quia tamen periodus illa fixum non habet initium si ad epocham orbis conditi vel æram Christianam referatur, hinc patet periodi hujus ope, non satis certo aliqujus facti tempus indicari, nisi autor suam de periodi initio sententiam declaraverit, aut facto aliquo indubitato illustraverit. Rem præsentis quæstionis exemplo explicabimus. Refert Josephus in *antiquitatibus Judaicis*; *vita defunctum esse Herodem post detrusum regno Antigoni anno 34*, ex quo a Romanis Rex declaratus est 37; *regium autem fastigium*

adeptus est Olympiade 184. Porro, cum ad Herodis mortem circiter referri possit Christianæ æræ initium, Josephi autoritate merito utuntur Chronologi, dummodo tamen Olympiadis annum certo definiant. Etenim anni Olympiadum ex orbis conditi epocha, atque ex æra Christiana pendent, ac proinde Chronologi ponunt quod est in questione. Quarendum igitur est factum aliud quo olympiadum annus certius determinetur, quo definito jam olympiadum epocha uti licebit tanquam puncto fixo ad quod revocari poterunt facta alia a Josepho narrata. In hunc usum adhiberi poterit eclipsis lunæ quam contigisse refert Josephus eadem nocte qua Herodes ægrotantis, jussu Matthias populi seductor occisus est, & post quam Herodes brevem ægramque vitam traxisse legitur. Contigit autem eclipsis illa, ex tabulis astronomicis, anno Juliano 42, die 13 Martii, tribus horis ante ortum solis. Si eclipsim hanc aliquo olympiadum anno notasset Josephus, de anno quo mortuus est Herodes, nullum jam foret dubium ac proinde & certo figi posset æra Christiana; cum ex Chronologorum omnium consensu certissimum sit Herodem paulo post Christum natum obiisse. Caterum ex dictis probabilissimum & historica demonstratione fere indubitatum est, æram Christianam in anno Juliano 41 vel 42 collocandam esse; quare æra vulgaris quæ nativitatem Christi consignat anno Juliano 45, tardior est annorum 3 vel 4 intervallo.

Alia est in rebus Chronologicis frequentissima ambiguitatis causa, ex diverso apud veteres Scriptores anni initio repetenda. Anni initium sumebant aliqui a mense Martio, alii a mense Januario, nonnulli a mense Decem-

bri,

bri, & quidem etiam a variis eorundem mensium diebus, a Paschatis festo annum auspicabantur plurimi. Ex hac varietate Chronologicas lites plurimas oriri necessum est, nisi probe cognita fuerit anni forma. Sed aliæ sunt multo graviores in annorum forma difficultates; anni nomine designari aliquando consuevit apud veteres, planetæ cujuscunque in cælo revolutio, ut testantur Diodorus Siculus, Plinius, Plutarchus aliique non pauci remotissimæ antiquitatis Scriptores. Teste Suida annus ex duobus, tribus, quatuor, sex, duodecim mensibus constabat, aliquando autem una die. Ex hac annorum varietate patet contrahendam esse remotissimam quam nonnulli populi jactant antiquitatem. Et quidem Scripturæ sacræ repugnat omnino quod de sua antiquitate fabulantur Babyloniorum, Ægyptiorum & Sinensium Annales; ac proinde tanquam fabulosa haberi debent tempora illa, vel annorum contractione ad sacram Chronologiam reducenda. Re quidem vera, in ipsa etiam Sacræ Scripturæ Chronologia non desunt varietates aliquæ, sed præterquam quod demonstrari non potest hanc, quoad Chronologiam, sacrorum Textuum diversitatem nulla ratione conciliari posse, jactata quorundam populorum antiquitas a Sacra Chronologia longissime differt. Textus hæbreus quater mille annos circiter a creatione mundi usque ad Christum numerat, textus Samaritanus paulo majus temporis intervallum tribuit; sed versio 70 Interpretum ad sex mille annos circiter idem intervallum protrahit: en totam textuum differentiam. At referunt Caldæorum annales jam a quadringentis mille & amplius annis, Caldæos Astronomiæ operam dedisse, dum Alexander in Asiam transit.

Eadem antiquitate gloriantur Babyloniorum, & Sinensium fasti; quæ quidem enormis temporum varietas a Scriptura Sacra ideoque a veritate immensum aberrat, nisi contracta annorum forma utamur. Hanc annorum reductionem exemplo aliquo tentabimus. Narrat Alexander Polyhistor, ex fide Berosi, servata fuisse Babylone jam ab annis 150000, antiquissimorum temporum documenta. Crassioris *anachronismi* reus facile convincitur Berosus, si animadvertamus a Nabonassaro qui 410 vel 411 annis ante Alexandrum vixit, destructa fuisse historica omnia monumenta. At si annos illos 150000 in dies contrahamus, invenientur anni 410, menses 8, dies 3, quod quidem cum Nabonassari temporibus apprime convenit. Sed de his intricatissimis rebus disputare nostrum non est, satis erit observare adversus Scripturæ Sacræ auctoritatem a perversissimis vitis summa impietate obijci Chronologiæ sacræ varietatem; Chronologicæ enim quæstiones ad fidem & bonos mores non pertinent, atque in rebus levioris momenti amanuensium incuria errorem aliquem in Scripturam Sacram potuisse obrepere consentiunt Theologi omnes. Tandem, ut jam monuimus, demonstratum non est iniri non posse concordiam inter variorum textuum Chronologiam, licet hactenus ignotam fateamur ineundæ hujus concordiæ rationem. Hic autem data occasione, silentio prætermittere non licet celebratissimum Nevvtoni systema Chronologicum. Quingentis circiter annis mundum recentiorē esse quam a Chronologis creditur, opinatus est Nevvtonus astronomica potissimum ratione innixus. Notum est ex Astronomia puncta æquinoctialia annorum 72 intervallo uniformi fere motu retrogrado incedere. Ex
San-

Sancto Clemente Alexandrino, Chiron qui unus fuit ex celebratissimis viatoribus *Argonautis*, æquinoctium vernum gradui 15° Arietis alligavit, ac proinde solstitium æstivum in gradu cancri 15° contigit. Anno ante bellum Peloponesiacum, solstitium æstivum fixit Meto in gradu 8° cancri. Quare cum gradus unus annis 72 respondeat, septies septuaginta duo anni numerari debent ab Argonautarum expeditione usque ad initium belli Peloponesiaci, hoc est, interfluxere anni 504, non autem 700. ut Græci Scriptores referunt. Hinc concludit Nevvtonus Argonautarum expeditionem anno 909 ante Christum esse affigendam, non autem anno 400, ut vulgo creditur, ac proinde annis circiter 500 mundus junior foret. Huic astronomicæ rationi aliam adjungit Nevvtonus ex generationum æstimatione deductam. Ægyptii a *Menete* usque ad *Sethonem* numerabant generationes 341, & tres generationes spatio annorum 100 æstimabant; Græci autem generationes singulas ad annos 40 revocabant. Ægyptios Græcosque erroris reprehendit Nevvtonus; verum quidem est tres generationes ad annos 120 vulgo reduci posse; sed generationes sunt Principum imperio diuturniores; evidens enim est, si rem generatim consideremus, homines vivere diutius quam Reges regnare. Quæcum ita sint, Nevvtonus Regum imperia constituit annorum circiter 20, hancque justam æstimationem comprobat descripta longa Regum serie. Hæc duplex est quam adhibet Nevvtonus probationis genus. Chronologiam hanc, licet excellentis ingenii virum demonstraret, impugnarunt homines eruditissimi; de argumentorum vi & pondere nostrum non est judicare, atque in obscurissima factorum temporum

porumque senectute, in tanta opinionum varietate, in densissimis rerum antiquissimarum tenebris nullum inveniri potest Chronologicum systema quod non oppugnetur facilius quam probetur.

S E C T I O . IV.

De Geographia.

G *Geographiæ* nomine intelligitur *Telluris descriptio*, ex qua definitione statim nascuntur diversæ *Geographiæ* partes. Primo enim considerandam sese offert terrestris globi superficies; hanc autem contemplari possumus velut divisam in varias regiones quæ Regum imperia Principumque ditiones constituunt atque terminant. Hæc *Geographiæ* pars mere historica est & ad *Physicam* non pertinet; hanc tamen ignorare turpe est viro cui vel mediocriter excultum est ingenium. *Geographia Physica* quam solam hic tractamus, diverso plane modo telluris superficiem considerat; diversas nempe investigat terrestris superficiei affectiones quæ ex solis positione pendent, & deinde præcipuas corporum species in ipsa telluris superficie positas expendit; ad telluris viscera descendens, intestinos rimatur variorum corpusculorum motus; ex telluris gremio tandem supra superficiem alte assurgens meteora observat illorumque causam explicat. Temporis brevitate sollicitatus, tantam rerum copiam duobus capitibus contraham; quod autem deerit, in aliis libris plurimis passim invenient qui hanc faciliorem *Physices* partem majori studio persequi voluerint.

C A.

C A P U T I.

De superficie terrestri præcipuisque in ea considerandis corporum speciebus.

A R T I C U L U S I.

De superficierum terrestrium divisione illiusque variis respectu solis affectionibus.

I. **U**niversam telluris superficiem per climata distinguunt Geographi. Climate appellant superficierum terrestrium portionem vel zonam duobus circulis æquatori parallelis comprehensam; talis autem adhiberi solet hujus zone latitudo ut longior dies in parallelo qui polo proximior est, data quadam quantitate, E. G. Semihora, longiorem diem excedat in parallelo qui proximior est æquatori. Itaque climata numerantur ab æquatore ad polos & inter se non differunt nisi quod in climate proximo dies æstiva longior, semihoræ unius tempore longior sit vel brevior quam in climate altero. Primi climatis intervallo statuitur 8 grad. 30', ultimum autem 3 non excedit. Hujus autem inæqualitatis ratio facile intelligetur, si varias explicaverim sphaeræ terrestrium positiones.

Triplex est sphaeræ positio, *recta* scilicet *obliqua* & *parallela*. Angulum quem æquator & horizon comprehendunt, metitur arcus qui est complementum latitudinis ad quadrantem (ex dem. cap. 1. Astron.). Quare si angulus ille rectus sit latitudo erit nulla, & æquator per verticem incedet, omnesque æquatoris paralleli erunt ad horizontem recti, ideoque hæc sphaeræ positio *recta* dicitur in qua paralleli
om.

omnes ab horizonte in partes æquales secantur. Itaque mora cujusvis syderis supra horizontem æqualis est tempori quo infra eundem deprimitur, & dies noctibus perpetuo sunt æquales. Si ab æquatore versus alterutrum polum recedamus, æquator quoque recedet a vertice & ad horizontem accedet, cum illo faciens angulum obliquum; quare illa sphaeræ positio dicitur *obliqua*, polusque superior supra horizontem tantum attollitur, quanta est latitudo loci; alter autem polus tantumdem infra horizontem deprimitur. Hinc patet æquatoris parallelos non secari bisariam ab horizonte; sed paralleli qui sunt versus polum superiorem, majorem habent partem supra horizontem, minorem vero infra; & quo propior est polo circulus quilibet, eo major ejus pars supra horizontem eminebit: circuli autem qui minus a polo distant quam est latitudo loci, supra horizontem toti attolluntur. Contrarium accidit in circulis parallelis versus polum inferiorem positis, quorum portiones majores infra horizontem jacent, minores supra attolluntur; si autem circuli sint polo propiores quam sit latitudo loci, perpetuo una cum stellis quæ in iisdem circulis includuntur, sub horizonte latent & nunquam fiunt conspicui. Itaque cum sol parallelum aliquem quotidie percurrat, necesse est ut ab æquinoctio verno ad solstitium æstivum dies continuo incremento noctes excedant, post solstitium decrescant ad æquinoctium autumnale, deinde ad solstitium Hyemale dies noctibus continuo breviores fiant; denique a solstitio hyberno ad æquinoctium vernum, dies adhuc sunt noctibus breviores, sed rursus continuo augentur, donec in ipso æquinoctio fiant tandem noctibus æquales. Si æquator nullum angulum cum horizonte efficiat,

ciat, sed cum illo coincidat, in tali positione
 polus quoque cum *zenith* congruet, & æqua-
 toris paralleli omnes erunt horizonti paralleli,
 atque ideo talis sphaeræ positio *parallela* dici-
 tur, in qua nullæ fixæ oriuntur aut occidunt,
 sed in circulis horizonti parallelis perpetuos
 gyros ducunt. Sol etiam cum ad æquinoctia-
 lem pervenerit, horizontem lambit; exinde
 versus polum superiorem digrediens nusquam
 occidit, sed diem facit longissimum sex men-
 sium. At ubi ab æquatore recesserit sol versus
 oppositum polum, e contrario nunquam ori-
 tur, noxque illis fit per alteros sex menses.
 Talem sphaeræ positionem obtinent qui sub po-
 lis degunt, si qui forte sint qui has incolant re-
 giones. Sphaera recta fruuntur qui sunt sub
 æquatore; tandem qui terras inter polum &
 æquatorem incolunt, hi habent sphaeram obli-
 quam. Hæc omnia nihil continent difficulta-
 tis & ex elementis Astronomiæ antea explica-
 tis statim intelliguntur; attamen diversas sphae-
 ræ positiones in vulgari globo terrestri Tyronum
 oculis demonstrare debet Physices Magister.

His de triplici sphaeræ positione præmissis,
 jam climatam in æqualitatem licet intelligere,
 hæc scilicet inæqualitas pendet ex natura sphae-
 ræ. Concipiatur in sphaera recta dimidium
 tropicum cancri qui est supra horizontem, di-
 visum esse in 48 partes æquales, quæ singulæ æ-
 quales sunt $3^{\circ} 45'$; hæ autem æquivalent horæ
 unius quadrantis. Præterea consideremus duas ex
 illis partibus horizonti proximiores quarum una
 sit ad orientem posita, ad occidentem altera;
 duæ autem simul sumptæ intervallum semiho-
 ræ efficiunt & climatis unius intervallo re-
 spondent. His positis, evidens est climatam
 inæqualitatem pendere ex majori vel minori
 sectionis tropici & horizontis obliquitate, pro
 diver-

diversa scilicet poli altitudine, qua fit ut, horizonte minus oblique tropicum secante versus partes æquales $3^{\circ} 45'$ ad orientem & occidentem prope horizontem positas major inde oriatur altitudinum poli differentia, quam ubi horizon magis oblique tropicum secat in iisdem punctis, $3^{\circ} 45'$. Quare cum differentia illa altitudinis poli quæ dimidiæ horæ in primis climatibus respondet, major sit versus æquatorem quam versus circulos polares ubi posita sunt ultima climata, hinc oritur intervallo- rum inæqualitas quæ multo majora sunt versus æquatorem quam versus polos.

II. Quoniam climata ab æquatore initium sumunt, primum clima ubi incipit, longiorem habet diem horarum 12; ubi autem desinit longiorem habet diem hor. 12. cum dimidia; & ita deinceps per dimidias horas progrediuntur alia climata usque ad circulum polarem in quo desinunt *horarum climata*, incipiuntque *climata mensium*, ut vocant Geographi. Quemadmodum climata horarum sunt spatia, duobus circulis æquatori parallelis comprehensa, in quibus longiorum dierum differentia est dimidiæ horæ, ita etiam climata mensium dicuntur spatia duobus circulis polari circulo parallelis comprehensa, ultra hunc circulum posita, & in quibus longior dies versus initium integro mense superat diem longiorem versus finem. Quamvis autem diversa utcumque climata fingere liceat, universam tamen telluris superficiem in quinque zonas distribuunt Geographi; nempe quatuor circuli minores in superficie telluris qui cælestibus ejusdem nominis circulis respondent, duo scilicet tropici & totidem polares terram dividunt in quinque portiones seu zonas, quarum una utroque tropico comprehensa vocatur *Torrida*, inhabi-

habitabilis a veteribus credita ob nimium caloris æstus; regiones tamen quæ in hac zona continentur nunc longe feracissimas esse, vitæ commodis incolisque abundare comperitum est. Duæ sunt zonæ frigidæ sub utroque mundi polo arctico & antarctico circulis polaribus inclusæ, & ob gelu perpetuum vix habitabiles; totidem sunt zonæ temperatæ inter frigidas & Torridam comprehensæ. Zonarum illarum incolæ ratione meridianorum & parallelorum comparati dicuntur *Periæci* qui sub eodem parallelo, at oppositis ejusdem meridiani semicirculis degunt; hi quidem tempestates anni easdem experiuntur, accedente sole eodem tempore ad utriusque loci verticem & exinde recedente; at meridiei & mediæ noctis vices alternas subeunt. Alii incolæ dicuntur *Antæci* sub eodem meridiani semicirculo, at oppositis parallelis habitantes; his meridies & mediæ nox simul contingunt, sed tempestates anni permutantur. Alii denique dicuntur *Antipodes*, qui sub oppositis meridianis æque ac parallelis versantes, adversis e diametro pedibus incedunt, ideoque vicissitudines æstatis atque hyemis, nec non meridiei & mediæ noctis, ortus & occasus siderum omnino adversos sentiunt. Præter hæc nomina, qui in zona Torrida degunt, dicuntur *Amphiscii*, eo quod eorum umbra meridiana versus utrumque polum diversis anni temporibus projiciatur. At dum sol ipsorum verticibus incunabit, sunt *Ascii*, quia nullam projiciunt umbram meridianam. Qui zonas temperatas incolunt, dicuntur *Hetroscii*, quorum umbra meridiana versus alterutrum, duntaxat mundi polum projicitur: qui in zonis frigidis sunt incolæ *Periscii* vocantur, eo quod sole non occidente, umbra illis in orbem circumagatur.

III. In unaquaque harum zonarum calor & frigus certas & constantes habent vicissitudines quæ a motu solis in declinationem, aut, quod eodem redit, ex diversa solis altitudine supra horizontem trahunt originem; nam frigus tunc mitescit in zona aliqua, quando sol ad zonam illam accedit; contra calor paulatim minuitur, prout sol ab ea recedit versus plagam oppositam. Inde fit ut dum zona una calorem experitur, opposita frigus sentiat, & vicissim dum una frigore premittitur, opposita calorem experiatur. Ad has vicissitudines explicandas, tres potissimæ considerari debent causæ, nempe major vel minor radorum solarium obliquitas: major vel minor radorum quantitas ab atmosphæræ particulis intercepta: tandem major vel minor dierum longitudo.

IV. Ut a prima causa ordiamur, in memoriam revocandum est quod de fluidorum percussione jam antea demonstravimus; idem enim valere potest ad æstimandam radorum solarium actionem in superficiem telluris. Itaque cum fluidorum percussio crescat vel decrescat ut crescit vel decrescit quadratum sinus anguli incidentiæ, hinc colligitur virtutem radorum solarium cum quadam obliquitate in terram incidentium esse ad virtutem radorum incidentium cum alia obliquitate, ut quadratum sinus prioris inclinationis ad quadratum sinus inclinationis posterioris. Jam vero cum altitudines solis meridianæ in solstitiis æstivo & hyberno sint ut 3 ad 1 proxime, erit calor hac causa productus in utroque casu, cæteris paribus, ut 9 ad 1. Hinc etiam pro diversa solis altitudine supra horizontem, caloris gradum ex hac causa oriundum æstimare licet; at sole supra horizontem nascentem.

scente, calor vix sentitur ob sinum incidentiæ nullum. Inde tamen immerito totam caloris summam ad calculum revocare conati sunt aliqui; totum scilicet tempus quo sol radiis suis terram calefacit, adhibent tanquam basim ad quam perpendiculares fingunt ordinatas quæ sint ut quadrata sinuum inclinationis; per aream curvæ ordinatis illis comprehensæ caloris summam dato quolibet tempore exhiberi ajunt; at fictitia omnino est talis curva; etenim hujus calculi autores fingunt permanentes caloris gradus sibi perpetuo addi & eisdem conservari; ac proinde die desinente, vehementior ferretur calor, quod est contra experientiam. Et quidem notum est calorem corpori alicui impressum per aliquod tempus tantum servari; ita fervente etiam æstate, calor, labente sole, languescit & sub vesperam maxime debilitatur. At ignotum omnino est quibus legibus calor crescat atque decrescat, ac proinde talis curvæ natura nulla lege definiri potest. Alia est majoris vel minoris caloris causa, major nempe vel minor quantitas radiorum quos Atmosphæra intercipit. Ille autem radiorum interceptorum numerus pendet maxime ex ipsa radiorum obliquitate. Ita radii solis tempore hyberno atmosphæram nostram magis oblique trajiciunt quam tempore æstivo, ideoque in aere nostro crassiori majus occupant spatium. Hinc fit ut radiorum illorum pars major intercipiatur, in solidas atmosphære particulas majori numero incurrens; pars alia diversis refractionibus torqueatur ac debilitetur.

Tertia tandem superest causa quæ est major vel minor dierum noctiumque longitudo; quo longior enim est dies & brevior nox, caloris actio major sit oportet; vicissim quo brevior

vior est dies & nox longior, frigus erit majus, ut patet. Cum enim calor oriatur ex virtute radiorum solarium qui agunt indefinenter, atque singulis, ut ita dicam, temporis articulis aliquid caloris addunt, quo dies longior est & nox brevior, æstus eo major erit & contra. Et certe corpus durum atque compactum eo majorem concipit caloris gradum quo vehementiori atque diuturniori ignis actioni subicitur. Quare cum tellus nostra tempore æstivo per 16 horas circiter radiis solaribus incalescat, tempore autem hyberno per octo horas duntaxat sol luceat, hinc patet potentissimam esse tertiam hanc caloris causam. Huic eadem causæ tribuendum est quod elapso post solstitium æstivum mense uno circiter, major sentiatur caloris vis quam in ipso solstitio. Etenim quamvis in die solstitii æstivi, ubi longior est solis mora supra horizontem, caloris gradus æque intensi non maneant, terram tamen nostram, quasi perpetuo calefaciunt; quamvis ergo pars aliqua caloris evanescat, si tamen descrescat minus quam crescat calor per vices additus, id tandem fieri debet ut calor per gradus augeatur, satis diu post solstitium æstivum.

V. Præter adductas caloris causas, tot sunt aliæ variabiles causæ ut caloris & frigoris temperies ullis legibus vix subjici possint. Pender enim maxime caloris gradus ex ipsa locorum conditione, nempe ex montium proximitate, ex soli natura, ex ventorum qualitate. Montes suam concavitatem soli obvertentes, speculi caustici instar, radios solares excipiunt & vi maxima in planitiem reflectunt. Quod spectat soli naturam; si lapidibus, taxis, arena, creta abundaverit, radios magna copia in aerem reflectit. At si pingue fue-

PARS II. SECT. IV. 38;

fuerit solum & nigricans, magnam radiorum partem absorbet, paucioresque reflectit. Ea de causa fit ut per sola quædam ambulantes, calorem maximum, urentibus quasi pedibus, sentiamus, temperatum autem vultu calorem experiamur; contra autem in aliis arenosis solis, vix calent pedes, dum vultus reflexorum radiorum vi vehementius incalcescit. Tandem ad caloris frigorisque temperiem maxime confert ventorum natura. In montium verticibus perpetuo fere spirant venti, qui in planities deinde reflectuntur, ita ut ex longiori montium serie; in certis regionibus pendeat aliquando æstatis hyemisque ratio. Unum tandem superest observandum quod maxime mirari solet imperitum vulgus, minorem esse solis a terra distantiam tempore hyberno quam tempore æstivo, ut constat ex systemate planetario atque etiam compertum est ex diametro solis apparenti quæ major hyeme quam æstate observatur. Itaque patet majorem caloris gradum non ex majori terræ solisque proximitate repetendum esse, quod persuasum habent plerique rerum physicarum rudes. Attamen in caloris effectu æstimando, negligi omnino non debet solis a terra distantia; cum enim calor proficiscatur a radiis solaribus, iique ita divergant ut in duplicata ratione distantiarum a sole fiant rariores, (ex antea demonstratis) evidens est caloris gradum, cæteris paribus, esse in ratione reciproca duplicata distantiarum a sole. At caloris incrementum ex hac causa oriundum longe minus est quam quod ex minori radiorum obliquitate oritur; has generales caloris æstivi, hybernique frigoris causas attigisse factis sit.

VI. Dierum inæqualitas diversaque solis altitu-

titudo supra horizontem varias constituunt anni tempestates. Dum sol versatur in Tropico qui polo opponitur, parum attollitur supra horizontem & brevi tempore moratur. Quare solares radii sub majori obliquitate tellurem feriunt & brevi temporis spatio, ideoque minorem afferunt caloris gradum, atque hinc *Hyems*. Contra autem ubi sol versatur in Tropico qui ad poli partes positus est, sol maximam habet altitudinem, radios suos fere perpendiculariter emittit, & diutius supra horizontem moratus, potentior est, majoremque creat calorem, atque hinc *æstas*. Tandem in punctis æquinoctialibus, medium veluti statum sol obtinet, ideoque mediocres sunt actionis solaris effectus, atque hinc aliæ duæ tempestates, *Ver* & *Autumnus*. Hæc omnia & universa Geographia ex demonstratis in Astronomia facile patent; quare nihil aliud superest nisi ut de globo illiusque usu pauca addamus.

Locorum positionem in globo terrestri determinant Geographi hoc artificio. Æquatorem dividunt in 360° , atque per singula divisionum puncta & per utrumque polum ducunt meridianos; unam vero ex illis divisionibus præ cæteris adhibent, a qua divisiones alias omnes numerare placet; meridianum autem qui per hanc divisionem traducitur *primum meridianum* vocant; hujus autem meridiani honos ex Geographorum arbitrio pendet. Porro si meridianus aliquis versus orientem gradu uno distat a primo meridiano, loca in hoc meridiano posita dicuntur habere *gradum unum longitudinis* & ita deinceps de aliis meridianis. Jam diviso primo meridiano vel alio quolibet in 90° ab æquatore ad polos, per singula divisionum puncta

Geo-

PARS II. SECT. IV. 385

Geographi traducunt circulos æquatori parallelos; singula vero puncta in circulo qui æquatori proximior est, *gradum unum latitudinis* habere dicuntur, quæ latitudo *borealis* est, vel *australis*. Simili modo puncta in circulo proxime sequenti posita, duos habent gradus latitudinis & ita deinceps. Itaque *longitudo geographica* loci alicujus est arcus æquatoris ab occidente in orientem numeratus inter primum meridianum & meridianum loci dati; *latitudo autem geographica* ejusdem loci est arcus circuli maximi inter æquatorem & parallelum loci dati comprehensus. Data latitudine seu altitudine poli, ad datum locum ita accommodari potest globus cœlestis vel terrestris ut Astronomica & Geographica problemata, respectu hujus loci, facile demonstret. Ad datam poli altitudinem attollatur globus cœlestis, deinde lineæ meridianæ vel pixidis magneticæ ope ita disponatur ut ligneus vel metallicus circulus immobilis qui meridianum in globo exhibet, cum meridiano loci congruat. Dato loco solis in ecliptica, locus ille transferatur sub meridianum, globus in hoc situ statum cœli repræsentabit pro loco dato in ipso meridiei puncto; vertatur globus atque pro singulis quatuor gradibus æquatoris transeuntibus per meridianum, numerentur minuta quatuor, pro alia qualibet hora data repræsentabitur cœli status. Res commodius præstari solet ope circuli polo annexi & in horas 24 divisi, index horarius simul cum globo revolvens æquatoris gradus præterlapsos, ac proinde & horas indicabit. Simili ratione patet innotescere longitudinem diei ac noctis, si, loco solis constituto sub meridiano, observetur index horarius, habebitur tempus quo sol attingi nori-

Tom. V.

R

zon-

zontem, ac proinde & tempus a meridie ad ortum vel occasum solis cujus temporis duplum erit longitudo diei, qua subtracta ab horis 24, habebitur longitudo noctis. Hinc etiam habebitur *amplitudo ortiva* vel *occidua* solis, punctus scilicet horizontis in quo sol oritur vel occidit. Ex his patet facili manu solvi problemata omnia quæ pendent ex motu solis. Nec difficilius dignosci notarique poterunt stellarum & planetarum loca. Disponatur enim globus eo quem diximus modo, deinde observetur in cælo stella aliqua probe cognita, E. G. Stella in media *cauda ursæ majoris*; cum hac stella comparentur stellæ aliæ in globo depictæ. Simili modo cum stellis proximis comparari poterunt planetæ. Quod spectat problemata Geographica, datis longitudine & latitudine loci, facile in globo terrestri notatur idem locus. Inveniatur in æquatore gradus longitudinis datus qui transferatur ad meridianum; deinde in meridiano computentur gradus latitudinis vel borealis vel australis; ubi numerandi finem facies, hic erit locus quæsitus; qua ratione inveniatur longitudinum differentia ex dictis patet. Statim vero innotescit locorum distantia, si circino capiatur locorum intervallum & deinde in æquatorem transferatur, gradus æquatoris in milliaria & gradus reducti ipsam locorum distantiam exhibebunt. Verum accurata graduum mensura pendet ex iis quæ de figura telluris antea disputavimus, nunc satis sit juxta recentiores observationes graduum æquatoris constituere Hexapedarum 56751. atque hinc posita telluris figura quam proxime sphaerica, facile inveniatur telluris magnitudo.

A R.

ARTICULUS II.

*De præcipuis corporum speciebus in telluris
superficie considerandis.*

I. **T**ELLURIS superficiem admiranda varietate vestiunt atque exornant innumera plantarum genera. Varias plantarum classes recensere rectoque ordine distribuere ad plantarum scientiam *Botanicen* præclarissimam historię naturalis partem pertinet; pauca generatim exponere satis erit. Et primo quidem prætermisiss de *vegetativa* plantarum anima inanissimis quæstionibus, *vegetationis* nomine nihil aliud intelligimus nisi perpetuum succi nutritii circuitum quo fit ut plantę nascantur, adolescant, crescant, nutriantur, vivant, quo deficiente nutritionem nullam accipiunt & *mori* dicuntur. Ut autem hæc omnia plantarum vitę phænomena intelligantur, brevem plantarum structuram sive *anatomem* præmitti oportet.

Plantarum partes in *solidas* ac *fluidas* primum distinguuntur. Fluida plantarum pars est humor ille vel succus qui in plantis ipsis præsertim contusis vel resectis conspicitur. Sic E. G. ex incisis papaverum capitibus *opium* colligitur, ex resecta vite, lacrymarum instar, stillant *gemmæ*. Infinita propemodum est varietas quæ in hoc humore vel succo observatur, sive colorem, sive saporem, sive qualitates alias consideres, atque hinc oritur diversissima plantarum indoles. Solidę partes quæ plantarum substantiam componunt, plurimę numerantur, præsertim *radix*, *truncus*, *cortex*, *rami*, *folia*, *flares*, *fructus*; has partes singulas suo ordine persequemur. *Radix*

est illa pars infima plantæ quæ solo adhærens atque per terræ poros veluti serpens humorem nutritivumve succum depascitur. Hinc innumeris illa poris est pervia, per quos ingresses puriores subtilioresque succi particulæ sentim ascendunt, nutriendæque plantæ per ramos distribuuntur. Unde etiam ex varia figura qua in variis plantarum generibus radicum poros præditos esse concipimus, ex varia quoque particularum vi attractiva, varium succum variis plantis nutriendis ingredi oportet. Altera plantæ pars quæ radicem telluri infixam proxime sequitur, & supra tellurem assurgit, vulgo dicitur *truncus* in arboribus, *caudex* vel *stipes*, in herbis, & leguminibus, *caulis* vel *scapus*, *calamus* aut *culmus* in tritico vocatur. Porro truncus aut caudex veluti plantæ substantia censerî potest ex qua rami, frondesque erumpant, & a qua rami, fructus & folia sustineantur. Hinc in arboribus plerumque durior atque rigidior conspicitur, & in fruticibus qui vel altius assurgunt vel graviores fructus emittunt, iisdemque sustinendis impares forent, ut *hedera*, *vitis*, tennes radículas truncus propagat quibus alteri plantæ, muro, vel palo adhæreant arclissimeque devinciantur. Plantarum plurimæ in medio trunco veluti centro *medullam* habent, quæ sive fungosa est, ut in *sambuco*, sive carnosa ut in *vite*, sive durior ut in *pinu*, sive nullo fere discrimine a reliqua trunci substantia distincta, ut in *Ebeno*, *quercu*, aliisque pluribus. Reliqua demum plantæ substantia quæ corticem inter atque medullam reperitur, vulgo *lignum*, *corpus lignosum* vocatur, a Plinio dicitur *caro* quæ in arboribus quidem solida, in herbis vero ac fruticibus flexibilis, sed instar ligni in longum fissilis reperitur.

Hæc

Hæc plantæ caro plurimis subtilissimisque fibris componitur; ejusmodi vero fibrarum ordo vel series duplex a Malpighio describitur; plurimæ nimirum fibræ in varios fasciculos collectæ in longum extenduntur, unde ligni fissilitas oritur. Aliæ deinde fibræ horizontaliter, sive transversum ductæ priores intersecant, iisque inseruntur, unde *insertiones* a Grævio, *utriculi* vero vel *bulle* a Malpighio vocantur, quod tuborum instar inanes sint. Præter hæc duo fibrarum genera *tracheas* insuper, sive *spiralia vasa* describit Malpighius, quæ laminulis in spiram contortis facillimeque flexibilibus composita sunt, ac proinde & ipsa contrahi diducique possunt. Plantarum caro vel lignum *cortice* ambitur; est autem *cortex* veluti membrana quædam aut cutis quæ rotundæ ligni substantiæ convolvitur. Tribus partibus illa componitur, exteriori, nempe, quæ instar cuticulæ interiorem crassioremque circumdat; crassior deinde in qua fibræ, utriculi, nervique conspiciuntur, illis propemodum similes qui in ipsa trunci substantia reperiuntur; intima denique & subtilior quæ ligno proxime adhæret. Ex ipsa trunci substantia rami erumpunt qui plerumque ramos alios frondesque emittunt. Qui prope ramorum extremitatem, exsectis præsertim illorum verticibus enascuntur, *gemma* vel *oculi* plantæ vocantur. Ex ramis insuper surculisque *folia* oriuntur, quæ non modo plantis ornatum & pulchritudinem largiuntur, sed tegendis etiam conservandisque fructibus conferunt, præsertim vero succo nutritio purius adhuc percolando perficiendoque; unde detractis foliis sterilescere solent plantæ, vel saltem quidpiam patiuntur. Denique folia ramis e quibus erumpunt plerumque pediculo conjunguntur;

R. 3

ali-

aliquando ex uno pediculo folium unicum pendet, aliquando plura, unde *triphylla*, *pentaphylla*, *eptaphylla*, nempe *trisolia*, *quinquefolia*, *septisolia* nominantur. Cæteras plantarum partes admirabili varietate superant flores. Quatuor in ipsis partes distingui solent, *calix* exterius scilicet floris involucrum, *foliola*, seu *petali* ut a plantæ foliis distinguantur; *filamenta* quæ e medio flore ut plurimum surgunt; hæc autem *stamina* appellantur, si capsulam pulvisculo turgidam in vertice deferant. Hæ singulæ partes in rosa vel lilio nitidius distinguuntur. Si florum texturam consideres, ipsi quoque tenerioribus mollioribusque veluti fibris componuntur in quibus aliæ duriusculæ nervorum instar reperiuntur. Alii similiter pediculum habent, alii ipso carent, alii expansa folia, alii recurva sive contorta gerunt. Postremo denique loco superest fructus, cui producendo ab optimo sapientissimoque rerum opifice destinata est admirabilis illa partium varietas fibrarumque textura quam plantis inesse diximus.

II. Plantarum semen, quantum patuit plurimum Anatome, earundem plantarum rudimenta complectitur veluti conglomerata, quæ deinde succo nutritio inflata paulatim explicantur & in plantæ speciem assurgunt. Ubi semen in terram injectum est, succus terrestris calore solis agitatus sensim subit poros, quibus seminis involucri sunt pertusa, ibique cum seminali succo qui in ipso semine est, fermentescit; quod dum fit, primum radices erumpunt, tum duo foliola aperta cum annexo corpusculo in acumen desinente, in quo exiguam esse plantam trunco, radice & foliis duobus constantem credibile est. Hujus autem seminalis plantæ procreatio adhuc latet.

set inrer arcana naturæ quæ nulla arte cognosci possunt; sed probabilissimum est in semine plantulam cum aliis seminibus contineri quæ alias seminales plantulas cum omnibus suis partibus aliaque semina complectuntur, atque sic deinceps in infinitum, ita ut in primis seminibus a Deo procreatis omnia plantarum seminumque rudimenta delituerint. Systema illud quod *involutionis* appellant, suis quidem non caret difficultatibus; illud tamen confirmare videntur observationes microscopicae, atque ejusdem plantæ multiplicatio & fere in infinitum continuata propagatio.

Neque ad superiores solum plantæ partes succus nutritius ascendit singulosque per ramos diffunditur, sed a supremis etiam extremisque partibus iterum ad radices descendit, perennemque circuitu per plantæ *utriculos* veluti venas excurrit. Et certe nisi attractus humor ad inferiores partes deinde reflueret, inferioribus ipsis plantarum partibus nutriendis impar foret. Succus enim qui proxime a terra ascendens per plantæ radices truncumque excurrit, crassior minusque tenuis atque digestus conspicitur, ideoque vel ipsi trunco vel tenerioribus certe ramusculis qui ex trunco erumpunt, nutriendis aptus esse non posset: at si humor ille assidue ascendens atque descendens, iterum percoletur, purior longeque subtilior ad inferiores plantæ partes perveniet. Et quidem perennis ille humoris circuitus in plantis quibusdam manifeste conspicitur. Si enim arctiori vinculo, ut ferreo circulo, transverse costringantur, illorum truncus supra vinculum turgere observatur, quod certe fieri non potest nisi collecto humore qui a superioribus ad inferiores partes descen-

dit. Neque humor ille solum refluere, sed inferiores etiam plantæ partes alere atque augereprehenditur. Si enim plantæ cortex duobus circulis transverse vel horizontaliter ductis secetur, corticisque pars circulis intercepta avellatur ut superior ab inferiore cortice disjungatur, inferior quidem cortex minime augetur aut versus superiorem assurgit, superior vero sensim nutritur ac versus inferiorem extenditur; succo nimirum per corticem refluente, novas partes acquirit, ut accuratissime observavit Malpighius.

Itaque cum hoc assiduo circuitu succus nutritius rarior semper atque subtilior evadat, atque juxta varium fibrarum quas penetrat ordinem atque figuram, varia ratione percoletur, digeratur ac veluti concoquatur, tennes partes illas quæ subinde a planta avolverint, reficere ac restaurare poterit, ut planta pristinam molem vel etiam novam acquirat. Ejusmodi vero circuitus nutritii succi, ideoque plantarum nutritio eo facilius peragitur quo plures fuerint *insertiones* quibus plantarum fibræ inter se communicant. Ita nimirum succus ex una fibra in vicinas propagatur, & singulis plantarum fibris aliæ fibræ adjunguntur. Hinc si quædam corticis pars avulsa fuerit, laterales quæ supersunt corticis partes ac veluti vulneris margines sensim dilatantur, sibi que mutuo proximiores fiunt, donec integrum vulnus obducant. Denique hoc perenni humoris circuitu, ex fibris in utriculos, ex utriculis in fibras alias propagatione fieri conspicitur, ut interior corticis pars ligno adhærens in lignum convertatur, ita ut truncus ipse ex variis veluti corticibus in lignum consertis sibi que concentricis aliquando componatur; quod in quercu præsertim ob-

ser.

servatur. Hinc intelligitur generatim tota nutritionis ratio; qua vero serie, vel ductu perennis ille succi circuitus peragatur, definiri vix potest. Probabilissimum tamen est maximam succi nutritii copiam ascendere per ligneam arboris partem, non vero per corticem, aut partem illam quæ corticem inter & lignum sita est. Etenim ut succi nutritii motus subtilius deprehendi posset, expertissimi quidam Physici mensibus Martio & Aprili secuerunt corticem arborum in trunco & ramis, ita ut cortex in orbem esset detractus; semperque observatum est corticem superiorem una cum ligno quod tegebat, aliquandiu crescere, dum interim inferiores partes nullum prorsus caperent incrementum. Porro si per ligneam arboris partem non ascenderet succus nutritius, sed per corticem aut partem illam corticem inter & lignum positam, pars arboris quæ infra sectionem est, maxime cresceret, superior autem pars in eodem statu maneret, aut prorsus interiret. Præter hæc quæ enumeravimus vegetationis instrumenta, adjungi etiam maxime debet *tuborum capillarium* vis attractiva qua fit ut capillares plantarum tubuli non solum attrahant succum nutritium, sed etiam eum qui sibi magis convenit usurpent, alium vero nutritioni minus idoneum respuant. Hæc autem conferantur cum explicata tuborum capillarium doctrina.

III. Quamvis inter ignota plurima & fere omnia naturæ arcana, numerari debeat admirandum vegetationis opus, ex dictis tamen patet nullum plantæ genus sine semine produci; quod autem plantæ plurimæ in iis locis oriri credantur ubi nulla sunt semina, ut in tectis, saxis, dirutisque ædificiorum parietibus, vulgi error est. Licet enim in iis locis nulla

deprehendantur semina, inesse tamen certissima ratione ostendi potest. Et certe plantas illas quæ sine semine oriri putantur, ex semine per aerem plerumque translato nasci probat Malpighius hoc experimento. Si terra e profundiori telluris parte eruta in vase collocetur, idemque vas tenui velo obtegatur, atque supra velum ipsum deponantur subtilissima herbarum semina, nunquam terra virefcere vel germinare videbitur; contra vero si aeri libero excipiendisque seminibus idoneo terra exponatur, statim virefcere deprehendetur. Et requidem ipsa in plantis plurimis quæ semine carere credebantur & vi, ut dicebant, terræ *plastica* produci semen deinde observarunt diligentiores Physici. Quare ex toto vegetationis progressu atque ex analogia naturæ concludendum est, in iis etiam plantis quæ nulla demonstrant seminis indicia, semen latere subtilioribus observationibus fortasse aliquando detegendum.

In plantarum seminibus ope microscopii hæ observantur partes præcipuæ, seu involucra quatuor, quorum primum dicitur *capsula* cujus diversa omnino est in diversis seminibus figura; alia duo proximiora involucra vocantur seminis *cuticulæ*. Ultimum tandem involucrum dicitur *placentula*, atque in plantis idem fere est illius usus ad quem destinatæ sunt in animalibus membranæ, quæ *fœtum* involvunt. Has autem partes singulas aliasque plurimas observare potissimum licet in faba recens exclusa. Admiranda omnino est seminum varietas; Si plantæ certum quoddam propriumque solum postulent, illarum semina tali donantur pondere & subtilitate ut recte terram petant & sine alio auxilio sese solo inferant. Si autem plantarum semina tantam

ha-

habeant levitatem, ut aeris flatu avehi facile possint, unico vel etiam pluribus quasi uncinulis muniti solent quibus retineantur. Contra autem alia semina plumulis & veluti alis sustinentur quibus ad magnam distantiam levi vento dispergi & a se invicem removeri possint. Tandem semina alia longius projiciuntur vi cuticulæ tendinosæ & elasticæ; hæc nempe cuticula exsiccata disrumpitur, semenque, ut ita dicam, explodit. Ecquis autem non mirabitur omnipotentissimam creatoris manum quæ semina quædam in capsulis elasticis inclusit, quarum elasticitate ad convenientem distantiam seminis particulæ projiciuntur? Aliis autem seminibus alas veluti indidit quibus sublevantur & a vento dissipantur. Tandem semina alia leviora hamulis, ut ita dicam, armavit quibus ventorum vi resistent.

Ex plantarum nutritione intelligitur quoque mortis ratio. Vivit planta, quandiu nutritur; nempe *vita* plantæ ille est status in quo succus nutritius concoquitur & ad singulas partes libere deferitur; Si ergo cessat nutritio, plantæ substantia arefcit & *mortua* dicitur. Quæ igitur motum succi nutritii destruant, plantam enecant; quare moriuntur plantæ, structura organica casu quodam vitiata, vel succi nutritii penuria. Itaque ad perficiendam nutritionis rationem, soli natura variis experimentis tentari debet, neque enim *omnis fert omnia tellus*. Præterea cum talis sit plantarum structura ut convenientem sibi succum nutritium admittant, inutilem vero rejiciant; agris ubertas conciliabitur, si eidem solo nova per vices committantur plantarum semina; etiamsi enim per longum tempus absumpta fuerit succi nutritii copia, idem tamen solum altero abundare poterit succo al-

teri plantarum speciei idoneo. Tandem felici successu promovetur aliquando *vegetatio*, adhibita vulgatissima operatione quam *infusionem* appellant. Et quidem *infusionis* ope fit ut succus nutritius per diversos & multiplices tubulorum anfractus percoletur magis atque perficiatur; hinc aliquando non solum perficitur planta, sed novam persæpe speciem mentitur. Verum ut feliciter succedat operatio, necessum est inter utramque plantam intercedere analogiam quandam, ita ut succus ex plantæ unius tubulis in plantam aliam transire libere possit atque pluribus viarum ambagibus feliciter percolari; alioqui non solum nihil emolumenti inde posset obtineri, sed plantæ ipsi crearetur mors.

IV. Quamvis jucundum æque ac utile Physicis spectaculum præbeat stupenda plantarum varietas, sua tamen utilitate principem locum sibi facile vindicat illa Physicæ pars quæ incredibilem fere animalium varietatem contemplantur. Animalium in varias species divisionem atque specierum illarum descriptionem persequi ad eos pertinet qui historiam naturalem data opera tractandam aggrediuntur, corporis nostri *æconomiam* considerare satis erit. Et primum quidem, ne breviores quam par est hic videamur, monendum est nos non Medicos sed Physicos agere, atque etiam de generali corporis anatome, de sensibus aliisque plurimis ad *æconomiam animale*m pertinentibus nos jam dixisse in Metaphysica & Physica generali; quare pauca adjungemus. Quo admirabili arcano nasci atque vivere incipiamus variis hypothesebus explicare frustra laborant Physici, conjecturas illas exponere religiose abstinemus; auditoribus enim nostris nobisque ipsis *maxima* hac in re *debetur reveren-*

PARS II. SECT. IV. 397

verentia; vitæ nostræ progressum atque interitum breviter duntaxat, quantum ad rem nostram attinet, prosequemur. Cibus *incisoriiis* dentibus dissecatur, *molaribus* atteritur & *saliva* affluente permixtus comminuitur atque prima *digestionis* operatio *masticatio* scilicet absolvitur. Cibus *masticatus* ope linguæ ad *æsophagi* fauces musculorum actione dilatatas devolvitur, *æsophago* ingestus descendit in ventriculum, agentibus fibris spiralibus per musculosam *æsophagi* tunicam dispersis, & adjuvante tunica glandulosa interiori superficiem irrigante. Cibus in ventriculum delatus commiscetur cum liquore *gastrico* quem per *crustam villosam* fundunt glandulæ, calore digestus cibus motibusque ventriculi conquassatus solvitur; fibris autem *tunica musculosæ* constrictis per *pylorum* ejicitur in *intestinum duodenum*, ubi *succus pancreaticus* cum *felle* effunditur ulterioris digestionis gratia; digestus autem cibus promovetur actione continua fibrarum quæ musculosam intestinorum tunicam vestiunt, pars crassior in *feces* abit, subtilior autem exprimitur in venas lacteas quæ radices suas per *ductum intestinalem* infinito propemodum numero spargunt. *Chylus* itidem *lymphæ* quam glandulæ copiose effundunt, dilutus in *cisternam* deducitur, commune *Chyli* atque *lymphæ* receptaculum, ibique magis attenuatus per *ductum thoracicum* in venam *subclaviam* deferitur. Sanguini permixtus mox per *venam cavam dextro cordis* *ventriculo* illabatur, unde in *arteriam pulmonalem* exprimitur. Redit sanguis ex *pulmone* ad cor per *venam pulmonalem*, & *sinistro cordis* *ventriculo* infusus motu cordis in *arteriam magnam* pellitur, per cujus ramos ad omnes corporis partes deferitur, unde per

ramos

ramos venarum redit in venam cavam dextræ cordis ventriculo iterum affundendus. Perpetuus iste motus *circulatio sanguinis* appellatur; admirandum circulationis artificium ex venarum arteriarumque structura atque systemate & ex illarum cum corde connexionè intelligitur. In dextrum cordis ventriculum hiant vena cava & arteria pulmonalis, in sinistrum vero vena pulmonalis & arteria magna. Venæ cavæ & arteriæ magnæ rami distribuuntur per totum corpus, rami autem venæ pulmonalis & arteriæ ejusdem nominis per pulmonum lobos disperguntur. Venæ & arteriæ per totum corpus invicem communicant per tubos capillares inflexos quorum pars una arteriæ, altera pars venæ vices subit. Movetur autem sanguis in arteriis a corde versus extremas corporis partes, in venis contra cor versus. Ne autem in actione cordis sanguis ex ventriculo redeat in venam unde venerat, valvulis impeditur quibus etiam regressus in cor coercetur. Sanguinis quantitatem illiusque velocitatem calculo æstimare conati sunt multi & quidem doctrinæ fama percelebres viri, sed irritò prorsus labore, ut jam antea observavimus.

V. Ut intelligatur nutritionis ratio, totum *Chylificationis* opus breviter resumamus. Chylus in ore præparatur, atteritur, in œsophago & ventriculo attenuatur, in intestinis elaboratur, in venis lacteis secernitur, in mesenterii glandulis diluitur, magis ac magis in ductu thoracico diluendus, sanguini in venis miscetur, ibi autem rursus solvitur, attenuatur, intimius miscetur, in arterialia pulmonum vasa pellitur, fluidarum particularum formam induit, suam fluiditatem ob perpetuum sanguinis circuitum conservat. Continua

nua pulmonis, viscerum aliorumque vasorum actione sanguis *Chylosus* varias mutationes subit, atque ex eo glandularum ope secernitur ac veluti exsugitur liquor, *serum sanguinis* quod in massam *gelatinosam* abit & singulis corporum partibus nutriendis destinatur; quia vero subtilior feri pars iterato circuitu perpetuo consumitur, hinc Chyli detrimentum moderato alimentorum usu reparandum. Quibus autem incrementis augeatur corpus jam in Phisica generali explicavimus, ubi sermo fuit de transpiratione, nunc cordis actionem quæ vitæ fons est atque principium, ipsamque respirationem breviter contemplabimur. Cor illiusque auriculæ sunt veri muscoli; spirales scilicet fibræ quæ, ex descripta cordis anatomie, a basi versus mucronem ascendentes, iterum versus basim reflectuntur, musculorum vi agunt; dum fibræ omnes simul breviores factæ, longitudinem cordis minuunt, latitudinem augent, ventriculorum cavitatem coarctant, tendinosa arteriarum orificia dilatant, venarum ostia restringunt; hinc sanguis magna vi in arterias exprimitur, atque hæc est *Systole*. Sanguine per systolem toto fere expulso ex cavis cordis, fibræ flaccescunt, arteriis jam dilatatis cordisque nervos comprimantibus; hinc distantia inter basim & apicem augetur, sanguis expulsus in venas transit, atque hæc est *Diastrale*. Præter muscularium fibrarum actionem, alias quoque vires plurimas ad motum cordis conferre certum omnino est, quamvis singulas vires illas nec calculo æstimare, neque etiam recensere noverint diligentiores Anatomici. Sed, quidquid sit, indubitatum est ad cordis contractionem sive Systolem non parum conducere musculos intercostales & diaphragma, quorum ope fit

ur

400 INSTITUTIONES PHYSICÆ

ut sanguini in pulmones pateat ingressus, quo negato actioni cordis insuperabile daretur obstaculum.

Itaque hæc omnia cum pulmonum actione & respiratione conjuncta sunt. Duplici motu absolvitur respiratio, *dilatatione* nempe & *constrictione* pectoris quarum una alteram sequitur. Dum pectus dilatatur aerem in pulmones haurimus, eo constricto pulmones evacuantur. Ut intelligatur quomodo hoc fiat, ex brevi anatome jam in metaphysicis institutionibus explicata repetendum est, pectoris cavitatem duodecim costis, arcuum instar, hinc & inde positis constare. Inter eas mediant muscoli *intercostales* qui superiores costas cum inferioribus connectunt. Inferioribus costis valide adhæret diaphragma quod transversim expansum inter pectus & abdomen modo complanatur & viscera abdominis comprimit, modo versus pectus attollitur & fornicis instar asurgit. His animadversis, dum intercostales muscoli contrahuntur, costæ elewantur, diaphragma complanatur, abdominis viscera extrorsum protruduntur, pectoris cavitas dilatatur, aer ambiens per os & nares atque hinc per tracheam ad pulmones ruit; aer autem *annulos cartilagineos* impellit, *tracheæ bronchia* dirimit atque separat, varios arteriæ pulmonalis & venæ ejusdem nominis ramos auget, & earumdem capacitatem amplificat. Hinc illarum continua & alterna actio ad cor transfertur a quo originem habuit. Paulo post costæ, musculorum pectoris viribus, pondere suo adjuvante, concidunt, diaphragma a resiliens visceribus sursum adigitur, bronchiorum annuli cartilaginei breviores fiunt, illorumque dimensio contrahitur, atque pari modo contrahuntur tunicarum muscularium vi & arteria

ria pulmonalis & vena, unde pectoris cavitas contracta susceptum aerem ejicit ex pulmonibus. Utrum vero aliquid aeris, facto per pulmones aditu, cum sanguine misceatur, quæstio est apud *Physicomedicos* agitata quam breviter attigimus, ubi aeris proprietates explicavimus.

Explicata circulationis & respirationis actio mechanica, fœtui in utero materno convenire non potest. *Septum* utramque cordis auriculam dirimens *foramine ovali* pertusum est; arteriæ pulmonalis truncus vix e corde egressus canalem quemdam communicantem in *aortam descendentem* demittit, nato & excluso fœtu foramen ovale sensim clauditur & canalis communicans arefcit. At fœtu incluso in utero materno, pulmones intumescere atque detumescere non possunt, pro ut faciunt ingresso aere; quare flaccidi fere manent & sine ullo motu, ac proinde sanguini per eos circulationem copiosam & facilem non permittunt. Hinc admirabili structura factum fuit foramen ovale ut sanguis e vena cava in dextram auriculam admissus, in auriculam sinistram influeret, atque in fœtu cordis vitam & actionem foveret non secus ac si per pulmones transiret.

VI. De musculorum actione sæpe mentionem injecimus; motus instrumentum sunt musculi quibus dissectis, membrum cui movendo destinantur, moveri amplius non potest. Venter musculi constat ex fibris carneis secundum longitudinem excurrentibus qui breviores sunt, ut pars corporis cui cauda affixa versus caput adducatur. Nervis ligatis vel resectis, quod in *phrenico* præsertim ad diaphragma tendente experiri licet, nulla in fibris *motricibus* fieri potest contractio; hinc colligitur per nervos ali-

aliquid ad musculos deferri quo illorum actio determinatur. Quare non sine ratione admittitur fluidum aliquod subtile quod in substantia *corticali* cerebri, utpote glandulosa, secretum, influit in nervos qui ex substantia medullari ortum ducunt.

Motus quo carneæ musculorum fibræ contrahuntur, nondum satis patet. Mittimus igitur conjecturas, etsi utiles; viam enim ad ultiores disquisitiones parant, dummodo tamen fiant a viris rerum anatomicarum expertissimis. Hoc unum certo nobis statuendum videtur ad musculorum actionem concurrere & fluidum subtilissimum per nervos decurrens, quæcumque sit hujus fluidi natura, simulque sanguinem ex arteriis affluentem; quemadmodum enim ligato nervo motus omnis in musculo impeditur, ita quoque si muscoli arteria constringatur, novique sanguinis in musculum influxus impediatur, nullus in musculo motus haberi potest. Sed de his jam sermonem habuimus in *Metaphysica*; hic autem duntaxat subjungemus musculos fere omnes suos habere *antagonistas* qui nempe contraria habeant officia. Tales sunt muscoli *extensores* & *flexores* quorum primi extendunt, postremi autem inflectunt. Hinc patet contractionem esse naturalem musculis omnibus statum; nisi enim musculus a suo Antagonista superetur, statim contrahitur neque ullo voluntatis imperio potest dilatari. Ita si partis alicujus flexor musculus refecetur, jam extensores contraria musculorum antagonistarum actione haud amplius superantur, hinc partem illam statim extendi necessum est; & contra eandem partem flecti oportet, refectis musculis extensoribus. Aliqui tamen muscoli inter quos *cor* suis carent antagonistis. Ex his omnibus intelligitur vitæ
fon-

fontem & veluti fundamentum esse cordis motum quo sanguis per universum corpus impellitur. Mors autem est æconomix animalis dissolutio per quam cessant & motus cordis & respiratio. Plurima alia ad hanc ipsam rem spectantia repeti debent ex Metaphysica atque ex Physica generali; id enim cavemus diligenter ne in aliquo loco iterum dicamus quod jam dictum prius. Nonnullas alias corporum species in sequenti capite considerabimus.

A P P E N D I X

De quibusdam capituli præcedentis utilitatibus.

Varia telluris climata in hoc capite enumeravimus; ex diversa autem cæli temperie ac proinde & ex ipsa climatum varietate suboriri in æconomia animali variationes plurimas negari non potest, atque experientia comprobatum est. Climatum varietas plurimum confert ad generalem corporis constitutionem, staturam, robur, colorem, morborum naturam, senectutem. At fatendum est generalem climatum rationem cum aliis particularibus causis, quales sunt aeris, aquæ, soli, alimentorum conditiones, tam confuse complicatam esse ut difficile omnino sit eas secernere varietates quæ climati propriæ sunt. Quia vero inter corpus & animam arctissimum est commercium, certum quoque est idque observatione constat, incolarum indolem, nisi voluntatis imperio regatur, ex ipsa climatis natura aliquo modo pendere. Ita climata quædam robur & fortitudinem excitant, alia vim imaginandi aciemque ingenii acunt, alia autem quasi hebetare videntur. Tandem suum.

suum cuique nationi fere proprium est ingenium; sed rem invidiæ plenam fusius persequi nostrum non est. Id tantum caute monendum est virtutum vitiorumque rationem non ex climatum conditione & natura, sed ex divina atque immutabili lege pendere; leges ergo in variis regionibus non mutabili climatum varietati, sed perpetuæ & invariabili iustitiæ attemperari debent. Tandem licet climatum temperies ad excitandam affectuum varietatem conferre aliquid possit, gubernari tamen possunt & debent voluntatis arbitrio, & ad divinæ legis normam moderari, atque, si pravi sint, extirpari omnino. Sed hæc ad Ethicam proprio jure pertinent.

Itaque his prætermiſſis fuseque tractandis in Ethica ubi sancta morum dogmata vindicabimus, jam ad Geographiam redeamus & de illius studio pauca adjungamus. Triplex, ut ita dicam, Geographiæ ætas considerari debet: Geographia *antiqua*. Geographiæ ætas *media* & Geographia *recentior*. Primus Geographiæ status, ea est terræ descriptio quam veteres Scriptores usque ad Imperii Romani occasum reliquere. Geographia mediæ ætatis ille est geographiæ status qui ab Imperii Romani occasu usque ad litterarum restaurationem obtinuit. Geographia recens est terræ descriptio a restauratis litteris ad præsens usque tempus. Quod spectat Geographiam antiquam, ea quidem magnam postulat veterum Scriptorum suppellectilem, sed recentioris etiam Geographiæ auxilio indiget. Veteres scilicet Scriptores cum recentioribus & cum accuratissimis mensuris comparandi atque etiam emendandi. Si hac comparatione destituamur, ignotæ omnino erunt *itineraria* veterum mensuræ ac proinde & ignotus erit veteris Geographiæ status.

Hæc

PARS II. SECTIO IV. 405

Hæc prima Geographiæ species ad Sacræ Scripturæ intelligentiam plurimum prodest. Quod attinet mediæ Geographiæ statum, iis densioribus involvitur tenebris, multaque ad hanc cognitionem necessaria nobis eripuit temporum barbaries. Attamen ex veteribus *Chronicis*, *cartulis* quibus *archivæ* abundant, aliquid lucis tantæ rerum Geographicarum obscuritati affulgere potest. Tandem quod spectat recentiorum Geographiam, Astronomorum laboribus ad summum perfectionis gradum ita perducta est, ut ignotus esse non possit in globo terrestri locus in quo Astronomus pedem figere possit. Itaque viro Geographiæ studioso probe cogniti esse debent globi cælestis atque terrestris circuli; hæcque est Geographia *Astronomica*. Præterea dividitur Geographia in *naturalem* in qua scilicet considerantur illæ quas natura constituit globi nostri divisiones, ope marium, montium, fluminum &c. dividitur etiam in *historicam* vel *politicam*, eaque considerat varias regionum vicissitudines, tum in ipsa principum mutatione variisque regionum in bello & pace fortunis, tum in ipso regimine *civili* aut *politico*. Tandem Geographia alia est *sacra* & *ecclesiastica* quæ nempe eas percurrit regiones de quibus mentio fit in Sacra Scriptura & in historia Ecclesiastica. Hæc autem Geographiæ pars varias, pro commoditate, divisiones admittit. Ita Geographia Ecclesiastica ratione jurisdictionis dividi potest in *patriarchatus*, *primatus*, *diæceses* &c. Ex his manifestum est cultiori cuilibet hominum conditioni utilissimam esse Geographiam, imo Geographiam *nescire turpe magis est quam scire gloriosum*.

CAPUT II.

De corporibus aliis in terræ gremio potissimum considerandis.

Corpora in terræ gremio conclusa generaliter *fossilium* nomine appellantur. Alia fossilia in terræ visceribus generantur atque formantur, hæc *nativa* dicuntur; ad hanc classem pertinent *terræ, lapides, metalla &c.* alia autem fossilia terræ propria non sunt & *extranea* vocantur, qualia sunt *piscium, quadrupedum ossa, ligna, plantarum corpora* terræ visceribus ignoto casu sepulta. In terræ gremio recluduntur innumerabiles succorum species, aliaque plurima infinito pene numero corpora. Ex corporum illorum concursu oriuntur aliquando intestini vehementissimique motus, atque hinc nascuntur persæpe subterranea atque etiam meteoraphænomena. In tanta rerum copia quæ universam fere historiam naturalem continet, pauca duntaxat corpora considerabimus quæ Physicorum contemplationi proprie subjacent. Quare hoc ultimum Physices caput in duos dividemus articulos. 1^{us} Erit de ferro & magnete illorumque mutua attractione, ubi etiam de vi electrica. In 2^o articulo alia contemplantur corpora quæ ad subterranea meteoraque phænomena videntur pertinere.

ARTICULUS I.

*De ferro & magnete illorumque vi attractiva,
ubi etiam de electricitate.*

I. **F**Erri & magnetis quædam sunt proprietates, admirandæ potius quam hæcenus explicandæ. Primo autem annotandum est magnetem haberi posse velut lapidis speciem, quæ ex ferro, oleo & sale coalescit; in hoc lapide quatuor effectus præcipuos considerabimus: scilicet, *vim attrahentem* aut *repellentem*, *vim communicatricem*, *vim directivam*, ac tandem *vim inclinatricem*, de quibus ordine dicendum est. Atque ut a vi attrahente initium ducamus, sciendum est magnetem trahere ad se multa corpora, sed potissimum magnetem alium, ferrum, & arenam illam lucidam qua ad exsicandos recens scriptos characteres uti solemus. Si magnes ad corpora ista admoveatur, statim videbuntur ea sponte moveri versus magnetem, & quidem majori vel minori cum velocitate pro majori vel minori eorum pondere; velocius enim ruunt corpora ista versus magnetem si minorem habeant molem; imo si magnitudinem paulo maiorem habeant, manebunt etiam immota, neque magnes tantam habebit vim qua ea ad se rapiat. Attractio autem ista mutua est; non minus enim magnes trahit ad se magnetem alium vel ferrum, quam trahitur ab illis, quod demonstravimus in Physica generali ubi de actione & reactione. Cæterum magnes nec trahit omni ex parte nec æqualem in omnibus suis partibus virtutem habere deprehenditur; donatus est enim magnes plerumque polo duplici, quorum alter trahit ad se, alter vicissim re-

repellit, si scilicet magnes magneti opponatur, non vero si ferrum magneti; ferrum enim semper & omni ex parte trahitur, quanquam non æque vehementer omni ex parte. Id vero intelligendum est de ferro quod magneticam vim non adhuc sibi comparavit; nam ferrum postquam magneticam vim adeptum est, a magnete repellitur non minus ac magnes alius. Quoniam vero in polis virtus trahendi maxima est, ii deteguntur ope scobis ferreæ vel etiam arenæ, quæ ita circa magnetem sese componit ut semitas quasdam veluti sulcos efficiat; ubi autem sulci isti convergunt, ibi reperiuntur poli. Linea utrumque polum coniungens dicitur *axis magnetis*, *æquator* autem dicitur planum ad axem perpendiculare ipsumque axem bifariam & æqualiter dividens. Magneticis polis idem impositum fuit nomen quod globi nostri polis, unus nempe *septentrionalis* sive *borealis*, alter *meridionalis* sive *australis* dicitur. Etenim si magnetem ex filo libere suspendas, sponte sua in hunc se disponit situm ut polus septentrionalis septentrionem, australis austrum respiciat, etsi non accurate nec æqualiter ubivis locorum. *Meridianus magneticus* appellatur planum ad magnetem perpendiculare, secundum longitudinem axis ac proinde transit per polos. Sunt autem poli magnetis puncta mutabilia; Si magnes per medium axem leni manu secetur, quælibet pars duos acquirit polos; partes quæ erant sub æquatore contiguæ ante sectionem, & quæ poli non erant, polorum vim habent; imo pars quælibet polus borealis vel australis fieri posset, sectione facta majoris magnetis polo australi vel boreali propius. Idem contingeret parti cuilibet dimidiæ, si eodem modo mediæ secarentur. At si magnes non secetur per
me-

medium axem, sed secundum longitudinem, habebuntur quoque poli quatuor, quorum duo *eiusdem nominis*, in ea manebunt parte in qua positi erant ante sectionem, & in qualibet parte formabitur novus axis priori parallelus. Phænomenum autem plane singulare præbent magnetis poli, nempe duorum magnetum poli, si fuerint diversi nominis, sese mutuo attrahunt; secus autem si eiusdem nominis fuerint; nimirum polus septentrionalis trahit australem, sed non vicissim duo septentrionales vel australes sese mutuo attrahunt, imo sese fugiunt, sive repellunt. Quare poli diversi nominis dicuntur *amici*; poli autem eiusdem nominis *inimici* appellantur.

II. Magnes donatur virtute alia quæ *communicatrix* dicitur, eo quod magnes vim suam attrahentem ferro aut calybi facile impertiatur. Si super polo cuiusvis magnetis vel prope eum lenta manu ducatur ferrum secundum sui ipsius longitudinem & eadem servata directione, magnes huic ferro virtutem suam ita communicabit ut ferrum ipsum, ad vim attrahentem quod attinet, nihil prorsus a magnete differat. Nec tamen magnes de viribus suis deperdit quidquam; etsi centena ferramenta vi sua impregnaverit; non desunt tamen qui affirmant magnetes imbecilliores evadere. At illud certum est ferrum ductum circa magnetem, binos polos sibi comparare qui iisdem donati sunt proprietatibus quibus pollent ipsius magnetis poli. Neque magnes tantum vim suam ferro communicat, sed etiam ferrum acceptam virtutem magneticam ferro tribuit, atque etiam alteri magneti; diversis artificiis comparantur magnetes *artefacti*, illud vero præcipuum est atque optimum.

Tom. V.

S

Ad-

Adhibeantur lamellæ calybeæ eximie lævigatæ summaque industria temperatæ, quæ singulæ eandem habeant longitudinem, latitudinem & crassitiem, sintque circiter sex pollices longæ, quinque lineas latæ, unam vero lineam crassæ. Si autem illarum longitudo augeatur, in eadem ratione augeri debent dimensiones singulæ. Rebus ita comparatis, cuilibet lamellæ seorsim vis magnetica communicetur, potenti magnete adhibito, deinde lamellæ illæ inter duas laminas ferreas vel calybeas ita constituentur ut suis polis oppositis eas contingant, quæ quidem præparatio *armatura* vocatur, atque ita habebitur *magnes artefactus*. Non solum magnetis ope, sed etiam sine magnete ullo parari potest vis magnetica. Laminulæ calybeæ probe lævigatæ incudi etiam eximiæ perpolitæ imponantur, eæque secundum longitudinem eandemque directionem atterantur ferro verticali satis magno, cujus extremitas inferior sit in rotundum conformata & bene expolita. Si operatio illa per singulas lamellæ calybeæ facies, quantum satis est, iteretur, eximiam virtutem magneticam acquirat lamella calybea, non secus ac si exquisito magnete tacta fuisset. Id autem notandum est ad septentrionem dirigi illam magnetis extremitatem a qua factum fuit attritus initium, contra autem ad meridiem convertitur extremitas altera in qua attritus desinit.

Sine ulla magnetis ope, egregiam vim magneticam natura aliquando suppeditat. Ferrum oblongum in loco sublimi positum & in situ verticali satis diu detentum mutatur in præstantissimum magnetem. Potentissimam vim magneticam per sæpe demonstrarunt virgæ ferreæ in ædium tectis templorumque fastigiis

stigiis erectæ. Insignem vim magneticam acquisivisse aliquando feruntur cælesti fulmine percussa ferramenta. Traditur cubiculum aliquod fulmine tactum fuisse in quo cultri aliaque id genus ferra plurima continebantur; id autem contigit omnino singulare, ferramentorum pars fulminis vi soluta fuit & liquefacta; pars autem alia insignem acquisivit virtutem magneticam qua clavos, annulosque ferreos ad se rapiebant; plurimis modis sive natura sive arte generatur vis magnetica, sed hos recensere longius foret.

III. Virtute alia donatur magnes, ob quam fit ut magnes polos suos præter propter ad mundi polos convertat. Magnes enim cymbæ ligneæ ita impositus ut axem habeat horizontis plano parallelum, si in amplo vase quod aqua plenum sit, innatet, paulatim sic convertet se, ut determinatas semper cæli plagas suis polis respiciat, quarum quidem cæli plagarum una est utcumque *borealis*, altera autem utcumque *australis*. Huic magnetis virtuti referendum est præstantissimum *nauticæ acus* inventum quod in arte nautica magnam præstat utilitatem. Arcus calybea oblongior, vi magnetica imbuitur acutæque pinnæ medio sui imponitur ut libere verti possit, ad mundi fere polos ipsa suos polos dirigit, apex qui respicit *boream* dicitur *polus boreus* & *septentrionalis*; qui vero *astrum* respicit, *polus australis* aut *meridionalis* vocatur. Acus nautica ne ab aeris motu vexetur, capsula ad custodiam coercetur; quare tale instrumentum *pixis nautica* appellatum est. At dolendum est quod ad maiorem nauticæ artis utilitatem, acus magnetica ad mundi polos sese non componat accurate variationibusque plurimis sit obnoxia. Si *pixis*

412 INSTITUTIONES PHYSICÆ

magnetica ita constituatur ut acus terrestri meridiano respondeat, idque fiat in plurimis terræ locis, observabimus directionem acus magneticæ a directione ipsius meridiani deflectere, nec quidem in omnibus locis æqualiter, sed magis vel minus pro vario locorum situ; talis aberratio acus magneticæ a meridiano appellatur *declinatio*. Præterea in ipsa declinatione mutatio fere perpetua deprehenditur, etiam in eodem loco non solum diversis annis, sed etiam diversis diebus & per varias ejusdem diei horas; sic Parisiis anno 1550 magnes ad orientem declinabat gradibus octo, anno 1580 gradibus undecim; anno 1666 polos accurate respiciebat; anno 1700 gradibus octo declinabat versus occidentem; quod autem Lutetiæ accidit, idem quoque in singulis terræ locis observatum est, sed diversa plane mutationis lege, imo potius nulla quæ subtilissimis etiam observationibus hætenus innotuisse potuerit. Præter hanc universalem declinationis variationem, ex certis quibusdam specialibus circumstantiis & conditionibus alias quoque mutationes plurimas interdum subit acus magnetica; ferrum acui magneticæ proximum illius declinationem plurimum turbat; aliquando etiam metæra in acus declinatione insignem variationem inducunt. Anno 1724 in latitudine boreali $41^{\circ} 10'$ & in longitudine 28° die 2 Septembris, perturbatis motibus ita agitata est acus magnetica ut ad dirigendum iter nullius potuerit esse usus; eandem agitationem patiebantur acus aliæ plurimæ vimagnetica recens imbutæ, ille autem vehementior inordinatusque motus horæ integræ spatio perduravit quo deinde cessante pristinam directionem acus magneticæ recuperarunt.

runt. Eandem vim directivam aliquando suspensam observavit peritissimus navium præfectus D. Ellis. Scæviente acutissimo frigore, navique magno gelu circumdata, semel deprehendit vi sua directiva fere destitutas fuisse acus singulas; aliæ autem ad plagas oppositas sese aliquando dirigebant. His tamen non obstantibus, quæ minus frequentes sunt, acus magneticæ variationibus, maximæ tamen utilitatis est pixis magnetica; declinatio enim satis accuratis observationibus ut plurimum nota est.

IV. Superest tandem consideranda magnetis virtus *inclinatrix*. Parata acu calybea, magnetica vi nondum imbuta, inventoque gravitatis centro, ita ut ipsum gravitatis centrum apici styli immineat, acus æquilibrata manebit, situmque horizonti parallelum obtinebit, neutra extremitate se vel attollente vel deprimente. At si hujusmodi acus concipiat vim magneticam & stilo eadem ratione imponatur, cuspis ejus borealis in his nostris regionibus borealibus deprimet sese aliquantulum, oppositus autem australis vicissim sese extollet. Nec depressio cuspidis unius & elevatio alterius æqualis est in omnibus terræ locis; eo enim minor observatur quo minor est locorum distantia ab æquatore, & contra eo major quo loca sunt polis propiora, ac proinde acus magneticæ *inclinatio* ex ipsa locorum latitudine pendere videtur. Hæc phænomena deprehenduntur in hemispherio nostro boreali; at translata acu ad oppositum hemispherium australe, tunc vicissim cuspis australis deprimet sese, borealis autem sese attollet, & eo magis quo propior fuerit locus polo australi. Hinc consequens videtur acumi manere

æquilibratam in æquatore , in polis autem eo usque inclinari ut perpendiculariter instat ad terram . Hæc autem acus magneticæ inclinatio majores quam ipsa declinatio variationes patitur , non solum in diversis terræ locis , sed etiam in eodem loco & per diversas diei horas . Verum hujus variationis partem aliquam referendam esse observatum est ad resistantiam quam ex mutuo axis attritu patitur acus magnetica , antequam ad æquilibrii situm perveniat . Et quidem diligenter observata acus magneticæ inclinatione , ea variabilis omnino deprehendebatur , iisdem licet manentibus experimenti circumstantiis . Paratæ fuerunt diversæ acus magneticæ quoad omnes conditiones simillimæ , vix unquam eandem inclinationem ostenderunt acus duæ , imo differentia 10 vel 12 gradus aliquando superabat . Ex illa inclinationis inconstantia factum fuit ut hanc variationis partem arte aliqua corrigendam proposuerit Academia Parisiensis , annexo de more præmio quod reportavit Doctissimus Daniel Bernoullius qui subtilissima acus magneticæ structura , hujus erroris vel differentiæ partem aliquam sustulit .

V. Quod spectat effectuum magneticorum causam , fatendum est nihil esse in Physica obscurius . Quare ne varias quidem referre volumus Physicorum hypotheses quibus explicatis non sumus doctiores . Generatim observare satis erit attractionem magneticam ex ferri magnetisque particulis atque illarum textura pendere . Et quidem mutata particularum dispositione generatur vel destruitur vis magnetica , frequentius intenditur vel remittitur ; quod jam variis exemplis ostendimus . Ita si ferrum magnetica vi imbutum
vali-

valide percutiatur, si igni subjiciatur, si violenta manu torqueatur, vi magnetica destituitur. Si vires attractivæ fuerint ex una parte majores quam ex altera, poli ex una parte erunt *attractivi*, ex altera *repulsivi*. *Communicatio* virtutis in eo sita esse potest quod ferri particulæ sine ullo ordine dispositæ ob magnetis vicini actionem, mutuam positionem mutant; tumque se prodeat magnetica vis in ferro quoque. Eadem de causa si filum ferreum quod magneti affricatum, virtutem contraxit, poterit virtutem amittere, si motu contrario ducatur ita ut conveniens partium positio turbetur. *Directio* acus ad certas terræ plagas polo proximas hinc oriri potest, quod per universam quidem tellurem ingentes lateant sub ipsa superficie massæ ferri & magnetis, sed multo plures quam alibi versus polos. Hac enim de causa fieri poterit, ut acus magnetica non dirigatur accurate versus polum, sed hinc inde aberraret. Si ejusmodi fodinæ minores per universam terram nullo certo ordine dispersæ sint, inde intelligetur in magnetis declinatione nullum esse certum ordinem. Hujus rei imaginem quandam habere possumus, si majorem aliquem eximie virtutis magnetem ad mensæ caput colloceamus, tum alios minores magnetes dispergamus sine ordine; acus se ad magnum magnetem potissimum diriget, minorum tamen magnetum actionibus nonnihil turbabitur directio. Eadem quoque erit *inclinationis* causa; videmus enim acum magneticam inclinari statim, si ferri fodinis proxima fuerit. Jam vero si hæc sit effectuum magnetorum generalis causa; quidni fieri poterit ut quotidie parum admodum & fere nihil

mueretur directio, quæ mutatio temporis progressu crescat & tandem post ingentes terræ motus statim vel maxime augeatur, vel etiam minuatur. Nimirum fodinæ perpetuas subeunt mutationes, novæ alibi generantur augenturque, alibi minuuntur & pereunt. Itaque perpetua est mutatio, exiguo tempore exigua, tempore longiori major, irregularis omnino si mutatio ipsa in fodinis irregularis fuerit. Quæ cum ita sint, non repugnat ad generalem attractionis legem referri posse effectus magneticos, qui proinde ex particularum figura, textura, mutua positione pendent, quæ quidem omnia nos latent, & utinam fortasse non semper lateant. Quare generatim rem difficiliori explicavimus parum solliciti de subtilissimis effluviis quæ tenuitate sua acutissimos oculos effugiunt, remotasque massas vi maxima connectunt.

VI. Cum vi magnetica aliquid affinitatis habere videtur vis *electricæ*. Antiquis etiam Philosophiæ temporibus notum fuit *succinum*, quod etiam *electricum* dicitur, eam vim habere qua paleolas leviaque corpuscula attrahat atque ideo virtuti huic attractivæ factum est *electricitatis* nomen. Progressu temporis hæc eadem vis in *sulphure*, *cera obsignatoria*, corporibusque aliis *bituminosis* & *resinosis* observata fuit; virtutem electricam in *vitro*, *gemmis*, *bombice*, *lana*, *capillis* experti sunt deinde Physici; dura enim siccaque manu perfrictis corporibus illis, leviuscula quæque corpora ad se rapiunt. Idem tentatum fuit in aliis plurimis corporum speciebus, nullumque inventum fuit corpus quod sua natura non foret electricum, vel electricitatem non posset accipere. Quod ut intelligatur, duplex distingu

qui debet corporum electricorum genus, alia dicuntur corpora *per naturam electrica* quæ nempe perfricta electricitatem demonstrant; alia autem per longum etiam tempus attrita nullum electricitatis indicium præbent: electricitatem tamen ex corporum electricorum vicinia haurire possunt atque accipere, & ideo vocantur *electrica per communicationem*. Ita quamvis metalla & fluida nullam ex attritu electricitatem possint concipere, iis tamen electricitas variis artificiis conciliari potest. Si ferrum aliquod tubis duobus vitreis horizontaliter sustineatur, vel funiculis sericis suspendatur, vel etiam resinosa massæ incumbat, ferrum illud admoto vitreo tubo debite perfricto, vim electricam admittet. Eodem artificio electricitatem accipient fluida aliaque corpora non electrica. Porro in electricitatis phænomenis non solum considerata est attractio, sed etiam repulsio quæ, ut plurimum, attractioni succedit. Ita si auri foliolum a tubo electrico attrahatur, rursus ab eo repellitur, atque per vices varios itus & reditus seu subsultus edit. Vix conspicua est repulsio, si debilior sit electricitas; at si valida sit, corpusculum attractum statim repellitur. Tandem si potentissima sit electricitas, nullus inter tubum & corpusculum observatur contactus, sed corpusculum repellitur, ubi ad duorum vel trium pollicum a vitro distantiam pervenit. Eandem attrahendi & repellendi vim acquirit metallum, si vi electrica *per communicationem* imbutum fuerit; idemque succedit in corporibus omnibus non electricis. At aliæ multæ attractionis & repulsionis conditiones summa attentione considerari debent.

VII. Ex attractionis repulsionisque phæno-

418 INSTITUTIONES PHYSICÆ

menis aliqua colligunt Phyci & quidem merito ut nobis videtur. 1°. Leviora corpuscula a corporibus electricis attrahuntur, donec eandem cum attrahentibus corporibus electricitatem acquirant, illorumque atmosphæræ ad eandem redigantur densitatem. 2°. Hac densitate acquisita, desinit attractio incipitque repulsio. 3°. Hæc repulsio viget tantum inter corpora quæ ad eundem electricitatis gradum pervenerunt. 4°. Tandiu viget hæc repulsio quandiu manet eadem atmosphærarum densitas, qua perturbata, fit iterum attractio donec æqualis densitas restituatur, rursusque nova excitatur repulsio. 5°. Vigere potest repulsio inter corpora duo quæ nullum unquam dedere attractionis signum, dummodo eandem servant atmosphæræ densitatem. 6°. Eo validior est repulsio quo major est electricitas; ac proinde ex spatiis vi repulsiva descriptis vires electricas æstimare licet. Recensitos effectus experientia confirmat; etenim si electricitas sit validior, inter auri foliolum tubumque vitreum nullus jam contactus deprehenditur, sed in duorum vel trium pollicum a vitro distantiam aurum repellitur, acquisita scilicet æquali atmosphæræ densitate, deinde supra tubum manet aurum veluti suspensum donec vim electricam acquisitam amiserit; sive eam sensim & per gradus amittat, vim suam communicando vaporibus per aerem dispersis, sive eam amittat statim ex alterius corporis non electrici contactu. Facta electricitatis jactura, jam cessat repulsio, foliolumque attrahitur, iterum post reparatam electricitatem repellendum. Hoc artificio auri foliolum per cubiculum transferri poterit, illud scilicet repellendo ope tubi eximie electrici, digitumque pro singulis repulsionibus ad-

admovendo; imo foliolum auri immotum sustineri poterit inter ferrum vi electrica imbutum & digitum ipsum, si subtus ipsum auri foliolum ita admoveatur digitus ut in singulis repulsionibus aurum tangatur, hac arte velut suspensum cohiberi poterit foliolum inter ferrum & digitum. Porro admodum verisimile est foliolum in hoc statu manere, eo quod tantam vim electricam digito communicet quantam ipsum a ferro accepit, ea tamen quantitate dempta quæ ad superandam gravitatem necessaria est. Sed hæc pauca dicta sunt, longiorem enim tractatum res postulat; legatur opus egregium quod magna sagacitate parique experimentorum subtilitate conscripsit *Taurini* doctissimus P. Beccarias qui Franklini doctrinam non solum explicavit, sed & mirifice perfecit. Tota doctrina huc reducitur: esse quoddam fluidum electricum quod interna corporum quorundam viscera illorumque superficiem possit pervadere, in aliis autem corporibus nullum habeat motum, licet tamen corporum illorum aliqua contineant hujusmodi fluidi copiam sibi firmissime adhærentem, nec sine frictione intestinoque motu effundendam. Prioris speciei corpora dicuntur electrica *per communicationem*, alia autem corpora vocantur electrica, *per naturam*. Priora corpora fluidum electricum statim ad æqualitatem in alia corpora diffundunt, licet alia majorem, alia minorem hujus fluidi copiam postulent ad quandam sibi *connaturalem*, ut ajunt, *saturitatem*. Quare e duobus ejusmodi corporibus quæ eundem natura sua non habent saturitatis gradum, aliud respectu alterius electricum est *per excessum*, aliud autem *per defectum*. Ubi nempe corpora illa ad eam admoventur di-

stantiam in qua particulæ circa eadem corpora atmosphærarum instar diffusæ, aliæ in alias possint agere, e corpore electrico per excessum fluit illico ejusmodi fluidum in corpus electricum per defectum, donec fluidum ad *respectivam* æqualitatem in utroque corpore perveniat. Porro fieri potest in hoc continuo effluxu ut corpora quæ fluidum dant & recipiunt, ad se invicem accedant, si leviora sint, vel libere pendeant. Imo si materiæ coacervatæ motus vehementior fuerit, explosiones excitari poterunt, scintillæ, tonitrua fulminaque ipsa.

VIII. Hinc aliqua ratione intelligi potest experimentum *Batavicum* quod est hujusmodi. Phiala vitrea mediocris crassitie, dimidia circiter parte aquam continet; hæc autem manu sustinetur, filo metallico in aqua interim pendente; illud vero filum alligatur lamellæ metallicæ aut corpori *per communicationem* electrico, quod ideo *conductor* vel *deferens* solet appellari, eo quod illius ope materia electrica propagetur & veluti ducatur atque deferatur. Si machinæ hoc modo comparatæ imponatur globus vitreus qui circa axem velocissime convertatur, sicca manu interim perfrictus, hic eximiam vim electricam concipiet quæ in corpora per communicationem electrica transibit. Jam excitata in globo vi electrica, si *conductori* extremitas digiti admoveatur, non solum scintillam elicies, sed te quoque vehementiori ictu percussum senties, atque eam ob causam experimentum illud *fulmen electricum* vocatur. Porro ad magnam distantiam propagatur fluidum electricum, & tanta est distantia illa ut Physicorum experimenta & diligentiam fugiat; si longissimum quoque filium ferreum filis fer-

cis

PARS II. SECT. IV. 421

cis sustineatur & in eo excitetur vis electrica, ad alterum fili ferrei extremum propagatur fluidum electricum tanta velocitate quæ nullam mensuram admittat. Si filum illud ferreum extremo digito tangatur, infinita propemodum velocitate extunditur fluidum electricum; quo autem longius est filum ferreum, eo vehementior sentitur ictus cum scintilla conjunctus. Si plures homines massis resinosis insistant pedibus & cum metallis in superficiem fatis magnam extensis communicent, quæ tamen metalla filis sericis suspendantur, in hac etiam longissima hominum serie si vel unus ferrum vi electrica imbutum manu contineat, singuli electricitatem acquirant, leviuscula corpuscula attrahent, atque ex iis vividissimæ elicientur scintillæ. Si resinosa massæ sint subtiliores, electricitatis effectus debiliores fiunt, & nulli omnino, si inter pedes terramque ipsam nullum medium sit corpus natura sua electricum. Hinc certum videtur fluidam esse materiam electricam, eamque per vitrum, resinam, bombycem transire facilius, si corpora illa minus crassa fuerint, facillime autem pervadere metallorum, animaliumque corpora, quibus intermediis ad terram propagatur, nisi corpore aliquo natura sua electrico cohibeatur. Scintillæ e corporibus electricis excussæ cum fulgure & fulmine tantam affinitatem habere videntur ut Physici plurimi persuasum habeant tonitrus boatum nihil aliud esse quam vehementiorem scintillæ electricæ explosionem. Et requidem ipsa, dum cælum tonat, ferramenta massis resinosis imposita tantam electricitatis vim concipiunt, ut scintillas multo splendidiore reddant, quam quæ machinarum vi extundi possunt; sed de his agemus

in proximo articulo. Cæterum quamvis de recentiori electricorum phænomenon invento non pauci doctissimi viri præclara nobis reliquerint quæ hic fusius exponere non licet, fatendum tamen est immaturum, ut ita dicam, adhuc esse argumentum illud, longa fortasse annorum atque experimentorum serie perficiendum; quod vero generalem primamque attractionis & repulsionis electricæ causam spectat, valde probabile est eam ad universum mundi systema pertinere, ac proinde nostros auditores hortamur ut in difficilioribus id genus quæstionibus nihil audacius proferant vanissimasque explicationum umbras & inanes verborum sonos non amplectantur.

ARTICULUS II.

*De subterraneis quibusdam meteoris
atque phænomenis.*

- I. **N**eminem latet in terræ gremio contineri diversissimas magna copia corporum species, quæ simul permixtæ intestinis motibus agitantur, vehementissimamque fermentationem concipiunt: Sulphure, bitumine, nitro particulisque metallicis abundant terræ viscera; porro notissimum est Physicis mixturas quasdam fieri ex nitro intermixto sulphuri, bitumini & calci vivæ, quæ humido aliquo aspersæ accenduntur: Quidni ergo similes commixtiones sub terra fieri valeant quæ humore aqueo imbutæ ignem excitent? Si limatura ferri & sulphur contritum misceantur atque aqua abluantur, ita ut ex iis componatur massa quædam mollis, hæc in vase aliquo condita & sub terra defossa magnum calorem primo excitabit, tum ignis & flamma emicabit quæ

quæ terram ipsam submovere poterit. Hac ratione clarissimus Lemerius *Vesuvinos* ignes imitatus est; nec abhorret a vero hanc aut consimilem rationem naturam adhibere ad magna Vesuvii incendia excitanda, ciendosque terræ motus. Et quidem causam hanc confirmat soli natura; in iis si quidem locis quæ tristissimis id genus phænomenis frequentius agitantur, terra prædictis materiis ad fermentationem ignemque idoneis referta observatur. Nulla autem dubitandi ratio esse videtur quin ad terræ motus conferat plurimum vis electrica, idque mox ostendemus ubi fulminis causam explicare conabimur. Interim monere satis sit, sine eximia vi electrica intelligi vix posse quod narrant Scriptores aliqui, ad incredibilem fere distantiam propagatos fuisse terræ motus. At si ponamus, quod quidem probabilissimum est, ex vehementissimo partium attritu generari potentissimam vim electricam, multo facilius explicantur subterranea phænomena ad tantam distantiam propagata; & factò quod scriptum relinquerunt aliqui, fides conciliabitur, ingentem scilicet terræ concussionem, e vesuvii monte ad Constantinopolin usque fuisse transmissam. Et requidem ipsa, vehementiores terræ motus quos memoriæ tradiderunt antiquissimi Scriptores, fulgure, igne, tonitru horruisse leguntur. Idem quoque his nostris temporibus an. 1756. *Ulissipone* contigisse fide publica certum est; de plerisque Vesuvii montis eruptionibus id etiam narratur. Si autem ignis hic subterraneus, illiusque, ut ita dicam, focus subtus mare delituerit, jam ipsas maris aquas sublevare poterit variisque in locis exundationes creare; quod quidem annis, 1755, 1756 accidisse infauis nuntiis accepimus.

II. Materię electricę procul dubio referen-
di

di videntur ignes illi qui *fatui*, seu *erratici* & *ambulones* vocantur. Frequentes sunt in locis pinguibus, uliginosis, & paludosis, in cœmeteriis non raro visuntur & timida plebi terrorem incutiunt. Nonnunquam subito evanescent, mox in alio loco resplendent, plerumque ad altitudinem sex pedum errant huc illuc, interdum altius hærent. Ex his ignibus aliqui lucentes sunt duntaxat, alii autem lucentes sunt simul & incendiarii ita ut palearia, testæ straminea & ædes incendere valeant. Dum ignes illi manu capiuntur, constare observantur ex materia viscosa & lubrica, non calida. Eiusdem naturæ est ignis qui *lambens* dicitur, hominum capillis equorumque iubis aliquando adhærens, præcipue dum pectine atteruntur. Ex dictis de igne electrico manifestum est ignes illos nihil aliud esse quam materiam electricam ex putrefactis plantis, cadaveribus, capillis, aliisque id genus corporibus motu atque attritu excussam. Eodem referendæ sunt exiguæ flammulæ quæ *Castor* & *Pollux* a navitis appellantur, & sæviente tempestate ad aplustria, ad funes, partesque navis volitare sæpe observantur. Ignem hunc esse electricum satis jam demonstrat memoratum in præcedenti articulo experimentum, quo nempe ferramenta, cælo tonante, eximiam vim electricam concipiunt, magnamque scintillarum copiam emittunt. Ad hunc ipsum locum pertinet phænomenum plane singulare cuius ego memini. In fastigio templi cujusdam apud Alvernos in Gallia, posita erat, de more, Crux ferrea. Tonante cælo e tribus crucis cuspidibus copiosæ emanabant scintillæ, tantaque lux aliquando splendebat quæ, ingruente etiam pluvia, præfocari non posset; sed Crux e loco dimota loci incolis terrorem, Physicis autem

tem phænomenum eripuit. Iisdem causis tribuendi sunt globi ignei aliquando in aere excitati quorum aliqui longiorem caudam, ut plurimum trahunt. Sunt autem ejusmodi globi sæpe ingentes, lunari magnitudine apparuerunt plurimi, majores nonnulli. Ingentem hujusmodi globum Bononiæ observavit Montanarius ann. 1676. Visum est illud ipsum lumen super mare Adriaticum tanquam ex Dalmatia venisse ac per universam Italiam transivisse; in iis autem locis quibus verticale fuit, auditum scribit laudatus autor crepitantem fragorem qualis edi solet a curribus citato cursu super strata lapidea delatis. Addit hoc lumen velocissime motum fuisse, nam intra horæ scrupulum unum, 160 miliaria italica peragrasse comperit; aliqui autem ex his globis in eadem cæli parte suspensi & fere immoti videntur. Ex odore sulphuris quem globi illi spargere solent, intelligere pronum est hoc meteorum ex sulphureis potissimum exhalationibus conflatum esse; & re quidem ipsa talem esse globorum illorum naturam demonstrant perniciosissimi hujus materiæ effectus; dum in terram non sine fragore maximo dissiliunt. Per longum tractum dispersi, arbores disjiciunt, evellunt, firmiora etiam ædificia solo corquant, vehementissimos ventos excitant. Valde autem probabile est aeris elasticitatem magna sulphuris copia debilitari, quocumque tandem modo id fiat. Hinc aerem longius remotum magna vi irruere necessum est, validiorem ventum excitare, & ad ædificiorum ruinam conferre. Porro certissimum est hujus meteor ignem materiæ electricæ simillimum esse, ac proinde vi electricæ referendam esse maximam prædictorum effectuum partem. Hoc ipso anno 1761 nuntiis publicis accepi.

cepimus Londini visum fuisse ingentem hujusmodi globum qui ædificia plurima subvertit non sine magna animalium strage; interrim vero cælum flammis, fulgure, tonitruque sæviebat. Quod autem meteora illa globi figuram, ut plurimum, aliasque etiam figuras interdum referant, idtribuendum videtur partim flantibus ventis, partim materiæ electricæ attrahenti. Sed singulos talis materiæ motus, innumeris causis variatos atque turbatos nulla assequi potest Physicorum industria, ullavæ explicatio.

III. Hinc fulminis naturam atque genesis aliqua ratione licet intelligere. Fulmen differt a tonitru & fulgure; *fulminis* nomine appellatur rapidissima flamma ex nubibus ad terram usque maximo cum impetu delata, & obvia omnia prosterbens. *Tonitrus* autem nihil aliud est quam fragor in summo aere subita exhalationum aut materiæ electricæ inflammatione ortus; *fulgur* vero est ipsa materiæ accensio. Itaque patet eandem esse fulminis, tonitrus, fulgurisque materiam & ratione effectuum duntaxat distingui. Jam meteori causam, juxta recentiores cultioresque Physicos, explicabimus. Calore solis, aut ventis aliisque aeris mutationibus, saltem tanquam a causa primaria, procellosas nubes non excitari, certum omnino videtur. Etenim autumnali hybernoque tempore hic Romæ & in aliis regionibus plurimis haud rara sunt tonitrua & fulgura. Præterea tranquillo penitus aere suboriuntur procellosæ nubes, & ipsa atmosphæræ tranquillitas imminentis procellæ indicium esse solet. Hæc igitur non est, ut vulgo credebatur, saltem generalis procellarum origo. In terræ sinu illiusque superficie, atque in liberis atmosphæræ regionibus, materiæ electricæ magnam

gnam copiam latere ex præcedentibus experimentis manifestum est . Porro hujus materiæ æquilibrium plurimis de causis tum in terræ gremio , tum in ipso aere turbari posse evidens est . Hinc excitari poterunt plurimi & infinitis fere modis variati hujus materiæ motus ; hinc nubes quæ ex aqueis partibus *per communicationem* electricis coalescunt , aliquando materia electrica imbuuntur magis , aliquando autem minus . Rem ita se habere demonstrat motuum vicissitudo in nubibus procellosis , materiæ electricæ variatis motibus simillima . Nubes quæ aquam deferunt , lente & tranquille admodum progrediuntur atque uniformi quasi motu expanduntur ; nubes aliæ quæ grandines , turbines fulgurque devehunt , ex improvise veluti apparent , impingunt , versus se invicem post contactum resiliunt , frequentissimisque reflexionibus jactantur , donec simul conjungantur & unum veluti corpus electricum componant . Jam vero si ponamus variabilem aliquam ob causam , alicubi accumulari materiam electricam , alibi autem deficere , & vapores plures , aut nubes , aut corpora quævis *per communicationem* electrica utrique loco esse interjecta , intelligemus a loco ad locum , redundantem electricitatis materiam vehementissime vibrari , interposita corpora trajicere , infinitis prope modum motibus serpere , atque mirabiles omnino effectus edere ; experimento rem illustrabimus . Supra massam ex cera vel resina conflata collocantur metallici plures globuli , ita ut linea omnium centra conjungens per varios serpat gyros ; deinde quo tempore primus globulus catenæ propius admoveretur , ultimus globulus digito tangatur , scintilla per globulos singulos ad digitum usque excurrat . Porro experimentum

tum illud varias fulguris ambages satis feliciter explicat ; nec mirum amplius videbitur quod fulminis materia quædam corpora pervadat, aliis propioribus relictis, ensẽm solvat vagina intacta, oculos feriat inoffenso corpore. Alia plurima sunt fulminis scintillæque electricæ simillima phænomena ; scintilla electrica inflammat corpora quæ flammam concipere possunt, ita etiam fulmen ejusdem naturæ *inflammabilis* corpora invadit, illaque in fumum ac cineres resolvit. Scintilla electrica corporum evaporationem auget, gravem odorem spargit, tenuissimas fundit auri metallorumque particulas, ita etiam fulmen liquores in vase contentos dissipat, odorem pro locorum varietate varium effundit, & quæ pervadit metalla, solvit, dissipat, absomit. Scintilla electrica enecantur volucres, & fulmine intereunt homines, atque in hominibus fulmine tactis eadem deprehenduntur signa quæ in volucris scintilla electrica percussis observantur. Quæ cum ita sint, fulmen considerari poterit tanquam scintilla ex nubibus electrica materia gravidis exclusa. Si electricorum ignium vires voluminibus proportionales esse fingamus, globi ignei qui diametrum lunarem referunt, vim longe majorem habebunt quam quæ ad disjiciendas ædes, evellendas arbores, propellendos lapides satis sit ; cum scintilla cujus diameter apparens sit lineæ unius, vitreum tubum facile frangat. Ex angulis catenæ vi electrica imbutæ micant coni valde lucidi & satis ampli, ita etiam ex nubibus aliquando ea poterit lux effundi quæ ad plures gradus extendatur, totumque cælum videatur occupare. Præterea vis qua in se invicem impingunt nubes, & fragor ex conflictu oriundus, enormiter excedet scintillæ electricæ strepitum

pitum pro majori nubium incurrentium amplitudine & vaporum ex quibus coalescunt, elasticitate.

Materiam electricam per universa corpora diffusam esse jam demonstratum est; ac proinde nullum dubium est quin fulmina alia ē terræ gremio in aerem assurgant, alia autem ex aere in terram recidant. Ex hoc materiæ electricæ terram inter & atmosphæram commercio, sagacissimis quibusdam Philosophis in mentem venit a fulminis ictu ædificia fortasse liberari posse. Et quidem observandum est materiam electricam ad metalla potissimum dirigi, eaque esse materiæ electricæ ac proinde & fulminæ, *conductores* sive *deferentes*. Igitur fulminis materia, cæteris paribus, corpora metallica præsertim imbuet, atque ex iis deinde emergens alia corpora pervadet. Itaque si *deferentes* metallici ad terram usque pertingant, hi fulminis materiam in terræ gremio deponent atque amovebitur fulminis periculum. Ita ædium aliquarum tecta metallicis canalibus circumdata sunt ad excipiendas demittendasque aquas; si autem in ædium illarum fastigio erigantur duæ vel tres metallicæ cuspides fili ferrei ope cum iisdem canalibus communicantes, periculum declinari posse sibi persuadent aliqui, & quidem non omni destituuntur fundamento, ut ex doctrina hætenus explicata colligitur. Et certe audivimus præsentissimum periculum expertos fuisse quosdam Physicos qui procellosa tempestate, nulla prævia diligentia tentare ausi sunt experimenta electrica; imo si narrationi fides esse debeat, eorum aliquos fulmine tactos fuisse didicimus. Laudanda quidem est Physicorum humanitas qui avertendis periculis humanique generis securitati invigilant, sed

sed Dei flagella timere melioresque fieri debemus.

IV. In omnibus meteoris partes aliquas habere videtur vis electrica. Si aquæ guttula *per communicationem* facta sit electrica, ea sal tritum attrahit, atque inde firmitatem aliquam adipiscitur, seu in massam compingitur. Pari ratione, si in nubibus procellosis idem majori copia fieri ponamus, nubium particulæ maximam salium, nitrorumque per atmosphæram effusorum copiam trahent & in *nivem* atque *grandinem* cogent. Si ex virga ferrea electricitate imbuta pendeat aquæ guttula quæ pollicis circiter intervallo distet a vase inferiori aquæ pleno, gutta superior pendens oblongatur, excutitur scintilla crepitusque auditur. En *columnæ* seu *tubæ marinæ* & *typhonis* simillimam imaginem; aliquando enim aqua circularem motum, inchoare a Nautis observatur, & paulatim ad altitudinem satis magnam assurgere; vortex ille si mari imminet, *tuba marina* appellatur. *Typho* autem dicitur si aereus sit vortex terræque subjectus. Periculosi admodum sunt hujusmodi turbines, & raro incumbunt terris sine maxima clade. Cæterum quamvis ad meteora aquea plurimum conferat materia electrica, aliæ tamen causæ quæ vulgo afferri solent, non debent omnino excludi. Nempe calore ipsius terræ & calore solis sublevantur vapores & ad altiore atmosphære regionem assurgunt, ibique ob minorem specificam gravitatem suspensi manere possunt. Si vero frigore addensentur majoremque acquirant gravitatem specificam, proprio pondere relabuntur, vel pluviz vel nivis vel grandinis instar. Hæc est vulgaris explicatio, quam quidem omnino de medio tollere immerito quis tentaret. Quamvis enim

PARS II. SECT. IV. 431

enim in meteoris aqueis partem maximam agere possit materia electrica quæ corpora longe graviora per aerem suspendere valeat, certum tamen est alias quoque causas ad meteora aquea conferre, aliquando omnes simul, interdum aliquas tantum.

Antequam hunc articulum ultimamque Physices partem absolvamus, prætermittendum non est phænomenum quod variatis vividissimisque lucis jactibus phænomena electrica imitari solet. Fulgentissimum illud spectaculum plagam septentrionalem, ut plurimum, illustrat, & *aurora borealis* appellatur. Arcus instar apparet atque ex illo vibrantur radii celeriter ascendentes iique admodum lari, instar columnarum verticalium nunc majori nunc minori copia, & tandem cælum flammis hinc inde serpentibus totum resplendet. Hujus phænomeni sedem in atmosphæra nostra collocant Physici omnes; & quidem ut alias prætermittam rationes plurimas, observationibus compertum est easdem auras boreales in duobus locis licet parum distantibus non eodem tempore visas fuisse, quod quidem certissimo est argumento tales auras non multum sublimes fuisse, & in atmosphæra nostra sedem habuisse. Hujus phænomeni altitudinem ex illius parallaxi investigarunt celeberrimi Mathematici, at fatendum est non satis tutam esse hanc methodum. Et quidem non constat auroram borealem e diversis locis observatam, esse eandem ipsam lucem quæ in eodem cæli loco fixa hærebat; quod tamen fieri oportet ad definiendam phænomeni parallaxim ac proinde & illius altitudinem. Vir doctissimus D. de Mairan summo ingenii acumine parique doctrinæ apparatu hujus phænomeni causam quæsit in atmosphæra solari quæ

quæ ad terrestrem usque atmosphæram aliquando pertingens, auroræ borealis spectaculum præbet. Præclarissima sane sunt opera quæ hac de re edidit vir clarissimus; opinionem hanc aggressus est celeberrimus vir Eulerus qui auroram borealem ex subfilioribus atmosphære nostræ particulis radiorum solarium vi impulsis conflatan esse existimavit. Sed litem hanc inter duos magnos viros componere, in argumento conjecturis pleno, non licet. Alii tandem ex materia electrica totum phænomenum repetunt hoc fere modo. Cum materia electrica sit ubique diffusa, alte etiam supra terrestrem superficiem evehitur materia hæc. Jam vero aer & quæ aeri immiscentur heterogeneæ particule, in terram, solem ac lunam graves sunt, circa terram diurno motu revolventes fluunt ac refluunt perpetuo, iisque in locis quibus ad perpendicularum insistant luminaria, attolluntur primum, tum luminaribus progredientibus fluunt ab æquatore ad polos, atque in novum ærem particuleque alias impingunt. Hinc fieri potest ut particule illæ in locis admodum diversis diversa imbuantur materia electrica diversumque electricitatis gradum acquirant; atque tandem eadem particule in se incurrentes electricitatis gradu dissimiles, omnia exhibere poterunt electricitatis spectacula. Ratiocinationem hanc confirmant ex mutue gravitatis legibus & maris nostri analogia, atque tandem accuratissima afferunt experimenta quæ in *cervis*, ut vocant, *volantibus* institui solent; his enim subtilissimis experimentis compertum est cervos ad diversas altitudines diversisque temporibus per ærem sublato, diversum electricitatis gradum concipere. His ita constitutis, jam consequuntur omnia

omnia electricitatis phænomena, ex particularum in se impingentium varietate nascetur miranda motuum varietas, hinc igneæ columnæ surgere statim poterunt & subsidere, lucidæ succedent coronæ ignesque alii sine ordine per cælum dispersi. Quia vero aer hyberno tempore in regionibus borealibus fit densior, excitandisque electricitatis phænomenis aptior, hinc aurora borealis frequentior conspicietur hyberno tempore & terra in perihelio constituta, quod demonstrant observationes *meteorologicæ*. Hæ sunt variæ hypothesæ quæ quidem singulæ suum habent probabilitatis gradum haud facile definiendum. Cæterum in iis quæ pertinent ad vim electricam, haud satis commendari debent clarissimi Becariæ opera; hic enim aliis omnibus qui hactenus de eodem argumento scripserunt, palmam longe præripuit; nobis vero quibus injecta est brevitās, hæc pauca satis sint; data autem præsentī occasione, nostram erga amicum venerationem libenter testatam volumus.

A P P E N D I X

*De quibusdam capitis præcedentis
utilitatibus.*

IN hoc capite mentionem fecimus de *fossilibus extraneis* quorum in terræ gremio magna latet copia, nec minor in ipsa telluris superficie apparet. Historiæ naturalis amatores maxima admiratione percellit tanta *conchyliorum marinorum & piscium* varietas, quibus abundare aliquando observantur altiores montes profundioresque valles, in magna etiam a mari distantia. Tot & tanta conchyliorum

rum

rum fossilium strata horizonti fere parallela semper deprehenduntur, aliquando autem strata plurima intermediis, ut ita dicam, lectis vel terreis vel arenosis separantur; neque casu quodam in nostras regiones translata credi possunt. Ita autem persæpe accumulata sunt conchyliorum strata, ut animalia quæ conchyliorum illorum incolæ fuerunt, quasi eandem familiam atque societatem constituisse videantur. Id autem mirandum est maxime quod corpora illa marina ad maria nostra minime pertineant, sed e remotissimis plagis ad nos advecta fuisse credantur a peritissimis historiæ naturalis Scriptoribus. Hæc antiquissima monumenta velut tristissimas diluvii universalis reliquias venerari non dubitant aliqui Physici, quorum sententiam confirmare videntur inventa in montibus a mare longe diffitis instrumentorum nauticorum fragmenta. Hæc quidem universalis diluvii documenta, &, ut alii appellant, *numismata*, pie ac religiose vindicantur; sed his argumentis quæ suis non carent difficultatibus minime indiget, nulli difficultati, nulli errori obnoxia Sacræ Scripturæ divina autoritas. Quid clarius his Dei comminantis verbis cap. 6. Genes.: *Delebo hominem quem creavi a facie terræ; finis universæ carnis venit coram me; ecce ego adducam aquas diluvii super terram ut interficiam omnem carnem, universa quæ in terra sunt consummentur*. Quod autem minas eventus fuerit subsequutus, aperte constat cap. 7.: *consumptaque est omnis caro quæ movebatur super terram, aquæ prævaluerunt nimis super terram, operisque sunt omnes montes excelsi sub universo celo*. Et certe si in habitatas duntaxat terræ partes diluvium sævierit; ad quid Noe, Deo iubente, arcam sibi fabricasset? cur in eam
ani.

animantia introduxisset ? cum a diluvianis aquis in aliis regionibus facile tutus esse potuisset . Sed de his fufius differere ad Sacræ Scripturæ interpretes pertinet ; superest ut refellamus objectiones duas quæ Physicorum juris esse videntur . Intelligi nequaquam posse ajunt aliqui qua via in Americam penetrare potuerint fera animalia . In omnes *continentis* nostræ partes facile quidem migrare potuerunt domestica animalia simul cum hominibus earundem terrarum incolis , fera quoque animalia temporis successu viam sibi quærere potuerunt . At omni caret verisimilitudine leones , tigres aliaque hominibus perniciosissima animalia in alterius continentis regiones fuisse translata . Hæc quidem est ineptissima obiectio quæ adversariis proponentibus solvenda etiam manet . Et quidem cum Deus cunctas animalium species in paradiso terrestri constituerit *easque adduxerit ad Adam* , etiamsi nulum fuisset diluvium , quæstio pari jure fieri posset quomodo ferocissima animalia in Americam pervenire potuerint . Variæ autem huic quæstioni responsiones esse possunt . Et primum quidem verisimillimum est , Americam reliquis terræ partibus conjunctam esse , vel angusto *isthmo* animalibus facile pervio a *continente* nostra dirimi . Et re quidem ipsa anno proxime elapso rarissimam ego vidi tabulam geographicam *Petropoli* eleganter incisam , in qua delineabatur transitus a viatoribus Russis per exiguum fretum in Americam his nuperimis annis institutus . Tandem si in nostras regiones plurima id genus animalia etiamnum hodie longius accersantur , quidni etiam fieri potuit eadem animalia in Americam fuisse advecta ? Huic ineptissimæ objectioni aliam adjungunt impietatis plenam ; divinam omni-

po-

436 INSTITUTIONES PHYSICÆ

potentiam calculis arithmeticeis metiri præsumunt, & fieri non posse ajunt ut atmosphæra universa in imbres etiam copiosissimos resoluta altiores montes attingat. Nihil certe audacius quam supremo aquarum rerumque omnium creatori limites præscribere & diluvii universalis facultatem adimere; *rupti sunt omnes fontes abyssi, cataraçtæ cæli apertæ sunt, & facta est pluvia super terram 40 diebus & 40 noctibus*. Genes. cap. 7. Verum quamvis divinæ vindictæ arcana scrutari non liceat; postquam Physicorum quorundam impietatem redarguimus, non abs re erit illorum quoque in rebus physicis imperitiam ostendere. Et quidem amplissimas regiones copiosissimis aquis per ipsas quoque rupium & montium fauces exundantibus devastatas fuisse certa fide traditum est. Tantam aquarum copiam comitabantur horrendi tonitrus & fulmina; atque hinc reddi potest effectuum illorum ratio, si nempe meminerimus tempestatum illarum causam ex atmosphærica subterraneaque materia electrica probabilissime repetendam esse. Si nempe inter ignem electricum in terræ gremio latentem & per universam quoque atmosphæram dispersum, maxime turbetur æquilibrium, non caret verisimilitudine ipsa rumpi montium latera, magnoque impetu aquas eructare, quod aliquando contigisse certum est. Hæc breviter dicta sint ut reprimatur Physicorum illorum superbia qui subterraneas aquas velut commentitias derident. Cæterum divina supplicia timemus, adoramus, sed explicare non præsumimus.

F I N I S.



99 966267

